


Xtiidx Dios



New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
fb4ebcb8-e1f4-5bfc-b08c-f590e137d86d

Contents

San Matew	1
San Marcw	44
San Lujc	72
San Juan	117
Ni been ree apóstoles	150
Gui'ch par ree bén Rom	191
Gui'ch yaløj par ree bén Corinto	209
Gui'ch barøj par ree bén Corinto	227
Gui'ch par ree bén Galacia	239
Gui'ch par ree bén Éfeso	245
Gui'ch par ree bén Filipos	251
Gui'ch par ree bén Colosas	255
1 Ts	259
2 Ts	263
Gui'ch yaløj par Timoteo	265
Gui'ch barøj par Timoteo	270
Gui'ch par Tito	274
Gui'ch par Filemón	277
Gui'ch par ree bén Hebreos	278
Gui'ch bacaa Santiaaw	292
Gui'ch yaløj bacaa San Pedr	297
Gui'ch barøj bacaa San Pedr	302
Gui'ch yaløj bacaa San Juan	305
Gui'ch barøj bacaa San Juan	310
Gui'ch bayon bacaa San Juan	311
Gui'ch bacaa San Judas	312
Ni balüü Jesucrist loj San Juan	314

Xtiidxza'c Jesucrist ni bacaa San Matew

Xdiaagulal Jesucrist

(Lc. 3:23-38)

¹ Guie zëed laj ree bën naj xdiaagulal Jesucrist, bën zëed ree loj xdiaa rey Davi në loj xdiaa Abraham.

² Abraham brier laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman.

³ Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram.

⁴ Aram gojc xdad Aminadab, Aminadab gojc xdad Naasón, Naasón gojc xdad Salmón.

⁵ Salmón gojc xdad Booz, guiáad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isai,

⁶ Isai gojc xdad rey Davi. Dxel rey Davi con bën goc lacheel Urías guyu xi'n reeman brier lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa.

⁸ Asa gojc xdad Josafat, Josafat gojc xdad Joram, Joram gojc xdad Uzías.

⁹ Uzías gojc xdad Jotam, Jotam gojc xdad Acáz, Acáz gojc xdad Ezequías.

¹⁰ Ezequías gojc xdad Mainán, Mainán gojc xdad Amón, Amón gojc xdad Josías.

¹¹ Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguuib.

¹² Chi ma barii reeman Babilonia lod guzu reeman zi'c bën yu' ladxguuib, gojl Salatiel, xdadaman gojc Jeconías. Dxel Salatiel gojc xdad Zorobabel.

¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor,

¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud,

¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob.

¹⁶ Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguuib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

Gojl Jesucrist

(Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman, ma naj gad reeman tia' lasa', guyu xi'n Li por xSprijt Dios.

¹⁹ Abi' Xiëb guiál najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi.

²⁰ Per la'tgaj cayüjnman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëedix.

²¹ Tijb xindoniguiaaw gac xi'n Li, yagu'l lajx “Jesús”, din por laax gra ree xbejn x gac perdon xtól.

²² Gra ree ni guie gojc persi guzobj xtiidx Dios zi'c gunee bën badëë xtiidxaman loj ree bejn, chi rëbaman:

²³ Tijb biinxdüb chu' xi'n, abi' chi galix grii lajx Emanuel, rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li,

²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobéz guin JESÚS.

2

Bignaj ree bën rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bën rajc, Jerusalén, laa reeman naj magos, za reeman niz oriente.

² Abi' gunabdiidx reeman, rëb reeman:

—¿Con xrey ree bën Israel, bën ma gojl? Din dunujn diizd duladxan baguiaan xbjalaman xanyabaa, zeel zio'pan din yazuxiban lojman.

³ Chi biguien rey Herodes zian, dád guyunawëëgaman, nëgajc gra ree bën Jerusalén guyunawëëg.

⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo.

⁵ Dxel rëb reeman:

—Belén naj galaman, tijb guiedx naaz Judea, din ze bacaa bën badëë xtiidx Dios loj ree bejn:

⁶ Lúj Belén, tijb guiedx naaz Judea, majsi guiedx dobëz najl loj gra ree guiedxro' naaz Judea. Per lasajquil din luguiedx Belén guin grii tijb bën nabee guiniaj tëëman da bën Israel reen.

⁷ Dxel ralanzi gurejdx rey Herodes bën rajc guin ree, persi gunabdiidxaman goc balüüloj bajl xanyabaa guin loj reeman.

⁸ Abi' guxhaalaman laa reeman Belén, rëbaman loj reeman: —Gol wej, gol bignabdiidxchaaw graczi xcwent xindobëz guin. Abi' chi yadxeljidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen.

¹⁰ Chi baguiaa reeman bajl guin, dád babaa reeman.

¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin.

¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree bën rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugjütaman laax.

¹⁴ Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto.

¹⁵ Ni guzu reeman xt güjt rey Herodes. Zian guzobj xtiidx Dios ni gunee bën badëë xtiidxaman loj ree bejn, chi rëbaman: “Babedx da xi'n'an Egipto.”

Gunabee Herodes guiët ree xindobëz

¹⁶ Chi gogbee Herodes guial basquiee ree bën rajc guin laaman, dád bidxe'chaman. Dxel gunabeeman guiët gra ree xindonigüiaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bën rajc guin guial ma gojc tio'p ijz ni baguiaa reeman bajl guin.

¹⁷ Zian gojc cumplid ni bacaa Jeremias, bën badëë xtiidx Dios loj ree bejn, chi rëbaman:

¹⁸ Biguien cha' tijb bejn guiedx Ramá, yu' guialroon në guialrbixdiaj, Raquelan cayoon por ree xi'nman, abi' ad rilet' chu gusquiejn laaman guial güjt ree xi'nman.

¹⁹ Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

²⁰ —Bixche, cwa' xindobëz guin con xniaax. Gol baguiaj niz Israel, din ma güjt ree bën guyën nugjüt laax.

²¹ Dxel bixche Xiëb cwa'man xindobëz guin con xniaax, bayejc reeman niz Israel.

²² Per chi gogbee Xiëb guial Arquelao, xi'n Herodes, naj bën canabee niz Judea, bidxe-baman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman.

²³ Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bën badëë xtiidx Dios loj ree bejn, guial grii laj Jesús bën Nazaret.

3

Diidx gunee Waj bën baroobnijs bejn ree

(Mr. 1:1-8; Lc. 3:1-9, 15-17; Jn. 1:19-28)

¹ Lën ree dxej ni bidxin Waj, bën baroobnijs bejn ree, loj yujbidx niz Judea catie'chaman xtiidx Dios.

² Rëbaman:

—Gol bayüjn xgab por xtolidi din ma zidyob xguialrniabee Dios.

³ Xcwent Waj guinan bacaa Isaías, bën badëë xtiidx Dios loj ree bejn, chi rëbaman: Rguien cha' tijb bën rbidxa' niz loj yujbidx, rëbaman: “Gol beenchaaw xnejz dux Dad ree Dios, gol guxhal tijb nejz nali.”

⁴ Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn.

⁵ Dxel bën Jerusalén ree në los demazri ree bën Judea nëtëë gra ree bën zojb gadëd ro' guiiw Jordán, brii reeman bicaagdiajg reeman ni rniee Waj.

⁶ Dxel guxhoobdol reeman, abi' baroobnijs Waj laa reeman loj guiiw Jordán guin.

⁷ Per chi baguiaa Waj zien ree bënfarisew në ree bénsaducew bidxin din tiobnijs reeman, rëbaman loj reeman:

—|Xi'n xindxab! ¿Chu bagojn lëjt din laadi loj castiro' ni zëëd?

⁸ Gol gubajn zagdxe din guiguien guial waliquidi ma bayüjndi xgab por xtolidi,

⁹ abi' ad bal rlies xvalorgajguidi, rëbidi: “Dunuyn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham.

¹⁰ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can.

¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp gualrniabee guial lon, abi' ni'qui xgurëchaman ad rayalt gaxhiecan.

¹² Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiaad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

Gurobnijs Jesús

(Mr: 1:9-11; Lc: 3:21-22)

¹³ Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman.

¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman.

¹⁶ Chi gulox guroobnijsaman, naabzi bariiman loj nijs guin, dxejzci bixal xanyabaa, abi' baguiaaman zidguiajt xSprijt Dios zi'c tijb palom xt guijcaman.

¹⁷ Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë' tëën.

4

Gojc Jesús prueb

(Mr: 1:12-13; Lc: 4:1-13)

¹ Dxel binë xSprijt Dios Jesús niz loj yujbidx, din güün xindxab laaman prueb.

² Ni guzuman tiuu dxej tiuu guiaal sin gualraw, dxel gulaanman.

³ Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guidahtil.

⁴ Per badxi' Jesús san rëbaman:

—Løj xtiidx Dios rëb: “Ad ganaxtizi guidahtil guiban bejn, nëgajc gra diidx rniee Dios.”

⁵ Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzii,

⁶ abi' rëbix lojman:

—Bal wali najl xi'n Dios, gudidya' diidz guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman

chitëë ladx ni'czi tijb guiaj guia'l.

⁷ Badxi' Jesús san, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree gualnaza'c yu' loj reen.

⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesús san, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

¹¹ Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

Rzuloj Jesús rtie'chaman xtiidx Dios niz Galilea

(Mr. 1:14-15; Lc. 4:14-15)

¹² Chi gogbee Jesús guial yu' Waj ladxguuib, bayejcaman Galilea.

¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabolón në Neftalí.

¹⁴ Zian gojc persi gojc cumplid ni bacaa Isaías, bën badëë xtiidx Dios loj ree bejn, chi rëbaman:

¹⁵ Bén Zabolón con ree bën Neftalí, në ree bën zobj gajxh ro' nijsdoo, nëtëë ree bën zobj xijch guiiw Jordán

con gra ree bën zobj niz Galilea, lod zobj ree bën ad najt bën Israel,

¹⁶ gra reeman gubajn loj xcaj.

Yan ma brii tijb biani par laa reeman,

abi' biani guin guxhal xquiarguejn ree bën ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëëd gajxh xguialrniabee Dios.

Rbejdx Jesús tajp ree bën gac xbejnman

(Mr. 1:16-20; Lc. 5:1-11)

¹⁸ La'tgaj caza Jesús gajxh ro' nijsdoo Galilea, baguiaaman Simón bën la gajc Bëd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman.

¹⁹ Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi bëjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman,

²² abi' basa'n reeman barcw guin con xdad reeman, dxel laa zinal gajc reeman laaman.

Rülüü Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjnman bën rdoob ree në gra ree bën rajc xhietëëz guialguidxan.

²⁴ Guidibczi niz Siria bire'ch xtiidx Jesús, abi' bidnë reeman bën cusagdiaj ree gadxagayaa ni mal në graloj ree guialguidx, bën yu' ree xindxab luxdoo, në ree bën rëjtya', nëtëë ree bën ad rilet' suli, abi' bayüjn Jesús laa reeman.

²⁵ Dád zien ree bejn binal laaman, bën Galilea ree, bën zëëd ree Decápolis, bën Jerusalén ree, bën zëëd ree niz Judea në ree bën zëëd stiblad ro' guiiw Jordán.

5

Ni baliüü Jesús tijb guijc guia'

¹ Chi baguiaa Jesús bën guixiuj ree, wë'paman tijb guijc guia' abi' gurejman, dxel gubig ree xbejnman lojman.

² Abi' guzuloj culüüman laa reeman, rëbaman:

Xiquilbaa ree bejn

(Lc. 6:20-23)

³ —Xiquilbaa ree bën ragbee guial ryaadx gagnë Dios laa reeman, din por zian yayal reeman lod rniabeeman.

⁴ Xiquilbaa ree bën yu'naya, din Dios yagu' luxdoo reeman zagdxë.

⁵ Xiquilbaa ree bën naj bën chaawladx, din laa reeman tia' guidxliuj ni rëb Dios gudëëdaman loj reeman.

⁶ Xiquilbaa ree bën rzajc zi'c chi rliiaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ Xiquilbaa ree bën raya lasa', din zian yaya Dios laa reeman.

⁸ 'Xiquilbaa ree bèn naya loj Dios, din laa reeman guguaiaa laaman.

⁹ 'Xiquilbaa ree bèn rüjn naguiejn cwedxenë lasa', din laa reeman grii laj xi'n Dios.

¹⁰ 'Xiquilbaa ree bèn cadëd loj guialzi por graloj ni rüjnnë bejn laa reeman guial cayüjn reeman zi'c rniabee Dios, din laa reeman yayaal lod rniabeeman.

¹¹ 'Xiquilbaadi, chi rüjnnë reeman lëjt xhiernarajc në chi rnieeguidx reeman lëjt nëtëë chi rudiix reeman guijquidi graczi, guial najdi da bejnan.

¹² Gol badxe' l uxdoodi nix, gol babaa tée din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bèn badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl

(Mr. 9:50; Lc. 14:34-35)

¹³ 'Lëjt naj zi'c zëd loj guidxliuj guie. Per bal id naxijran, çhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴ 'Lëjt naj zi'c tijb biani loj guidxliuj guie, naj téeëdi zi'c tijb guiedx ni riga' tijb guijc guia' abi' ad zajct guiguie'chan.

¹⁵ Ad ritiaguij téeë tijb guij par guida'cwan lën tijb yagalm, rtiaguijn persi rzojban ya din gusnin loj gra ree bën yu' lëñü.

¹⁶ Ziangajc lëjt, gol gojc zi'c biani loj ree bejn, din chi guguaiaa reeman ni zagdx cayüjndi guza't reeman xDadidi Dios zagdx bën yu' xanyabaa.

Rülüü Jesús xcwent ley

¹⁷ 'Ad naladxidi zialan par günan ley tibladi, ley ni badëë Dios loj Moisejs o ni balüü ree bèn badëë xtiidx Dios loj ree bejn, zialan par günanan cumplid.

¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac.

¹⁹ Zianan zeel bèn ad ruzoobt tijb mandamient ni zëëd loj ley guin majsi nidobëz naj mandamient guin, bal rülüü téeëman bejn ree güün reeman zian, laaman lasajc ta'nzi lod rniabee Dios. Per bèn ruzoob gra ree mandamient ni zëëd loj ley guin, rülüü téeëman bejn ree guzoob reeman laan, laaman naj mazri bèn lasajc lod rniabee Dios.

²⁰ Zeel naj rni lojdi, bal id zabajndi mazri zagdx guial loj ree mextr rajc ley në ree bënfarisew, ad zayaltidi lod rniabee Dios.

Rülüü Jesús xcwent guialrdxe'ch lasa'

(Lc. 12:57-59)

²¹ 'Lëjt ragbee guial rëb Dios loj ree xbéngualidi: "Ad gugüjtil bejn, din bèn gugüjt bejn yayalaman casti."

²² Per naj rni lojdi, chutëëz bèn rdxe'chnë lasa', yayalaman casti, në bèn rniee diidxguijdx lasa' xt loj guxtis zajc cheman, guiaad bèn rëb loj lasa' achet sirv lüj, laaman yayal loj bajl yu' gabijl.

²³ 'Zeel bal zinël gon lën yadoo abi' yagaj rusaaladxil guial yu' bèn rdxe'chil,

²⁴ basa'nsii xgonl yagaj, yalojxgaj babenë bèn rdxe'chil zagdx, dxel ma zile' yayejqul din gusa'n xgonl.

²⁵ 'Bal chu bèn rudëed lüj loj guxtis, baya'nnëman diidx zagdx la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguiib.

²⁶ Naj rni lüj, ad zariitil ladxguiib guin xtezi quixil gra ni na guxtis guin.

Rülüü Jesús xcwent guialrzunë lacheel ben ren

²⁷ 'Lëjt ragbee guial loj ley rëb: "Ad sunël lacheel ben ren."

²⁸ Per naj rni lëjt, chutëëz bèn rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

²⁹ 'Bal laagajc guiaaloj ladbeel rüjn din güünl dol, mazri zagdx naj gulëen bazaalan zijt. Din mazri zagdx naj nit tibladi guiaaloj luar che guidibil gabijl.

³⁰ Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdx naj nit tibladi yaal luar che guidibil gabijl.

Rülüü Jesús xcwent guial rala' lasa' bejn

(Mt. 19:9; Mr. 10:11-12; Lc. 16:18)

³¹ 'Ma bacaagdiaj téeëdi: "Chutëëz bèn rala' lacheel, rayal gudëëdaman gui'ch lojman guial ma bala' lasa' reeman."

³² Per naj rni lëjt: Xinguaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

Ad rayalt guza't xlia' bejn Dios

³³ Rëb tëë Dios loj ree xbéngulalidi: “Ad guza't xlia'di Dios, rayal güündi cumplid ni rëbidi gudëëdidi lojman.”

³⁴ Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zobj Dios,

³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladz rey mazri rniabee.

³⁶ Ad guza't tëë guijquidi par chililadx reeman lëjt, din ni'qui tijb guidxguijquidi ad zajet güündi ni ya's o ni naquich ya.

³⁷ Zagdxeli con gol güjdx “an” o “a'n”, din los demazri ree ni guinieedi loj xindxab zan.

Ad yadxi'di ni mal por ni mal

(Lc. 6:29-30)

³⁸ Lëjt ragbee guial loj ley rëb: “Bén cwëë guiaalolj, gulëë gajc guiaaloljman. Guiaad bén cwëë layil, gulëë gajc layaman.”

³⁹ Per naj rni lëjt: Ad yadxi'di ni mal por ni mal, bal chu chëëz xhajg ladbeedi, gol badëë stibladan chëëzaman.

⁴⁰ Bal chu bén tilë lüj din cwëëxuuman xmanguil, badëë në xchamarril tia'man.

⁴¹ Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro.

⁴² Chutëëz bén rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilán.

Guyën bén rdxe'ch lüj

(Lc. 6:27-28, 32-36)

⁴³ Ragbee tëëdi rëb ree bejn: “Guyën bén rën lüj, bidxe'ch tëë bén rdxe'ch lüj.”

⁴⁴ Per naj rni lojdi: Gol guyën bén rdxe'ch lëjt, gol gurejdx tëë Dios por ree bén rzunal lëjt, din güün reeman lëjt ni mal.

⁴⁵ Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bén naban zi'c rayal në par ree bén ad nabant zi'c rayal.

⁴⁶ Din bal rëndi ganaxzi bén rën lëjt, ¿xhieza tia'di loj Dios zian? Din xt bëndol ree rüjn zian.

⁴⁷ Abi' bal ganaxzi bén rëndi rugajpdiozidi, ¿xhieza ni zagdx cayüjndi? Din xt bén ad nünbeet ree Dios rüjn zian.

⁴⁸ Zeel gol gojc benza'c, zi'c naj xDadidi Dios bén yu' xanyabaa.

6

Xhienaag gagnë lasa' bejn

¹ Ad güündi ni zagdx nüz loj ree bejn naabzi par yadxalolj reeman lëjt. Din bal güündi zian, xDadidi Dios bén yu' xanyabaa achet guneeman lojdi.

² Zeel chi güünl yudar bén ryaadx xhienin, ad gutie'chil diidx par gagbee bejn xhie cayüjnl zi'c rüjn ree bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman.

³ Zeel chi güünl yudar bén ryaadx xhienin, ni'czi loj xmiwda'til ad gül diidx ni cayüjnl.

⁴ Mazri zagdx lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman guneë ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab reeman Dios lën ree yadoo në ree xquin nejz, din yadxalolj bejn laa reeman. Din naj rni lojdi, laazan naj ni rayal reeman.

⁶ Per lüj chí cwedx guiniabil Dios, bayu lëñü lidxil, basiaaw ro' port, dxel gurejdx gunab Dios bén za'në lüj. Abi' laaman cuguiaa ni cayüjn lüjzi, laaman guneë ni rayalil.

⁷ Chi rbejdx rniabidi Dios, ad radxi'di diidx guin guië'tzi guië't naabzi par gacxhie xtiidixidi, zi'c rüjn ree bén ad nünbeet Dios. Din laa reeman naladx guial zien ni rniece reeman mazri guidxga' Dios laa reeman.

⁸ Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan.

⁹ Zeel chí cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rënl loj guidxliuj zi'c rajc xanyabaa.

11 Banee ni yadaawan guixie guixie.

12 Been dunujn perdon gra ree ni mal ma baguieenan zi'c raguieenan perdon b́en ŕujn ree dunujn ni mal.

13 Ad guslaal dunujn yaguieenan dol, babéé dunujn loj gra ni mal.

14 'Din bal güündi perdon b́en ŕujn lějt ni mal, ziangajc xDadidi Dios b́en yu' xanyabaa źujn gajcaman perdon xtolidi.

15 Per bal id źujndi perdon b́en ŕujn ree lějt ni mal, ziangajc xDadidi Dios ad źujntaman lějt perdon.

Xcwent guialrba'n

16 'Chi rba'ndi ad güün lojdi naya, zi'c ŕujn ree b́en rusquiee din guguaa bejn guial naba'n reeman. Naj rni lojdi, guial laazan naj ni rayal reeman.

17 Per lúj, chi rba'nl, gudiib lojl gudújn t́éé guijquil

18 chit́éé gagbee ree bejn guial naba'nl. Tijbzi xDadil Dios b́en za'né lúj naj b́en gagbee laan, abi' laaman gunee lúj ni rayal tia'!

Guialnaza'c yu' xanyabaa

(Lc. 12:33-34)

19 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaaan cwan laa reen.

20 Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu t́éét xingubaaan cwan laa reen.

21 Lod gapil guialnaza'c guin yagaj su luxdool.

Guiaalój bejn naj zi'c biani

(Lc. 11:34-36)

22 'Guiaalój bejn naj zi'c tijb biani par xcuerpaman. Zeel bal cayújn! ni zagdxé, guidib xcuerpil rajp biani.

23 Per bal cayújn! ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

24 'Ad zile't chu güün sirv loj tio'p patron, din zadxe'chaman tijbaman abi' guiénman stíjbaman, o gacaman benza'c con tijbaman abi' ad zéntaman stíjbaman. Zeel ad zile't güündi sirv loj Dios né loj milia.

Achetczí rayal chu' bejn xgab

(Lc. 12:22-31)

25 'Naj rni lějt: Ad chu'di xgab por ni gawidi né por ni guié'di din guibandí, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman.

26 Gol baguúaa ree be rzuj xanyabaa, ad rxúbint reeb, ad rato'p t́éét reeb guialnaza'c, ad naj t́éét lod cu'chaaw reeb guialnaza'c guin. Per xDadidi Dios b́en yu' xanyabaa rudééd ni raw reeb. Abi' mazri lasajquidi guial loj reeb.

27 Abi' t́éé, ¿wen guial ru da'tidi xgab ma güün lějt mazri ziool ya?

28 '¿Chexquiza zeel dád rudi xgab por xabidi? Gol baguúaa xhienaag rni's ree guiaa dajn. Achet dxiin ŕujn reen ad rguib t́éét reen,

29 per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman.

30 Abi' bal gui'xh dajn ruzujchaaw Dios yan, majsi guixiezi che'can. Diidxgui lějt b́en ad riladxza'ct ree laaman, nid zuneeman ni gacwidi ya.

31 Zeel ad rudi xgab xhie gawidi, o xhie guié'di, o xhie gacwidi.

32 Din b́en ad núnbeet ree Dios ŕujn zian, laa reeman ru xgab por gra ree ni guin. Per lějt yu' xDadidi xanyabaa, abi' laaman ragbeechaaw xhienin ryaadxidi.

33 Per yaloxgaj gol baguúil güündi zi'c rniabee Dios, gol been t́éé zi'c ŕenman, dxel laaman gunee gra ree ni ryaadxidi.

34 Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

7

Xcwent guialrula'ch

(Lc. 6:37-38, 41-42)

1 'Ad gula'chidi bejn chit́éé saquidi zian.

² Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt.

³ Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi.

⁴ Abi' bal mazri falt narooob rajpidi, ζoxoza guiëbidi loj stijb bejn: “Ad laa naj ni rüjnl?”

⁵ jBën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: “Ad laa naj ni rüjnl.”

⁶ Ad güündi naguiejn güüncwënt ree bën ad rënt güüncwënt xtiidx Dios, chitëë xhie güünnë reeman lëjt. Din bal güündi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

Ni guiniabidi zaca'dan

(Lc. 11:9-13; 6:31)

⁷ Naj rni lëjt: Gol gunab loj Dios, abi' laaman gunee ni rniabidi. Gol baguuilaman, zadxejlidi laaman. Gol gurejdx gunabaman, züjncwëntaman lëjt.

⁸ Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwëntaman laaman.

⁹ Lëjt najdi dad, ζwen zudëëdi tijb guiaj loj xi'ndi ya chi guiniabix guiadxtil?,

¹⁰ ζo zudëëdi tijb bëel ya chi guiniabix bëjl?

¹¹ Nacli lëjt najdi bëndol rajc rudëëdi ni rën xi'ndi. jDiidxgui xDadidi bën yu' xanyabaa, nid zudëëdaman ni zagdxë loj ree bën rniab laan ya!

¹² Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

Port nadëë

(Lc. 13:24)

¹³ Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin.

¹⁴ Per port nadëë guin në nejz nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

Por ni rüjndi zayünbee ree bejn lëjt

(Lc. 6:43-44)

¹⁵ Gol gojp cudad con ree bën rusquiee rëb rudëëd reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn.

¹⁶ Per zayünbeedi laa reeman por ni rüjn reeman, din ad rtiat uv loj yaquiey ch ad rtia tëët higo loj gui'xh guiëjch.

¹⁷ Zeel gra yag zagdxë rtia ni zagdxë lojn. Guiáad gra yag guijdx rtia ni guijdx lojn.

¹⁸ Ad rtiat ni guijdx loj yag zagdxë, ad rtia tëët ni zagdxë loj yag guijdx.

¹⁹ Gra yag ad rtiat ni zagdxë, rirugan dxel re'can.

²⁰ Ziangajc lëjt zayünbeedi laa reeman por ni rüjn reeman.

Ad grat bejn chu' lod rniabee Dios

(Lc. 13:25-27)

²¹ Ad grat ree bën na lon: “Dad, Dad,” chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa.

²² Dxejzii, zien ree bën na lon: “Dad, Dad, por lüj batie'chan xtiidxil, abi' guial baza'tan lajl balëën xindxab ree luxdoo ree bejn, baguieen tëën zien ree milagr guial baza'tan lajl.”

²³ Dxel guiën loj reeman: “Ad benbeetzan lëjt, gol gubi'ca lon bëndol.”

Tio'p loj cimiant

(Lc. 6:47-49; Mr. 1:22)

²⁴ Chutëëz bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj.

²⁵ Abi' gol guia, dxel biguiajnt nijs ro' gubi' tëë bidoxh, gulaj reen lad yu guin, per ad gulenxantan guial naj xcimiantan loj guiaj.

²⁶ Per bën riguejn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx.

²⁷ Abi' chi gol guia biguiajnt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tilda'nan ad baya'nt.

²⁸ Chi gulox guneeën Jesús bën guin ree, graczi reeman badxa da't loj zi'c balüüman laa reeman,

²⁹ guial rulüüman laa reeman zi'c bën rajp guialrniabee, ad zi'c rulüüt ree mextr rajc ley.

8

Rayüjn Jesús tijb bén rajc guialguijdx la lepra

(Mr. 1:40-45; Lc. 5:12-16)

¹ Chi baza Jesús ruguia' guin, dád zien bejn nal laaman.

² Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman.

⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bén suldad rniabee ree suldad

(Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx,

⁶ rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bén rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan.

⁹ Din zi'c naj yu' ree bén rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, reyx, chi rën loj stijbix: “Guda”, ri'tix. Abi' chi rë loj da mojsan: “Been ni guin”, rüjnxan.

¹⁰ Chi biguejnj Jesús zian, dád badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén riladx Dios zi'c riladx Bén guin Dios.

¹¹ Naj rni lëjt, dád zien ree bén gralad yayal gawnë Abraham, në Isaac, në Jacob lod rniabee Dios.

¹² Guiáad ree bén rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

¹³ Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs Bén guin.

Rayüjn Jesús xnasuegr Bëd

(Mr. 1:29-31; Lc. 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa.

¹⁵ Dxel gunaazaman yaaman, abi' bariiman xliaa guin, dxel bixchewan guzulox cyaanman laa reeman.

Rayüjn Jesús zien ree bénragxu

(Mr. 1:32-34; Lc. 4:40-41)

¹⁶ Chi ma caxhin, binë ree bejn zien ree Bén yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo reeman, bayüjn tëëman gra ree Bénragxu.

¹⁷ Zian gojc persi gojc cumplid ni rëb Isaias, Bén badëë xtiidx Dios loj ree bejn, chi rëbaman: “Laaman zigné dux guialguijdx ree, laa tëëman zigné dux guialzi ree.”

Bén rën chinal Jesús

(Lc. 9:57-62)

¹⁸ Chi baguiaa Jesús bénguixuj nayaw laaman, gunabeeman tédaman stiblad ro' nijs naj yagaj.

¹⁹ Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëéz guin chel.

²⁰ Abi' rëb Jesús lojman:

—Béz ree yu' xbilaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

²¹ Dxel rëb stijb ree Bén zinal laaman:

—Dad, baslaa naj gabenè' da dadan xt chi guiètaman.

²² Per rëb Jesús lojman:

—Tanal naj, basa'nman con ree bën ad rënt guidnal naj, laa reeman guquie'ch laaman chi guiètaman.

Racwëëz Jesús bidoxh

(Mr. 4:35-41; Lc. 8:22-25)

²³ Guyu Jesús loj barcw con ree xbejnman,

²⁴ abi' la'tgaj zë reeman loj nijs guin dxejlczi gubi' tijb bidoxh, ma cazëëbczi barcw guin xan nijs. Per Jesús naga'yëjsaman.

²⁵ Dxel bicwëën ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad rliadxza'ctidi naj?

Dxel bixchewan abi' gunabeeman bacwëëz bi guin në nijs guin. Loj hor ziigajc babedxe reen.

²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bën guin, zeel xt bi në nijs ruzoob xtiidxaman?

Tio'p ree bën yu' xindxab luxdoo

(Mr. 5:1-20; Lc. 8:26-39)

²⁸ Chi bidxin Jesús stiblad ro' nijs guin, loj xguidxliuj ree bën Gadara, dxel tio'p ree xinguaaw yu' xindxab luxdoo brii reex lad ree baa abi' wej reex loj Jesús. Dád nadoxh reex, zeel ad rile't chu téd lunejz guin.

²⁹ Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cüch, cayaw reeb,

³¹ abi' guzajc ree xindxab guin liaadx loj Jesús, rëb reex:

—Bal yabëël dunujn, baneë mod yadxu'n lën ree cüch guin.

³² Dxel rëb Jesús:

—Gol wej,

Dxel barii ree xindxab guin luxdoo ree bën guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

³³ Abi' ree bën cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bën yu' ree xindxab guin luxdoo.

³⁴ Dxel gra ree bën guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayüjn Jesús bën nëjt xcuerp

(Mr. 2:1-12; Lc. 5:17-26)

¹ Dxel bayu Jesús loj tijb barcw, badëdaman stiblad ro' nijs guin abi' badxin ladxaman.

² Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliadx reeman laaman, rëbaman loj xin ragxuu guin:

—Bagu' luxdool zagdxe, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.”

⁴ Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal?

⁵ ¿Chonin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”?

⁶ Per yan, gulün lëjt guial naj, Bën guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidxix.

⁸ Chi baguiaa ree bën guin zian, bidxeb reeman, abi' baza't reeman Dios zagdxe por guialrniabee ni badëëman loj ree bejn.

Rbejdx Jesús Matew

(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bën ruquijx impuest në ree bën zëëb xtiidx ad nabant xnejz, gra reeman zojbnë Jesús xan mex con ree xbejnman.

¹¹ Chi baguiaa ree bënfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bën ruquijx ree impuest në ree bëndol?

¹² Chi biguejñ Jesús ni rëb reeman, dxel rëbaman:

—Bënnadaan ree ad ryaadxt reeman doctor, bënragxuu ree laa reeman ryaadx doctor.

¹³ Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree bëndol, din yayüjn reeman xgab por xtol reeman.

Rniabdiidx reeman loj Jesús xcwent gualrba'n

(Mr: 2:18-22; Lc: 5:33-39)

¹⁴ Dxel ree xbejn Waj, bën baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujñ con ree bënfarisew dád zientvolt raba'n'an, guiáad ree xbejn ad rba'nt reeman?

¹⁵ Badxi' Jesúsán rëbaman:

—Lod yu' gualruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

¹⁶ 'Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin.

¹⁷ Ad rgu' tëët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

Bayajc xi'n Jairo në bëngunaa bagaal xab Jesús

(Mr: 5:21-43; Lc: 8:40-56)

¹⁸ La'tgaj canee Jesús zian, bidxin tijb bën rniabee lën xyadoo ree bën Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

¹⁹ Dxel zinë Jesús laaman con ree xbejn Jesús.

²⁰ Abi' tijb bëngunaa ragxuu ma gojc chiptio'p ijz ad rbëzt ryajbaman rejñ, gubigaman niz xijch Jesús abi' bagaalaman guia' xabaman,

²¹ guial gunaladxaman: “Bal gugaalaman majsi xabzaman, zayajcaman.”

²² Per badxi' loj Jesús, abi' baguiaadxijchaman bëngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bën guin.

²³ Chi bidxin Jesús lidx bën rniabee guin, baguiaaman ma riga' ree xinrucwejdñ din chiquie'ch reex xi'nman, abi' ree bejn roon rbixdiaj reeman guijquim.

²⁴ Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman.

²⁵ Chi ma barii reeman, zianz guyuman. Gunaazaman yaa bindo guin dxel bixchem.

²⁶ Abi' guidib niz yagaj bire'ch diidx ni goc.

Rayüjn Jesús tio'p bënlutia'p

²⁷ Chi baza Jesús yagaj, binal tio'p bënlutia'p laaman, rbixdiaj reeman, rëb reeman:

—¡Jesús, xdiáa Davi, baya dunujñ!

²⁸ Chi badxin Jesús lod zojbaman, dxel bibig ree bën guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaløj reeman, rëbaman:

—Gac zi'c rliladxidi.

³⁰ Abi' bayajc guiaaløj reeman, dxel rëb Jesús loj reeman:

—Ad bal chu loj guiëbidi guial bayajc guiaaløjdi.

³¹ Per naabzi baza reeman yagaj, guzuløj catie'ch reeman diidx guidib niz yagaj ni been Jesús.

Rayüjn Jesús tijb bengop

³² Chi baza ree bén bayüjn Jesús guiaaloj, dxel bidxinnë ree bejn tijb bengop, yu' xindxab luxdooman.

³³ Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

³⁴ Per ree bénfarisew rëb reeman:

—Bén guin rabëë xindxab luxdoo ree bejn por xguialrniabee gajc xindxab rniabee ree xindxab.

Raya Jesús bejn ree

³⁵ Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn.

³⁶ Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt.

³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bén gulüü laa reeman yu'.

³⁸ Zeel gol gunab loj Dios din guixhiaalaman mazri ree bén gulüü laa reeman.

10*Gulej Jesús chiptio'p ree apóstoles*

(Mr. 3:13-19; Lc. 6:12-16)

¹ Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

² Bén guie ree naj guidxiptio'p ree xi apóstoles Jesús: Simón bén gulëëljaman Béd, con bijchaman Andrejs, në Jacob con Waj, bén naj ree xi'n Zebedeo.

³ Në Felip, Tol, Tumajs con Matew bén baquijx impuest, nëtëë Jacob xi'n Alfeo con Lebeo bén la gajc Tadeo

⁴ në Simón bén bi'ch loj ree bén Cananistas con Judas Iscariote bén yayü Jesús.

Rxhiaal Jesús gra ree xbejnman chigliüü reeman xtiidx Dios

(Mr. 6:7-13; Lc. 9:1-6)

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zobj ree bén ad najt bén Israel, ni'qui ree guiedx riga' niz Samaria,

⁶ gol chejli niz lod zobj ree bén Israel bén ad zinalt ree xnejz Dios.

⁷ Gol güjdx loj reeman guial ma zëëd gajxh xguialrniabee Dios.

⁸ Gol bayüjn bénragxuu ree, gol basban bén ma güjt ree, gol bayüjn bén rajc ree guialguijdx la lepra, gol babëë tëë xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

⁹ Ad chinëdi or, ni'qui plajt, ni'qui cobr,

¹⁰ ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagriadxidi, din bén rüjn dxiin rayal gudëëd ree bejn ni gawaman.

¹¹ Chi guidxindi tijb guiedx o tijb ciuda, gol gule'c ruson chu bén naj benza'c yaya'ndi lidx, yagaj gol baya'n xt chi yazadi luguedx guin.

¹² Abi' chi chu'di lënu guin, gol güjdx loj ree bén zobj yagaj: “Yabe'cdxe Dios luxdoodi.”

¹³ Bal rayal reeman guialnaza'c guin, zaya'nan con laa reeman guíaad bal id rayal reeman laan zayejcan con lëjt.

¹⁴ Guíaad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi.

¹⁵ Naj rni lëjt guial dxej ni yadëëd ree bejn cwent loj Dios, mazri casti narooob yayal reeman guial loj ree bén Sodoma në Gomorra.

Guialzi ni zëëd

¹⁶ Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tëë nadoo zi'c palom.

¹⁷ Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo.

¹⁸ Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bén ad zinalt xnejz Dios.

¹⁹ Per chi chiné reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx ni guinieedi.

²⁰ Din ad lëjttan guinee, xSprijt xDadidi Diosan guinee por lëjt.

²¹ 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman.

²² Gra bénguidxliuj guidxe'ch lëjt guial najdi da bejnan, per bën sudxi'ch loj guial rililadxaman naj xt dxej chigra guibanman, laaman yayal xanyabaa.

²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

²⁴ 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx.

²⁵ Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëlay ree bejn naj Beelzebú, diidxgui lëjt najdi da bejnan.

*Chu rayal guidxeb bejn
(Lc. 12:2-9)*

²⁶ 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn.

²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn.

²⁸ Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ 'Lëjt ragbee guial biguijndoo ree ad lasajc reeb wayëjx, per ni'qui tijb reeb ad zëjtt sin xpermis xDadidi Dios.

³⁰ Guiáad lëjt xt guidxgujquidi graczan nayab loj Dios.

³¹ Zeel ad rdxebidi din mazri lasajquidi guial loj zien da't ree biguijndoo.

*Bën rëb loj ree bejn guial najman xbejn Jesucrist
(Lc. 12:8-9)*

³² 'Bén guiëb niz loj ree bejn guial da bejnanan, ziangajc naj guië loj da Dadan Dios bën yu' xanyabaa guial da bejnanan.

³³ Per bën guiëb niz loj ree bejn guial ad da bejntanan, ziangajc guië loj da Dadan Dios bën yu' xanyabaa guial ad da bejntanan.

*Por Jesús rlia' lasa' ree bejn
(Lc. 12:51-53; 14:26-27)*

³⁴ Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl.

³⁵ Din guial chililadx bejn naj, zadxe'ch xinguaaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim.

³⁶ Abi' laagajc bën zobj ree lënülixidi guidxe'ch lëjt.

³⁷ 'Bén rën xdad o xniaa mazczi guial lon, ad zajct gacaman da bejnan. Ziangajc bën rën xi'ngaan o xi'ndxa'p mazczi guial lon, ad zajct gacaman da bejnan.

³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan.

³⁹ Bén rnijachi' guialnaban rajpaman loj guidxliuj guie, zadxin dxej gunijtaman laan, per bën guiët por naj, zajpaman guialnaban tiblayaa con Dios.

*Ni tia' ree bejn
(Mr. 9:41)*

⁴⁰ 'Bén ridxga' lëjt, najn ridxga'man, guiáad bën ridxga' naj, bën guxhaal najn ridxga'man.

⁴¹ Bén ridxga' tijb bën rudëë xtiidx Dios loj ree bejn, guial zëëdaman por Dios, zaca'man lasa' ni rayal tia' bën guin loj Dios. Ziangajc bën ridxga' tijb bën naban zi'c rën Dios, zaca'man lasa' ni rayal tia' bën guin loj Dios.

⁴² Abi' chutëëz bën gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

11

*Bigneenë ree xbejn Waj Jesús
(Lc. 7:18-35)*

¹ Chi gulox rëb Jesús loj guidxiptio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

² Abi' Waj, la'tgaj yu'man ladxguiib, cwa'man ruson gra ree ni cayün Jesús. Dxel guxhaal tio'p choon ree xbejnman,

³ bignabdiidx reeman lojman, rëb reeman:

—¿Lüj naj Cristo ya bën naj gui't, o yalëznan ben ren ya?

⁴ Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi.

⁵ Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree bën rajc guialgüjdx la lepra, ma riguejn ree bën nacwa't guiaad ree bengüt ma baban reeman, abi' ree bënprob ma caguejn reeman xtiidx Dios.

⁶ Xiquilbaa ree bën ad zucwëëzt chililadx naj.

⁷ Chi baza ree bën guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bën biquiaadi loj yujbidx? ¿Naladxidi ya najman zi'c tijb biqui ni runiib bi?

⁸ ¿O xhienaag naj bën biquiaadi? ¿Najman tijb bën najcw lajd zagdxe ya? Lëjt ragbee guial bën rajcw ree lajd zagdxe lën palas zobj reeman.

⁹ ¿Chuza biquiaadi? ¿Tijb bën rudëë xtiidx Dios loj ree bejn ya? Per naj rni lojdi guial biquiaadi tijb bën mazri zobjloj guial loj bën rudëëd xtiidx Dios loj ree bejn.

¹⁰ Wajn din laaman naj ben ruza't loj xtiidx Dios lod rëb:

Naj rxhial tijb bën ned lojl,
ben güünchaaw xnejzil.

¹¹ Naj rni lëjt, loj graczi ree bénguidxliuj, ad wayut bën mazri zobjloj guial loj Waj. Per majsi zian, bën ad zobjlojt loj xguialrniabee Dios, laaman mazri zobjloj guial loj Waj.

¹² "Diizd chi bi't Waj xt yan, zien bejn rünj da't naguejn chu' lod rniabee Dios. Abi' ree bën rünj da't naguejn laa reeman chu' lod rniabeeman.

¹³ Diizd ley badëë Dios loj Moisejs con loj ree bën badëë xtiidx Dios loj ree bejn, xt Waj, laa reeman gunee xcwent xguialrniabee Dios.

¹⁴ Abi' bal chililadxidi ni ganin lëjt, naj rni guial Wajn naj Elias bën badëë xtiidx Dios loj ree bejn.

¹⁵ Bën rën ree gucaagdiajg, gol bacaagdiajg.

¹⁶ ¿Xhienaag ganin lëjt naj ree bën riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex:

¹⁷ "Bacwejdyan bidxa, per ad baya'tidi, badoolan ni naya ree per ad biintidi."

¹⁸ Din bi't Waj bën baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdooman.

¹⁹ Yan, bi't Bën guxhaal Dios, rawaman rë' tëëman vin abi' rëbidi nalaman ruladx tëëman guië'man, ruchajg tëëman bëndol ree con ree bën ruquijx impuest. Per ree bën ma ca' xguialrniabee Dios, por laa reeman rguien guial gra ni rünj Dios naj zagdxe.

Bën ad bazoobt ree xtiidx Dios

(Lc. 10:13-15)

²⁰ Dxel guzuloj Jesús cadilëman bën zobj ree guiedx lod beenman mazri zien ree milagr. Din bën guin ree ad bayünj reeman xgab por xtol reeman, abi' rëbaman loj reeman:

²¹ —¿Probza lëjt bën Corazín! ¿Probza lëjt bën Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayünj reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayünj reeman xgab por xtol reeman.

²² Per rnin lëjt guial dxej yadëëd ree bejn cwent loj Dios, mazri casti narooob yayalidi guial loj ree bën Tiro në ree bën Sidón.

²³ Guiaad lëjt bën Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin.

²⁴ Per rnin lojdi guial dxej yadëëd ree bejn cwent loj Dios, mazri casti narooob yayalidi guial loj ree bën Sodoma.

Gol guda lon din yaziiladxidi

(Lc. 10:21-22)

²⁵ Lën ree dxejzii rëb Jesús:

—Dad, ruzatan lüj zagdxe, din ni baquie'chil loj ree bën rajc në loj ree bën rignia', laan ma balüül loj ree bën ad rajct.

²⁶ Zian gojc Dad, din zian guyënl.

²⁷ Da Dadan bane gra lon. Abi' achut nünbee Jesucrist xi'n Dios, tijbzi Dios, achu tēēt nünbee Dios, tijbzi Jesucrist xi'nman, con ree bēn rēnman güünbee Dios.

²⁸ Gradi, bēn ma badxag rüjn xhienin din yaya'ndi zagdxe loj Dios, ma badxag tēēdi nüü xtolidi. Gol guda lon, naj gune guialraziiladx lojdi.

²⁹ Gol bazoob da diidxan, gol basiid tēē gaquidi benza'c nē bēn chaawlaxd zi'c naj, din yabedxe luxdoodi loj Dios.

³⁰ Din ad nawēēgt guial guzoobidi da diidxan, ad nawēēg tēēt guial güündi zi'c rēnan.

12

Rgui'ch ree xbejn Jesús trigo dxej raziiladx ree bēn Israel

(Mr. 2:23-28; Lc. 6:1-5)

¹ Tijb dxej raziiladx ree bejn, chi cadēd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan.

² Abi' chi baguiaa ree bēnfarisew ni cayüjn reeman, rēb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

³ Dxel rēb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

⁴ Guyu Davi lēn xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen.

⁵ ¿O gadidi gool loj xley Moisejs ya guial achet dol rüjn ree bixhioz chi rüjn reeman dxiin lēn yadoo majsi ad raziiladxt reeman dxej raziiladx ree bejn?

⁶ Abi' naj rni lējt guial naj, bēn za'nē lējt mazri lasajcan guial loj yadoo.

⁷ Bal rignia'di xhie rēn guiēb loj xtiidx Dios lod rēb: “Ni rēnan naj guial yaya lasa'di, ad guial guneetidi gon lon.” Bal rignia'di diidx guin ree ad zudxiibtidi guiyc ree bēn ad rajpt dol.

⁸ Abi' Bēn guxhaal Dios rajpaman gualrniabee dxej raziiladx ree bejn.

Rayajc tijb bēn nējt tibladyaa

(Mr. 3:1-6; Lc. 6:6-11)

⁹ Chi gudēd gojc zian, dxel baza Jesús abi' guyuman lēn tijb yadoo naj niz yagaj.

¹⁰ Lēn yadoo guin za' tijb bēn nējt tibladyaa. Abi' guial ree bēnfarisew raguuil reeman mod xhie gudxiib reeman guiyc Jesús, dxel gunabdiidx reeman lojman, rēb reeman:

—¿Zile' yayüjn bejn tijb bēnragxuu dxej raziiladx bejn ya?

¹¹ Badxi' Jesúsán rēbaman:

—Bal tijb lējt rajp tijb xiil, abi' yabib lēn bala' dxej raziiladx bejn. ¿Nid zabēēdi laab dxej guin ya?

¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxe dxej raziiladx bejn.

¹³ Dxel rēb Jesús loj bēnragxuu yaa guin:

—Basli yaal.

Abi' basli yaa bēn guin, loj hor ziigajc bayajc yaaman zi'c naj stibladan.

¹⁴ Per chi barii ree bēnfarisew guin lēn yadoo guin, guzuloj cayü reeman diidx xhienaag güün reeman din gugüjt reeman Jesús.

Bēn gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bēnragxuu,

¹⁶ abi' gunabeeman laa reeman chitēē guitie'ch reeman diidx chu bayüjn laa reeman.

¹⁷ Zian guzojb xtiidx Isaías, bēn badēē xtiidx Dios loj ree bejn, chi rēbaman:

¹⁸ Gol baguiaa, bēn guie naj bēn gulen

din güünman naj sirv,

laaman naj bēn rēn da'tan,

rabaanē' tēēn laaman.

Gudē da Sprijtan lojman

abi' guiēbaman loj ree bēnguidxliuj

xhienaag naj da gualrniabeen.

¹⁹ Achut tilnēman,

ad zabixdiaj tēētaman

achut tēēt guien cha'man niz lunejz.

²⁰ Ad zudēētaman casti bēn ad za'dxi'cht

ree loj da nejzan, nē ree bēn ad ridxga'za'ct naj,

xt chi ma beenman gan gac guialguxtis.

²¹ Abi' xt ree b́en ad najt b́en Israel
cwéz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú
(Mr. 3:19-30; Lc. 11:14-23; 12:10)*

²² Binë ree bejn tijb xinguaaw lod za' Jesús, yu' xindxab luxdoox, natia'p lojx naj tēëx
gop. Dxel bayüjn Jesús laax abi' guzuloj rnieex ruguaa tēëx.

²³ Graczi ree bejn dád badxaloj reeman, abi' rëb reeman:

—¿Id b́en guinan zëëd loj xdiaa Davi ya?

²⁴ Chi bigueijn ree b́enfarisew zian, dxel rëb reeman:

—B́en guin rabëë xindxab luxdoo ree bejn por xguialrniabee Beelzebú xin rniabee ree xindxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman.

²⁶ Ziangajc bal xindxab su contr laagajquix, nayob nitix.

²⁷ Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuzá rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi.

²⁸ Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

²⁹ 'Din ¿xhieza naag chu' tijb bejn lidx tijb b́en gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

³⁰ 'B́en ad za't con naj, za'man contr naj. Guiáad b́en ad ruto'pt bejn par naj, rtie'chaman laa reeman.

³¹ 'Zeel rnin lëjt: Züjn Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon b́en rnieeguijdx ree xSprijt Dios.

³² Chutëëz b́en guinieeguijdx B́en guxhaal Dios, zajcaman perdon, per b́en guinieeguijdx xSprijt Dios ad zajtaman perdon yan, ni'qui chi yaguialan.

*Nünbee bejn tijb yag por ni rtia lojn
(Lc. 6:43-45)*

³³ 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn.

³⁴ ¡xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman.

³⁵ Benza'c rnieeman diidxza'c, din laan yu' luxdooan. Guiáad benmal rnieeman diidxmal din laan yu' luxdooan.

³⁶ Per naj rni lëjt guial dxej ni güün xguialguxtis Dios, gra ree bejn yadëëd cwent lojman por gra ree diidxguijdx ni rniee reeman.

³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

*Rniab ree b́enfarisew tijb milagr
(Mr. 8:12; Lc. 11:29-32)*

³⁸ Yu' ree b́enfarisew con ree mextr ni rajc ley, rëb loj Jesús:

—Mextr, rayënan yaguaan güünl tijb milagr.

³⁹ Badxi' Jesúsán rëbaman:

—Lëjt benmal, b́en ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás b́en badëë xtiidx Dios loj ree bejn.

⁴⁰ Din zi'c guyu Jonás lën bëjl narooob choon dxej choon guiaal, ziangajc B́en guxhaal Dios, choon dxej choon guiaal chu'man lën baa.

⁴¹ Abi' chi yadëëd ree bejn cwent loj Dios, b́en guban ree Nínive zaban reeman abi' guiëb reeman guial ree b́en riga' yan, yayal reeman xcasti Dios. Din b́en Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, b́en za'në lëjt mazri lasajcaman guial loj Jonás.

⁴² Ziangajc b́en goc reina niz sur, zabanman chi yadëëd ree bejn cwent loj Dios, dxel guiëbaman guial ree b́en riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, b́en za'në lëjt mazri lasajcan guial loj Salomón.

*Xindxab ni rayejc
(Lc. 11:24-26)*

⁴³ Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix:

⁴⁴ "Zagdxeli yaye'can lod guzaan." Abi' chi rayejquix ruguiaax luxdoo bén guin najn zi'c tijb lénü lod achut zobj, lod bilioob lod najcchaaw tée.

⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bén guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

Xniaa Jesús con ree bijchaman
(Mr: 3:31-35; Lc: 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman.

⁴⁷ Abi' yu' tijb bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidx bén guin rëbaman:

—¿Chu naj da nan chu tée ree nin naj da bichan?

⁴⁹ Dxel con yaaman balüü ree xbejnman rëbaman:

—Bén guie ree naj da nan në ree da bichan.

⁵⁰ Din chutëéz bén rüjn zi'c rën da Dadan bén yu' xanyabaa, laaman naj da bichan, da zanan, në da nan.

13

Xcwent Bén rtie'ch bin
(Mr: 4:1-9; Lc: 8:4-8)

¹ Dxejzii brii Jesús yu lod zobjaman, bisobaman ro' nijs Galilea.

² Abi' guial dád zien ree bejn bido'p yagaj, beeanan naguiejn wë'p Jesús loj tijb barcw dxel gurejman lojn, guiáad ree bén guin za' reeman ro' nijs guin.

³ Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman.

⁴ Chi catie'chaman bin guin, ta'nan biajb loj nejz, abi' bi't ree biguijn gudaw reeb laan.

⁵ Sta'nan biajb loj ree guiaj lod ad riga't zien yuj, cari gulejnan guial ad zient yuj riga'.

⁶ Per chi brii gubidjx, baze'can laan, abi' guial ad yu't liujn gubidjan.

⁷ Dxel sta'nan biajb loj ree yaquiejch, chi guni's ree yaquiejch guin banidloj reen laan.

⁸ Per sta'nan biajb loj yuj za'c, abi' dád gojcan. Yu'n cwa tûbgayuu bin loj, yu'n cwa gayojn yu' tée'n cwa gajlbichii.

⁹ Bén rën gucaagdiajg, gol bacaagdiajg.

Chexc zeel ruluü Jesús con ni naj ree zi'c cwent
(Mr: 4:10-12; Lc: 8:9-10)

¹⁰ Dxel gubig ree xbejn Jesús lojman rëb reeman:

—¿Chexquiza zeel ruluü bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman, per bén guin ree ad basa'nt Dios laa reeman chignia' reeman laan.

¹² Din Bén ma rignia', gusnuu chignia'man mazri, abi' zignia' da'taman. Per bén ad rignia'za'ct ad rüjn tée'taman naguiejn chignia'man mazri, xt ta'n ni rignia'man zayanladxaman.

¹³ Zeel rnienë'n laa reeman con ganaxzi zi'c cwent ree. Din majsi rani loj reeman per rüjn reeman zi'c bén ad ruguiaat, abi' majsi rigueijn reeman per rüjn reeman zi'c bén ad rigueijnt, bén ad rignia' tée't.

¹⁴ Zian rzojb xtiidx Isaías, bén badëë xtiidx Dios loj ree bejn, chi rëbaman:

Majsi rigueijn reeman, per achetzi chignia' reeman.

Abi' majsi rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tée guiaaloj reeman.

Chitëë guguaa reeman,

guiguiejn reeman,

chignia' tée reeman.

Din ad rënt reeman gui't reeman lon din gūnan laa reeman perdon.

¹⁶ Per xiquilbaadi cuguaadi cuguiejn tée'di.

¹⁷ Din naj rni lojdi guial dád zien ree bédëé xtiidx Dios loj ree bejn, në ree bèn guban zi'c rayal, guyën reeman nuguaia reeman ni cuguaiaadi per ad baguaiaat reeman laan. Guyën reeman niguiejn reeman ni caguiejn di per ad biguiejnt reeman laan.

Rusignia' Jesús xcwent bèn rtie'ch bin

(Mr. 4:13-20; Lc. 8:11-15)

¹⁸ Yan gol bacaagdiajg xhie rën guiëb ni rnin lojdi xcwent bèn bigtie'ch bin.

¹⁹ Bén riguejn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman.

²⁰ Guiáad bin biajb loj ree guiaj naj zi'c bèn riguejn xtiidx Dios, abi' dád nix ru luxdooman riguejnman laan,

²¹ Per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni riladxaman.

²² Abi' bin biajb loj ree yaquie'ch naj zi'c bèn riguejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëéz rucaagdiajgaman xtiidx Dios achet sirv been ni bacaagdiajgaman.

²³ Per bin biajb loj yuj za'c naj zi'c bèn riguejn xtiidx Dios abi' rignia'man laan rünj tēeman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bèn badxe' ganax bin zagdxe loj xguiniaa.

²⁵ Per la'tgaj naga'yëjs gra reeman, bidxin bèn rdxe'ch laaman guxübinman gui'xhguijdx ree loj trigo guin dxel ziaman.

²⁶ Abi' chi gulen trigo guin brii tēē dojn lojn në ree gui'xh guin ma yu' lojn.

²⁷ Dxel bicojn ree xmojs bèn naj xguiniaa laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?”

²⁸ Badxi'man laan rëbaman: “Wed tijb bèn rdxe'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?”

²⁹ Dxel rëbaman loj reeman: “Yajqui, chitëe guial gaxhidi gui'xh guin gaxhidi në trigo guin.

³⁰ Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bèn guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman.

³² Abi' bin guin naj mazri ni wit loj gra ree bin, per chi rni'san laan rajc mazri ni narooob loj gra ree cwaan. Abi' guial narooob da't rajcan, xt rünj xguixbitia's ree biguijn xidxan.

Xcwent levadur

(Lc. 13:20-21)

³³ Be tēe Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

Chexc zeel ruliüü Jesús con ni naj ree zi'c cwent

(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent.

³⁵ Zian gojc persi guzojb xtiidx bèn badëé xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiix reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

³⁷ Badxi' Jesús an rëbaman:

—Bèn rudxe' bin zagdxe guin naj Bén guxhaal Dios,

³⁸ abi' guiniaa guin naj guidxliuj. Guiáad bin zagdxe guin naj ree bèn naj par loj xguialrniabee Dios. Abi' ree gui'xh guin naj bèn naj ree par xindxab.

³⁹ Guiáad bèn rdxe'ch, bèn guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bèn yato'p guialnaza'c guin naj ree xianjl Dios.

⁴⁰ Zian zi'c rado'p ree gui'xhgüjdx guin par che'c reen, zian gac chi nit guidxliuj.

⁴¹ Bèn guxhaal Dios guixhiaal ree xianjlanan din yabëë reeman bèn rayal ree yarii loj xguialrniabeeman, bèn ruzaalguiw bejn ree din güün reeman dol në gra ree bèn cayüjn dol.

⁴² Abi' guzaal reeman laa reeman loj bajl lod goon reeman xt gaw lay reeman.

⁴³ Dxel bèn naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bèn rën gucaagdiajg, gol bacaagdiajg.

Xcwent ni lasajc

⁴⁴ Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëeman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ Rni tëen lëjt: Xguialrniabee Dios naj zi'c tijb bèn rguuil perl zagdxe din siiman laan.

⁴⁶ Chi rdxejlanan tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ 'Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazan ghaloj bëjl.

⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman.

⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c.

⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bèn rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bèn rbe nicüb në ni yojx loj gra ni rajpaman.

Badxin Jesús Nazaret

(Mr: 6:1-6; Lc: 4:16-30)

⁵³ Chi gulox gunee Jesús loj reeman zian, zianz bazaman.

⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloy ree bèn guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rünman milagr ree?

⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas?

⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëëz guin rajp ree bejn respetj tijb bèn rudëë xtiidx Dios loj ree bejn, per ladxaman achut rajp laaman respetj ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Güjt Waj Bèn baroobnijs bejn ree

(Mr: 6:14-29; Lc: 9:7-9)

¹ Tiampzii Herodes bèn canabee niz Galilea, biguejnman ni cayüjn Jesús.

² Abi' rëbaman loj ree xbejnman:

—Waj bèn baroobnijs bejn ree, laaman baban zatijb, zeel rajpaman guialrniabee rünman milagr ree.

³ Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bèn la Filip,

⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyën Herodes nugÿjtaman Waj, per bidxebaman xhie nÿjn ree bejn laaman guial graczi reeman rëb Waj naj tijb bën rudëéd xtiidx Dios loj ree bejn.

⁶ Per chi baza' Herodes ijz, brieri xi'n Herodías baya'm loj ree xbioozaman. Abi' dád bayuladx Herodes zi'c baya'm,

⁷ dxel rëb Herodes gudëédaman xhietëez ni guiniabim.

⁸ Abi' xniaam rëb lojm xhie guiniabim, dxel rëbim loj Herodes:

—Banee guijc Waj bën ruroobnijs bejn ree, baneen loj tijb pliajt.

⁹ Dád gyyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuladadaman gudëéd reeman ni gunabim.

¹⁰ Dxel gunabeeman gütü' reeman guijc Waj lën ladxguiib guin,

¹¹ abi' bidxinnë reeman laan loj tijb pliajt badëéd reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn

(Mr. 6:30-44; Lc. 9:10-17; Jn. 6:1-14)

¹³ Chi gogbee Jesús zian, gyyuman loj tijb barcw zëman niz lod achutczzi zojb din su laazaman. Chi gogbee ree bejn, dxel brieri ladx reeman zë guia'zi reeman lod guidxinman.

¹⁴ Chi barii Jesús loj barcw guin baguiaaman bën guixiuj ree riga' yagaj, bayaman laa reeman abi' bayÿjnman bënragxuu zinë reeman.

¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bën guin ma gojl yaguiaj reeman, din che reeman guiedx lod sii ni gaw reeman.

¹⁶ Per badxi' Jesús an rëbaman:

—Ad rÿjnt naguiejn yaguiaj reeman, lëjt gol badëë ni gaw reeman.

¹⁷ Badxi' reeman laan rëb reeman:

—Per gaayzi guidahtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bën guin loj guixya'. Abi' cwa'man guigaay guidahtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guidahtil guin badëëman laan loj ree xbejnman persi gudi's reeman laan loj gra ree bën guin.

²⁰ Gra reeman gudaw xt bigdixinladx reeman, abi' staczi bacha reeman za chiptio'p dxüm ni baya'n.

²¹ Bën gudaw guin ree naj reeman cost gaay mil xinguaaaw garenqui ree bëgunaa con ree xindoo.

Riza Jesús loj nijs

(Mr. 6:45-52; Jn. 6:16-21)

²² Dxel gunabee Jesús xbejnman gyyu reeman loj barcw din ned reeman täd gaj reeman stiblad ro' nijs guin, la'tgaj cuzaadiidx nëman benzien guin ree.

²³ Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin.

²⁴ Guiaád barcw guin zijt ma zën loj nijs, dád rliaro' xtÿjp nijs guin laan guial rliaj bi niz loj barcw guin.

²⁵ Chi ma cayreguiaal, zibig Jesús loj ree xbejnman rzaman loj nijs guin.

²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

²⁷ Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

²⁸ Badxi' Bëdan rëbaman:

—Dad, bal lÿjn, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiajt Bëd loj barcw guin, rzaman loj nijs guin zëman loj Jesús.

³⁰ Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

³¹ Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliadxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin.

³³ Guiáad ree bën yu' loj barcw guin bazuxib reeman loj Jesús, rëb reeman:
—Diidxliciz lüjn naj xi'n Dios.

Rayüjn Jesús bënragxuu ree Genesaret
(Mr. 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret.

³⁵ Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman,

³⁶ guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

15

Ni rüjn persi rajc bejn bëndol
(Mr. 7:1-23)

¹ Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

² —¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tiblad persi zinal xcostumbridi?

⁴ Din Dios rëb: “Gojp respejt xDadil con xniaal”, abi’ “Bën rniece diidxguijdx loj xdadaman o xniaaman ya, rayal guiëtaman.”

⁵ Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.”

⁶ Rëbidi guial bën guinee zian, ad zile't güün yudar xdadaman con xniaaman, abi' zian rbëälaxdi xtiidx Dios persi zinal xcostumbridi.

⁷ ¡Bën rusquiee! ¡Rüjnzidi guial nabandi xnejz! Waliqni ni gunee Isaías, bën badëë xtiidx Dios loj ree bejn, chi rëbaman:

⁸ Bën guie ree rëbzi reeman rniajchi' reeman naj, per ad rënt reeman naj con guidib luxdoo reeman.

⁹ Xlia'czi rniajchi' reeman naj,

abi' ruluü reeman bejn ree ganaxzi ni rbëëguijc ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi.

¹¹ Ad ni rawt bejn rüjn laaman bëndol, ni ririi ro'man laan rüjn laaman bëndol.

¹² Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguejn reeman ni guneel?

¹³ Badxi' Jesús laan rëbaman:

—Gra ni ad zëëdt por da Dadan Dios bën yu' xanyabaa, yu' dxej nitan.

¹⁴ Zeel gol basa'n reeman din laa reeman naj zi'c tijb bënlutia'p ruluü stijb bënlutia'p ban niz cheman. Abi' bal tijb bënlutia'p guluü stijb bënlutia'p guin, zayajb grop reeman ro' bala'.

¹⁵ Dxel rëb Bëd loj Jesús:

—¿Basignia' dunujn xhie rën guiëb ni guneel?

¹⁶ Badxi' Jesúsán rëbaman:

—¿Wen, ni'qui lëjt ad rignia'tan ya?

¹⁷ ¡D rignia'di ya guial gra ni raw bejn rej lënman abi' rariin?

¹⁸ Per diidx ririi ro' bejn, luxdoo man zan, abi' laan rüjn laaman bëndol.

¹⁹ Din luxdoo bejn za graloj ree xgabmal, guialrugüt bejn, guial rüjn nidxuudx, guial-rzunë lacheel ben ren, guialrban, guialrusquiee në guialrniece diidxguijdx loj lasa'.

²⁰ Gra ree ni guie naj ni rüjn bejn bëndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman bëndol.

Tijb béngunaa Canaán bililadx Jesús
(Mr. 7:24-30)

²¹ Chi baza Jesús yagaj zëman niz Tiro në niz Sidón.

²² Abi' yagaj zojb tijb béngunaa za niz Canaán, briiman, rbixdiajman rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dáad rusagziman laam.

²³ Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguaajman, din rbixdiajman nalaman dunuj ree.

²⁴ Dxel rëb Jesús:

—Dios guxhaal naj din gūnan yudar ganaxzi ree bēn Israel zē loj nejz mal.

²⁵ Per béngunaa guin bigzuxibaman loj Jesús, rēbaman:

—¡Dad, gognē naj!

²⁶ Badxi' Jesúsán, rēbaman:

—Ad zagdxet naj chiquied bejn guidxtil loj xi'nman din gudēedaman laan loj ree bē'cw.

²⁷ Badxi' béngunaa guinan, rēbaman:

—Waliquil, Dad, per nē ree bē'cw ruto'p guiadxtil laay ni ryajb xan xmex bēn naj xbē'cw laa reeb.

²⁸ Dxel rēb Jesús lojman:

—¡Na, waliquil riladxtil con guidib luxdool! Gac zi'c rēnl.

Loj hor guin gajc bayajc xi'n bēn guin.

Rayūjn Jesús zien ree bēnragxuu

²⁹ Baza Jesús yagaj, bidxinman ro' nijs Galilea, dxel wē'paman guiic tijb guia' abi' gurejman yagaj.

³⁰ Dád zien bejn bido'p lod za'man. Binē reeman bencoj ree, nē ree bēnlutia'p, nē ree bēn ad rūjnt xu'c dxiin, con ree bengop nē zien ree bēnragxuu ren ree, badxig reeman laa reeman loj Jesús, abi' bayūjnman laa reeman.

³¹ Dád badxa loj ree bejn chi baguiaa reeman ma rniee ree bengop, ma bayajc xu'c ree bēn ad rūjnt dxiin xu'c, guíaad ree bencoj ma rza reeman abi' ree bēnlutia'p ruguiaa reeman. Zianz guzuloj cuza't reeman zagdxe xDios ree bēn Israel.

Ruyaan Jesús tajp mil bejn

(Mr. 8:1-10)

³² Abi' gurejdx Jesús bēn naj ree xbejnman, rēbaman loj reeman:

—Rayan bēn guin ree, din ma gojc choon dxej za' reeman con naj, abi' achet ni gaw reeman. Ad rēntan yagu'nejzan laa reeman sin gualraw ad nial yadaaj reeman niz lunejz.

³³ Dxel rēb ree xbejnman lojman:

—Per ŷban guin yuca'n ni gaw ree benzien guin, zi'c naj guie lod achutdzi bejn zobj?

³⁴ Gunabdiidx Jesús loj reeman, rēbaman:

—¿Bēl guiadxtil ca'di?

Badxi' reeman laan rēb reeman:

—Gajdx guiadxtil con zatio'p choon bējl.

³⁵ Dxel gunabee Jesús gurej gra ree bēn guin luyuj.

³⁶ Abi' cwa'man guigajdx ree guiadxtil guin con ree bējl guin, badēēman quixtēē loj Dios. Dxel gula'man laa reen, badēēman laa reen loj ree xbejnman persi gudi's reeman laa reen loj gra ree bēn guin.

³⁷ Gra reeman gudaw xt bigdxinladx reeman. Abi' staczi bacha reeman gajdx dxūm ni baya'n.

³⁸ Bēn gudaw ree naj reeman tajp mil xinguaaaw, garenqui ree béngunaa con ree xindoo.

³⁹ Dxel bazaadiidxnē Jesús laa reeman, abi' guyuman loj barcw ziaman niz Magadán.

16

Rniab reeman güün Jesús tijb milagr

(Mr. 8:11-13; Lc. 12:54-56)

¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien gual Dios guxhaal laaman.

² Per badxi' Jesús laan rēbaman:

—Wadxe ree chi ruguiaadi naxnia xanyabaa, rēbidi: “Zagdxe gac guixie din naxnia xanyabaa.”

³ Guíaad rsil chi naxnia xanyabaa yu' tēē zāj, rēbidi: “Ad laat gac yandxej.” ¡Bēn rusquieel, bal ragbeedi xhie rēn guiēb sen yu' xanyabaa, ŷchexc ad rignia'tidi xhie rēn guiēb gra ni cuguaadi yan?

⁴ Bēn mal, ad riladxtidi abi' rniabidi güün tijb milagr, per achet guguaadi, tijbzi zi'c guzac Jonás.

Dxel basa'n Jesús laa reeman, ziataman.

Xlevadur ree bénfarisew

(Mr. 8:14-21)

⁵ Dxel gudēdnē ree xbejnman stiblad ro' nijs guin, per bayanladx ree xbejnman ninē reeman guiadxtil.

⁶ Abi' rēb Jesús loj reeman:

—Gol gojp cudad con xlevadur ree bñfarisew nê ree bñsaduцев.

⁷Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt riladxidi naj.

⁹¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi?

¹⁰¿Nid zaladx tēēdi ya chi gudi'san gajdx guiadxtil loj tajp mil bejn, abi' zabël dxüman bato'pidi?

¹¹¿Chexc zeel ad rignia'tidi guial ad guiadxtilan cuzatan lojdi, chi rnin lojdi gapidi cudad con xlevadur ree bñfarisew nê ree bñsadusew?

¹²Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni rulüü ree bñfarisew nê ree bñsaduцев.

Rëb Bëd guial Jesús naj Cristo

(Mr. 8:27-30; Lc. 9:18-21)

¹³Chi bidxin Jesús niz Cesarea de Filipino, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

¹⁴Badxi' reeman laan, rëb reeman:

—Yu' reeman rëb guial Wajn, bën baroobnijs bejn ree. Yu'za reeman rëb guial Elíasan, bën badëë xtiidx Dios loj ree bejn, yu' tēē reeman rëb guial Jeremíasan, bën badëëd xtiidx Dios loj ree bejn o stijb ben ren ya, bën badëëd xtiidx Dios loj ree bejn.

¹⁵Dxel rëbaman loj reeman:

—Laadx lëjt, ¿xhie nadi, chu naj?

¹⁶Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

¹⁷Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bën yu' xanyabaa laaman naj bën guna lojl.

¹⁸Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bën gac da bejnan abi' ni'qui gualgüjt ad zunijtt laa reeman.

¹⁹Naj gune lüj gualrniabee ni za xanyabaa, abi' gra ni tiëbil gac loj guidxliujt guie ma naj gacan xanyabaa, guiáad ni ad zatiëjbtal gac loj guidxliujt guie ad najt gacan xanyabaa.

²⁰Dxel gunabee Jesús loj gra ree xbejnman guial achu loj guiëb reeman guial laaman naj Cristo.

Rugojn Jesús guiëtaman

(Mr. 8:31-9:1; Lc. 9:22-27)

²¹Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz nê ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman.

²²Dxel gulëëcaan Bëd laaman, rëbaman lojman:

—¡Dios ad zabëeladxt lüj, Dad! ¡Laaman ad zatiëjbt saquil zian!

²³Per badxi' loj Jesús, rëbaman:

—¡Basa'n naj, xindxabl!, ad rüjn nawëëguil lon. Din ad por Diost zëed ree xgab ni rüjnl, xixgab bénguidxliujn rüjnl.

²⁴Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, siibnejzaman gualzi ni tédzaman abi' guidnalaman naj.

²⁵Din bën mazri rën xgualnaban ni rajpaman loj guidxliujt guie zadxin dxej gunijtaman laan. Per bën guiët por naj, zajpaman gualnaban tiblayaa con Dios.

²⁶Xhieczi gan gap bejn gra ni yu' loj guidxliujt, abi' nitaman loj Dios. Din ad zile't sii bejn xgualnabanman xanyabaa.

²⁷Abi' Bén guxhaal Dios, gui'taman con xgualrniabee xDadaman Dios nê ree xianjl Dios din gudëëman ni rayal tijbgaj bejn, bal gonin been bejn.

²⁸Diidxliczi rnin lojdi guial yu' ree bën riga' guie ad zëjtt reeman chi gad reeman guguiaa Bén guxhaal Dios, gui'taman con xgualrniabeeman din nabeeman.

17

Bidxaa Jesús loj choon ree xbejnman

(Mr. 9:2-13; Lc. 9:28-36)

¹Chi gudëd xho'p dxej, binë Jesús Bëd, nê Jacob con Waj bijch Jacob, binëman laa reeman guijc tijb guia' ya.

² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiaad xabaman bayajcan naquich, balaa tëën bacha' zi'c guij.

³ Abi' loj hor guin baguiaa reeman Moisejs con Elías cayünë reeman Jesús diidx.

⁴ Dxel rëb Bëd loj Jesús:

—Dad, rzagdxë naj nadxu' ree guie! Bal rën, gūnan choon ranch, tijban par lūj, tijban par Moisejs, stijban par Elías.

⁵ La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin bria cha' bejn rëbaman:

—Bën guie naj da Xi'nān, bën rën da'tan, bën rabaanë' tëën, gol bacaagdiajg xtiidxaman.

⁶ Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman.

⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bën guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

¹¹ Badxi' Jesúsān, rëbaman:

—Walican guial yaloj Elías gui't, laaman guzuxnejz gra.

¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bën guxhaal Dios.

¹³ Dxel gogbee ree xbejnman guial Wajn bën baroobnijs bejn ree cuza'taman.

Rayūjn Jesús tijb xin rëjtya'
(Mr: 9:14-29; Lc: 9:37-43)

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaaaw lojman, bazuxibix lojman rëbix:

¹⁵ —Dad, baya da xi'nān, din dád rzagdiajx rëjtya'x. Bëlczī volt riyajbix lojguij o lojnijs ya.

¹⁶ Bidnë'n laax loj ree xbejn, per ad rajct rayūjn reeman laax.

¹⁷ Badxi' Jesúsān, rëbaman:

—jBenguijdx, bën ad rlladxt! ¿Xt goc gazunë'n lëjt? ¿Xt goc gadaanān lëjt? Gol tanë xinzii guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi rlladxidi. Naj rni lojdi bal naj xguialrlladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetctzi gac nawëëg par lëjt.

²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman
(Mr: 9:30-32; Lc: 9:43-45)

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bën guxhaal Dios loj ree bejn,

²³ abī' gugūjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bën ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

²⁵ Badxi' Bëdan, rëbaman:

—Riguijxcaman laan.

Dxel chi bayu Bëd lënú lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

²⁶ Badxi' Bëd laan rëbaman:

—Benzit ree.

Dxel rëb Jesús:

—Abi' ree bën ladx reeman ad rguijxt reeman laan.

²⁷ Per chitëë guidxe'ch reeman, wej ro' nijs, bazaal xiansuelil, dxel bëjl yaløj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

18

¿Chu mazri zøjbloj?

(Mr: 9:33-37; Lc: 9:46-48)

¹ Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zøjbloj lod rniabee Dios?

² Dxel gurejdx Jesús tijb xindoo, bazujman laax galay reeman,

³ abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tëëdi zi'c tijb xindoo, ad zutidi lod rniabee Dios.

⁴ Bén güün naya loj Dios, gac tëëman zi'c xindo guie, laaman gac bén mazri zøjbloj lod rniabee Dios.

⁵ Abi' bén yaca' tijb xindoo, por naj, najn raca'man.

Bén rüjn persi ryajb ree bejn loj dol

(Mr: 9:42-48; Lc: 17:1-2)

⁶ 'Bal chu gusajb tijb bén qui riladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs.

⁷ ¡Proba bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡proba bén gusajb bejn ree loj dol!

⁸ 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'.

⁹ Abi' bal laagajc guialojl rusajb lüj loj dol, gulëën bazaalan zijt, zagdxeli chu'l con tiblodzi guialojl xanyabaa, luar chu'l con gropladan loj bajl yu' gabijl.

Xcwent xiil gunit

(Lc: 15:3-7)

¹⁰ 'Ad guiniajgaadi loj ree bén qui riladxri naj. Din diidxliczi rnin lëjt guial xanyabaa yu' ree anjl rnij laa reeman zianczi za' reeman loj da Dadan Dios bén yu' xanyabaa.

¹¹ Guiaad Bén guxhaal Dios zëëdaman par ree bén ad zinalt xnejz Dios din laa reeman loj dol.

¹² '¿Xhie naladxidi? Bal tijb bejn rajp tibgayuu xiil, abi' rizëëb tijbib, ¿nid zusa'nman zatajpagjlchiinbitapib dajn ya din chigdiilaman be bizëëb guin?

¹³ Abi' bal yadxejlaman laab, diidxliczi rnin mazri yabaanëman laab guial loj tajpgajlchiinbitap be ad bizëëb guint.

¹⁴ Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui riladxri laaman.

Xhienaaq yaguieen perdon du lasa' ree

(Lc: 17:3)

¹⁵ 'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdxë.

¹⁶ Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman.

¹⁷ Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaaadi laaman zi'c tijb bén ad riladxrt Dios o zi'c tijb bén ruquijx impuest par Rom.

¹⁸ 'Diidxliczi rnin, gra ni ad zatiëjbtidi gac loj guidxliuj guie ad rajctan xanyabaa, guiaad ni tiëbidi gac loj guidxliuj guie mal rajcan xanyabaa.

¹⁹ 'Rni tëën lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bén yu' xanyabaa, laaman gunee laan.

²⁰ Din lod rado'p tio'p o choon bejn por naj, laa naj za' galay reeman.

—Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

²² Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

Xcwent bén ad rüjn perdon lasa'

²³ 'Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman.

²⁴ Chi guzulojman caybëëman cwent guin, bidxin tijb xmojsaman lojman bën ral zro' da't.

²⁵ Abi' guial achet rajp bën guin din yaguijxaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguijxaman di'n guin.

²⁶ Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.”

²⁷ Zianz baya rey guin laaman, beenman laaman perdon gra ni ralaman, abi' baslaaman laaman ziaman.

²⁸ Per chi barii mojs guin yagaj, badxajgaman tijb bën rüjnnëman dxiin, ralaman ta'nzi milia lojman. Dxel gunaazaman laaman guzuloj caguijman yëjnman, rëbaman: “iBaguijx ni ralil lon!”

²⁹ Dxel bazuxib bën guin lojman beenman naya rëbaman: “Gojp naj pacens zaguixcan graczi ni ralan lojl.”

³⁰ Per ad guyënt bën guin, badxe'man laaman ladxguuib xt lodzi yaguijxaman di'n guin.

³¹ Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc.

³² Dxel gurejdx rey guin mojs guin, zianz rëbaman lojman: “iMojs guiidx! Benan perdon gra ni ralil lon guial been naya.

³³ ¿Nid nëgajc lüj rayal naya xcompniaril ya, zi'cgajc bayan lüj?”

³⁴ Abi' guial tant balen rey guin, gunabeeman badxe' reeman laaman ladxguuib xt lodzi baguijx gra ni ralaman.

³⁵ Basnuu Jesús rëbaman:

—Ziangajc güünnë da Dadan lëjt, bën yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

19

Ruliüi Jesús xcwent guial rala' lasa'

(Mr. 10:1-12; Lc. 16:18)

¹ Chi gulox guneë Jesús zian, bazaman niz Galilea, zëman niz Judea, niz stiblad ro' guiw Jordán.

² Zien ree bejn binal laaman, yagaj bayüjnman bënragxuu ree.

³ Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

⁴ Badxi' Jesúsán rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaw në bëngunaa”?

⁵ Rëb tëëman: “Zeel xinguaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.”

⁶ Zianan zeel ad najtri reex tio'p, ma naj reex tijbzi. Zeel bënguidxliuj ad rayalt yala'man lasa' ni ma bachajg Dios.

⁷ Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

⁸ Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diizd guia'xchej.

⁹ Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

¹⁰ Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan.

¹² Yu' bejn diizd rajlaman ad zëëdtaman loj guidxliuj par guxhlaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli gutie'ch reeman xtiidx Dios luar guxhlaa reeman. Bën rën chignia', gol bignia'.

Rüjnlë Jesús xindoo ree

(Mr. 10:13-16; Lc. 18:15-17)

¹³ Binë ree bejn xindoo ree lod za' Jesús, din guixhioob yaaman guijc reex cwedx guiniab tëëman Dios por laa reex, per ree xbejnman guzuloj cadilë reeman bën zinë ree laa reex.

¹⁴ Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree b́en naj zi'c laa reex.

¹⁵ Abi' guxhoob yaa Jesús gui'c ree xindo guin, dxel ziaman.

Tijb xinri'cw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidix lojman, rēbix:

—Mextr, ¿xhie ni zagdxe gūnan din ga'pan guialnaban tiblyaa con Dios?

¹⁷ Dxel rēb Jesús lojx:

—¿Chexc zeel rniabdiidix lon conin naj ni zagdxe? Achut naj benza'c, tijbzi Dios. Per bal rēnl gapil guialnaban tiblyaa con Dios, been zi'c rēb ree mandamiant.

¹⁸ Dxel gunabdiidix loj Jesús rēbix:

—¿Con ree mandamiantan?

Badxi' Jesúsán, rēbaman:

—Ad gugūjtil bejn, ad sunēl lacheel ben ren, ad cwanl, ad cwēēl xtiidx bejn,

¹⁹ gojp respejt xdad xniaal, guyēn tēē ree lasa'l zi'c rēn lūj gajc.

²⁰ Dxel rēbix:

—Gra ree ni guin cayūnan diidz najn xindoo, ¿xhieri ryaadx gūnan yan?

²¹ Badxi' Jesúsán, rēbaman:

—Bal rēnl gaquil benza'c loj Dios, bigto' gra ni rajpil dxel gudēēl milia guin loj ree b́enprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinri'cwán.

²³ Dxel rēb Jesús loj ree xbejnman:

—Diidxiczi rnin lojdi: Dád nawēēg chu' benri'cw lod rniabee Dios.

²⁴ Naj rni lējt. Adli nawēēgt tēd tijb camell xan gagux, guial chu' tijb benri'cw lod rniabee Dios.

²⁵ Chi biguiejn ree xbejn Jesús zian, dád badxaloj reeman, abi' rēb reeman:

—¿Chuzazajc gac perdon loj Dios?

²⁶ Dxel baguiaa Jesús loj reeman, rēbaman:

—Nawēēg gac zian par b́enguidxliuj, per par Dios achet ni nawēēg yu'.

²⁷ Abi' rēb Béd lojman:

—Ma basa'nan graczi ni raya'pan, persi zudnaalan lūj. Abi' ¿xhieza yayalan?

²⁸ Badxi' Jesúsán, rēbaman:

—Diidxiczi rnin lojdi chi guidxin dxej yacūb gra, guidxin tēē dxej cwe B́en guxhaal Dios luar lod nabeeman, nē lējt, guial zidnalidi naj, cwedi loj chiptio'p ree luar lod nabeedi, din gūūn xgualguxtisidi loj guidxiptio'p ree xdiaa Israel.

²⁹ Abi' gra ree b́en basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tēē reeman guialnaban tiblyaa con Dios.

³⁰ Per zien ree b́en naj b́en yaloj, gac reeman b́en bigra, abi' zienza ree b́en naj b́en bigra, gac reeman b́en yaloj.

20

Xcwent ree b́en ri'n dxiin

¹ Rēb tēē Jesús:

—Xguialrniabee Dios naj zi'c tijb b́en rajp tijb guiniaaro', rsildoo briiman zitiilaman mojs gūūn dxiin loj xguiniaaman.

² Baya'nnēman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman.

³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman.

⁴ Zianz rēbaman loj reeman: “Gol biguieen dxiin loj da guiniaan, naj gaguix lējt zi'c rayal.” Dxel zē reeman.

⁵ Cost garol dxej briiman stijb, abi' brii gajman cost raca choon wadxe ziangajc rēbaman loj ree b́en riga' yagaj, b́en achet xchiin.

⁶ Cost raca gaay wadxe wejman galay luguiedx guin stijb, abi' bidxaaglojman ben ren ree, b́en achet ree xchiin, gunabdiidxaman loj reeman, rēbaman: “¿Chexc zeel za'di guin gudēdchej ad cayūjntidi dxiin?”

⁷ Badxi' reeman laan rēb reeman: “Achut wanee dxiin yaguieenan.” Dxel rēbaman loj reeman: “Nē lējt gol biguieen dxiin loj da guiniaan naj gaguix lējt zi'c rayal.”

⁸ Chi ma gurej guiaal, rëb bën naj xguiniaan loj bën naaz dxiin guin: “Gurejdx ree mojs guin din quixil laa reeman, per yalojxgaj gudijx ree bën bigra guyu, zianz quixil bën guyu ree yaloj.”

⁹ Chi bidxin ree bën guyu loj dxiin guin raca gaay wadxe, gojx tijbgaj reeman xieen tibdxej.

¹⁰ Dxel chi bidxin ree bën guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej.

¹¹ Abi' chi cayajx reeman, guzuloj cadxe'ch reeman bën naj xguiniaa laan,

¹² rëb reeman lojman: “Bën bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dëchej loj guialnalaa.”

¹³ Per rëb bën guin loj tijb reeman: “Achet ni mal cayünan lüj. ¿Nid baya'n diizd ya plac gunen tia'l tibdxej?”

¹⁴ Cwa' ni bayalil baguiaj. Din naj rënan gaguixan bën bigratë guyu zi'c gudixan lüj,

¹⁵ zajc günnë' da milian ni rëntzan. ¿O nadëdloj ya guial najn benza'c?”

¹⁶ Zianan zeel bën naj ree bën bigra gac reeman bën yaloj, guiáad ree bën yaloj gac reeman bën bigra.

Bayon volt bagojn Jesús guial guiëtaman

(Mr. 10:32-34; Lc. 18:31-34)

¹⁷ Chi zë Jesús Jerusalén, gurejdx guidxiptio'p ree xbejnman tiblax, rëbaman loj reeman:

¹⁸ —Ganin lëjt, ziyo' ree Jerusalén, lod yayü reeman Bën guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman,

¹⁹ yayü reeman laaman loj ree benzit, din guze' reeman laaman quïn tëë reeman laaman, abi' gucaa reeman laaman loj crüjz, per yayon dxej yabanman.

Ni gunab xniaa Jacob con Waj

(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman.

²¹ Gunabdiidx Jesús lojman, rëbaman:

—¿Xhie rën'l?

Badxi' bën guinan, rëbaman:

—Rënan nabeel cwe tijb da xi'nman xladbeel, stijbim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tëdidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxliczi rnin zajc tëdidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bën bacaabee da Dadan.

²⁴ Chi biguiejn zachii ree xbejn Jesús zian dád balen reeman grop bijch reeman.

²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zojbloj rüjnnë reeman bejn ree zi'ctzi rën reeman por guialrniabee ni rjap reeman.

²⁶ Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi.

²⁷ Ziangajc bën rën gac bën zojbloj lojdi, rayal güünman sirv lojdi zi'c bën nado'.

²⁸ Zi'c Bën guxhaal Dios ad bi'ttaman par güün reeman sirv lojman, bi'ttaman par güünman sirv gudëë tëë xguialnabanman din laa zien bejn loj dol.

Rayüjn Jesús tio'p ree bénlutia'p

(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejnman, dád zien ree bejn binal laaman.

³⁰ Dxel tio'p ree bénlutia'p zojb cwë' nejz chi biguiejn reeman cadëd Jesús niz yagaj, gurixdiaj reeman rëb reeman:

—jDad, xdiaa Davi, baya dunujn!

³¹ Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—jDad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

21

Ru Jesús Jerusalén

(Mr 11:1-11; Lc. 19:28-40; Jn.12 :12-19)

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman,

² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiee reeb gol tanë reeb guie.

³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

⁵ Gol güjdx loj ree bën Sión:

“Gol baguiaa laa xreydi zëëd lojdi, ad zëëdtaman nabë, dxiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman,

⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin.

⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman.

⁹ Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

¹⁰ Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

¹¹ Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

Rabëë Jesús bën ruto' ree lën yadoo Jerusalén

(Mr 11:15-19; Lc. 19:45-48; Jn.2 :13-22)

¹² Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom.

¹³ Dxel rëb Jesús loj reeman:

—Løj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁴ Dxel bën lutia'p ree con ree bencoj bibig reeman loj Jesús lën yadoo guin abi' bayünman laa reeman.

¹⁵ Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguiejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman.

¹⁶ Abi' rëb reeman loj Jesús:

—¿Rguiejn! ni canee ree xindo guin ya?

Badxi' Jesúsán, rëbaman:

—Rguiejn can. Per ¿gadidi gool loj xtiidx Dios ya? Lod rëb: Løj badëëd ni gool ree xindoo në ree xindobëz sta rë' dud, din guillies reex xvaloril.

¹⁷ Dxel basa'n Jesús laa reeman, zëman Betania ni baya'nman guxhin guin.

Tijb yag higo ni gubidx

(Mr 11:12-14, 20-26)

¹⁸ Chi bareguiaal rsil la'tgaj zë Jesús Jerusalén stijb, guzuloj gulaanman.

¹⁹ Abi' baguiaaman zojb tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Løj hor guin gajc gubidx yag guin.

²⁰ Chi baguiaa ree xbejnman zian, dád badxalój reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliadxidi Dios abi' ad zunawëégtidi, ad ni bentzan con yag higo guin zajc güüdi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian.

²² Gra ni guiniabidi loj Dios, bal rliadxidi laaman, zuneeman laan.

Xgualrniabee Jesús

(Mr. 11:27-33; Lc. 20:1-8)

²³ Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güün! ni guin ree? ¿Chu banee gualrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree.

²⁵ ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?”

²⁶ Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman rliadx guial Waj naj bën badëéd xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

Tijb bën guyu tio'p xi'n

²⁸ Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxey biguieen dxiin loj guiniaa yu' uv.”

²⁹ Badxi'xan, rëbix: “Ad zatan.” Per dxelri bayüjnx xgab zianz wejx.

³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix.

³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yalój guin.

Dxel rëb Jesús loj reeman:

—Diidxliczi rnin, bën ruquijx ree impuest con ree béngunaa naban nadxuudx, yalojl laa reeman chu' lod rniabee Dios guial lojdi.

³² Din bi't Waj, bën baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiaád ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din bililadxidi laaman.

Xcwent ree mojs guiidx

(Mr. 12:1-12; Lc. 20:9-19)

³³ Rëb tëé Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëeman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bën güün dxiin lojn, zëtaman zijt.

³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman.

³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguiaj reeman.

³⁶ Dxel bën naj xguiniaan guxhaalaman mazri ree mojs guial loj ree bën we yalój, per ziangajc beennë ree bën guin laa reeman.

³⁷ 'Ni bigra, guxhaal xi'nman guial gunaladxaman: “Zajpqui reeman da xi'nnan respejt.”

³⁸ Per chi baguiaa ree bën guin xi'nman, rëb loj lasa' reeman: “Xin guinan naj xin tia' guidxliuj guin, yagüjt reex din gacan du xieen ree.”

³⁹ Abi' gunaaz reeman laax, babëë reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree bën caneenëman, rëbaman:

—Chi yadxin bèn naj xguidxliuj laan, ¿xhie naladxidi güünnëman bèn guin ree?

⁴¹ Abi' rëb reeman loj Jesús:

—Ad zayataman gugjütaman bèn guin ree, dxel gudëëman guidxliuj guin garol loj ree ben ren, bèn yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bèn rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

⁴³ Zeel rnin lojdi, zariacadi loj xgualrniabee Dios abi' ben ren ree yayu xluaridi, bèn wali ree güün zi'c rënman.

⁴⁴ Abi' chutëëz bèn yab guijc guiaj guin, zarooxaman, guiáad bal yab guiaj guin guijcaman zanidlojman.

⁴⁵ Chi biguiejn ree bixhioz rniabee ree bixhioz con ree bënfarisew guin ni cayü Jesús zi'c cwent, dxel gogbee reeman guial laa reeman cuza'taman.

⁴⁶ Abi' guyën reeman niniáaz reeman laaman, per bidxeb reeman bejn ree guial rliidx reeman laaman naj bèn rudëëd xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rëbaman:

² —Xgualrniabee Dios naj zi'c tijb rey bèn been lanijro' chi baxhliaa xi'nman.

³ Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman.

⁴ Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.”

⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad,

⁶ yu' tëë reeman gunaaaz mojs guin ree gudijn reeman laa reeman abi' bagüjt reeman laa reeman.

⁷ Chi gogbee rey guin zian, dád bidxe'chaman. Guxhaalaman bèn naj ree xsuldadaman persi bagüjt reeman bèn guin ree baze'c tëë reeman lidx reeman.

⁸ Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bèn gunen ad najt guial ni't reeman.

⁹ Yan, gol wej lod radxaag lasa' ree nejz, gol güjdx loj ree bèn guidxaalojtzidi din gui't reeman loj guialruxhliaa guin.”

¹⁰ Abi' bñii ree mojs guin wej reeman lunejz guin ree, bato'p reeman gra ree bèn bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ Per chi guyu rey guin din guguaaaman biooz guin ree, baguaaaman tijb bèn ad najcwt xab ni rayal gacwaman loj guialruxhliaa guin.

¹² Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb bèn guin.

¹³ Zianz rëb rey guin loj ree bèn cagui's guialraw: “Gol guxhii guia'x në yaax, gol bazaal tëëx xchu lod nacay da't lod goonx gaw tëë layix.”

¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree bënfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman.

¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mexti, dunujn rayagbee guial lüj rniee diidxli, abi' walil ruluüi guial xhienaag rën Dios guiban bejn, ad ridxga' tëëtíl chu naj bejn. Din lojl tiblojzi naj bejn.

¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayüjn reeman, abi' rëbaman loj reeman:

—Bën rusquiee, ¿chexc zeel raguüilidi mod xhienaag gutidia'di naj?

¹⁹ Gol balüü tijb cintabl lon ni rguijxnëdi impuest.

Dxel badëëd reeman tijban lojman,

²⁰ abi' gunabdiidx Jesús loj reeman, rëbaman:

—¿Chu loj ca lojn chu tëë laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëéd loj César ni naj xieen César, guiáad loj Dios gol badëéd ni naj xieen Dios.

²² Chi bigujejn reeman zian, dád badxaløj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

²⁴ —Mextr, Moisejs rëb guial bal guiët tijb xinguaaw abi' achut xi'n reex guyu con lacheelix, bijch xingüt guin guxhlianë béngunaa bizëjb guin din chu' xi'n reex luar bijchix.

²⁵ Du lojn guyu tijb famil lod gojc reex gajdx bijch. Baxhliaa xin yaløj guin, per güjtix abi' guial ad guyut xi'nix, dxel bijch barojpax baxhlianë béngunaa guin.

²⁶ Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian.

²⁷ Chi bara reex güjt dxel güjt béngunaa guin.

²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhlianë laaman?

²⁹ Badxi' Jesús, rëbaman:

—¡Ragdxadi guial ad nünbeetidi xtiidx Dios ad nünbee tëtëti xhienaag naj xguialrniabee-man!

³⁰ Din chi yaban ree bengüt, ad zuxhliaatri reeman ad zudëéd tëtëri xi'n reeman guxhliaa, ma gac reeman zi'c ree anjl yu' xanyabaa.

³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb:

³² “Naj naj xDios Abraham, xDios Isaac në xDios Jacob”? Abi' Dios ad najtaman xDios ree bengüt, najman xDios ree bën naban.

³³ Chi bigujejn ree bejn zian, dád badxaløj reeman zi'c rulüüman laa reeman.

Mandamient mazri zøjbloj

(Mr. 12:28-34)

³⁴ Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman.

³⁵ Abi' tijb ree bënfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zøjbloj loj gra ree mandamient ni zëéd loj ley?

³⁷ Badxi' Jesús, rëbaman:

—“Guyën xDadil Dios guidiblagaa guidib guijc guidib ladxil.”

³⁸ Laan naj mandamient mazri zøjbloj.

³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.”

⁴⁰ Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëë xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bënfarisew guin, gunabdiidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bën rniabee naj:

“Gurej da ladbeen, xt gabecan

xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutczí gojc nadxi' xtiidx Jesús, ni'czi tijb diidx. Abi' diidx dxejzii achutczí bayax niniabdiidx xhienin lojman.

23

Ni rüjn ree mextr rajc ley në ree bënfarisew

(Mr. 12:38-40; Lc. 11:37-54; 20:45-47)

¹ Rëb Jesús loj ree bejn në loj ree xbejnman:

²—Mextr rajc ree ley con ree bénfarisew rulüü reeman xhie rën guiëb ni ca loj xley Moisejs.

³ Zeel gol bazoob xtiidx reeman, gol been tëë gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman.

⁴ Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman.

⁵ Gra ni rüjn reeman, rüjn reeman laan din yadxalój bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdx.

⁶ Ruladx reeman cwe reeman lod rayal rbej ree bën zobjloj, loj tijb guialraw, abi' ziangajc rüjn reeman lën ree yadoo.

⁷ Ruladx tëë reeman gugajpdioz bejn laa reeman zagdx niz lunejz guiëb tëë reeman loj reeman mextr.

⁸ Per lëjt ad sëëbladixidi guinee bejn lëjt mextr, din tijbzi naj gradi, tijbzi mextr rajpidi abi' laaman naj Cristo.

⁹ Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa.

¹⁰ Ad güün tëëdi nagueijn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo.

¹¹ Bën mazri zobjloj lojdi, laaman rayal güün sirv lojdi.

¹² Din bën rlies xvalor gajc achet lasajcaman. Guiáad bën rüjn naya, zajs xvaloraman.

¹³ ;'Probza lëjt mextr rajc ley në lëjt bénfarisew, bën rusquieel, ad rtiëjtidi gagbee ree bejn xhienaag din gac reeman xbejn Dios, ni'quiza lëjt ad rüjntidi nagueijn gaquidi xbejn Dios, abi' rudxoondi gac xbejn Dios bën rën ree gac xbejnman.

¹⁴ ;'Probza lëjt mextr rajc ley në lëjt bénfarisew, bën rusquieel, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

¹⁵ ;'Probza lëjt mextr rajc ley në lëjt bénfarisew, bën rusquieel, zizadi guidibdoos rguilidi bën gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

¹⁶ ;'Probza lëjt, bënlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn nagueijn güünman ni guneeman.”

¹⁷ ;'Natontidi, wed natia'p lojdi! ;'Conin mazri lasajc: Or guin ya o yadoo beenle' or guin?

¹⁸ Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn nagueijn güünman ni guneeman.”

¹⁹ ;'Bénlutia'p! ;'Conin mazri lasajc par lëjt: Gon guin ya o altar beenle' gon guin?

²⁰ Bën ruza't altar guin ad altar guintzan ruza'taman, nëgajc gra ni dxiib lojn ruza'taman.

²¹ Guiáad bën ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin.

²² Abi' bën ruza't xanyabaa, Diosan ruza'taman në lod zobjbaman.

²³ ;'Probza lëjt mextr rajc ley në lëjt bénfarisew, bën rusquieel, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zobjloj, ad rüjntidi zi'c rayal, ad rayat lasa'di, ad za'dxi'ch tëëti loj xnejz Dios. Laa reen rayal güündi, per ad cwëëladixidi gudëëdi ni rayal loj Dios.

²⁴ ;'Bénlutia'p, rajpidi cudad chitëë guiëbidi tijb bizëdlajs, abi' rguiejbidi tijb camell!

²⁵ ;'Probza lëjt mextr rajc ley në lëjt bénfarisew, bën rusquieel, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaaan nëtëë guialrdxe'ch lasa'.

²⁶ ;'Bénfarisew lutia'p: Yalojxgaj gol basia, zian guiguuien waliquidi nayadi loj Dios!

²⁷ ;'Probza lëjt mextr rajc ley në lëjt bénfarisew, bën rusquieel, najdi zi'c baa nayë' color naquich, guijcan rguien nix da't, per lënan guidxa ree xdxijt bengüt në gralój ree ni dxuudx.

²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

²⁹ ;'Probza lëjt mextr rajc ley në lëjt bénfarisew, bën rusquieel, rüjndi xbaa ree bën badëë xtiidx Dios loj ree bejn, abi' rüjnchaawidi xbaa ree bën goc benza'c,

³⁰ dxel rëbidi: “Bal nabajnan xtiamper ree dux béngulalan, ad nët dunujn nagüjt bën badëë ree xtiidx Dios loj ree bejn.”

³¹ Abi' con ni guin ree, rayünbeegajquidi guial loj xdiaa bën bagüjt ree bën badëë xtiidx Dios loj ree bejn zëëdidi.

³² ;'Gol balooxa ni guzuloj been xbéngulalidi!

³³ ;'Bëndol, xi'n xindxab! ;'Xhienaag laadi loj castiro' ni yu' gabijl?

³⁴ Zeel gaxhalan lojdi bën gudëe ree xtiidx Dios, bën rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tõe reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin.

³⁵ Zianan zeel guijquidi yab xtol gra ree bën bagüjt bën goc ree benza'c diizd Abel bën guban xnejz loj Dios xt Zacarías xi'n Berequías, bën bagüjt reeman lule' yadooro' Jerusalén.

³⁶ Diidxliczi rnin lëjt, xcasti gra ree ni guin yab guijc ree bën riga' loj guidxliuj yan.

Roon Jesús por Jerusalén

(Lc. 13:34-35)

³⁷ Rëb tõe Jesús:

—jBën Jerusalén, bën Jerusalén, rugüjtidi bën rudëe ree xtiidx Dios loj ree bejn abi' rucaaguiajdi bën rxhiaal Dios lojdi! jBëlci volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiëbtidi!

³⁸ Zianan zeel yaya'n ladxidi zi'c tijb guiedx lod achut zojb.

³⁹ Abi' rnin lëjt diizd yan ad zuguaatrudi naj, xt chi guidxin dxej guiëbidi: “jNünle' Dios bën guxhaalaman!”

24

Rëb Jesús guial yaze'n yadooro'

(Mr. 13:1-2; Lc. 21:5-6)

¹ Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman.

² Abi' rëb Jesús loj reeman:

—Diidxliczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt.

⁵ Din zien ree bejn gui't guiëb reeman guial por naj zëed reeman, guiëb tõe reeman: “Naj naj Cristo”, abi' zien bejn gusquiee reeman.

⁶ Per lëjt chi guiguiejndi cayajc wadijl o zëeb diidx guial gac wadijl, ad guidxebidi din zian naj gac. Per ad wadxint dxej nit guidxliuj.

⁷ Din til nacion con stijb nacion, në bën rajp gualrniabee con stijb bën rajp gualrniabee. Abi' gui't xudoxh në gubijn niz ni niz guie.

⁸ Gra ree nine ree gac chi ma suloj gualzi guin.

⁹ Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan.

¹⁰ Chi gac zian zien ree bejn gusa'n gualrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman.

¹¹ Gui't tõe zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman.

¹² Abi' guial dád zien ni mal gac, zien da't bën ad zëntri ree lasa'.

¹³ Per bën sudxi'ch loj gualrliladxaman naj, xt dxej chigra guibanman, laaman yayal xanyabaa.

¹⁴ Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

¹⁵ Zianan zeel chi guguaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëe xtiidx Dios loj ree bejn (bën gool gui'ch guie ree, gol bignia'),

¹⁶ guial bën zojb ree Judea rayal guxüün reeman che reeman dajn.

¹⁷ Guiáad ree bën yë'p guijc yulidx dxejzii, ad yayu lënülidx reeman par tia' xhie xieen reeman.

¹⁸ Abi' ree bën za' dajn, ad yajejc reeman chigxii xab reeman.

¹⁹ jProba ree béngunaa nüü xi'n o bën ca' ree xindobëz lën ree dxejzii!

²⁰ Gol gurejdx gunab Dios chitëe gac zian tiamp nayaag o dxej raziiladx ree bejn ya.

²¹ Din nadxel dád gualziro' chu', zi'c ad wayajctczi diizd guia'xchej chi gad guidxliuj gacchaaw ad yu' tõe dxej gac zian.

²² Abi' bal id Dios gucwëez gualzi chu' lën ree dxej guin, ni'qui tijb bejn ad zalaat, per gucwëezaman laa reen por ree bën guleman.

²³ Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi.

²⁴ Din zi't zien ree bén gusquiee na guial laa reeman naj bén guxhaal Dios o na reeman guial laa reeman naj bén rudëed xtiidx Dios. Abi' züjn reeman milagr ree në graloj ni yadxalaj bejn din gusquiee reeman laa reeman, abi' bal zile'n xt në ree bén gulej Dios gusquiee reeman.

²⁵ Ma rni xgajn lojdi ni gac.

²⁶ Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënu ni”, ad bal chililadxidi.

²⁷ Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb.

²⁸ Bén rililadx ree naj gui't reeman lon, zi'c chi rado'p ree golbich lod naga' tijb begüt.

Gui't Bén guxhaal Dios stijb

(Mr 13:24-37; Lc 21:25-33; 17:26-30, 34-36)

²⁹ 'Chi ma gudëd ree dxej ni gac ree guialzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib.

³⁰ Dxel guiguinen tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi gugiaa reeman Bén guxhaal Dios, rdiinman bacha' zëëdaman loj zaj con xguialrniabeeman.

³¹ Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree bén guleman, bén za' ree giralad guidiblagaa guidxliuj.

³² 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëëd tiamp nalaa.

³³ Ziangajc chi gugiaaadi ma cayajc ree ni guin, gagbeedi guial ma zidyob gac zi'c rnin lëjt.

³⁴ Diidxliczi rnin lëjt guial gra ree ni guin gac chi gad ree bén naban yan guiët.

³⁵ Guidxliuj në xanyabaa zanijt reen, per da diidxan ad zanijtjan.

³⁶ 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ 'Zi'c goc gual chi guban Noé, zian gac chi yaguaaad Bén guxhaal Dios.

³⁸ Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman.

³⁹ Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguaaad Bén guxhaal Dios.

⁴⁰ Dxej guin, lod za' tio'p ree xinguaaw dajn, tijbix yaza, stijbix yaya'n.

⁴¹ Guiaad lod cayojt tio'p ree béngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaaad xDadidi.

⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwaxn, zabejnaaman abi' ad zatiëjbtaman chu' xingubaan guin lidxaman.

⁴⁴ Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

Mojs za'c në mojs guiidx

(Lc 12:41-48)

⁴⁵ 'ÇChu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor?

⁴⁶ Xiquilbaa mojs cayüjn dxiin zi'c rayal chi yadxin xpatronx.

⁴⁷ Din diidxliczi rnin lëjt, patron guin zusa'n gra xieenman loj mojs guin.

⁴⁸ Per bal naj mojs guin mojs dxuudx, naladxix: “Zaglaari da patronan.”

⁴⁹ Zianz suloj gusagzix los demazri ree mojs guin, suloj gawix, guië'në tëëx xingu' ree.

⁵⁰ Abi' yadxin xpatronx tijb dxej ni ad ragbeetix ad rbëz tëëtix laaman.

⁵¹ Dxel dád castiro' gudëëd patron guin laax, guixhiaal tëëman laax lod rayal ree bén rusquiee, lod goonx gaw tëë layix.

25

Xcwent chii biinxdüb

¹ Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin.

² Gaay reem been xgab xhie güün reem, per za gaay reem ad beent xgab.

³ Biin ad beent ree xgab guin binë xguij reem per ad binët reem mazri sejt ni che'cnë ree guij guin.

⁴ Guiaad ree biin been xgab guin xhie güün reem, binë reem za tib lumejt'gaj sejt con xguij reem.

⁵ Abi' guial goglaa badxin xinruxhliaa guin, bi't bacaal loj gra reem, abi' goodyëjs reem.

⁶ Cost garol guiaal, biguien cha' tijb bejn rëbaman: "iLaa xinruxhliaa guin ma ziaad, gol tagchaagloj!"

⁷ Dxel bixche gra ree biinxdüb guin, abi' beenchaaw xguij reem.

⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: "Gol baneesii tibda'n xsejti, din dux guijn ma cayü' reem."

⁹ Per badxi' reemin rëb reem: "Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc."

¹⁰ Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin gyyunë reem laax loj guialruxhliaa guin dxel bida'cw ro' port.

¹¹ Dxel chi badxin za gaay biin bisii ree sejt guin, rëb reem: "iDad, dad, guxhal din yadxu'n!"

¹² Per badxi'xan rëbix: "Diidxliczi rnin, ad nünbeetan lëjt."

¹³ Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

Xcwent bén badëéd milia

¹⁴ Dxel rëb tëë Jesús:

—Xguialrniabee Dios naj zi'c tijb bén ma grii cheman zijt, abi' gurejdx ree xmojsaman, basa'n xmiliaman loj reeman.

¹⁵ 'Loj tijbaman badëëman gaay mil cintabl, loj zatijbaman badëëman zatio'p milan, guiaad loj zatijbaman badëëman za timilan. Loj tijbgaj reeman badëëdan ni naladxaman zajc güünnë reeman dxiin, dxel briitaman zëman zijt.

¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan.

¹⁷ Ziangajc been mojs cwa' tio'p milan, beenman gan za tio'p mil gajcan.

¹⁸ Per mojs cwa' timil cintabl guin bitëenman luyuj persi baquie'chaman cintabl guin ni badëéd xpatronman.

¹⁹ 'Gojc xchej da't dxel badxin patron guin abi' babëëman cwent con la reeman.

²⁰ Yaloj bidxin mojs cwa' gaay mil cintabl guin abi' bayüman zagaay milan, rëbaman: "Dad, lüj banee gaay milan lon, yan, laa za gaay milan guie ni benan gan."

²¹ Dxel rëb patron guin lojman: "Zagdxen, mojsza'c, zagdxë beenl, guial zagdxë beenl con tibda'n ni banen, yan, gunen mazri guial loj ni banen. Guyu, babaa con naj."

²² Zianz bidxin mojs cwa' zatio'p mil cintabl guin rëbaman: "Dad, lüj banee tio'p milan lon, yan, laa zatio'p milan guie ni benan gan."

²³ Dxel rëb patron guin lojman: "Zagdxen, mojsza'c, zagdxë beenl, guial zagdxë beenl con tibda'n ni banen, yan, gunen mazri guial loj ni banen. Guyu, babaa con naj."

²⁴ 'Per chi bidxin mojs cwa' timil cintabl guin, rëb loj xpatronman: "Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëël guialnaza'c lod ad rtie'chtil bin.

²⁵ Zeel bidxeban abi' biquiechan xmilial lën liuj, yan, laa xmilial guie."

²⁶ Badxi' patron guinan, rëbaman: "Mojs mal, mojs ploj, bal ragbeel rabën guialnaza'c lod ad rgu'tan bin, ratop tëën guialnaza'c lod ad rtiechtan bin.

²⁷ Adil nilu' da milian lën bancw, din chi naguialan naca'nan con xi'nan ni benan gan."

²⁸ Dxel rëb patron guin loj ree bén za' yagaj: "Gol biquied timil cintabl guin lojx, gol badëëdan loj xin rajp chii milan.

²⁹ Din Bén rajp zaca'man mazri, abi' gapaman zro' da't, per Bén rajp ta'nzi, xt ni rajpaman chiquied lojman.

³⁰ Abi' mojs ad rünjt sirv guin gol bazaalix xchuni lod nacay, lod goonx, lod gaw tëë layix."

Xguialguxtis Jesús

³¹ 'Chi gui't Bén guxhaal Dios, gui'taman con xguialrniabeeman, në con gra ree xianjlan din cweman lod nabeeman.

³² Dxel gra ree bénguidxliuj yado'p lojman, abi' cweman laa reeman zi'c rünj tijb Bén rajp xiil chi rabëëcaman xiil ree loj ree dxib.

³³ Abi' guzujman Bén naj ree xbejnman xladbeeman, guiaad ree Bén ad najt xbejnman guzujman xladruvejsaman.

³⁴ Dxel guiëb rey guin loj ree Bén za' xladbeeman: "Gol guda Bén ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj.

³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan.

³⁶ Chi byaadx da xaban, lëjt baneer ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj."

³⁷ Dxel guiëb ree bën za' ladbee guin: "Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quill nijs, abi' baneen nijs gu'l?"

³⁸ ¿Goc baguiaan lüj zizal zi'c tijb benzit, abi' baneen lod baya'n'l, o goc biyaadx xabil, abi' baneen ni gotil?"

³⁹ ¿Abi' goc baguiaan lüj ragxuul, o guyul ladxguiib, abi' budganajn lüj?"

⁴⁰ Dxel guiëb rey guin loj reeman: "Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar."

⁴¹ 'Dxel guiëbaman loj ree bën za' xladruejsaman: "Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx.

⁴² Din chi gulaanan, ad baneetidi ni niawan, chi we'can nijs, ad baneetidi ni nië'n.

⁴³ Chi bizaan zi'c benzit, ad baneetidi lod naya'n'an, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajtidi naj."

⁴⁴ Dxel guiëb reeman lojman: "Dad, ¿goc baguiaan lüj rliaanl o re'quill nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?"

⁴⁵ Abi' yadxi'man laan guiëbaman: "Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bën lasajc, najn ad beentidi yudar."

⁴⁶ Laa reeman yayal loj casti tiblyayaa, guiáad ree bën been zi'c rayal, laa reeman rayal guilnaban tiblyayaa con Dios.

26

Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn. 11 :45-53)

¹ Chi gulox guneer Jesús diidx guin ree, dxel rëb loj ree xbejnman:

² —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüjz.

³ Lën ree dxejzii badxaag lasa' ree bixhioz rniabee ree bixhioz, con xguxtis ree bën Israel, lidx Caifás quijb bixhioz zojbloj.

⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman.

⁵ Per rëb reeman:

—Ad zaguieent ree zian loj lanij guin chitëe gac naquie' luguiedx guin.

Ruroob tijb béngunaa perfum guijc Jesús

(Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bën rniee reeman Leproso,

⁷ bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojb Jesús xan mex, baroobaman perfum guin guijc Jesús.

⁸ Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin?

⁹ Zile' nido'n zro' da't din nünjan yudar bënprob ree.

¹⁰ Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxre naj ni beenman naj.

¹¹ Din bënprob guin ree zianczi za'në reeman lëjt, sa'n naj ad ziantczi gazunë'n lëjt.

¹² Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan.

¹³ Diidxliczi rnin, bantëez guin guire'ch xtiidzxa'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bën la Judas Iscariote, bigneenëman bixhioz rniabee ree bixhioz,

¹⁵ rëbaman loj reeman:

—¿Plac guneedi din yanen Jesús lojdi?

Abi' badëed reeman gajlbichii milia plajt lojman.

¹⁶ Diizd dxejzii guzulojman raguuilaman mod xhienaag yayüman Jesús.

Gudawnë ree xbejn Jesús xche

(Mr. 14:12-25; Lc. 22:7-23; Jn. 13 :21-30; 1Co. 11 :23-26)

17 Dxej ni guzuloj lanij ni raw ree bejn guiadxtil ni ad yu't lewadur, gubig ree xbejn Jesús lojman, rëb reeman:

—¿Ban guin rën! yaguieenchaawan ni yadaaw ree guxhin lanij pascw?

18 Badxi' Jesúsán rëbaman:

—Gol chej Jerusalén lidx bën guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

19 Dxel been ree xbejnman zi'c rëbaman, been tõe reeman ni gaw reeman guxhin lanij pascw.

20 Chi gure guiaal, zojb Jesús xan mex con guidxiptio'p ree xbejnman.

21 Abi' la'tgaj cayaw reeman, rëbaman loj reeman:

—Diidxiczi rnin, tijb gajc lëjt yayü naj.

22 Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

23 Badxi' Jesúsán, rëbaman:

—Bën cayaw loj pliajt ni cayaw gajcan, laaman yayü naj.

24 Walican, Bën guxhaal Dios naj guial sacaman zi'c rëb loj xtiidx Dios. Per i'probza bën yayü laaman!, zagdxeli naj par laaman ad niutaman loj guidxliuj.

25 Dxel Judas bën yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

26 La'tgaj cayaw reeman, cwa' Jesús guiadxtil, badëédaman quixtõe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

27 Dxel cwa'man tib cojp vin, chi gulox badëédaman quixtõe loj Dios, badëédaman cojp guin loj reeman, rëbgajman:

—Gol gu' gradi loj cojp guie.

28 Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman.

29 Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

Rëb Jesús guial guiëb Béd ad nünbeetaman laaman

(Mr. 14:26-31; Lc. 22:31-34; Jn.13 :36-38)

30 Chi gulox biil reeman tijb cant par Dios, dxel zë reeman guijc guia' Olivos.

31 Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.”

32 Per chi yabanan, yaloj naj ganeed ga gajn Galilea dxelri gui'tidi.

33 Dxel rëb Béd lojman:

—Majsi gra reeman cwëëladx lüj per naj ad yu't dxej gabëladxan lüj.

34 Per rëb Jesús lojman:

—Diidxiczi rnin lojl, yan guxhin gajc chi gad guid cwidxa', mal rëbil choon volt guial ad nünbeetil naj.

35 Abi' rëb Béd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemaní

(Mr. 14:32-42; Lc. 22:39-46)

36 Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

37 Dxel zinëman Béd con grop ree xi'n Zebedeo, zianz guzuloj cayunayaman abi' ad nixtri yu' luxdooman.

38 Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

39 Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj guialzi ni gadëëdan, per ad gac zi'c rënan, gac zi'c rën.

40 Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Béd:

—¿Wen ni'qui tib hor ad bile't natie'ch xbacaalidi ya, din sunëdi naj?

⁴¹ Gol batie'ch xbacaalidi gol gurejdx gunab tëë Dios, chitëë güün xindxab lëjt gan, din rënquidi güüdi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

— Dad, bal id zile' téd guialzi ni naj gadëëdan, bal rüjn naguiejn gadëëdanan gacri zi'c rën.

⁴³ Chi badxinman lod za' ree xbejnman stijb, laa reeman naayëjs guial dád guidxa bacaal loj reeman.

⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree.

⁴⁵ Chi badxinman lod za' ree xbejnman, rëbaman loj reeman:

— ¿Sta naga'lyëjsidi ya, cayziiladx tëëdi? Guiaad Bén guxhaal Dios ma bidxin hor yayü reeman laaman loj ree béndol.

⁴⁶ Gol bixche, yo' ree, gol baguiaa laa bén yayü naj ma zëëd gajxh.

Gunaaz reeman Jesús

(Mr. 14:43-50; Lc. 22:47-53; Jn. 18 :2-11)

⁴⁷ Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bén Israel laa reeman.

⁴⁸ Abi' Judas bén bayü laaman mal rëbxgajman loj ree bén guin: “Bén gawan xid xhajg, laaman raguuilidi, gol gunaazaman.”

⁴⁹ Chi bidxin Judas bibigaman loj Jesús, dxel rëbaman:

— ¡Xchan, Mextr!

Laa gudaw gajcaman xid xhajgaman.

⁵⁰ Abi' rëb Jesús lojman:

— Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

⁵¹ Per tijb ree bén za'në Jesús yagaj, gulëë xiespadaman dxel gutü'man guidiajg xmojs quijb bixhioz zojbloj.

⁵² Dxel rëb Jesús lojman:

— Bagu'chaaw xiespadil xluaran. Din bén rdil con espad, con espad rëjtaman.

⁵³ ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil ree xianjlanan din gagnë reeman naj?

⁵⁴ Per ¿xoza gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

— ¿Chexc zeel zëëdidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj.

⁵⁶ Per gra ree ni guie cayajc din gac cumplid ni bacaa ree bén badëë xtiidx Dios loj ree bejn.

Loj hor guin gajc baxiün ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn. 18 :12-14, 19-24)

⁵⁷ Bén gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bén Israel.

⁵⁸ Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bén rajp ree lidx bixhioz guin, din guguaaman xhie güünnë ree bén guin Jesús.

⁵⁹ Guiaad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiëtaman.

⁶⁰ Per ad radxejt xhienaag gutedia' reeman laaman majsi zien ree bén basquiee. Dxel bibig zatio'p reeman,

⁶¹ rëb reeman:

— Bén guie rëb: “Zile' yase'n nan xyadoo Dios abi' loj choon dxejzi yayünanan.”

⁶² Dxel guzuli quijb bixhioz zojbloj guin, rëbaman loj Jesús:

— ¿Nid zadxi'lan ya? ¿Waliqui ni canee ree bén guin contr lüj ya?

⁶³ Per achat rëb Jesús. Dxel rëb bixhioz guin lojman:

— Por Dios bén naban, rniabeen lüj guna diidxli. Guna bal lüjn naj Cristo, Xi'n Dios.

⁶⁴ Badxi' Jesúsán rëbaman:

— Waliquil. Rni tëën lëjt, zuguiaadi Bén guxhaal Dios zojbaman xladbee Dios bén rajp guialrniabee abi' zuguiaa tëëdi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rëbaman:

— Diosan caneeguijdx bén guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rnieeguijdxaman Dios.

⁶⁶ Yan, ¿xhie nadi?

Badxi' ree bën guinan rëb reeman:

—Rayal guiëtix.

⁶⁷ Dxel bacojþ xhiejn reeman lojman, gudijn reeman laaman, yu' tõe reeman wëëz ro'man,

⁶⁸ rëb reeman lojman:

—Bal lüjn naj Cristo, guneeya' chu gudin lüj.

Rëb Bëd ad nünbeetaman Jesús

(Mr. 14:66-72; Lc. 22:56-62; Jn. 18 :15-18, 25-27)

⁶⁹ La'tgaj zojb Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

⁷⁰ Per Bëd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

⁷² Per Bëd gurexuuman stijb, xt baza'taman Dios, rëbaman:

—Ad nünbeetan bën guin.

⁷³ Dxel ad gojct xchej, gubig ree bën riga' yagaj loj Bëd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

⁷⁴ Per Bëd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guid.

⁷⁵ Abi' basaaladxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

27

Binë reeman Jesús loj Pilato

(Mr. 15:1; Lc. 23:1-2; Jn. 18 :28-32)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güin reeman din guiët Jesús.

² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, bën bayü Jesús, chi baguiaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel,

⁴ rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczí yaguieenan, ¡lüj gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxé' ree milia guin lën lod ru gon, din con laan bio' bën guiët.

⁷ Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit.

⁸ Zeel xt yan la guidxliuj guin Yuj Rejn.

⁹ Zian gojc cumplid ni guneé Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman,

¹⁰ abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn. 18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetçzi radxi'man.

¹³ Dxel rëb Pilato lojman:

—¿Nid riguejnl gra ni canee reeman contr lüj ya?

14 Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn.18 :38-19:16)

15 Lèn ree dxej lanij, ruslaa gobernador Pilato tijb Bén yu' ladxguuib Bén guiëb ree bénguiedx guin laa, zi'c naj xcostumbr reeman.

16 Lèn ree dxejzii yu' Barrabás ladxguuib, tijb Bén nünbee ree bejn niz ni niz guie.

17 Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, Bén rëb ree bejn naj Cristo?

18 Rëbaman zian guial gogbeeman ganaxzi guialnadédlojn zeel bayü reeman Jesús.

19 La'tgaj zojb Pilato lod rijnman guialguxtis, bidxin xruson lacheelaman, rëbaman lojman: “Adxhie güünnël Bén guin achet dol rajpaman, din dád nadxuudx gune'xchalan laaman nuche.”

20 Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman.

21 Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

22 Abi' rëb Pilato loj reeman:

—¿Xhieza günnë'n Jesús, Bén rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

23 Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

24 Chi baguiaa Pilato guial achet rile' güünman, al mazri naquie' cayüjn ree Bén guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët Bén guie, xcwentidan.

25 Badxi' gra ree Bén guinan rëb reeman:

—¡Du guijcan, në guijc du xi'n'an cwiban guial guiëtaman!

26 Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

27 Zianz xsuldad ree gobernador guin binë reeman Jesús lèn palas lod bado'p gra ree suldad, gadëd lod za'man.

28 Dxel gulëë reeman xabaman bascajcw reeman laaman tijb lajd xnia.

29 Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree Bén Israel!

30 Abi' rucojpx xhiejn reeman lojman, laagajc tëë yag ni ca'man rugaz reeman guijcaman.

31 Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn.19 :17-27)

32 Chi zinë reeman Jesús, badxaagloj reeman tijb Bén Cirene, laman Simón, abi' been reeman laaman naguiejn byaaman xcrüjz Jesús.

33 Chi bidxin reeman tijb luar la Gólgota (rën guiëban Xluar Calaver),

34 ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

35 Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan.

36 Dxel gurej reeman yagaj din gap reeman laaman.

37 Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

38 Në tio'p xin gubaan bacaa reeman loj crüjz, tijbix xladbee Jesús stijbix xladruvejsaman.

39 Abi' ree Bén rdëd, rnieeguidx reeman Jesús, runij guijc reeman,

40 rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

⁴¹ Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

⁴² —Baslaax ben ren ree, abi' ad rajct ruslaa laagajquix. Bal wali najx xrey ree bén Israel, yaguaiajtix loj crüjz guin, din yaliladx reex.

⁴³ Rililadxix Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

⁴⁴ Abi' nëgajc ree xingubaan ca cwë'man ruze' laaman.

Güjt Jesús

(Mr. 15:33-41; Lc. 23:44-49; Jn. 19 :28-30)

⁴⁵ Dxel diizd garol dxej bicajy loj guidib guidxliuj, xt raca choon wadxé.

⁴⁶ Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëëladxil naj?

⁴⁷ Yu' ree bén za' yagaj, chi bigujejn reeman, rëb reeman:

—Laaman cabejdx Elías, bén badëë xtiidx Dios loj ree bejn.

⁴⁸ Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan.

⁴⁹ Per rëb los demazri reeman:

—Basa'nx, din yaguaiaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel güjtaman.

⁵¹ Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guiajro'.

⁵² Guiáad ree baa bixal reen, abi' zien ree bejn bén naj xbejn Dios, bén ma güjt ree baban.

⁵³ Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bén guin.

⁵⁵ Zien ree béngunaa guzanal Jesús diizd Galilea, bén been tëë ree laaman yudar, za' reeman zijt ruguiaa reeman ni cayajc.

⁵⁶ Loj reeman no'ch María Magdalena, në Li xniaa Santiaaw con Xiëb nëtëë xniaa ree xi'ngaan Zebedeo.

Biguie'ch Jesús

(Mr. 15:42-47; Lc. 23:50-56; Jn. 19 :38-42)

⁵⁷ Chi gure guiaal, bidxin tijb benrijcw laman Xiëb, bén Arimatea, në laaman binal Jesús.

⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman.

⁵⁹ Abi' cwa'man cuerp guin batüübaman tijb lajd naya.

⁶⁰ Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman.

⁶¹ Abi' zojb María Magdalena con stijb bén la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bénfarisew, bigneenë reeman Pilato,

⁶³ rëb reeman lojman:

—Dad, rasaaduladxan, chi ziz naban bén rusquiee ni, rëbaman guial chi gac choon dxej yabanman.

⁶⁴ Zeel gunabee guiaawdxich ro' baa guin xt chi gac choon dxej, chitëë gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxich ro' baa guin zi'c rëndi.

⁶⁶ Abi' zë reeman, dxel basiaawdxich reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn. 20 :1-10)

¹ Chi gudëd dxej raziiladx ree bejn, bareguiaal chidumingw, María Magdalena con stijb bén la gajc Li biquiaa reeman ro' baa guin.

² Dxel bi't tijb xudoxh, guial biguiajt tijb xianjl Dios diidz xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan.

³ Dád rliajman bacha' zi'c chi rē'p nijs, guíáad xabaman naquichbējn.

⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj.

⁵ Dxel rēb anjl guin loj ree béngunaa guin:

—Ad rdxebidi, ragbeen cayguilidi Jesús bén cwa loj crūjz.

⁶ Per achutri laaman guie, ma babanman zi'c naman. Gol guida nial din guguaaadi lod gudixh reeman laaman.

⁷ Yan, gol baxüün gol bicojn ree xbejnman guial ma babanman, ma nedaman lojdi zégajman Galilea, ni guguaaadi laaman. Ni nezan naj ni rugojnan lējt.

⁸ Dxel cari da't baza reeman ro' baa guin rdxeb reeman rabaa tēē reeman, ruxüün reeman zia reeman zicojn reeman xbejn Jesús.

⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man,

¹⁰ abi' rēbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rēb ree suldad

¹¹ La'tgaj zia ree béngunaa guin, nē tio'p choon ree suldad cayajp ro' baa guin zē luguiedx guin zicojn reeman bixhioz rniabee ree bixhioz gra ni goc.

¹² Dxel wej ree bixhioz rniabee guin bigneenē reeman guxtis Israel ree persi baya'n reeman diidx xhie güün reeman. Abi' dad zro' milia badēēd reeman loj ree suldad guin,

¹³ rēb reeman:

—Con gol güjdx loj ree bejn: “Guxhin la'tgaj nadoodyēsan, bi't ree xbejn Jesús abi' gulan reeman xcuerpaman.”

¹⁴ Abi' bal gagbee gobernador, dunujn yaneenē' laaman chitēē xhie güünnēman lējt.

¹⁵ Dxel cwa' ree suldad guin milia guin abi' been reeman zi'c rēb reeman. Laan naj diidx ni nare'ch loj ree bén Israel xt yan.

Rxhiaal Jesús bén naj ree apóstoles

(Mr.16:14-18; Lc.24:36-49; Jn.20:19-23)

¹⁶ Guidxiptib ree xi apóstoles Jesús, wej reeman Galilea, guijc tijb guia' lod rēb Jesús che reeman.

¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct.

¹⁸ Dxel bibig Jesús loj reeman, rēbaman:

—Dios ma baneē gra guialrniabee din ganabeen xanyabaa nē loj guidxliuj.

¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman nē por xSprijtaman,

²⁰ gol balüü tēē reeman din guzoob reeman diidx gra ni ma rnin lējt. Abi' naj gazunē' lējt gradxejczy xt chi nit guidxliuj. Amén.

Xtiidxza'c Jesucrist ni bacaa San Marcw

Rzuloj Waj ruliüman xtiidxza'c Jesucrist

(Mt. 3:1-12; Lc. 3:1-9, 15-17; Jn.1 :19-28)

¹ Ze guzuloj xtiidxza'c Jesucrist, Xi'n Dios.

² Guyu tijb bén badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bén ned lojl,

bén güünchaaw xnejzil.

³ Rguien cha' tijb bén rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

⁴ Zian bi't Waj bén baroobnijs bejn ree, guzuman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman.

⁵ Gra ree bén zojb niz Judea, në ree bén Jerusalén brii reeman zicaagdiajg reeman ni rniece Waj, abi' rxhioobdol reeman. Zianz ruroobnijs Waj laa reeman loj guiiw Jordán.

⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn.

⁷ Chi guneenëman bejn ree, rëbaman:

—Xichan zëëd tijb bén mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon.

⁸ Naj curobnijs lëjt con nijs, per laaman guroobnijs lëjt con xSprijt Dios.

Riobnijs Jesús

(Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán.

¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman.

¹¹ Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

Been xindxab Jesús prueb

(Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx.

¹³ Ni guzuman tiuu dxej tiuu guiaal, loj ree bedoxh. Abi' been xindxab laaman prueb chitëë nuzoobaman xtiidx Dios, guiaad ree xianjl Dios gunaj laaman.

Rzuloj Jesús ruliüman bejn ree niz Galilea

(Mt. 4:12-17; Lc. 4:14-15)

¹⁴ Chi mal guyu Waj ladxguuib, wej Jesús niz Galilea bigneeman xtiidxza'c Dios,

¹⁵ rëbaman:

—Ma bidxin dxej zëëd xguialrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

Rbejdx Jesús tajp ree bén gac xbejnman

(Mt. 4:18-22; Lc.5:1-11)

¹⁶ La'tgaj caza Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl.

¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayüjnchaaw xguijxh reeman.

²⁰ Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiaad laa reeman zinal reeman Jesús.

Rabëë Jesús xindxab luxdoo tijb bejn

(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree bén Israel culüüman laa reeman.

²² Dád radxa loj reeman zi'c rnieenëman laa reeman guial rulüüman laa reeman zi'c tijb bën rniabee, ad rulüütaman zi'c rulüü ree mextr rajc ley.

²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rën con dunujn, Jesús bën Nazaret? ¿Zëëdiil ya zidganijtil dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—¡Bacwëëz ro'l, barii luxdoo xin guin!

²⁶ Abi' been xindxab guin xin guin zi'c bën rëjtya', zianz gurixdiajx rejs, bariix luxdoo xin guin.

²⁷ Graczi ree bën riga' dád badxaloy reeman, riniabdiidx loj lasa' reeman rëb reeman:

—¿Xhie ree nicüban rulüü bën guin? ¡Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd

(Mt. 8:14-15; Lc. 4:38-39)

²⁹ Bariiz reeman lën yadoo guin, binë Jesús Jacob con Waj lidx Simón con Andrejs.

³⁰ Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman.

³¹ Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloy cudëëdaman ni gaw reeman.

Rayüjn Jesús zien ree bënragxuu

(Mt. 8:16-17; Lc. 4:40-41)

³² Chi ma gurej guiaal, binë reeman bënragxuu ree lod za' Jesús, në ree bën yu' xindxab luxdoo.

³³ Graczi ree bën luguiedx guin bido'p ruyu lod za' Jesús.

³⁴ Bayüjn Jesús zien ree bën rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

Rulüü Jesús xtiidx Dios niz Galilea

(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczy bejn zojb, persi gurejdx gunabaman Dios.

³⁶ Abi' Simón con ree xcompniaraman bigdiil reeman laaman.

³⁷ Chi badxejl reeman laaman, rëb reeman lojman:

—Gra ree bejn cayguuil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree bën Israel guidib niz Galilea babëë tëëman xindxab luxdoo ree bejn.

Rayüjn Jesús tijb bën rajc guialguijdx la lepra

(Mt. 8:1-4; Lc. 5:12-16)

⁴⁰ Tijb bën rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bën guin abi' baya xcuerpaman.

⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bën guin chi ziaman guzuloy catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zojb. Per gra lad rza ree bejn rej reeman lod za'man.

2

Rayüjn Jesús xin nëjt xcuerp

(Mt. 9:1-8; Lc. 5:17-26)

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj,

² tibrajtzi bido'p zien da't reeman lod za'man, xt ni'quid rdaant ro' port chu' reeman, guiaad laaman culüüman laa reeman xtiidx Dios.

³ Dxel bidxin tajp ree bejn yagaj lejn reeman tijb xin nëjt xcuerp.

⁴ Per ad gojct niunë reeman laax lod za' Jesús guial Bén guixiuj guidxa. Abi' guxhal reeman gujcx yu lod za'man persi gulet reeman xinragxuu guin guidib ni naga'x loj xt lod za' Jesús.

⁵ Chi baguiaa Jesús guial rliladx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zobj tio'p choon ree mextr rajc ley, been reeman xgab naladx reeman:

⁷ “¿Chexc zeel rnice xin guin zian? ¿Chexc zeel rüjnx mazri xin zobjloj guial loj Dios? Achutctzi rajc rüjn perdon dol tijbzi Dios.”

⁸ Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian?

⁹ ¿Conin ad nawëëgt gac, guial guiën loj bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”?

¹⁰ Per yan gulün lëjt guial Bén guxhaal Dios rajpaman guialrniabee loj guidxliuj guie din güünman dol ree perdon. Dxel rëbaman loj xinragxuu guin:

¹¹ —Lüj rnin, bixche, baca' ni go'til loj baguiaj lidxil.

¹² Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree Bén riga' yagaj. Abi' gra reeman badxaløj, ruza't reeman Dios zagdxe, rëb reeman: —Ni'qui tijb ad waguiaat ree zi'c naj ni cayguiaa ree yan.

Rbejdx Jesús Leví

(Mt. 9:9-13; Lc. 5:27-32)

¹³ Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios.

¹⁴ Chi cadëdaman, baguiaaman Leví xi'ngaan Alfeo, zobjbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵ Dxel chi cayaw Jesús lidx Leví con zien ree Bén ruquijx impuest në ree Bén ad nabant zi'c rën Dios, gra reeman zobjnë Jesús xan mex con ree xbejnman, guial zinal zien ree bejn laaman.

¹⁶ Chi baguiaa ree Bénfarisew con ree mextr rajc ley guial cayawnë Jesús Bén guin ree, rëb reeman loj ree xbejnman:

—¿Chexc zeel rawnë xmextridi Bén ruquijx ree impuest në ree Bén dol?

¹⁷ Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, Bénragxuu ree, laa reeman riaadx doctor. Ad zialtan par ree benza'c, zialtan par ree Bén dol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Lc. 5:33-39)

¹⁸ Lën ree dxej zii guba'n ree xbejn Waj Bén ruroobnijs bejn ree, në ree Bénfarisew. Abi' yu' ree Bén gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree Bénfarisew?

¹⁹ Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman.

²⁰ Per guidxin dxej chiquiedix loj reeman, abi' chi guidxin dxej guin dxel guiba'n reeman.

²¹ 'Acht Bén rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin.

²² Ad rgu' tëët bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree Bén Israel

(Mt. 12:1-8; Lc. 6:1-5)

²³ Tijb dxej raziiladx ree Bén Israel, cadëd Jesús con ree xbejnman loj guiniaa lod yu' trigo, abi' ree xbejnman guzuløj cagui'ch reeman trigo guin chi cadëd reeman.

²⁴ Dxel rëb ree Bénfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

²⁵ Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

²⁶ Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

²⁷ Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn.

²⁸ Abi' naj, guial najn Bén guxhaal Dios, ra'pan guialrniabee dxej raziiladx ree bejn.

3

Rayajc tijb xin naxü'n tibladyaa

(Mt. 12:9-14; Lc. 6:6-11)

¹ Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa.

² Abi' ree bén yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús.

³ Dxel rëb Jesús loj xin naxü'n yaa guin:

—Bisu, guzuj galay guin.

⁴ Abi' rëbaman loj ree bén guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman.

⁵ Dxel rdxe'ch Jesús ruguaaman loj gra reeman, dád gyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan.

⁶ Chi baza ree bénfarisew guin, zianz baya'n reeman diidx con ree xbejn Herodes din gugüjt reeman Jesús.

Zien ree bejn riga' ro'nijsdoo

⁷ Per Jesús zë gajcaman ro'nijsdoo Galilea con ree xbejnman. Zien da't ree bén Galilea con ree bén Judea binal laaman,

⁸ në ree bén Jerusalén con ree bén Idumea, në ree bén zobj zatiblad ro' guiwro' Jordán, në ree bén Tiro con ree bén zobj niz Sidón. Dád zien ree bejn wej lod za' Jesús guial gogbee reeman ni rüjnman.

⁹ Zeel rëbaman loj ree xbejnman din guzujsin reeman tijb barcw par laaman chitëë gutëë ree bén guin laaman.

¹⁰ Guial ma bayüjnman zien ree bejn, zeel rbig gra ree bénragxuu lojman din guqui' reeman laaman.

¹¹ Guíaad ree bén yu' xindxab luxdoo chi ruguaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

¹² Per gunabeeman xindxab guin ree chitëë guiëb reex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wë'p Jesús tijb rugua', abi' gurejdxaman gra ree bén guleman. Zianz wej reeman,

¹⁴ loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios.

¹⁵ Abi' badëëman guialrniabee din yayüjn reeman bénragxuu ree yabëë tëë reeman xindxab luxdoo ree bejn.

¹⁶ Bén guie ree naj guidxiptio'p ree bén gule Jesús: Simón bén gulëëljaman Béd,

¹⁷ Jacob con Waj, bén naj ree xi'n Zebedeo, gunee Jesús laa reeman Boanerges (rën guiëban, xi'n guziaaw);

¹⁸ në Andrejs, Filip, Tol, Matew, Tumajs con Jacob xi'n Alfeo, në Tadeo, nètëë Simón bén bi'ch loj ree bén Cananistas,

¹⁹ con Judas Iscariote bén bayü Jesús.

Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zobjaman.

²⁰ Dád zien ree bejn bido'p yagaj stijb, xt ni'quid bile't najw Jesús con ree xbejnman.

²¹ Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

²² Abi' ree mextr rajc ley bén zëed ree Jerusalén rëb reeman:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

- ²³ Dxel gurejdx Jesús laa reeman, rëbaman:
—¿Xhienaa yabëë sataná's lasa' xindxab gajquix?
- ²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrni-
abee reeman,
²⁵ ziangajc tijb famil, bal rdilné lasa' reeman, nayob la' lasa' reeman.
²⁶ Yan, ziangajc bal sataná's su contr lasa' xindxabgajquix, zala' lasa' reex abi' wed yagaj
lox xguialrniabee reex.
²⁷ 'Abi' achut zajc chu' lidz tijb béngojl da't din cwanman gra xieenman bal id zaxhii
xgajman laaman. Zian zile' cwanman ni rajpaman.
²⁸ 'Naj rni lojdi guial yu' perdon par gra dol ni rüjn bejn, yu' tëë perdon par gra
diidxguijdx ni rníee bejn chutëëz.
²⁹ Per Bén guinieeguijdx xSprijt Dios, ad yu't dxej gacaman perdon, ma banijtaman loj
Dios.
³⁰ Rëb Jesús zian guial rëb reeman yu' xsprijt xindxab luxdooman.
Xniaa Jesús con ree bijchaman
(Mt. 12:46-50; Lc. 8:19-21)
- ³¹ Hor guin bidxin xniaa Jesús con ree bijchaman yu' lod za'man, per ad bile't niu reeman
zeel guxhaal reeman Bén chignee laaman.
³² Dxel ree Bén zojbnë laaman yagaj bagojn reeman laaman, rëb reeman:
—Laa xniaal con ree bijchil za' lule' guin cayguil reeman lüj.
³³ Badxi' Jesús xtiidx reeman rëbaman:
—¿Chunin naj da nan con ree da bichan?
³⁴ Dxel baguiaaman Bén zojb ree gadëd lod zojbaman, rëbaman:
—Bén guie ree naj da nan con ree da bichan,
³⁵ din graczi ree Bén rüjn ni rën Dios, laa reeman naj da bichan, da zanan në da nan.

4

Xcwent Bén rtie'ch bin

(Mt. 13:1-9; Lc. 8:4-8)

- ¹ Zatijb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod
za'man zeel wë'paman loj tijb barcw yu' lojnijs guin, abi' gurejman lojn guiáad ree Bén guin
riga' reeman ro' nijs guin.
² Zien ree ni balüüman laa reeman, rüman laan loj reeman zi'c cwent, loj ree ni culüüman
laa reeman rëbaman:
³ —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman.
⁴ Chi catie'chaman laan, ta'nán biajb lunejz abi' bidxin ree biguijn gudaw reeb laan.
⁵ Zata'nán biajb loj ree guiaj lod ad riga't zien yuj, abi' cari gulejnan guial ad zient yuj
riga'.
⁶ Per chi gunan gubijdx, bigoolan abi' guial ad zro't liujn yu', gubidxan.
⁷ Zata'nán biajb loj ree yaquiëjch. Abi' chi guni'san, banidloj yaquiëjch guin laan, abi' ad
cwat ladan.
⁸ Per zata'nán biajb loj yuj za'c, abi' dád gojcan, yu' ni cwa gajlbichii, yu' ni cwa gayojn
yu' tëë ni cwa tibgayuu.
⁹ Rëb tëë Jesús loj reeman:
—Bén rën gucaagdiajg, gol bacaagdiajg.
Chexc zeel ruliüü Jesús con cwent ree
(Mt. 13:10-17; Lc. 8:9-10)
- ¹⁰ Chi ma baya'nnë Jesús zata'nz ree bejn con guidxiptio'p ree xbejnman, dxel gunabdi-
dx reeman xhie rën guiëb cwent guin.
¹¹ Badxi'man laan rëbaman:
—Dios ma basa'n lëjt din chignia'di xhienaa naj xguialrniabeeman ni goc naguie'ch par
lëjt, sa'n ree Bén ad rililadxt xguialrniabeeman, con ganaxzi ree cwent naj guial gulün laa
reeman.
¹² Din majsi rani loj reeman, per ad zuguaat reeman, majsi riguejrn reeman, per ad
zignia't reeman chitëë yayejcn reeman loj Dios abi' güünman perdon xtol reeman.
Rusignia' Jesús xcwent Bén rtie'ch bin
(Mt. 13:18-23; Lc. 8:11-15)
- ¹³ Abi' rëb Jesús loj reeman:
—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi?
¹⁴ Bén gutie'ch bin guin, laaman naj zi'c Bén rtie'ch xtiidx Dios.

¹⁵ Bin białj lunejz, naj zi'c ree bėn riguiejn xtiidx Dios, per rdxin gajc xindxab rquiedix laan luxdoo reeman.

¹⁶ Yu' ree bėn naj zi'c bin białj loj ree guiaj. Riguiejn reeman xtiidx Dios abi' dád nix ru luxdoo reeman riguiejn reeman laan.

¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din gũn reeman laa reeman ni mal por xtiidx Dios, laa rusa'n gajc reeman ni riladx reeman.

¹⁸ Yu' tēē ree bėn naj zi'c bin ni białj loj yaquiejch. Riguiejn reeman xtiidx Dios,

¹⁹ per ru reeman xgab por ree ni riga' loj guidxliuj guie. Rusquiee guialnaza'c laa reeman rėn reeman gap reeman graloj. Abi' guial yu' xgab guin guijc reeman, zianz rucwēēz rucaagdiajg reeman xtiidx Dios, abi' achet sirv rũjn ni rucaagdiajg reeman.

²⁰ Per yu' ree bėn naj zi'c bin białj loj yuj zagdx, ridxga' reeman laan con guidib luxdoo reeman. Rũjn reeman zi'c rėn Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

Achet ni naguei'ch yu'
(Lc. 8:16-18)

²¹ Abi' rėb Jesũs loj reeman:

— Achut bėn ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib.

²² Din achet ni naguei'ch yu' ni ad zaguiet ad yu' tēēt ni ralan ni ad zagbeet bejn.

²³ Bėn rėn gucaagdiajg, gol bacaagdiajg.

²⁴ Rėb tēē Jesũs:

— Gol been xgab por ree diidx ni cagueiejndi. Bal ridxga'di xtiidx Dios, mazri gustėdguienman lėjt.

²⁵ Din bėn ma rignia' xtiidx Dios, chignia'man mazri. Per bėn ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rėb tēē Jesũs loj reeman:

— Xguialrniabee Dios naj zi'c rzajc bėn rxũbin loj xguiniaaman.

²⁷ Din majsi naga'yėjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan.

²⁸ Din yuj guin gajc rusni's laan, yaloj rliejnan najn tijb gui'xhdoo, dxel ririin dojn, zianz rtia ladan.

²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rėb tēē Jesũs:

— Ćxhienaag ganin naj xguialrniabee Dios, o xhienaag gũn diidx lojdi din chignia'di xhienaag naj xguialrniabeeman?

³¹ Rnin lojdi guial xguialrniabee Dios naj zi'c naj xhaj moxtajs. Chi rxũbin reeman laan. Laan naj ni mazri ni dobėz loj gra ree bin yu' loj guidxliuj.

³² Per chi ma guxũbin reeman laan, rni'san rajcan mazri narooj loj gra ree cwaan, xt rajc rũjn xguixbitia's ree biguijn xidxan.

Balıü Jesũs con ganax cwent

(Mt. 13:34-35)

³³ Balüü Jesũs laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman.

³⁴ Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdx xhie rėn guiėb ree ni rėbaman.

Racwēēz Jesũs bidoxh

(Mt. 8:23-27; Lc. 8:22-25)

³⁵ Dxej zii, chi gure guiaal, rėb Jesũs loj ree xbejnman:

— Yo' ree zatiblad ro' nijs guin.

³⁶ Dxel basa'n reeman bėn riga' ree yagaj, wė'p reeman loj barcw ni yu' Jesũs zinė reeman laaman con ree barcw ren.

³⁷ Dxel brii bidoxh loj nijs guin, xt guzuloj cadxa nijs loj barcw guin.

³⁸ Per Jesũs naga'yėjsaman loj barcw guin tijb luar naj xijchan, nucuugaman tijb almoad. Dxel bacwėn reeman laaman rėb reeman:

— ¡Mextr! ĆNid yu'l xgab ya? ¡Ma cayzėeb ree xan nijs!

³⁹ Abi' bixche Jesũs, bacwėzaman bidoxh guin rėb tēēman loj nijs guin:

—jBacwëëz, bayajcdxe!

Dxel bayajcdxe bi guin con nijs guin.

⁴⁰ Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

⁴¹ Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ruzoob xtiidxaman?

5

Rayüjn Jesús tijb xin yu' xindxab luxdoo

(Mt. 8:28-34; Lc. 8:26-39)

¹ Chi badxin Jesús con ree xbejnman zatiblad ro' nijsdoo guin, xdajn ree bën Gadara,
² baguiajzi Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa,

³ guial nabanx ni. Achutdzi rajc rixhii laax ni'qui con caden.

⁴ Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan.

⁵ Dxejz guiaal rizax niz dajn con lad ree baa, rbixdiajx rguuilguijdx laagajquix con guiaj.

⁶ Zijtri baguiaax Jesús, baxüünx bigchaaglojx laaman abi' bazuxibix lojman.

⁷ Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rëbix zian, guial cayëb Jesús lojx:

—jXindxab, barii luxdoo xin guin!

⁹ Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

¹⁰ Abi' rëbix lojman chitëë guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb.

¹² Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

¹³ Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijis, lod gu' reeb nijs zianz güjt reeb.

¹⁴ Guiáad ree bën baguajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc.

¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman.

¹⁶ Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin.

¹⁷ Dxel guzuloj rëb reeman loj Jesús din yazaman niz ladx reeman.

¹⁸ Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman.

¹⁹ Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

Rayajc xi'n Jairo në béngunaa bagaal xab Jesús

(Mt. 9:18-26; Lc. 8:40-56)

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman.

²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaa-man Jesús, bazuxibaman lojman,

²³ abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman.

²⁵ Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn.

²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman.

²⁷ Chi biguejnman gra ni rüjn Jesús, gudédaman lad ree bén guin, gubigaman niz xijchaman dxel bagaalaman xabaman.

²⁸ Guial gunaladxaman: “Gugalzan xabaman, ma bayajc gajcan.”

²⁹ Loj hor zii gajc gulëjz białbaman rejn, abi' gogbeeman ma bayajcaman.

³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bén guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiaad lüj rniabdiidxil chu baqui' xabil.

³² Per Jesús ruguiaaman gra lad din guguiaaman chu baqui' laaman.

³³ Abi' guidib rniş béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman.

³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxe. Ma bayajquil guialguijdx ni goquil.

³⁵ Sta canee Jesús zian, chi bidxin ree bén guza lidz Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

³⁶ Per chi biguejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bén riga' laaman, Bëdzi, con Jacob, con Waj bijch Jacob.

³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman.

³⁹ Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniam con ree bén zinëman, lod naga' bindo guin.

⁴¹ Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

⁴² Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'.

⁴³ Per gunabee Jesús laa reeman chitëë chu loj guiëb reeman ni goc, gunabee tëëman gudëëd reeman ni gawim.

6

Radxin Jesús Nazaret

(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman.

² Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bén cucaagdiajg dád badxa loj reeman ni rnieeman, abi' rëb reeman:

—¿Ban basiid bén guin gra ni rnieeman? ¿Ban gulëëman guialrignia' guin abi' chu badëë guialrniabee zeel rüjnman milagr guin ree?

³ ¿Nid laaman naj bén carpinter ya, xi'n Li abi' ree bijchaman naj Jacob, Xiëb, Judas, në Simón? Guiaad ree bizanman zojb luguiedx guie.

Abi' ad bidxga't reeman Jesús.

⁴ Per rëbaman loj reeman:

—Guidibczi rajp reeman respejt tijb bén rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nüjn Jesús zien ree milagr yagaj. Bëłzi ree bënragxuu bayüjnman, badxiib yaaman guijc reeman.

⁶ Dád badxalojman guial ad bililadx reeman laaman. Dxel zëman guiedx naj ree gajxh, ziglüüman bejn ree.

Rxhial Jesús guidxiptio'p ree xbejnman chigliüü reeman xtiidx Dios

(Mt. 10:5-15; Lc. 9:1-6)

⁷ Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xindxab ree luxdoo ree bejn.

⁸ Dxel gunabeeman din achetdzi chinë reeman par runejz, ni'qui guijxh, ni'qui guialraw, ni'qui milia, tijbzi yagriadx reeman,

⁹ con xgurëch reeman, con tijbzi lajd najcw reeman.

¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin.

¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen guial ad rënt reeman guzoob reeman

diidx. Din naj rni lojdi, guial dxej ni yadëed ree bejn cwent loj Dios mazri casti narooß yayal reeman guial loj ree bën Sodoma në Gomorra.

¹² Zianz brii reeman ziguiedx reeman loj ree bejn guial rayal yayüjn reeman xgab por xtol reeman.

¹³ Abi' rabëe reeman zien ree xindxab luxdoo ree bejn, zien tëë ree bënragxuu gudëeb reeman sejt, abi' bayüjn reeman laa reeman.

Guýt Waj bën baroobnijs bejn ree

(Mt. 14:1-12; Lc. 9:7-9)

¹⁴ Chi biguiejn rey Herodes ni rüjn Jesús guial ruza't ree bejn laaman guidibczi, rëb reeman:

—Waj, bën baroobnijs bejn ree ma baban, zeel rajpaman guialrniabee rüjnman milagr ree.

¹⁵ Per yu' reeman rëb:

—Elíasan, bën rudëe xtiidx Dios loj ree bejn.

Yu'za reeman rëb:

—Tijb bën rudëe xtiidx Dios loj ree bejnan lasa' ree bën gocli.

¹⁶ Chi biguiejn Herodes rëb reeman zian, rëbaman:

—Waj, xin gunabeen biru' yëjn, laaxan ma baban yan.

¹⁷ Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguuib por Herodías. Herodías naj xbëngunaa Felip bijch Herodes. Per Herodes cwa'man Herodías.

¹⁸ Abi' guial rëb Waj loj Herodes:

—Ad laat tia' xbëngunaa bijchil.

¹⁹ Zeel bidxe'ch Herodías Waj, guyënman nugüjtaman laaman. Per ad riletan,

²⁰ din rdxeß Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nüjnnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

²¹ Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea.

²² Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

²³ Xt badëe xtiidxaman gudëëman ni guiniabtzim, majsi garol ni rajpaman.

²⁴ Dxel bariim bignabdiidx loj xniam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruroobnijs bejn ree.

²⁵ Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bën ruroobnijs bejn ree, guneelan loj tijb pliajt.

²⁶ Dád guyu naya Herodes, per mal badëed xtiidxaman guidib loj ree bën riga', zeel ad bile't nibexuuman nudëëman ni gunabim.

²⁷ Dxel gunabee Herodes tijb suldad din chica'x guijc Waj.

²⁸ Zianz wej suldad guin lën ladxguuib guin, gutü'x guijc Waj badxe'xan loj pliajt binëxan lojm. Dxel bayü loj xniamin.

²⁹ Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

Ruyaan Jesús gaay mil bejn

(Mt. 14:13-21; Lc. 9:10-17; Jn.6 :1-14)

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman.

³¹ Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bën zia zien tëë ree bën zëed, xt ni'qui guial gaw reeman ad riletan.

³² Dxel Jesús con ree bën naj ree apóstoles zë reeman loj barcw tijb luar lod achut zojb.

³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman.

³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojib niz guie.

³⁶ Gÿjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëëd ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rÿjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëj.

³⁹ Dxel gunabeeman din cwe tibcwaa gaj reeman loj guixya'.

⁴⁰ Zianz gurej reeman zian, yu' lod gure tibgayuu reeman, yu' lod gure tü'pchii reeman.

⁴¹ Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëëman quixtëë loj Dios, gula'man guiadxtil guin badëëman loj ree xbejnman persi gudi's reeman laan loj ree bén riga', gudi's tëëman grop bëjl guin loj gra reeman.

⁴² Graczi reeman gudaw xt bigdxinladx reeman,

⁴³ abi' staczi bacha reeman chiptio'p dxüm guiadxtil laay con bëjl ni baya'n.

⁴⁴ Loj ree bén gudaw no'ch cost gaay mil xinguaaaw.

Rza Jesús loj nijs

(Mt. 14:22-27; Jn. 6 :16-21)

⁴⁵ Dxel gunabee Jesús guye ree xbejnman loj barcw din tëdgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree.

⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios.

⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin.

⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tëdnejz.

⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman.

⁵⁰ Dád cadxeb reeman por ni cuguaa reeman. Per guneenë Jesús laa reeman rëbaman:

—jGol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guiáad laa reeman dád badxa loj reeman,

⁵² din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

Ryÿjn Jesús bënragxuu ree Genesaret

(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs.

⁵⁴ Naabzi baguiajt reeman loj barcw guin, laa bayünbee gajc ree bejn Jesús.

⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bënragxuu ree lod riguejntzi reeman za' Jesús.

⁵⁶ Bantëëz zëman, majsi guiedx narooob o guiedx dobëz o ranch ree, rguijxh reeman bënragxuu guin ree niz lod tëdaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén bagaal xabaman bayajc.

7

Ni rÿjn persi rÿjn bejn dol

(Mt. 15:1-20)

¹ Tijb dxej, tio'p choon ree bënfarisew con ree mextr rajc ley, bén guza ree Jerusalén, bibig reeman loj Jesús.

² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman.

³ (Din bénfarisew nè gra ree bèn Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin.

⁴ Nè chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quiib reeman re, con vajs, con ree trast guuib, nè xloon reeman riguiib reeman.)

⁵ Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnł zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bèn badëe xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

⁷ Xlia'czi rën da't reeman naj,

abi' rullüü reeman bejn ree ganaxzi ni rbëëguijc ree bénguidxliuj.

⁸ Yan, rusa'ndi xtiidx Dios tibladd persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tibladd.

¹⁰ Rëb Moisejs: “Gojp respejt xdadil con xniaal”, abi’ “Bén guzaal diidxmal guijc xdad o xniaa, rayal guiëtaman.”

¹¹ Per lëjt rëbidi guial zile' guieë bejn loj xDadaman o xniaaman: “Ad zajct günan lüj yudar, ðin gra ni ra'pan naj Corbán” (Corbán rën guieë gran naj par Dios).

¹² Rëbidi, bèn guieë zian, ad zile'tri güün xdad xniaaman yudar.

¹³ Abi' rbëëladixi xtiidx Dios persi zinal xcostumbridi ni rullüü lasa'di, nè zien ree ni ren rüjndi lasa' ree ni guin.

¹⁴ Dxel gurejdx Jesús bèn zien guin ree, rëbaman:

—Gol bacaagdiajg gradi gol bignia' tëë ni ganin:

¹⁵ Ad ni rawt bejn rüjn persi rüjnman dol. Ni ririi ro'man nè ni rüjnman, laan rüjn persi rüjnman dol.

¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bèn guin bayuman lënü, dxel gunabdiidx ree xbejnman xhie rën guieë ni rëbaman.

¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol,

¹⁹ ðin ni raw bejn ad rejtan luxdooan, rejn lënman, abi' rariin?

Zian basignia'man guial ad rüjnt bejn dol por ni rawzaman.

²⁰ Rëbaman:

—Ni ririi ro' bejn nè ni rüjnman, laan rüjn persi rüjnman dol.

²¹ Din guijc bejn zëëd graloj xgab mal, guial rüjn ni dxuudx, guialgubaan, guialrugüjt lasa',

²² guial rzunë béngunaa ren o xinguaaw ren, guialrzëëblad xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', nè guial rüjn ni ad rayalt.

²³ Graczi ree ni guin zëëd guijc bejn, abi' laan rüjn persi rüjnman dol.

Rayajc xi'n tijb bën Sirofenicia

(Mt. 15:21-28)

²⁴ Chi baza Jesús niz yagaj, zëman niz Tiro nè Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman.

²⁵ Din gogbee gajc xniaa tijb bindoo yu' xinxab luxdoo. Abi' wej xniaam lod za' Jesús zianz bazuxibaman lojman.

²⁶ Ad najtaman bèn Israel, najman bèn Sirofenicia. Dxel guzajcaman liaadx loj Jesús ðin yabëëman xinxab guin luxdoo bindoo guin.

²⁷ Per rëb Jesús lojman:

—Badëëdxgaj mod gaw yaloj ree xindoo, ðin ad rayalt chiquied bejn guiadxtil loj xi'nman ðin gudëëman laan gaw ree bé'cw.

²⁸ Badxi' bèn guinan rëbaman:

—Waliquil, Dad, per nè ree bé'cw raw xguiadxtil laay reem ni ryajb xan mex.

²⁹ Dxel rëb Jesús:

—Laaqui guneel. Ma zajc yaguiajl, ma barri xinxab guin luxdoo xi'nl.

³⁰ Chi badxin lidx bën guin, baguiaaman laa bindo guin naga' loj loon, ma barii xindxab guin luxdoom.

Bayajc tijb bën nacwa't ad rniee tēētaman zagdxe

³¹ Baza Jesús niz Tiro, gudēdaman niz Sidón, nē loj ree guiedx riga' Decápolis abi' bidxinman ro'nijsdoo Galilea.

³² Ni bidxinnē reeman tijb xinguaaw nacwa'tix ad rajc tēt rnieex zagdxe. Abi' rēb reeman loj Jesús din gudxiib yaaman guijquix.

³³ Zianz binē Jesús laax tiblax, badxe' xbacwēnman lēn guidiajguix, abi' con xhiejnman bagaalaman lūdxix.

³⁴ Dxel gules lojman xanyabaa, banajladxaman, rēbaman:

—¡Efata! —rēn guiēban: ¡Baxal!

³⁵ Loj hor zii gajc baxal ree guidiajg xin guin, baban lūdxix dxel guzuloj caneex zagdxe.

³⁶ Dxel gunabee Jesús laa reeman chitēē chu loj guiēb reeman ni goc. Per guial rēbaman zian, mazri rū reeman laan loj ree bejn.

³⁷ Dád badxa loj reeman rēb reeman:

—Xi zagdxe naj gra ree ni rūjnman, xt rūjnman persi riguejn ree bën nacwa't, abi' ree bengop rniee reeman.

8

Ruyaan Jesús tajp mil bejn

(Mt. 15:32-39)

¹ Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rēbaman loj reeman:

² —Rayan bën guin ree din ma gojc choon dxej nadxu'nē' reeman guie, abi' ad ca't ni gaw reeman.

³ Abi' bal yaxhalan laa reeman lidx reeman sin gualraw, dool yadaj reeman lunejz, din yu' reeman zēēd zijt.

⁴ Dxel rēb ree xbejnman:

—Per, ¿ban guin yuca'n ni gaw ree bën guin, achutczí bejn zojb niz guie?

⁵ Dxel gunabdiidxaman loj reeman rēbaman:

—¿Bēl guiadxtil ca'di?

Abi' rēb reeman:

—Gajdxan.

⁶ Dxel gunabeeman gurej ree bën guin luyuj. Zianz cwa'man guigajdx guiadxtil guin, badēēman quixtēē loj Dios, abi' gula'man laa reen badēēd loj ree xbejnman persi gudi's reeman laa reen loj gra ree bën guin.

⁷ Nēgajc tio'p choon ree bējldoo ca' reeman, abi' badēēman quixtēē loj Dios dxel gunabeeman gudi's reeman nē laa reeb loj ree bën guin.

⁸ Graczi reeman gudaw xt bigdxinlax reeman, abi' staczi bacha reeman gajdx dxüm guiadxtil laay nē bējl ni baya'n.

⁹ Bën gudaw ree naj reeman cost tajp mil. Chi gulox gudaw reeman, dxel bazaadiidxnē Jesús laa reeman.

¹⁰ Zianz guyuman loj barcw con ree xbejnman zē reeman niz Dalmanuta.

Rniab ree bēnfarisew tijb milagr loj Jesús

(Mt. 16:1-4; Lc. 12:54-56)

¹¹ Dxel bidxin ree bēnfarisew, guzuloj cadildiidxnē reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zēēdaman.

¹² Dxel banajladx Jesús, rēbaman:

—¿Chexc zeel rēndi günan tijb milagr? Diidxli ganin, achetczí milagr günan guguaiaadi.

¹³ Dxel basa'nman laa reeman, bayuman loj barcw zatijb, zignē ree xbejnman stiblad ro' nijs guin.

Xlevadur ree bēnfarisew

(Mt. 16: 5-12)

¹⁴ Bayanladx ree xbejn Jesús ninē reeman gualraw, tijbzi guiadxtil ca' reeman loj barcw guin.

¹⁵ Abi' chi rēbaman loj reeman:

—Gol gojp cudad con xlevadur ree bēnfarisew nē xlevadur Herodes.

¹⁶ Dxel guzuloj rēb loj lasa' reeman:

—Naman duloj ree zian guial ad naca't ree guiadxtil.

¹⁷ Abi' gogbee Jesús ni canee reeman, zianz rēbaman:

—¿Chexc zeel rëbidi guial ad ca'tidi guidxtil? ¿Staczi ad rignia'tidi ya? ¿Sta nayaaw xquiarguiejndi ya?

¹⁸ Yu' guialojdi per rulüü ad ruguiaatidi, yu' guidiajguidi per rulüü ad riguejntidi. ¿Nid rusaaladxidi ya?

¹⁹ Chi gudi'san gaay guidxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guidxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

²¹ Dxel rëbaman:

—¿Staczi ad waygnia'tidi ya?

Rayüjn Jesús tijb bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb bén ad ranit loj, rëb reeman loj Jesús din gugaalaman guialojman.

²³ Dxel gunaaz Jesús yaaman gulëëman laaman luguiedx guin, abi' gudëëb xhiejnman guialojman, baqui'man guialojman. Zianz gunabdiidxaman rëbaman:

—¿Rajc ruguiaal ta'n ya?

²⁴ Dxel guzuloj cuguaaman, abi' rëbaman:

—Ruguan bejn ree, per rulüü naj reeman zi'c yag ni caza.

²⁵ Dxel bagaal Jesús guialojman stijb, abi' rëbaman lojman din guguiaadxijchaman, dxel guzuloj cuguaaman zagdx, naynidxuj ma ruguiaaman gra.

²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhiënaag bayajc lojl.

Rëb Bëd guial Jesús naj Cristo

(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bén badëëd xtüidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman

(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

³² Zagdx basignia'man laa reeman. Dxel gulëëcaan Bëd laaman, rëbaman lojman chitëë rëbraman zian.

³³ Per badxi' lojman baguiaa ree xbejnman, dxel gudilëman Bëd rëbaman:

—¡Bisüd lon, Satanás!, din ad por Diost zëëd ree xgab ni rüjnl, rüjnl zi'c naj xixgab bénguidxliuj.

³⁴ Dxel gurejdx ree xbejn Jesús con ree bén riga' yagaj, abi' rëbaman loj reeman:

—Bal chu rën gac da bejnman, ad rayalt güünman zi'c naj xixgabaman. Siibnejzaman gualzi ni tëdzaman abi' guidnalaman naj.

³⁵ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblyaa con Dios.

³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios?

³⁷ Din ad zile't sii bejn xguialnabanman xanyabaa.

³⁸ Din bén yatunë naj në da diidxan niz loj ree bëndol bén ad zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi gualan con xguialrniabee da Dadan con ree xianjlaman.

9

¹ Rëb tëë Jesús loj reeman:

—Diidxliczi ganin, yu' ree bën za' guie, ad zëjtt xt guguiaa reeman gui't xguialrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman.

³ Balaa xabaman bacha', gojcan naquichbëj, achutdzi rguieb lajd zian loj guidxliuj guie.

⁴ Dxel baguiaa reeman Elías në Moisejs cayünë reeman Jesús diidx.

⁵ Abi' rëb Bëd lojman:

—Mextr, jzagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

⁶ Per ad ragbeet Bëd xhienin caneeman guial dád bidxeb reeman.

⁷ Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bën guie naj da Xi'n'an, bën rën da'tan, gol bazoob xtiidxaman.

⁸ Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj.

⁹ La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bën guxhaal Dios.

¹⁰ Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt.

¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaløj Elías gui't?

¹² Badxi'man laan rëbaman:

—Walican yaløj Elías gui't, laaman guzuxnejz gra. Per, ¿chexc zeel ca loj xtiidx Dios guial Bën guxhaal Dios sagdiaj da'taman ad zën tëët reeman laaman?

¹³ Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

Rayijn Jesús tijb xin yu' xindxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman.

¹⁵ Chi baguiaa reeman zëëd Jesús, dád badxa loj reeman abi' baxüün reeman bicajpdioz reeman laaman.

¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

¹⁷ Abi' rëb tijb bën za' yagaj:

—Mextr, zidnë' da xi'n'an lojl guial yu' xindxab luxdoox abi' nusa'nx laax gop.

¹⁸ Bantëëz guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tëë ree layix, dxel ratiaguix. Ma gunaaban loj ree xbejnl din nabëë reeman xindxab guin, per ad gojct reeman.

¹⁹ Zeel rëb Jesús:

—Bën ad rliladxt! ¿Xt goc gazunë'n lëjt gadaan tëën lëjt? Gol tanë xinzii guie.

²⁰ Dxel binë reeman laax lojman. Per chi baguiaa xindxab guin laaman, laa bagüjtya'gajguix xin guin, bareeyujx laax abi' rbixtjüpix ririi tëë bichijn ro'x.

²¹ Dxel gunabdiidx Jesús loj xdadix rëbaman:

—¿Goc guzuløj rajguix zian?

Badxi'man laan rëbaman:

—Diizd xindobëzix.

²² Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

²³ Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

²⁴ Dxel gurixdiaj xdadix rëbaman:

—¡Rliladxan lüj, gognë naj din chililadxan mazri!

²⁵ Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëë, rniabeen lüj din yariil luxdoo xin guin. Ad bal yayejcril luxdoox zatijb.

²⁶ Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix.

²⁷ Per gunaaz Jesús yaax gulesaman laax, dxel guzulix.

²⁸ Dxel bayu Jesús lënu con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

²⁹ Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëedi.

Rugojn Jesús zatijb guial guiëtaman

(Mt. 17:22-23; Lc. 9:43-45)

³⁰ Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj,

³¹ guial culüü ree xbejnman, rëbaman:

—Yayü reeman Bén guxhaal Dios loj ree bén gugüjt laaman, per ni gac choon dxej yabanman.

³² Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zobjloj?

(Mt. 18:1-5; Lc. 9:46-48)

³³ Dxel badxin Jesús Capernaum con ree xbejnman, abi' badxin reeman yu lod zobj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

³⁴ Per achet rëb reeman guial cadildiidx reeman lunejz chu reeman mazri zobjloj.

³⁵ Dxel gurej Jesús, gurejdxaman guidxiptio'p reeman, rëbaman:

—Bal chu bén rën gac mazri bén zobjloj lojdi, rayal güün laagajcaman zi'c tijb bén ad zobjlojt güün tëeman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, rëbaman:

³⁷ —Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man.

Bén ad za't contr dunuj ree za'man con dunuj ree

(Lc. 9:49-50; Mt. 10:42)

³⁸ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxoondi, din bén rün milagr por da guialrniabeen, ad zile't guinieeguijdxaman naj.

⁴⁰ Bén ad za't contr dunuj ree, za'man con dunuj ree.

⁴¹ Chutëez bén gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëed Dios lojman.

Bén ruzaalguiiw bejn din güünman dol

(Mt. 18:6-9; Lc. 17:1-2)

⁴² 'Chutëez bén guiaalguiiw tijb bén qui riladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo.

⁴³ Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü',

⁴⁴ lod ad rëjtt ree bizog lod ad rayü' tëët bajl.

⁴⁵ Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü',

⁴⁶ lod ad rëjtt ree bizog lod ad rayü' tëët bajl.

⁴⁷ Bal laagajc guiaalojl rusajb lüj loj dol, zagdxeli gulëen. Mazri zagdxé chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü',

⁴⁸ lod ad rëjtt ree bizog lod ad rayü' tëët bajl.

⁴⁹ 'Zi'c ru zëd guijc guialraw, ziangajc ree bén riladx naj sagdiaj reeman din gac reeman naya.

⁵⁰ Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëe saquidi zi'c zëd ni ad rüjnt sirv, gol gubajnnë tëe lasa'di zagdxé.

10

Rulüü Jesús xcwent guial rala' lasa'

(Mt. 19:1-12; Lc. 16:18)

¹ Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman.

² Yu' ree bēnfarisew gubig lod za'man. Abi' par güün reeman laaman prueb, gunabdiidx reeman lojman rēb reeman:

—¿Zajc yala' xinguaaw lacheelix ya?

³ Badxi'man laan rēbaman:

—¿Xhie gunabee Moisejs güündi?

⁴ Abi' rēb reeman:

—Cwējb Moisejs yala' xinguaaw lacheelix, per gudēēdix gui'ch tia'man guial ma bala' reex.

⁵ Dxel rēb Jesús:

—Rēb Moisejs gac zian guial nadidi.

⁶ Per guia'xchej chi gule'cchaaw Dios guidxliuj, “beenman xinguaaw con bēgunaa”.

⁷ “Zeel xinguaaw gusa'n xdad xniaax din guibannē lacheelix,

⁸ dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi.

⁹ Zeel, bēnguidxliuj ad rayalt yala'man lasa' ni ma bachajg Dios.

¹⁰ Chi bayu reeman lēnū, gunabdiidx ree xbejnman lojman zatijb, xcwent ni guneeaman.

¹¹ Abi' rēbaman loj reeman:

—Xin rala' lacheel, abi' rtia'x ben ren dolan cayūjn,

¹² ziangajc bal tijb bēgunaa yala' lacheelaman abi' tia' xin ren laaman, dolan cayūjnman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binē ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilē reeman bēn binē ree laa reex.

¹⁴ Chi baguiaa Jesús zian, balenman zeel rēbaman:

—Gol badēēd mod gui't reex lon, ad bal rudxoondi. Din lod rniabee Dios naj par ree bēn naj zi'c laa reex.

¹⁵ Diidxliczi rnin, bēn ad rliladxt xgualrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxinx abi' bazuxibix lojman, dxel gunabdiidx rēbix:

—Mextr za'c, ¿xhie rayal günan din ga'pan guialnaban tiblayaa con Dios?

¹⁸ Badxi' Jesús laan rēbaman:

—¿Chexc zeel nal lon benza'c? Achut naj benza'c, tijbzi Dios.

¹⁹ Lūj rajc ree mandamient, “Ad gugūjtil bejn, ad sunēl bēgunaa ren, ad cwānl, ad cwēēl xtiidx bejn ad gusquiee tēēl, gojp respejt xdad xnial.”

²⁰ Dxel rēbix loj Jesús:

—Mextr, gra ree ni guin cayūnan diidz xindoon.

²¹ Baguiaa Jesús lojx, bayaman laax, rēbaman:

—Per yu' zatijb ni riaadx güünl: bigto' gra ni rajpil, badēēd milia guin loj ree bēnprob, zian gapil gualnaza'c xanyabaa dxel guidnalil naj majsi xhietēēz saquil.

²² Chi biguejn xin guin zian, ad nixt guyu luxdoox abi' dād yu'nayax ziax guial dād xinrijcwan.

²³ Dxel baguiaa Jesús loj gra reeman, abi' rēbaman loj ree xbejnman:

—¡Dād nawēēg naj chu' benrijcw loj xgualrniabee Dios!

²⁴ Dād badxa loj ree xbejnman ni rēbaman. Per rēbaman loj reeman zatijb:

—Xi'n, ¡bēn yu'guijc mazri ni rajpaman, dād nawēēg naj chu'man loj xgualrniabee Dios!

²⁵ Adli nawēēgt tēd tijb camell xan gagux guial chu' tijb benrijcw loj xgualrniabee Dios.

²⁶ Chi biguien reeman diidz guin ree, mazri badxa loj reeman, dxel rniabdiidx loj lasa' reeman, rēb reeman:

—¿Chu zajc laa loj xcasti Dios?

²⁷ Baguiaa Jesús loj reeman, abi' rēbaman:

—Par bejn nawēēgan, per par Dios ad nawēēgtan din par Dios graczan zile' gac.

²⁸ Dxel guzuloj rēb Bēd loj Jesús:

—Dunujn basa'nan graczi ni raya'pan persi zudnaalan lüj.

²⁹ Badxi' Jesúsán rëbaman:

—Diidxiczi ganin lëjt, chutëez bén rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidxxa'c Dios,

³⁰ loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaaman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblayaa con Dios.

³¹ Per dád zien ree bén naj bén yaloj yan, gac reeman bén bigra, guiáad ree bén naj bén bigra yan, gac reeman bén yaloj.

Rugojn Jesús zatijb guial guiëtaman

(Mt. 20:17-19; Lc. 18:31-34)

³² Chi zë reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bén nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

³³ —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tëë reeman naj loj ree bén ad najt bén Israel.

³⁴ Guze' reeman naj, gucojpxhiejn reeman lon, quin reeman gugüjt tëë reeman naj, per yayon dxej yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi gūnan?

³⁷ Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëëdi zi'c naj,

⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bén rayal laan.

⁴¹ Chi biguien zachii xbejn Jesús ni rëb reeman, dád balen reeman Jacob con Waj,

⁴² per gurejdx Jesús laa reeman rëbaman:

—Lëjt ragbee guial ree bén rniabee loj guidxliuj guie, rniabee reeman bejn ree zi'ctzi rën reeman, guiáad ree bén zobjloj rüjnnë reeman bejn ree zi'ctzi rën reeman por guialrniabee ni rajp reeman.

⁴³ Per con lëjt ad rayalt gac zian. Din bal chu rën gac bén rniabee lojdi, rayal güünman sirv lojdi,

⁴⁴ guiáad bén rën gac bén zobjloj, rayal güünman sirv loj gradi zi'c bén nado'.

⁴⁵ Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan ðin gūnan laa reeman sirv, abi' con da guialnabanan gaguixan por xtol zien ree bénguidxliuj.

Rayajc guiaaloy tijb xin ad ranit loj la Bartimeo

(Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bén la Timeo, zobjbx cwë' nejb rniabix carda.

⁴⁷ Chi biguiejnx cadëd Jesús bén Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

⁴⁸ Dád zien ree bejn ridilë laax din yacwëëz ro'x. Per mazri rejs rbidxa'x rëbix:

—¡Xdiaa Davi, baya naj!

⁴⁹ Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús.

⁵¹ Gunabdiidx Jesús lojx rëbaman:

—¿Xhie rënl gûnan por lüj?

Badxi'xan rëbix:

—Mextr, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn. 12 :12-19)

¹ Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman,

² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb.

³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bén guin zinë reeman laab.

⁷ Bidxinnë reeman laab lojman, badxiib xab reeman xijchib, persi gudxibaman laab.

⁸ Zien ree bejn riguijxh xab niz lod rdëdaman, yu' tëë reeman rutüüg zijn persi riguijxh reeman laan niz lod rdëdaman.

⁹ Abi' zi'c ree bén ned, në ree bén nal rbixdiaj reeman, rëb reeman:

—¡Gagnëman dunuj ree yan! ¡Nagle' Bén zëëd por Dios!

¹⁰ ¡Nagle' Bén zëëd nabee zi'c dux béngulal ree rey Davi! ¡Quixtëë dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

Bazaal Jesús diidx guijc yag higo

(Mt. 21:18-19)

¹² Chi bareguiaal, barii reeman Betania. Dxel guzuloj calaan Jesús.

¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiamptanan.

¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

Rabëë Jesús Bén ruto' ree ro' yadooro' Jerusalén

(Mt. 21:12-17; Lc. 19:45-48; Jn. 2:13-22)

¹⁵ Chi bidxin reeman Jerusalén. Dxel guyu Jesús ro' yadooro' Jerusalén rohan, abi' guzuloj caybëëman Bén cuto' ree në ree Bén cazii. Barexguiataman xmex ree Bén ruchaan milia con xyagxhil ree Bén ruto' ree palom,

¹⁶ ad rtiëjtaman xhie chu'në ree bejn ro' yadoo guin.

¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguuil reeman mod xhienaag gugüjt reeman Jesús, guial rdxeb reeman laaman din gra bejn radxalaj ni rulüüman.

¹⁹ Chi ma caxhin, bazanë ree xbejn Jesús Jerusalén.

Tijb yag higo ni gubidx

(Mt. 21:20-22)

²⁰ Chi bareguiaal rsildoo, badëd reeman niz lod zojb yag higo guin, abi' baguiaa reeman ma gubidx diidx liujn.

²¹ Dxel basaalex Bëd ni rëb Jesús, abi' rëbaman lojman:

—Mextr; ꞑbaguiaa yag higo ni bazaalil diidx guijc ma gubidxan!

²² Badxi' Jesúsán rëbaman:

—Gol bililadx Dios.

²³ Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooman, bal rliladxaman, gac ni guneeaman. Zian gacan.

²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan.

²⁵ Guiaad chi ribejdx rniabidi Dios, bal yu' bën rdxe'chidi, gol beenman perdon din ziangajc xDadidi bën yu' xanyabaa güünman perdon xtolidi.

²⁶ Din bal id züjndi perdon, ziangajc xDadidi Bën yu' xanyabaa ad züjntaman perdon xtolidi.

Xguialrniabee Jesús

(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús níz lën yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bën Israel,

²⁸ gunabdiidx reeman loj Jesús, rëb reeman:

—¿Xhie guialrniabee rajpil zeel rüjnl ni guin ree? ¿Chu banee guialrniabee lojl güünl zian?

²⁹ Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee günan ni guin ree.

³⁰ ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?”

³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rliladx guial gojc Waj tijb bën badëë xtiidx Dios loj ree bejn, bën wali gunee xtiidx Dios.

³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

12

Xcwent ree mojs guijdx

(Mt. 21:33-46; Lc. 20:9-19)

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin. 'Zianz badëëman laan garol loj ree bën güün laan dxiin, briitaman zëman zijt.

² Chi bidxin dxej yala' reeman uv guin, guxhaal tijb xmojsaman din chigxiiman ni rayalaman.

³ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi.

⁴ Dxel guxhaal bën naj xguidxliuj laan zatijb xmojsaman, per ziangajc, bacaaguiaj reeman laaman, gula' reeman guijcaman abi' guneeguijdx reeman laaman.

⁵ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁶ 'Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'nán respejt.”

⁷ Per ree bën guin, rëb loj lasa' reeman: “Xin guin naj xin yaya'nñë guidxliuj guin, yagüjt reex din gacan du xieen ree.”

⁸ Dxel gunaaz reeman laax, bagüjt reeman laax abi' babëë reeman laax loj guidxliuj guin.

⁹ Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün bën naj xguidxliuj laan? Zi'taman din gugüjtaman bën guin ree, dxel gudëëman guidxliuj guin loj ree ben ren.

¹⁰ ¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bën rüjn yu,

laan goc ni mazri been sirv gojcnë yu guin.

¹¹ Zian been dux Dad ree Dios, zeel radxaduloj ree.

¹² Chi biguiejn ree bën rniabee guin ni gunee Jesús, guyën reeman niniiaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

*Xcwent Impuest**(Mt. 22:15-22; Lc. 20:20-26)*

¹³ Guxhaal reeman tio'p choon ree bénfarisew në tio'p choon ree xbejn Herodes lod za' Jesús, din yaguuil reeman mod guiniee Jesús diidx ni gudxiib reeman guijc din gac cwe'c reeman xguialquiaman.

¹⁴ Abi' rëb reeman:

—Mextr, dunujn rayagbee guial lüj rnnee diidxli ad ridxga' tēētil chu naj bejn. Din par lüj tibloji naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

¹⁵ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

¹⁶ Dxel badëéd reeman cintabl guin lojman, abi' rëbaman:

—¿Chu loj ca lojn, chu tēē laj ca lojn?

Badxi' reeman laan rëb reeman:

—Loj César ca lojn në lajman.

¹⁷ Dxel rëb Jesús loj reeman:

—Gol badëēcliza loj César ni naj xieen César, guiáad loj Dios gol badëéd ni naj xieen Dios.

Dád badxa loj reeman ni rëbaman.

*Xcwent guial yaban ree bengüt**(Mt. 22:23-33; Lc. 20:27-40)*

¹⁸ Tio'p choon ree bénsaducew bignaj Jesús, laa reeman ad rliadxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiēt tijb xinguaaw abi' achut xi'nx guyu con lacheelix, bijch xin güt guin guxhlianë béngunaa bizëjb guin din chu' xi'n reex zi'c gulüü xi'n xingüt guinan.

²⁰ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix.

²¹ Dxel bijch barojpix baxhlianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin,

²² abi' zianz baxhlianëman guigajdx reex, zianz bara reex güjt achut xi'n reex guyu con laaman. Ni bigra tēē në béngunaa guin güjt.

²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhlianë laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tēētidi xhienaag naj xguialrniabeeman.

²⁵ Din chi yaban ree bengüt, ad zuxhliatri reeman, ad zudëē tēētri xi'n reeman guxhliaa, ma gac reeman zi'c ree anjl yu' xanyabaa.

²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.”

²⁷ Din Dios ad najtaman xDios ree bengüt, najman xDios ree bén naban. Zeel ad laat naj xgab rüjndi.

*Mandamient mazri zobjloj**(Mt. 22:34-40)*

²⁸ Chi bigueijn tijb mextr rajc ley badxi' Jesús xtiidx reeman zagdxé guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zobjloj loj gra ree mandamient?

²⁹ Badxi'man laan rëbaman:

—Mandamient mazri zobjloj rëban: “Gol bacaagdiajg, Bén Israel, dux Dad ree Dios, tijbzi laaman naj Dios.

³⁰ Guyën xDadil Dios guidiblagaa guidib guijc guidib ladxil.” Laan naj mandamient mazri zobjloj.

³¹ Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zobjloj guial loj grop ree mandamient guie.

³² Dxel rëb mextr guin loj Jesús:

—Zagdxequi guneel, Mextr. Waliquul tijbzi Dios yu', achutri ben ren yu'.

³³ Abi' guidib guijc guidib ladx bejn guiënman laaman guidiblagaa, guiën tēēman ben ren ree zi'c rën laagajcaman. Laan naj ni mazri zobjloj guial loj gra gon ni rudëéd bejn loj Dios.

³⁴ Chi biguien Jesús badxi' mextr guinan zagdxé, rëbaman:

—Ad zijjt za'l par chu'l loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:
—¿Chexc zeel rëb ree mextr rajc ley guial za Cristo loj xdiaa rey Davi?

³⁶ Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxe, ruladx tëë reeman gugajpdioz ree bejn laa reeman con respejt niz lunejz.

³⁹ Abi' lën ree yadoo ruladx reeman cwe reeman lod rbej ree bën zojbloj, ziangajc rüjn reeman lod ritaw reeman.

⁴⁰ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

Gon badëëd tijb béngunaa bizëjb

(Lc. 21:1-4)

⁴¹ Tijb dxej zojb Jesús lën yadooro' Jerusalén niz lod za' alcancia ni ru gon, abi' ruguiaa-man rgu' ree bejn milia lën alcancia guin, në zien ree benrijcw rgu' zro' milia.

⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi.

⁴³ Abi' gurejdx Jesús bën naj ree xbejnman, rëbaman:

—Diidxli rmin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin.

⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

13

Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

¹ Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

² Badxi' Jesúsán rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijg stijban, gran yaze'n.

Ni gac chi gad guidxliuj nit

(Mt. 24:3-28; Lc. 21:7-24; 17:22-24)

³ Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëë chu gusquiee lëjt.

⁶ Din zien ree bën gui't guiëb reeman guial por naj zëëd reeman, guiëb tëë reeman: “Naj naj Cristo”, abi' gusquiee reeman zien bejn.

⁷ 'Per lëjt chi guiguiejni cayajc wadijl o zëëb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj.

⁸ Din til nacion con stijb nacion, til tëë bën rajp guialrniabee con stijb bën rajp guialrniabee, gui't tëë ree xudoxh në gubijn niz ni niz guie. Zian gac chi ma suloj ree guialzi ni naj gac.

⁹ 'Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman.

¹⁰ Per yalojxgaj rüjn naguiejn guire'ch xtiidzxa'c Dios loj gra ree nacion, dxelri nit guidxliuj.

¹¹ Chi chinë reeman lëjt loj ree guxtis, ad bal chu'di xgab, ad bal güün tēēdi xgab xhie guiēbidi loj reeman. Gol gunee diidx gunee Dios lëjt loj hor guin. Din ad lëjtitan guiniee, xSprijt Diosan guiniee.

¹² Abi' lëjt xtiidx dxej yayü bejn laagajc bijchaman din guiētix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiēt reeman.

¹³ Gra bēnguidxliuj guidxe'ch lëjt guial najdi da bejnan, per bën sudxi'ch loj ni rililadxaman naj xt dxej chigra guibanman, laaman yayal xanyabaa.

¹⁴ Chi guguaadi zojz tijb ni dxuudx lēn yadooro' Jerusalén, zi'c bacaa Daniel, bën badēē xtiidx Dios loj ree bejn diidz gulal (bēn gool ree gui'ch guie, gol bignia'n), guial bēn zojz ree niz Judea chigxüün reeman niz dajn.

¹⁵ Guiaád bēn yē'p guijc yu lidx dxejzii, ad yayu lēnū lidxaman tia' xhie xieenman.

¹⁶ Guiaád bēn za' dajn, ad yayejc lidxaman chigxi xabaman.

¹⁷ 'Proba ree bēngunaa nüü xi'n o bēn ca' ree xindobēz lēn ree dxej zii!

¹⁸ Gol gurejdx gunab Dios chitēē yayal gac zian tiamp nayaag,

¹⁹ din dād guialziro' chu' dxejzii ree, zi'c ad wayajctczi diidz chi beenchaaw Dios guidxliuj, ad yu' tēētri dxej gac zian.

²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bēn rēnman, bēn gulejman par laaman.

²¹ 'Bal chu na lojdi: "Gol baguiaa, laa Cristo za' guie", o "laaman za' ni", ad bal chililadxidi.

²² Din gui't zien ree bejn, na reeman guial laa reeman naj Cristo o na reeman laa reeman naj bēn rudēē xtiidx Dios loj ree bejn, abi' güün reeman milagr ree nē ree graloj ni yadxaloj ree bejn, din gusquiee reeman laa reeman, abi' bal zile'n xt zajc nē ree bēn gulej Dios gusquiee reeman.

²³ Zeel gol gojp cudad, ma bagojnxgajn lëjt gra ni gac.

Gui't Bēn guxhaal Dios zatijb

(Mt. 24:29-35, 42-44; Lc. 21:25-36)

²⁴ 'Per lēn ree dxej ni ma gudēd gra ree guialzi guin, zacajy loj gubijdx abi' ad zusnitri bēēw,

²⁵ zayajb ree bajl yu' xanyabaa guiaád gra ree ni yu' xanyabaa guiniib reen.

²⁶ Dxel guguaa ree bejn Bēn guxhaal Dios rdiinman bacha' zēēdaman loj zaj con xguialrniabee narooberman.

²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bēn ma naj par Dios.

²⁸ 'Gol badxe'gujic ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa.

²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin.

³⁰ Diidxli rnin lëjt guial gra ree ni guin gac chi gad ree bēn naban lēn ree dxej guie guiēt.

³¹ Guidxliuj nē xanyabaa zanijt reen, per da diidxan ad zadēd gacan cumplid.

³² 'Per achut ragbee xhie dxejn xhie tēē horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ 'Zeel gol gojp cudad, gol guzujsin tēē, gol gurejdx gunab Dios din ad ragbeetidi goc gac zian.

³⁴ Ni guin ree naj zi'c chi ririi tijb bejn rejman zijt. Abi' chi gadaman grii rudēēman dxiin loj tijbgaj ree xmojsaman, rniabee tēēman susin bēn rajp ro' port.

³⁵ Yan ziangajc lëjt gol guzujsin, din ad ragbeetidi goc o xhie horan gualan bal chi ma ribej guiaal ya, o garol guiaal, o chi ma rbidxa' gujd, o rsildoo.

³⁶ Zeel gol guzusun din bal dxejczy gualan ad guidxaaglojn lëjt ad cayüjntidi zi'c rayal.

³⁷ Abi' ni canin lojdi, loj gradi caninan: Gol guzujsin.

14

Baya'n reeman diidx xhienaag guiniaaz Jesús

(Mt. 26:1-5; Lc. 22:1-2; Jn.11 :45-53)

¹ Zatio'p dxej riaadx gal lanij pascw, lanij raw ree bejn guidxtil ni ad yu't levadur. Abi' ree bixhioz rniabee ree bixhioz con ree mextrajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman.

² Per rēb reeman:

—Ad zaguieent ree zian loj ree dxej lanij guin, chitēē gac naquie'.

*Baroob tijb béngunaa perfum guijc Jesús**(Mt. 26:6-13; Jn.12 :1-8)*

³ Dxel chi za' Jesús luguiedx Betania lidx Simón, bèn gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojccaawnën ganax nardo, zianz guxhalaman ro' lumejt guin persi baroobaman perfum guin guijc Jesús.

⁴ Abi' yu' ree bèn za' yagaj bidxe'ch, rëb loj lasa' reeman:

—¿Chexc zeel guxhie'man perfum guin?

⁵ Awa zajc nido'n choon gayuu denario din nūjnan yudar bënprob ree.

Abi' caneeguidx reeman béngunaa guin.

⁶ Per rëb Jesús loj reeman:

—Gol basa'nman. ¿Chexc zeel ruslendi laaman? Zagdx naj ni beenman con naj.

⁷ Zianczi sunëdi bënprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj.

⁸ Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan.

⁹ Diidxiczi rnin lëjt, guial guidib loj guidxliuj bantëez guin guiniee reeman xtiidzxa'c Dios, zü ree bejn diidx ni been béngunaa guin con naj din gusaaladx reeman laaman.

*Baguüil Judas mod xhienaag yayüman Jesús**(Mt. 26:14-16; Lc. 22:3-6)*

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman.

¹¹ Chi biguiejn ree bixhioz guin zian, dád babaa reeman. Abi' rëb reeman gudëed reeman milia lojman. Dxel guzuloj raguüilaman mod xhienaag yayüman Jesús.

*Gudawnë ree xbejn Jesús xche**(Mt. 26:17-29; Lc. 22:7-23; Jn.13 :21-30; 1Co.11 :23-26)*

¹² Dxej ni guzuloj lanij raw ree bèn Israel guidxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalen. Ni guguaadi tijb xinguaaw ca' re yu' nijs. Gol chinalix.

¹⁴ Abi' lod yayux, gol güjdx loj bèn naj lidxan: “Na mextr: ¿Ban lënü gawnë ree xbejnman yan guxhin pascw?”

¹⁵ Dxel gulüüman lëjt tijb lënü narooj ni raroj cwaa, ma najccaaw lënü guin. Yagaj gol been ni yadaaw ree xche.

¹⁶ Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman.

¹⁸ Dxel chi zojb reeman xan mex cayaw reeman, rëb Jesús loj reeman:

—Diidxiczi rnin lojdi guial tijb lëjt, bèn cayawnë naj, laaman yayü naj.

¹⁹ Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjtan, bèn cugajdx xguiadxtil loj gajc pliajt lod cugajdx da guidxtilan, laaman.

²¹ Walican guial Bén guxhaal Dios naj sacaman zi'c ca loj xtiidx Dios. Per, jprob bèn yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guidxtil abi' badëëman quixtëe loj Dios, dxel gula'man laan badëëman loj reeman, rëbaman:

—Gol gudaw guidxtil guie, laan naj da cuerpan.

²³ Dxel cwa'man tijb cojp yu' vin, chi gulox badëëman quixtëe loj Dios, badëëman cojp guin loj reeman, abi' gra reeman gu' vin yu' lojn.

²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guial tijb nejz cüb xhienaag gap ree bejn perdon loj Dios.

²⁵ Naj rni lëjt, ad yu'tri dxej guië'n vin rajccaawnë uv, xt dxej ni guië'n vin cüb lod rniabee Dios.

Rëb Jesús guial guiëb Bëd ad nünbeetaman laaman

(Mt. 26:30-35; Lc. 22:31-34; Jn.13 :36-38)

²⁶ Chi gulox biil reeman tijb cant par Dios. Dxel zë reeman ruguia' Olivos.

²⁷ Dxel rëb Jesús loj reeman:

—Graczi di tio'nladx naj yan guxhin, zi'c ca loj xtiidx Dios lod rëb: “Gugÿjtan bën rajp ree xiil, abi' guire'ch reeb.”

²⁸ Per chi yabanan, yalox naj ganeed lojdi gan Galilea.

²⁹ Dxel rëb Bëd lojman:

—Majsi gra reeman tio'nladx lÿj, per naj ad zaro'nladxtan lÿj.

³⁰ Badxi' Jesúsán rëbaman:

—Naj rni lÿj Bëd, yan guxhin gajc chi gad guj cwidxa' tio'p volt, choon volt mal rëbil guial ad nünbeetil naj.

³¹ Per naguiejn rÿjn Bëd rëbaman:

—Majsi guiëtnë'n lÿj, per ad zëtan guial ad nünbeetan lÿj.

Abi' graczi reeman rëb zian.

Rbejdx rniab Jesús Dios lod la Getsemani

(Mt. 26:36-46; Lc. 22:39-46)

³² Chi bidxin reeman tijb luar la Getsemani, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzulox guyunayaman abi' ad nixtri yu' luxdooman.

³⁴ Zianz rëbaman loj reeman:

—Yu' naya da't luxdon, rulüü ma gugÿjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerojman, gunabaman loj Dios, bal zile' téd ni naj sagdiajman.

³⁶ Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdianj. Per ad gac zi'c rënan, rayal gac zi'c rënl.

³⁷ Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya?

³⁸ Gol gurenaa, gol gurejdx gunab Dios chitéë güün xinxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree.

⁴⁰ Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxeljt xhie guiëb reeman lojman.

⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bën guxhaal Dios ma bidxin hor yayü reeman naj loj ree bëndol.

⁴² Gol bixche, yo' ree, laa bën yayü naj ma zëëd gajxh.

Gunaaz reeman Jesús

(Mt. 26:47-56; Lc. 22:47-53; Jn.18 :2-11)

⁴³ Sta caneenë Jesús laa reeman chi bidxin Judas, bën goc tijb ree xbejnman. Bidxinëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel.

⁴⁴ Abi' Judas bën bayü laaman ma bagojnxgajman bën guin ree rëbaman:

—Bën gawan xid, laaman naj bën raguilidi, gol gunaazaman gol chinëman, gol gojppaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid.

⁴⁶ Zianz gunaaz ree bën guin laaman din chinë reeman laaman.

⁴⁷ Per tijb bën za' yagaj gulëë xiespadaman, gutü'man guidiajg xmojs bixhioz rniabee gra ree bixhioz.

⁴⁸ Dxel rëb Jesús loj ree bën guin:

—¿Chexc zeel zëëdidi con espad con yag din chinëdi naj zi'c tijb xingubaan?

⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree bén guin laax,

⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn. 18 :12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley.

⁵⁴ Abi' zijt zijt binal Béd Jesús xt rule' lidx bixhioz guin, dxel gurejman ruděj con ree bén rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguiil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman,

⁵⁶ majsi zien reeman rudxiib diidx rusquiee guijcaman, per garent garen rëb tijb gaj reeman.

⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunujn bagujejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

⁵⁹ Per ni'qui zian ad guneet reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree bén riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetdzi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesúsan rëbaman:

—Walican, najcan. Abi' lëjt zuguaadi naj najn Bén Guxhaal Dios zooban xladbee Dios Bén ca' gra gualrniabee guguaa tēēdi naj guialan loj zaj xanyabaa.

⁶³ Chi bigujejn bixhioz guin zian, gudixya' xabaman, dxel rëbaman:

—Ad rüntri naguiejn yadiil ree testiw.

⁶⁴ Lëjt ma bigujejn canee guijdxix Dios. Yan, ¿xhie nadi?

Abi' graczi reeman rëb, guëtaman.

⁶⁵ Yu' reeman rucojp xhiejn lojman, ruta'cw tēē reeman lojman, dxel riguin reeman laaman, rëb reeman:

—¡Guneeya' chu gudín lüj!

Guiáad ree bén rajp yagaj wëz reeman lojman.

Rëb Béd ad nünbeetaman Jesús

(Mt. 26:69-75; Lc. 22:56-62; Jn. 18 :15-18, 25-29)

⁶⁶ Chi za' Béd rule' guin, dxel bidxin tijb béngunaa rün dxiin lidx bixhioz rniabee guin.

⁶⁷ Chi baguaaman zobj Béd ruděj guin cucha'man, baguaaman lojman, dxel rëbaman:

—Në lüj za'në Jesús bén Nazaret.

⁶⁸ Per gurexuu Béd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' gujd.

⁶⁹ Dxel baguaa béngunaa guin Béd zatijb, zianz guzuloj rëbaman loj ree bén riga' yagaj:

—Në bén guin naj xbejn Jesús.

⁷⁰ Per gurexuu Béd zatijb. Gojc xchejdo rëb ree bén riga' yagaj loj Béd:

—Walican në lüj naj xbejnx din xin Galilea lüj, abi' zi'cgajc rniee reeman rnieel.

⁷¹ Per guzudxi'ch Béd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bén nadi.

⁷² Loj hor zii gajc barojp volt guridxa' gujd. Dxel basaaladx Béd guial rëb Jesús lojman: “Chi gad gujd cwdixa' tio'p volt, mal gojc choon volt rëbil ad nünbeetil naj.” Chi basaaladxaman zian, dxel guzuloj cayoonman.

15

Binë reeman Jesús loj Pilato

(Mt. 27:1-2, 11-14; Lc. 23:1-5; Jn. 18 :28-38)

¹ Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato.

² Abi' gunabdiidx Pilato loj Jesús rëbaman:

—¿Lüjn naj xrey ree bén Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman,

⁴ zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetczi badxi' Jesús, zeel dád badxa loj Pilato

Gunabee reeman guiët Jesús

(Mt. 27:15-31; Lc. 23:13-25; Jn. 18 :38-19:16)

⁶ Loj ree dxej lanij pascw, ruslaa Pilato tijb bén yu' ladxguiib, bén rëb ree bén guiedx guin guslaaman.

⁷ Lën ree dxej zii yu' bén la Barrabás ladxguiib con ree ben ren, bén bagüjt ree bejn loj tijb wadijl ni been reeman contr gobiarn.

⁸ Dxel chi bido'p ree bejn, rëb reeman loj Pilato din güünman zi'c naj costumbr,

⁹ Abi' rëb Pilato loj reeman:

—¿Rëndi ya guslaan xreydi?

¹⁰ Rëbaman zian guial ragbeeman bayü ree bixhioz guin laaman por guial rdëdlojzi reeman laaman.

¹¹ Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás.

¹² Abi' gunabdiidx Pilato loj reeman rëbaman:

—¿Xhie rëndi günnë'n bén nadi naj xreydi?

¹³ Dxel gurixdiaj reeman rëb reeman:

—¡Bacaax loj crüjz!

¹⁴ Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

¹⁵ Abi' guial rën Pilato yaya'nman zagdxe loj reeman, zeel baslaaman Barrabás, gunabee-man a Jesús, dxel bayüman laaman loj reeman din tiaman loj crüjz.

¹⁶ Abi' binë ree xin suldad guin Jesús xlule' palas, yagaj badxaag lasa' gra reex.

¹⁷ Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman.

¹⁸ Dxel guzuloj rbixdiaj reex rëb reex:

—¡Guibanri xrey ree bén Israel!

¹⁹ Zianz rugaz reex var guijcaman, rulaa xhiejn reex lojman, abi' ruzuxib reex lojman.

²⁰ Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reeman Jesús loj crüjz

(Mt. 27:32-44; Lc. 23:26-43; Jn. 19 :17-27)

²¹ Chi zinë reex Jesús, badxaagloj reeman tijb bén Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

²² Abi' binë reex Jesús luar la Gólgota, rën guiëban Calaver.

²³ Yagaj badëëd reex vin no'ch ni la mirra lojman din guië'man laan, per ad gu'taman laan.

²⁴ Chi ma bacaa reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

²⁵ Raca gaa rsil bacaa reex laaman loj crüjz.

²⁶ Guijc crüjz guin bacaa reex lejr ni rëb chexc zeel bacaa reex laaman loj crüjz, rëban: “Xrey ree bén Israel.”

²⁷ Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman.

²⁸ Zian gojc cumplid ni ca loj xtiidx Dios, lod rëb: “Nayabaman loj ree benmal.”

²⁹ Abi' ree bén ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb,

³⁰ yan baslaa lüj gajc baguiajt tëë loj crüjz zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix.

³² Yaguiajtix loj crüjz guin, bal laax naj Cristo, xrey ree bén Israel, din yaguaa ree, dxelyaliduladx ree.

Xt në ree xingubaan canëman loj crüzj guneeguijdx laaman.

Güjt Jesús

(Mt. 27:45-56; Lc. 23:44-49; Jn. 19 :28-30)

³³ Chi gol garol dxej, bicajy guidib guidxliuj xt raca choon wadxe.

³⁴ Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj?

³⁵ Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.

³⁶ Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië' man laan, rëbaman:

—Gol basa'nx, yaguaa ree don zi't Elías yalet laax loj crüzj guin ya.

³⁷ Per Jesús dád rejs gurixdiajman, dxel güjtaman.

³⁸ Loj hor zii goxya' lajd nal lën yadooro' Jerusalén, gojcan tio'p lala', diidz guijc guin xt guia' guin goxya'.

³⁹ Dxel suldad rniabee ree suldad guial za' x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj benguiag loj Xiëb.

⁴¹ Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diidz Galilea xt Jerusalén.

Biguie'ch Jesús

(Mt. 27:57-61; Lc. 23:50-56; Jn. 19 :38-42)

⁴² Chi bidxin dxej rüjn ree bën Israel gra, chi guixiezi naj dxej raziiladx reeman, ma cabej guiaal,

⁴³ bidxin Xiëb bën za guiedx Arimatea. Gojcaman tijb xguxtis ree bën Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús.

⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin.

⁴⁵ Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin.

⁴⁶ Guzii Xiëb tijb lajd, abi' chi baletaman xcuerp Jesús loj crüzj guin dxel batüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'.

⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

16

Raban Jesús

(Mt. 28:1-10; Lc. 24:1-12; Jn. 20 :1-10)

¹ Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëëb reeman laan xcuerp Jesús.

² Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx.

³ Chi zë reeman lunejz, rëb loj lasa' reeman:

—¿Chuja chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran.

⁵ Chi guyu reeman lën baa guin, baguiaa reeman tijb xinguiag zojbix ladbee, najcwix lajd naquich yool, abi' bidxeb reeman.

⁶ Per rëbix loj reeman:

—Ad rdxebidi, raguilidi Jesús bën Nazaret bën cwa loj crüzj. Per ma babanman, achutri laaman guie, gol baguiaa lod gudixh reeman laaman.

⁷ Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

Balüüloj Jesús loj María Magdalena

(Jn. 20:11-18)

⁹ Chi ma baban Jesús, chidumingw rsildoo, yaloj loj María Magdalena balüülojman, bën babëëman gajdx xindxab luxdoo.

¹⁰ María Magdalena guin bicojn ree xbejn Jesús, bén yu'naya ree roon tëë reeman por laaman.

¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

Balüüloj Jesús loj tio'p ree xbejnman

(Lc. 24:13-35)

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn.

¹³ Dxel bén guin ree bicojn lasa' reeman, per ni'qui laa reeman ad bililadxt reeman.

Rucaabee Jesús bén naj ree apóstoles

(Mt. 28:16-20; Lc. 24:36-49; Jn.20 :19-23)

¹⁴ Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad rililadxt reeman bén baguiaa ree laaman guial ma babanman.

¹⁵ Dxel rëbaman loj reeman:

—Gol chej guidib guidxliuj, gol chigtie'ch xtiidxa'c Dios loj gra ree bejn.

¹⁶ Bén chililadx tiobnijs tëë zajcaman perdon loj Dios. Per bén ad zaliladxt xtiidxa'c Dios, laaman yayal casti.

¹⁷ Sen guie ree gap ree bén chililadx naj: Por da gualrniabeen zabëë reeman xindxab luxdoo ree bejn, zanee tëë reeman diidx ren ree,

¹⁸ zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bénragxuu, zayajc reeman.

Bayë'p Jesús xanyabaa

(Lc. 24:50-53)

¹⁹ Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios.

²⁰ Guiáad laa reeman brii reeman zigtie'ch reeman xtiidxa'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rníee reeman. Amén.

Xtiidxza'c Jesucrist ni bacaa San Lujc

Rxhiaal Lujc gui'ch loj Teófilo

¹ Zien ree b́en ma been naguiejn gucaa ni goc con dunuj ree,
² zi'cgajczi balüü ree bejn dunuj ree, b́en baguiaa ree diidz guia'xchej ni been Jesús nē ni guzacaman, gutie'ch tēē reeman xtiidxaman.

³ Naj baguixnejzchaaw diidz guia'xchejn, dad Teófilo, zeel naladxan zagdxen gucanan xnejz par lüj,

⁴ din chignia'l zagdxe diidxli balüü reeman lüj.

Rugojn tijb anjl gal Waj

⁵ Tiamp gunabee rey Herodes guidib niz Judea, guyu tijb bixhioz brii laj Zacarías, bachajaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón.

⁶ Grop reeman gubajn xnejz loj Dios bazooob tēē reeman diidz graczi ni rniabee Dios, abi' achut ríle' guiēb guial rajp reeman dol.

⁷ Per achut xi'n reeman guyu guial ad gojct niu xi'n Elisabet, grop reeman ma naj bengol.

⁸ Tijb dxej ni bayal ree bixhioz no'ch Zacarías loj, been reeman sirv loj Dios,

⁹ zi'c naj xcostumbr ree bixhioz guin, gudxijt reeman suert din guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin.

¹⁰ La'tgaj cagu'man goxyaal guin, gra ree bejn riga' lule' cabejdx canab reeman Dios.

¹¹ Dxel balüüloj tijb xianjl Dios loj Zacarías, za'liman xladbee altar lod cayu goxyaal guin.

¹² Chi baguiaa Zacarías anjl guin, ad badxejlt xhie nünman, dád bidxebaman.

¹³ Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaaw abi' yagu'l lajx Waj.

¹⁴ Yabaa da'til, nē zien ree bejn yabaa chi galix,

¹⁵ guial gaquix xin lasajc loj Dios. Ad zē'tix vin ni'qui ni gusüdx laax. Abi' diidz chi gadix gal mal za'nē xSprijt Dios laax.

¹⁶ Por laax zien ree b́en Israel yayejc loj xDad reeman Dios.

¹⁷ Laax ned lojman, chu' xSprijt Dios luxdoox gap tēēx gualrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, guluü tēēx b́en ad ruzoobt ree diidx din guzuxnejzix bejn ree guidxga' reeman laaman chi gui'taman.

¹⁸ Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

¹⁹ Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl.

²⁰ Per yan guial ad bililadxtil da diidxan, yaya'n! gop ad zajct guinieel xt guidxin dxej gal xindo guin.

²¹ Guiaad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin.

²² Chi bariiman ad rajctri rnieeman, gaz sen rünman guial ma baya'nman gop. Dxel gogbee reeman guial yu' xhie baguiaaaman lēn yadoo guin.

²³ Zianz baza' ree dxej ni been Zacarías sirv lēn yadoo guin, dxel zia lidxaman.

²⁴ Chi gudēd ree dxej guin, guyu xi'n xbéngunaaman Elisabet. Gaay bēēw tib guyuzaman lēnü, rēbaman:

²⁵ “Ze naj ni beennē Dios naj lēn ree dxej guie chitēē guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bēēw, guxhaal Dios anjl la Gabriel luguiedx Nazaret ni riga' niz Galilea,

²⁷ din chignajman tijb biinxdüb lam Li. Ma naj tia' tijb xin la Xiēb laam, xin zēēd loj xdiaa rey Davi.

²⁸ Guyu anjl guin lod yu' Li abi' rēbaman:

—¡Xchan Li, Dios ma gulej lüj! Dios za'nē lüj, ma beenle' tēēman lüj loj gra ree béngunaa.

²⁹ Chi baguiaa Li anjl guin dád badxa lojm guial rēbaman zian, abi' gunabdiidxim xhie rēn guiēb ree diidx guin.

³⁰ Dxel rēb anjl guin:

—Li, ad rdxebil din lüj gule Dios beenle' tēēman lüj.

³¹ Chu' xi'n!l, abi' chi galaman yagu'l lajman JESÚS.

³² Laaman gac bén zojbloj, guinee ree bejn laaman Xi'n Dios bén yu' xanyabaa. Güün dux Dad ree Dios laaman rey zi'c goc xdiaagulalaman Davi,

³³ din nabeeman bén Israel ree xt goctëez, abi' xguialrniabeeman ad yu't dxej loxan.

³⁴ Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

³⁵ Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bén yu' xanyabaa gusiaawan guijquil con xbalan. Zeel xi'nl bén gal, gacaman naya nali abi' guinee ree bejn laaman Xi'n Dios.

³⁶ Ziangajc lasa'l Elisabet ma yu' xi'nman, majsi ma najman bengol, bén rëb ree bejn ad zajct chu' xi'n, per yan ma gojc xho'p bëw yu' xi'nman.

³⁷ Din Dios graczi zajc güünman.

³⁸ Dxel rëb Li loj anjl guin:

—Dios naj bén rniabee naj, gacza zi'c rënman.

Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea,

⁴⁰ dxel guyum lënu lidx Zacarias, bagajpdiozim Elisabet.

⁴¹ Chi bigueijn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa.

⁴² Abi' gunee Elisabet rejs, rëbaman:

—¿Dios ma beenle' lüj loj gra ree béngunaa, beenle' tëëman bejndobëz yu' lën!

⁴³ ¿Chuzo najn zeel zidganaj xniaa da Diosan naj, bén rniabee?

⁴⁴ Din bigueijnzan cha'l bagajpdiozil naj, laa baniib gajc da bindoon lënan guial babaaman.

⁴⁵ Xiquilbaal guial bililadxil, din gac zi'c bagojn Dios lüj.

⁴⁶ Dxel rëb Li:

Ruzatan Dios zagdx,

⁴⁷ rabaanë' tëën laaman, guial ragnëman naj.

⁴⁸ Guial baguiaaman naj, majsi biin rüjnzi sirv lojman naj.

Abi' diizd yan xt goctëez guza't ree bejn naj, guiëb reeman xiquilbaam.

⁴⁹ Din Dios, bén rniabee, dád zro' naj ni ma beennëman naj.

Naya naliman.

⁵⁰ Ad rbëzt rayaman graczi ree bén ruzoob xtiidxaman.

⁵¹ Zro' naj ni ma beenman con xguialrniabeeman.

Base'nman xixgab ree bén rüjn benro'.

⁵² biquiedaman guialrniabee loj ree bén rniabee, guiaád loj ree bén ad zojblojt badëëman guialrniabee loj reeman.

⁵³ Badëëman guialnaza'c loj ree bén biaadx guialraw,

guiaád ree benrijcw basa'nman laa reeman zezi.

⁵⁴ Gognëman bén Israel ree, xbejnman,

abi' ad bayanladxtaman nayaman laa reeman,

⁵⁵ zi'c rëbaman loj dux béngulal ree,

Abraham në loj ree xdiaaman.

⁵⁶ Abi' baya'nnë Li Elisabet cost choon bëw, dxel baguiaj lidxim.

Rajl Waj

⁵⁷ Chi bidxin dxej gojl xi'n Elisabet najx xinguaaw.

⁵⁸ Abi' gogbee ree lasa'man në ree bén zojb gajxh guial baya Dios laaman, dád babaa reeman bignaj reeman laaman.

⁵⁹ Chi ma gojc xindobëz guin toxman, dxel binë reeman laax guyux sen ni ru ree bén Israel. Abi' guyën reeman nagu' reeman lajdoox Zacarias zi'c la xdadix,

⁶⁰ per gunee xniaax, rëbaman:

—Ad zayutan zian. Rayal gaquim Waj.

⁶¹ Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

⁶² Abi' con sen gunabdiidx reeman loj xdad xindobëz guin chu rënman grii lajx.

⁶³ Zianz gunabaman tiblia' tabl abi' bacaaman lojn: “Waj grii lajx.” Dád badxaloj gra ree bén guin.

⁶⁴ Loj hor ziigajc gojc banee Zacarias, abi' guzuloj cuza'taman Dios zagdx.

⁶⁵ Gra ree bén zojbnëman gajxh dád badxa loj reeman, xt gra ree guiedx riga' lad ree guia' niz Judea gogbee reeman graczi ni goc.

⁶⁶ Guiaád graczi ree bén gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

Ni guneë Zacarías

⁶⁷ Zacarías, bën naj xdad xindo guin guyu xSprijt Dios luxdooman guidiblagaa, zianz guzuloj caneeman, rëbaman:

⁶⁸ Benza'c bendxoon naj Dios, dux Dad ree nayajc ree bën Israel, guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

⁶⁹ Guxhaalaman tijb bën rajp guialrniabee din yabëëman dunuj ree loj ni cayza'c ree, zëëdaman loj xdiaa rey Davi, bën naj xbejn Dios.

⁷⁰ Zi'c been Dios promejs diizd gocli, zian guneë ree bën badëë xtiidxaman loj ree bejn, bën guban ree zi'c rënman:

⁷¹ Guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

⁷² yaya tëëman dux béngulal ree, abi' ad zayanladxtaman promejs ni beenman.

⁷³ Ni ne naj promejs ni beenman loj dux béngulal ree Abraham:

⁷⁴ guial yabëëman dunuj ree loj ree bën ralen dunuj ree,

din chile' yaguieen ree sirv lojman sin guialrdxeb,

⁷⁵ yabajn ree yaguieen tëë ree zi'c rënman, guidib tiamp ni yabajn ree.

⁷⁶ Guiáad lüj xi'n, guiniee ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

⁷⁷ gulüü tëë xbejnman din gagbee reeman xhienaag gac xtol reeman perdon, laa tëë reeman loj casti.

⁷⁸ Guial raya da't dux Dad ree dunuj ree,

zeel guxhaal xi'nman, bën naj zi'c xbacha' gubijdx din gusniman du loj ree,

⁷⁹ guixhial tëëman xquiarguiejn ree bën zë loj nejzmal, bën ad nabant ree xnejz zi'c rën Dios, gulüü tëëman dunuj ree yadxoo ree loj xnejzaman din yabajn ree zagdxë sin wadjil.

⁸⁰ Guiáad xindo guin guni'six guyu tëë xquiarguiejnx mazri por Dios. Guzujx loj yujbidx, xt bidxin dxej guneex xtiidx Dios loj ree bën Israel.

2

Rajl Jesús

(Mt. 1:18-25)

¹ Lën ree dxejzii gunabee rey César Augusto guiyab gra ree bejn guidib lod rniabeeman.

² Laan naj ni yaløj biyab ree bejn chi goc Cirenio gobernador Siria.

³ Graczi ree bejn naj yaguiaj ladx ladx din guiyab reeman.

⁴ Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëëd Xiëb.

⁵ Wejman binëman Li, lacheelaman din guiyab reeman. Ma yu' xi'n Li.

⁶ Abi' la'tgaj za' reeman Belén, bidxin dxej gojl bejndobëz guin.

⁷ Yagaj gol xi'n yaløj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënu naya'n reeman.

Bidxin ree xianjl Dios lod za' ree bën rajp xiil

⁸ Gajxh Belén guin za' ree bën rajp xiil, abi' dajnguin gajc rdëd reeman guiaal rajp reeman laa reeb.

⁹ Dxejczí balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman.

¹⁰ Per rëb anjl guin loj reeman:

—Ad rdxebidi din zidnë'n diidzxa'c lojdi, por laan yabaa gra ree bejn.

¹¹ Yan, ladx rey Davi ma gojl bën yabëë léjt loj ni cazajquidi, laaman naj Cristo, laaman naj Dad.

¹² Abi' din yayünbeedi laaman; nadüübaman lajd, naga'man lod ru ni raw ree be.

¹³ Dxejczí balüüloj zien da't ree anjl cwë' anjl yaløj guin, ruza't reeman Dios zagdxë, rëb reeman:

¹⁴ Benza'c bendxoon naj Dios bën yu' xanyabaa,

abi' loj guidxliuj yabe'cdxëman luxdoo bën rüjn ree zi'c rënman!

¹⁵ Chi ma zia ree anjl guin xanyabaa, dxel rëb loj lasa' ree bën rajp ree xiil guin:

—Yo' ree Belén yuquuaa ree ni goc ni, zi'c ma bagojn dux Dad ree Dios dunuj ree.

¹⁶ Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be.

¹⁷ Chi baguiaa reeman laaman, be reeman diidx ni rëb anjl guin loj reeman xcwent bejndobëz guin,

¹⁸ abi' graczi ree bën biguiejn dád badxa loj reeman ni rëb ree bën rajp ree xiil guin.

¹⁹ Per Li, rgu'chaaw luxdooman gra ni rucaagdiajgaman, rüjn tēëman laan xgab.

²⁰ Dxel zia ree bën rajp ree xiil guin, raba reeman rudëë tēë reeman quixtëë loj Dios por gra ni baguiaa reeman biguiejn tēë reeman, guial gojc zi'c rëb anjl guin loj reeman.

Binë reeman Jesús lën yadooro' Jerusalén

²¹ Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tēë reeman lajman Jesús zi'c rëb anjl guin loj Li chi gad Jesús gacxhie' lënman.

²² Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén.

²³ Been reeman zian din loj ley guin ca: "Gra ree xindoniguaaw rajl yaloj ma naj reex par Dios."

²⁴ Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

²⁵ Tiamp zii zojb bën la Simeón Jerusalén. Najman benza'c rën tēëman Dios, rbëzaman bën gagnë bën Israel ree za'në tēë xSprijt Dios laaman.

²⁶ Abi' por Sprijt guin gogbeeman guial ad zëjtaman xt guguaaman Cristo, bën guixhiaalaman.

²⁷ Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley,

²⁸ zianz gudiidx Simeón bejndobëz guin baza'taman Dios zagdx, rëbaman:

²⁹ Dad, yanri ma babedxe luxdon.

Ma zajc guslaal naj guiëtan

najn xmojsil, ma gojc zi'c nal.

³⁰ Din con quijb guiaalon ma baguian bën gagnë dunujn.

³¹ Guial ma bazujl laaman loj gra ree bénguidxliuj.

³² Laaman naj biani par ree bën ad najt bën Israel, naj tēëman bacha' par ree xbën Israelil.

³³ Guiáad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin.

³⁴ Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman.

³⁵ Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman.

³⁷ Ma gojc tajpgajlbitap ijz baya'nman bizëjb. Zianczi yu'man lën yadooro', rba'nman rbejdx rniab tēëman Dios.

³⁸ Loj hor zii'gajc bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tēëman bejndobëz guin loj gra ree bën cabëz guixhiaal Dios bën gagnë bën Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea.

⁴⁰ Cani's bejndobëz guin, cayuman gojl, cayajcaman nasin, cayüjnle' tēë Dios laaman.

Yu' Jesús lën yadooro' Jerusalén

⁴¹ Gazob ijz rej ree xdad Jesús Jerusalén lanij pascw.

⁴² Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman.

⁴³ Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén.

⁴⁴ Gunaladx reeman ma no'chaman loj ree bën zia. Zian guza reeman tibdxej. Per chi baguüil reeman laaman loj lasa' reeman në loj ree bën nünbee reeman,

⁴⁵ achut laaman naguiee. Dxel bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tëëman laa reeman.

⁴⁷ Gra ree bën caguejñ ni rnieeman caydxaloy reeman guial rajcaman në ree diidx radxi'man.

⁴⁸ Chi baguiaa ree xdadaman laaman, dád badxaloy reeman, dxel rëb xniaaman:

—Xi'n, ¿chexc zeel basaquil dunujn zian? Xdadil con naj dád nadxu'n xgab caydiilan lüj.

⁴⁹ Badxi' Jesús laan rëbaman:

—¿Chexc zeel raguilidi naj? ¿Nid ragbeedi ya rayal günan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman.

⁵² Zi'cri cani's Jesús cayu tëë mazri xquiarguejñman. Rabaanë Dios laaman rabaanë tëë ree bejn laaman.

3

Rzuloy Waj rulüüman xtiidx Dios

(Mt. 3:1-12; Mr. 1:1-8; Jn. 1:19-28)

¹ Chi goc chiin iñ rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Filip najman gobernador Iturea në Traconite, guiáad Lisania's najman gobernador Abilinia.

² Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx.

³ Dxel gudëd Waj graczi ree guiedx riga' ro' guiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon.

⁴ Zian gojc cumplid ni bacaa Isaias bën badëë xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb nejz nali.

⁵ Gra ree la'ch yadxa reen guiáad ree guia' con

ree lom yayajc reen tibloj,

në ree nejz volt yayaali

yadxa tëë ree lunejz ni ad najt tibloj.

⁶ Gra ree bénguidxliuj guguiaa bën

guixhiaal Dios gagnë dunuj ree.”

⁷ Chi brii zien ree bejn din guroobnijs Waj laa reeman, rëbaman loj reeman:

—¿Xi'n xindxab lëjt! ¿Chu bagojn lëjt guial laadi loj castiro' ni zëëd?

⁸ Gol gubajn zagdxe din guiguien guial waliqui ma bayüjndi xgab por xtolidi, ad guiëb tëë loj lasa'di: “Dunujn tio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham.

⁹ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

¹⁰ Dxel gunabdiidx reeman, rëb reeman:

—¿Xhie rayal yaguieenan?

¹¹ Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'nan loj bën ryaadxan.

¹² Në tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

¹³ Badxi' Wajn, rëbaman:

—Ad guquijxidi mazri guial loj ni rayal guquijxidi.

¹⁴ Yu' tëë ree suldad gunabdiidx lojman rëb reex:

—Laadxza dunujn, ¿xhie rayal yaguieenan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tëë ni rajxidi.

¹⁵ Guiáad ree bejn gagbeenezdoo reeman bal Wajn naj Cristo,

¹⁶ per rëbaman loj gra reeman:

—Naj curobnijs lëjt con nijs. Per zëëd tijb bën guroobnijs lëjt con xSprijt Dios në bajl. Laaman rajp mazri guialrniabee guial lon, ni'qui xgurëchaman ad zajct gaxhiecan.

¹⁷ Abi' zi'c raya trigo zian güünnëman bejn. Din bén zinal ree xnejz Dios yayal reeman lod rniabeeman, guiáad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

¹⁸ Zian guneeñë Waj laa reeman, në ree con diidx ren guneeñëman laa reeman rulüüman laa reeman xtiidzxa'c Dios.

¹⁹ Gudilë téëman rey Herodes guial cwa'man Herodías xbéngunaa bijchaman Felip, në por graczi ni mal ni ma beenman.

²⁰ Per luar nidxga' Herodes xtiidx Waj aal beenman zatijb ni mal: badxe'man Waj ladxguuib.

Rirobnis Jesús

(Mt. 3:13-17; Mr. 1:9-11)

²¹ Chi curoobnis Waj bejn ree nëgajc Jesús gurobnijs. Abi' la'tgaj cabejdx canabaman Dios, bixal xanyabaa

²² zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'n'an, rënan lüj rabaanë' téën lüj.

Bén goc ree xdiaagual Jesús

(Mt. 1:1-17)

²³ Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Eli.

²⁴ Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb,

²⁵ Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai,

²⁶ Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá,

²⁷ Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri,

²⁸ Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er,

²⁹ Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat,

³⁰ Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim,

³¹ Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán,

³² Natán gojc xi'n Davi, Davi gojc xi'n Isai, Isai gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón,

³³ Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá,

³⁴ Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor,

³⁵ Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala,

³⁶ Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec,

³⁷ Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán,

³⁸ Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

4

Been xindxab Jesús prueb

(Mt. 4:1-11; Mr. 1:12-13)

¹ Yu' xSprijt Dios luxdoo Jesús guidiblagaa. Chi bazaman guiiwro' Jordán dxel binë xSprijt Dios laaman lod naj yujbidx.

² Ni guzuman tiuu dxej tiuu guiaal, abi' been xindxab laaman prueb. Achetctzi gudawaman dxej zii ree, zianz gulaanman.

³ Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

⁴ Badxi' Jesús laan rëbaman:

—Loj xtiidx Dios rëb: "Ad ganaxtizi guiadxtil guiban bejn, nëgajc gra diidx rníee Dios."

⁵ Dxel binë xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj.

⁶ Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan.

⁷ Bal guzuxibil lon abi' guiën da'til naj, graczan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

⁹ Dxel binë xindxab guin laaman Jerusalén, abi' gulë'pix laaman guijc yadooro' zobj luguedx guin. Zianz rëbix lojman:

—Bal wali najl Xi'n Dios, gudidya' diidz guie xt luyuj,

¹⁰ din loj xtiidx Dios rëb:

Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman,

chitëë quuilguijdx guiaj guia'l.

¹² Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xindxab guin Jesús prueb, dxel biquiedix tiblädëd.

Rzuloj Jesús rulüüman bejn ree niz Galilea

(Mt. 4:12-17; Mr. 1:14-15)

¹⁴ Badxin Jesús niz Galilea, yu' xSprijt Dios luxdooman guidiblagaa, abi' guidibczi niz yagaj bire'ch xtiidxaman.

¹⁵ Rulüüman bejn ree lën ree yadoo guidib niz yagaj, abi' graczi reeman ruza't laaman zagdxe.

Radxin Jesús Nazaret

(Mt. 13:53-58; Mr. 6:1-6)

¹⁶ Badxin Jesús Nazaret luguedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios.

¹⁷ Badëd reeman gui'ch ni bacaa Isaías bën badëë xtiidx Dios loj ree bejn. Chi bachijlaman loj gui'ch guin, badxejlaman lod rëb:

¹⁸ XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugojan bejn ree xhienaag laa reeman loj ni rzajc reeman,

yaxhal tëën loj ree bën'lutia'p.

Gün tëën yudar bën rusagzi reeman,

¹⁹ din gugojan guial ma bidxin dxej za'cdxoon ni güünle' Dios bejn ree.

²⁰ Dxel batüüb Jesús gui'ch guin bayüman laan loj bën rüjn yudar lën yadoo guin, zianz gurejman. Graczi ree bën riga' yagaj ruguaadxijch laaman.

²¹ Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

²² Graczi reeman cuza't laaman zagdxe caydxa tëë loj reeman diidxza'cdxoon ni canee-man. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

²³ Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayün lüj gajc”, na tëëdi: “Ni ma baguiejnan beenl Capernaum nëgajc guie beenan najn ladxil.”

²⁴ Rëb tëë Jesús:

—Diidxliczi rnin, ni'czi tijb bën rudëë xtiidx Dios loj ree bejn, ad rënt reeman laaman ladx gajcaman.

²⁵ Gol basaaladx dád zien ree bëngunaa bizëjb zobj Israel lën ree dxej guban Elías bën badëë xtiidx Dios loj ree bejn, chi ad golt guia choon ijz garol, abi' guyu gubijn guidibczi.

²⁶ Per ad guxhaalt Dios Elías guin loj tijb ree bën bizëjb zobj Israel, guxhaalaman laaman loj tijb bën bizëjb zobj guiedx la Sarepta, gajxh Sidón.

²⁷ Në lën ree dxej guban Eliseo bën badëë xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bën Siria bayünjman laman Naamán.

²⁸ Chi biguiejn gra ree bën yu' lën yadoo guin ni rëb Jesús, dád balen reeman.

²⁹ Bisu reeman babëë reeman Jesús luguedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman.

³⁰ Per gudëd Jesús galay reeman, ziataman.

Rabëë Jesús xindxab luxdoo tijb bejn
(Mr. 1:21-28)

³¹ Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman.

³² Abi' dad badxaloj reeman ni rulüüman guial rnieenëman laa reeman con guialrniabee.

³³ Lën yadoo guin yu' tijb xin yu' xindxab luxdoo, abi' guridxa' xindxab guin rëbix:

³⁴ —Basa'n dunujn, ¿xhie rën! con dunujn, Jesús bën Nazaret? ¿Zëëdil ya zidganijtíl dunujn? Nünbeen lüj, naya nalil najl xi'n Dios.

³⁵ Dxel gudilë Jesús xindxab guin, rëbaman lojx:

—¡Bacwëëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetzi goquix.

³⁶ Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

³⁷ Abi' guidibczi niz yagaj bire'ch xtiidxaman.

Rayüjn Jesús xnasuegr Bëd
(Mt. 8:14-15; Mr. 1:29-31)

³⁸ Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman.

³⁹ Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixcheman guzuloj cudëëman ni gaw reeman.

Rayüjn Jesús zien ree bënragxuu
(Mt. 8:16-17; Mr. 1:32-34)

⁴⁰ Chi ma wëëz gubijdx, graczi ree bën rajp bënragxuu bën rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman.

⁴¹ Në zien ree bënragxuu guin rarii xindxab luxdoo, rbidxa' reex rëb reex:

—¡Lüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

Rülüü Jesús xtiidx Dios niz Galilea
(Mr. 1:35-39)

⁴² Chi bareguiaa, barii Jesús luguiedx guin zëman lod achut bejn zojb. Per raguiil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman.

⁴³ Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabee-man, din par zian guxhaalaman naj.

⁴⁴ Zian basnuu guneeman xtiidx Dios lën ree yadoo niz Galilea.

5

Rniaaz reeman zien bëjl
(Mt. 4:18-22; Mr. 1:16-20)

¹ Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios.

² Dxel baguiaa Jesús tio'p barcw ro' nijs guin; ni basa'n ree bën rniaaz bëjl la'tgaj caguiib xguijxh reeman ni rniaaznë reeman bëjl.

³ Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree.

⁴ Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

⁵ Badxi' Simón laan rëbaman:

—Mextr, gudëd guiaalczi baguieenan dxiin, achutczí bëjl wanaazan. Per bal lüj na, yazaalan guijxh guin ree.

⁶ Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin.

⁷ Abi' been reeman sen loj ree xcompniar reeman bën yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs.

⁸ Chi baguiaa Simón Béd ni goc, bazuxibaman loj Jesús rëbaman:

—Biquied lod za'n, Dad, din béndol naj.

⁹ Guial Simón con ree bën za'nëman badxa loj reeman guial dád zien bëjl gunaaz reeman.

¹⁰ Ziangajc badxaløj ree Jacob con Waj, bën naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

¹¹ Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

Rayün Jesús tijb bën rajc guialguijdx la lepra

(Mt. 8:1-4; Mr. 1:40-45)

¹² Chi za' Jesús tijb luguiedx, bidxin tijb bën rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjnl naj.

¹³ Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bën guin.

¹⁴ Dxel rëb Jesús lojman:

—Achuczi loj guiëbil guial ma bayajquil. Lojzi bixhioz wej din guguaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

¹⁵ Per guixie guixie mazri bire'ch xtiidx Jesús por gra ree ni zagdxe rünman. Abi' dád benzien rdo'p din gucaagdiajg reeman ni rnieeman yayün tëëman laa reeman guialguijdx ni rajc reeman.

¹⁶ Guiaad laaman rejman niz lod achut bejn zojb, persi rbejdx rniabaman Dios.

Rayün Jesús bën nëjt xcuerp

(Mt. 9:1-8; Mr. 2:1-12)

¹⁷ Tijb dxej culüü Jesús bejn ree, abi' zojb tio'p choon ree bënfarisew në ree mextr rajc ley, zëëd reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayünman bënragxuu ree.

¹⁸ Dxel bidxin tio'p choon ree bejn, bidxinnë reeman tijb xin nëjt xcuerp, naga'x loj da. Abi' guyën reeman niunë reeman laax lënü guin din niguijxh reeman laax lod za' Jesús.

¹⁹ Per ad badxejl ban niz niunë reeman laax guial bën guixiuj riga' yagaj. Dxel wë'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree bën guin lod za' Jesús.

²⁰ Chi baguiaa Jesús guial rililadx reeman laaman; rëbaman loj xinragxuu guin:

—Xi'n, ma benan xtolil perdon.

²¹ Per ree mextr rajc ley con ree bënfarisew guzuloj cayün reeman xgab: “¿Chu xin guin zeel rünx mazri xin zojbloj guial loj Dios? Achutczaj rajc rünj perdon dol, tijbzi Dios.”

²² Per gogbee gajc Jesús xgab cayün reeman, dxel rëbaman:

—¿Chexc zeel rünjdi xgab zian?

²³ ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”?

²⁴ Per yan, gulün lëjt guial Bén guxhaal Dios rajpaman guialrniabee loj guidxliuj guie din gүүnman perdon dol ree.

Dxel rëb Jesús loj xinragxuu guin:

—¡Bixche, baca' ni go'til loj! Baguiaj lidxil.

²⁵ Loj hor guin gajc bixchex guidibloj gra ree bën riga' yagaj balesix ni go'tix loj, zianz zia lidxix ruza'tix Dios zagdxe.

²⁶ Graczi reeman badxaløj ruza't tëë reeman Dios zagdxe abi' dád bidxeb reeman, rëb reeman:

—¡Ni'qui tijb ad waguiaat ree zi'ct naj ni cayguiaa ree yan!

Rbejdx Jesús Leví

(Mt. 9:9-13; Mr. 2:13-17)

²⁷ Chi gudëd gojc zian, baguiaa Jesús tijb bën ruquijx impuest, laman Leví, zojbaman lod ruquijxaman. Abi' rëbaman lojman:

—Tanal naj.

²⁸ Dxel bisu Leví, guro'nladxaman gran zinaltaman Jesús.

²⁹ Abi' been Leví lanjro' lidxaman par Jesús, në zien ree bën ruquijx impuest zojb nëtëë ree ben ren zojbnë reeman xan mex.

³⁰ Per ree bénfarisew ree në ree mextr rajc ley, bén nuchajg gajc ree bénfarisew guin, guzuloj caneeguijdx reeman xbejn ree Jesús, rëb reeman:

—¿Chexc zeel rë' rawnëdi bén ruquijx ree impuest në ree bëndol?

³¹ Badxi' Jesús laan rëbaman:

—Bénnadaan ree ad riaadxt reeman doctor, bénragxuu ree laa reeman riaadx Doctor.

³² Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Mr. 2:18-22)

³³ Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

³⁴ Badxi' Jesús laan rëbaman:

—¿Wen zajc güündi naguiejn ya guiba'n ree biooz za' loj guialruxhliaa, la'tgaj za'në xin cuxhliaa guin laa reeman?

³⁵ Per guidxin dxej chiquiedix, dxel guiba'n reeman.

³⁶ Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguaatan zagdxe loj lajdyojx guin.

³⁷ Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen.

³⁸ Zeel vin cüb rayal chu'n lën anfr cüb din ni'qui tijb reen ad xaxint.

³⁹ Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

6

Rgui'ch ree xbejn Jesús trigo dxej raziiladx ree bén Israel

(Mt. 12:1-8; Mr. 2:23-28)

¹ Tijb dxej raziiladx ree bén Israel, la'tgaj cadëd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman.

² Abi' yu' ree bénfarisew rëb loj reeman:

—¿Chexc zeel rüjndi ni ad rayalt güündi dxej raziiladx ree bejn?

³ Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

⁴ Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bén guxhaal Dios rajpaman guialrniabee dxej raziiladx ree bejn.

Rayajc tijb xin naxü'n tibladya

(Mt. 12:9-14; Mr. 3:1-6)

⁶ Zatijb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee.

⁷ Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús.

⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin.

⁹ Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

¹⁰ Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax.

¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles

(Mt. 10:1-4; Mr. 3:13-19)

¹² Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj.

¹³ Chi bareguiaal, gurejdxaman b́en nal ree laaman, dxel gulejman chiptio'p reeman loj reeman, abi' guneeman laa reeman apóstoles.

¹⁴ La reeman: Simón, b́en gulēlajman Béd, Andrejs bijch Simón, Jacob, Waj, Felip, Tol,

¹⁵ Matew, Tumajs, Jacob xi'n Alfeo, Simón, b́en bi'ch loj ree b́en cananistas,

¹⁶ Judas xi'n Jacob, nē Judas Iscariote b́en bayü Jesús.

Ruliü Jesús zien ree bejn

(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman nē ree ben ren, b́en zēed ree niz Judea nē Jerusalén nē ree b́en zēed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tēeman laa reeman guialguijdx ni rajc reeman.

¹⁸ Nē ree b́en yu' xindxab luxdoo bayajc.

¹⁹ Zeel graczi ree bejn rēn guqui' laaman, guial rayüjnman laa reeman con xguialrniabeeman.

Xiquilbaa ree bejn

(Mt. 5:1-12)

²⁰ Dxel baguiaa Jesús loj ree xbejnman, abi' rēbaman:

—Xiquilbaadi b́enprob, din lējt rayal loj xguialrniabee Dios.

²¹ 'Xiquilbaadi b́en rliaan ree yan, din Dios guneen ni gawidi xt chigdxinladxidi.

'Xiquilbaadi b́en roon ree yan, din zadxin dxej guxijdxidi.

²² 'Xiquilbaadi chi rdxe'ch bejn lējt, chi rabēca reeman lējt, rnieeguijdx tēe reeman lējt, naladx reeman najdi bendxuudx guial rliadxidi B́en guxhaal Dios.

²³ Gol babaa gol badxe' tēe luxdoodi zagdx chi güünnē reeman lējt zian, din zro' ni tia'di yu' xanyabaa, din ziangajc beennē xbéngulal reeman b́en badēē ree xtiidx Dios loj ree bejn.

²⁴ 'Per probza lējt benrijcw, din ma guyuxgaj luxdoodi nix.

²⁵ 'Probza lējt b́en raw xt rigdxinladx yan, din zadxin dxej guiliaandi.

'Probza lējt b́en ruxijdx yan, din zadxin dxej goondi guial chu'nayadi.

²⁶ 'Probza lējt, b́en ruladx ree guilies bejn xvalor, din zian beennē ree xbéngulal reeman b́en goc ree b́en rusquiee, rēb reeman rudēē reeman xtiidx Dios loj ree bejn.

Guyēn b́en rdxe'ch lüj

(Mt. 5:38-48; 7:12)

²⁷ 'Per ganin lējt b́en rucaagdiajg ree da diidxan: Gol guyēn b́en ralen lējt, gol gojc benza'c con ree b́en yu'xyajn lējt,

²⁸ gol bazaal diidxza'c guijc ree b́en ruzaal diidxmal guijquidi, gol gurejdx gunab Dios por ree b́en rnieeguijdx lējt.

²⁹ Bal chu chēēz tiblax hajguil, badēēd zatibladan, bal chu cwēēxuu xchamarriil, ad cwexuul chinēman nē xmanguil.

³⁰ Chutēēz b́en rniab xhienin lojl, badēēdan. Bal chu rquied xhie xieenl, ad bal yanabilan.

³¹ Gol beennē ree bejn zi'c rēndi güünnē reeman lējt.

³² 'Bal rēndi ganaxzi b́en rēn lējt, ¿xhieza ni zagdxen cayüjndi? Din xt b́endol ree rüjn zian, rēn reeman b́en rēn laa reeman.

³³ 'Abi' bal rüjndi wen ganaxzi b́en rüjn lējt wen, ¿xhieza ni zagdxen cayüjndi? Din xt b́endol ree rüjn zian.

³⁴ Ziangajc bal rudēēdidi ni rguin ganaxzi b́en naladxidi zajc yaguijx lojdi, ¿xhieza ni zagdxen cayüjndi? Din xt nē ree b́endol rudēēd rguin ree b́en naladx reeman zajc yaguijx loj reeman.

³⁵ Per lējt gol guyēn b́en ralen lējt, gol been reeman wen. Gol badēēd qui'n reeman, ad cwēzidi xhie tia'di guijcan. Zian tia'di zro' guialnaza'c ni guneen Dios b́en yu' xanyabaa, gac tēēdi xi'nman, din laaman naj benza'c con ree b́en ad rudēēd quixtēē lojman nē con ree benmal.

³⁶ Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

³⁷ 'Ad gula'chidi, ad gudxiib tēēdi ni mal guijc ree bejn chitēē saquidi zian, gol been perdon din gaquidi perdon.

³⁸ Gol badēēd ni riadx ree bejn, Dios mazri zro' naj ni guneeman zi'c tijb bols guidxadi. Din zi'c rudēēdidi loj ree bejn, ziant gajc naj ni guneen Dios lojdi.

³⁹ Rēb Jesús loj reeman zatijb diidx:

—¿Wen zajc chinē b́enlutia'p zatijb b́enlutia'p ya? ¿Nid zayajb grop reeman ro' bala' ya?

⁴⁰ Tijb bén cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

⁴¹ 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil.

⁴² Abi' bal mazri falt narooob rajpil, ¿xoxa guiëbil loj zatijb bejn: "Ad laat naj ni rüjnl"? ¡Bén rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: "Ad laat naj ni rüjnl".

Por ni rtia loj yag rayünbee bejn xhie yagan
(Mt. 7:17-20; 12:33-35)

⁴³ 'Ad yu't yag zagdxer tia ni guidx loj, ad yu' tëet yag guidx rtia ni zagdxer loj.

⁴⁴ Din tijbgaj yag rayünbee bejn xhie yagan por ni rtia lojn. Ad raru't higo loj yaquieëch, ad raru' tëet uv loj gui'xh.

⁴⁵ Benza'c rnieeman diidxa'c din laan yu' luxdooan, guiáad benmal rnieeman diidxmal din laan yu' luxdooan. Din ni yu' luxdoo bejn laan rnieeman.

Tio'ploj cimiant
(Mt. 7:24-27)

⁴⁶ ¿Chexc zeel rnieedi naj, "Dad, Dad", abi' adza rüjntidi ni rnin?

⁴⁷ Ganin lojdi chu naj zi'c bén ri't lon, rigueijnman ni rën, abi' rüjnman laan:

⁴⁸ laaman naj zi'c tijb bén been yu, yaloj xgaj gudëenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guijc guiaj.

⁴⁹ Per bén rigueijn da diidxan abi' ad rüjntaman laan, najman zi'c tijb bén been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

7

Rayajc xmojs tijb suldad rom xin rniabee ree suldad
(Mt. 8:5-13)

¹ Chi gulox guneenë Jesús bejn ree, dxel zëman Capernaum.

² Yagaj zojb tijb suldad Rom xin rniabee ree suldad. Yu' tijb xmojsix xin rën da'tix, ragxuu mojs guin ma rulüücüi guiëtix.

³ Chi bigueijn suldad rniabee guin ruza't ree bejn Jesús, guxhaalix tio'p choon ree bén rniabee Israel lojman din chisajc reeman liaadx yayüjnman xmojsix.

⁴ Abi' bidxin reeman loj Jesús gajajc reeman liaadx, rëb reeman:

—Gagnësiil suldad rniabee guin,

⁵ din rënx Bén duladx ree, në yan por laax gojc dux yadoo ree.

⁶ Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënu lidxan,

⁷ zeel ad bayaxtan nial quijb naj nidgadilan lüj. Per con guneë diidz lod za'l din yayajc da mojsan.

⁸ Din zi'c naj yu' ree Bén rniabee naj, ziangajc naj yu' ree da suldadan xin rniabeen. Chi rën loj tijb reex: "Wej", rejx. Chi rën loj zatijbix: "Guda", ri'tix. Abi' chi rën loj da mojsan: Been ni guin, rüjngajquixan.

⁹ Chi bigueijn Jesús zian, dáad badxa lojman ni rëb suldad guin, abi' badxi' lojman loj gra ree Bén zinal laaman, rëbaman:

—Diidxliczi rnin, ni'qui Israel ad wadxaaglojtan tijb Bén rililadx da't Dios zi'c rililadx xin guin Dios.

¹⁰ Chi badxin ree xin guxhaal suldad rniabee guin lidxix, baguiaa reex ma bayajc mojs guin.

Rasban Jesús xi'n tijb béngunaa bizëjb

¹¹ Chi gudëd gojc zian, wej Jesús tijb luguiedx la Naín binë ree xbejnman, në zien ree ben ren.

¹² Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman Bén bizëjb. Zien da't ree bénluguiedx guin zinal laaman.

¹³ Chi baguiaa Dad Jesús laaman, bayaman laaman, dxel rëbaman lojman:

—Ad roonl.

¹⁴ Abi' bibig Jesús baqui'man xcaj xingüt guin, dxel guzudxe ree Bén zinë laax. Zianz rëbaman lojx:

—Xi'n, naj rni lojl: ¡Bixche!

¹⁵ Dxel gureli xin guin, guzuloj caneex, zianz bayü Jesús laax loj xniaax.
¹⁶ Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bén zobjloj, bén rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

¹⁷ Abi' guidib niz Judea në ree guiedx riga' niz yagaj gogbee ree bejn ni been Jesús.

Bigneenë ree xbejn Waj Jesús

(Mt. 11:2-19)

¹⁸ Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman,

¹⁹ dxel guxhaalaman laa reeman loj Jesús din chignabdiidx reeman bal laacaman naj Cristo bén naj diidx gui't, bén cabëz reeman, o cwëz reeman ben ren ya.

²⁰ Abi' bibig reeman, guneenë reeman laaman, rëb reeman lojman:

—Waj bén ru-roobnijs bejn ree guxhaal dunujn lojl zudganabdiidx bal lüjcan naj Cristo bén naj diidx gui't, bén caylëzjan o yalëzjan ben ren ya.

²¹ Hor ziigajc bayüjn Jesús zien da't ree bénragxuü, në ree bén rdoob, nëtëë ree bén yu' xindxab luxdoo, baxhal tëëman loj ree bénlutia'p.

²² Dxel badxi' Jesús xtiidx ree bén guxhaal Waj, rëbaman:

—Gol chej, gol chiguiedx loj Waj ni cuguiaadi në ni caguiejni. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tëë ree bén goc guialguijdx la lepra, ma riguejn ree bén nacwa't, guiáad ree bengüt ma baban reeman, abi' ree bénprob ma caguiejn reeman xtiidxza'c Dios.

²³ ¡Xiquilbaa ree bén ad zucwëëzt chililadx naj!

²⁴ Chi baza ree bén guxhaal Waj, guzuloj Jesús caneeman xcwent Waj loj ree bejn, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui runiib bi?

²⁵ ¿O chu biquiaadi? ¿Tijb bén najcw lajd zagdxe ya? Lëjt ragbee guial bén rajcw ree lajd zagdxe, në ree bén naban zagdxe, lën palas zobj reeman.

²⁶ ¿Chu biquiaadi? ¿Tijb bén rudëë xtiidx Dios loj ree bejn ya? Per diidxliczi rnin lojdi, biquiaadi tijb bén mazri zobjloj guial loj tijb bén rudëë xtiidx Dios loj ree bejn.

²⁷ Wajn naj bén ruza't xtiidx Dios, lod rëb:

Naj rxhial tijb bén ned lojl,

bén güünchaaw xnejzil.

²⁸ Rnin lëjt, loj graczi ree bénguidxliuj ad wayut bén rudëë xtiidx Dios loj ree bejn, bén mazri zobjloj guial loj Waj. Per majsi zian, bén ad zobjlojt loj xgualrniabee Dios, laaman mazri zobjloj guial loj Waj.

²⁹ Gra ree bejn, në ree bén ruquijx impuest bén baroobnijs Waj, chi biguiejn reeman ni rëb Jesús bignia' reeman guial rüjn Dios zi'c rayal.

³⁰ Per ree bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

³¹ Rëb tëë Jesús:

—¿Xhienaag ganin lëjt naj ree bén riga' loj guidxliuj guie yan? ¿Chu naj zi'c laa reeman?

³² Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.”

³³ Din bi't Waj bén baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdooman.

³⁴ Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guië'man, ruchajg tëëman bëndol ree con ree bén ruquijx impuest.

³⁵ Per xgualrignia' Dios, rguienan por ree xbejnman.

Rej Jesús lidx tijb bénfarisew la Simón

³⁶ Tijb bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex.

³⁷ Dxel tijb béngunaa dxuudx zobj gajc luguiedx guin. Chi gogbeeman cayaw Jesús lidx bénfarisew guin, bidxinne'man tijb lumejt yu' perfum.

³⁸ Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguicaman laan, cayawaman xid guia'man curoob tëëman laan perfum guin.

³⁹ Chi baguiaa bénfarisew guin zian, beenman xgab: “Balgui zian wali bén guin najman bén rudëe xtiidx Dios loj ree bejn, zagbeeman chunin cuqui' laaman xhie tée naag naban béngunaa guin, najman bendxuudx.”

⁴⁰ Dxel rëb Jesús loj bénfarisew guin:

—Simón, yu' tijb ni ganin lüj.

Badxi' bénfarisew guinan rëbaman:

—Gunan, mextr.

⁴¹ Abi' rëb Jesús lojman:

—Tijb bén rudëed milia rgui'n ree bejn, ral tio'p ree bejn lojman. Tijbaman nuzëeb gaaygayuu denario, zatijbaman nuzëeb tú'pchiin.

⁴² Grop reeman ad beent gan naguijx lojman, per bén badëed milia guin rëbaman loj reeman guial ad zaguijxt reeman ni nuzëeb reeman. Yan guna, çchu loj grop reeman mazt guien laaman?

⁴³ Badxi' Simón laan, rëbaman:

—Par naj, bén bazëeb mazri zro' guin.

Dxel rëb Jesús:

—Waliquil.

⁴⁴ Zianz baguiaa Jesús loj béngunaa guin, abi' rëbaman loj Simón:

—çRuguaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguicaman.

⁴⁵ Ad gudawtil naj xid, guiáad laaman diidz chi guyu'n ad rbëzt rawaman xid guia'n.

⁴⁶ Achet sejt badxe'l guican, per laaman ma badxe'man perfum guia'n.

⁴⁷ Zeel rnin lüj, gra ree xtolaman ma gojc perdon guial rën da'taman naj. Per bén yu' ta'nz xtol abi' rajcaman perdon, ta'nz rënman naj.

⁴⁸ Dxel rëb Jesús loj béngunaa guin:

—Ma naj gra xtolil perdon.

⁴⁹ Guiáad ree bén zojbnëman yagaj guzuloj canabdiidx loj lasa' reeman, rëb reeman:

—çChu bén guin zeel xt në ree dol rünman perdon?

⁵⁰ Per rëb Jesús loj béngunaa guin:

—Ma najl perdon guial rliladxil naj, baguiaj zagdx ad rural xgab.

8

Béngunaa been ree Jesús yudar

¹ Chi gudëd gojc zian, wej Jesús gra ree guiedx narooob në ree guiedx dobëz bicojnman biglüü tëeman xhienaag naj xguialrniabee Dios. Në guidxiptio'p ree apóstoles binëman,

² nëtëe tio'p choon ree béngunaa, bén babëëman xindxab luxdoo, në ree bén bayünman guialguijdx ni rajc reeman. Loj reeman no'ch María Magdalena, bén babëë Jesús gajdx xindxab luxdoo.

³ Në Xuan, lacheel Cuza, Cuza guin goc bén nulen xchiin Herodes. Në Susan nëtëe zien ree béngunaa ren, been reeman yudar Jesús con ni rajp reeman.

Xcwent bén rtie'ch bin

(Mt. 13:1-9; Mr. 4:1-9)

⁴ Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

⁵ —Tijb bejn zëman zigtie'chaman bin. Chi catie'chaman laan, ta'nan biajb lunejz abi' balëe ree bejn guicjan gudaw tée ree biguijn laan.

⁶ Zata'nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin.

⁷ Zata'nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen.

⁸ Zata'nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel guneeaman rejs rëbaman:

—Bén rën gucaagdiajg, gol bacaagdiajg.

Chexc zeel ruliüü Jesús con cwent ree

(Mt. 13:10-17; Mr. 4:10-12)

⁹ Dxel gunabdiidx ree xbejn Jesús lojman, rëb reeman:

—çXhie rën guiëb cwent guin?

¹⁰ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguejñ reeman, per ad zignia't reeman.

Rusignia! Jesús xcwent bén rtie'ch bin
(Mt. 13:18-23; Mr. 4:13-20)

- 11 'Ni ne rën guiëb xcwent bén rtie'ch bin: Bin guin naj zi'c xtiidx Dios,
 12 guiáad bin biajb runejz naj zi'c ree bén rigueijn xtiidx Dios; per rdxin gajc xindxab rquiedix laan luxdoo reeman chitéë chililadx reeman laan abi' gac reeman pardon.
 13 Guiáad bin biajb loj ree guiaj, naj zi'c ree bén rigueijn xtiidx Dios, abi' dád nix ru luxdoo reeman rigueijn reeman laan, per guial naj reeman zi'c cwaan ni ad yu't liuj, rliladx reeman laan tiblädé abi' chi rzagdiaj reeman laa rusa'n gajc reeman ni rliladx reeman.
 14 Guiáadza bin biajb loj ree yaquiëjch, naj zi'c ree bén rigueijn xtiidx Dios; per ru reeman xgab por gra ree guialnaza'c riga' loj guidxliuj guie rüjn tée reeman ni rëntzi reeman, abi' zianz rucwëéz rucaagdiajg reeman xtiidx Dios ad rüjn tēt reeman ni rënman.
 15 Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tée reeman loj xnejzaman, zianczi rüjn reeman ni rënman.

Achet ni naguie'ch yu'
(Mr. 4:21-25)

- 16 'Achut bén ruze'c tijb guij dxel ruta'cwaman laan, ad rudxe' tētaman laan xan lon, ruzujman laan ya dín gusunin loj ree bén chu' lëñü.
 17 Achet ni naguie'ch yu' ni ad zaguient ad yu' tēt ni ralan ni ad zagbeet bejn, zadxin dxej gagbee bejn laan.
 18 'Zeel gol bacaagdiajg zagdxé, bén ma rignia' gusunuu chignia'man mazri, per bén ad rignia't, xt ta'n ni naladxaman rignia'man ad zignia'traman.

Xniaa Jesús con ree bijchaman
(Mt. 12:46-50; Mr. 3:31-35)

- 19 Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'.
 20 Abi' yu' bén bagojn Jesús rëbaman:
 —Laa xniaal con ree bijchil za' lule' guin rën reeman guinieenë reeman lüj.
 21 Badxi' Jesús laan rëbaman:
 —Bén rucaagdiajg ree xtiidx Dios rüjn tée reeman zi'c rënman, laa reeman naj da nan laa tée reeman naj da bichan.

Racwëéz Jesús bidoxh
(Mt. 8:23-27; Mr. 4:35-41)

- 22 Tijb dxej guyu Jesús loj barcw con ree xbejnman, abi' rëbaman loj reeman:
 —Yo' ree zatiblad ro' nijs guin.
 Zianz zë reeman.
 23 La'tgaj cadë reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbczi barcw guin xan nijs.
 24 Dxel bacwëën reeman Jesús, rëb reeman:
 —¡Mextr! ¡Mextr! ¡Ma cayzëëb ree xan nijs!
 Abi' bixche Jesús gunabeeman bacwëéz bidoxh guin në xtüjp nijs guin, zianz gulëjz reen dxel bayajcdxe.
 25 Abi' rëbaman loj reeman:
 —¿Conza xguialrliladxidi?
 Per laa reeman dád bidxeb reeman badxa tée loj reeman, abi' canabdiidx loj lasa' reeman rëb reeman:
 —¿Chu bén guin zeel rniabeeman bi në nijs, abi' ruzoob reen xtiidxaman?

Rayün Jesús tijb xin yu' xindxab luxdoo
(Mt. 8:28-34; Mr. 5:1-20)

- 26 Dxel badxin Jesús con ree xbejnman xdajn ree bén Gadara, ni riga' zatiblad ro' nijs Galilea.
 27 Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoo. Ad rajcwt xabix, ad nabantix lëñü, ganaxzi ro' ree baa nabanx.
 28 Chi baguiaax Jesús bazuxibix lojman, guneex rejs rëbix:
 —¿Xhie rënl con naj, Jesús, Xi'n Dios yu' xanyabaa? Rniaaban lojl ad gusagzil naj.
 29 Rëbix zian guial ma canabee Jesús din yarii xindxab guin luxdoo. Ma gojc xchej naaz xindxab guin laax. Abi' ma guxhii ree bejn yaax në guia'x con caden chitéë ban chex, per rutüguia'gajquix caden guin abi' rulaagdxa xindxab guin laax niz lod achut bejn zobj.
 30 Gunabdiidx Jesús lojx rëbaman:
 —¿Chu lal?

Badxi'xan rëbix:

—Legión lan.

Rëbix zian guial zien da't ree xindxab yu' luxdoox.

³¹ Rëb ree xindxab guin loj Jesús chitëë guixhiaalaman laa reex gabijl.

³² Dajn guin riga' zien ree cüch cayaw reeb. Zeel rëb ree xindxab guin lojman din gudëëman mod chu' reex lën ree cüch guin, dxel cwëjbaman.

³³ Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

³⁴ Chi baguiaa ree bën cayajp ree cüch guin ni goc, baxüün reeman bicojn reeman bejn ree luguiedx në ree dajn.

³⁵ Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badëdguienx abi' bidxeb reeman.

³⁶ Guiáad ree bën baguiaa ni goc, be reeman diidx loj reeman xhienaag bayajquix.

³⁷ Graczi ree bën zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman.

³⁸ Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

³⁹ —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

Rayaic xi'n Jairo në béngunaa bagaal xab Jesús

(Mt. 9:18-26; Mr. 5:21-43)

⁴⁰ Chi badxin Jesús zatiblad ro' nijs guin, dád rabaa gra ree bën za' yagaj guial badxinman din mal cabéz reeman laaman.

⁴¹ Dxel bidxin bën la Jairo, laaman rniabee lën tijb xyadoo ree bën Israel. Bazuxibaman loj Jesús, rëbaman lojman din cheman lidxaman,

⁴² guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

⁴³ Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman.

⁴⁴ Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

⁴⁶ Per rëb Jesús zatijb:

—Yu' chu baqui' naj din gogbeen yu' tijb bën ma bayajc con da guialrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman.

⁴⁸ Dxel rëb Jesús lojman:

—Xi'n, ma bayajquil guial bililadxil naj, baguiaj zagdxë.

⁴⁹ Sta caneenë Jesús béngunaa guin, chi bidxin tijb bën guza lidx Jairo, bën rniabee lën xyadoo ree bën Israel, rëbaman loj Jairo:

—Mal güjt xi'nl, ad ruslenril Mextr guin.

⁵⁰ Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin.

⁵² Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

⁵³ Graczi reeman baze' laaman guial ma ragbee reeman güjtim.

⁵⁴ Dxel gunaaz Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babanm, bixchem. Dxel gunabee Jesús badëëd reeman ni gudawim.

⁵⁶ Dád badxa loj ree xdadim, per rëb Jesús loj reeman achu loj guiëb reeman ni goc.

9

Rxhiaal Jesús guidxiptio'p ree xbejnman chiglüü reeman xtiidx Dios

(Mt. 10:5-15; Mr. 6:7-13)

¹ Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bénragxuu ree.

² Guxhaalaman laa reeman chiglüü reeman xhienaag naj xguialrniabee Dios, yayüjn tëë reeman bénragxuu ree.

³ Rëbaman:

—Ad chinëdi xhienin par runejz: ni'qui yagrliadxidi, ni'qui guijxh, ni'qui guialraw, ni'qui milia, ni'qui stibnejz xabidi.

⁴ Chutëëz lidx guidxindi, tib gol baya'nzi xt chi yazadi luguedx guin.

⁵ Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman bénragxuu ree.

Riguiejn Herodes ni cayüjn Jesús

(Mt. 14:1-12; Mr. 6:14-29)

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj Bén baroobnijs bejn ree ma baban,

⁸ yu' tëë reeman rëb Elíasan Bén badëë xtiidx Dios loj ree bejn ma balüüloj, yu'za reeman rëb, tijb ree Bén badëë xtiidx Dios loj ree bejn gocli ma baban.

⁹ Per rëb Herodes:

—Naj gajc gunabee biru' yëjn Waj. ¿Chuza Bénan riguaejnman ruza't ree bejn xcwent ni cayüjnman?

Zianan zeel rüjn Herodes nagueijn guguaaman Jesús.

Ruyaana Jesús gaay mil bejn

(Mt. 14:13-21; Mr. 6:30-44; Jn. 6 :1-14)

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczí bejn zojb, gajxh guiedx Betsaida.

¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bénragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree Bén guin din yaguiaj reeman chitiil lod yaya'n reeman luguedx doo ree në ree ranch, chitiil tëë ni gaw reeman din lod nadxu' ree achetzi yu'.

¹³ Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian.

¹⁶ Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree Bén guin.

¹⁷ Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

Rëb Bëd guial Jesús naj Cristo

(Mt. 16:13-19; Mr. 8:27-29)

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj Bén baroobnijs bejn ree, yu'za reeman rëb lüj naj Elías Bén badëë xtiidx Dios loj ree bejn, yu' tëë reeman rëb lüj naj tijb ree Bén badëë xtiidx Dios loj ree bejn gocli, Bén ma baban.

²⁰ Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

Rugojn Jesús guiétaman
(Mt. 16:20-28; Mr. 8:30-9:1)

²¹ Rëb Jesús loj reeman achuczi loj guiëb reeman zian,

²² rëb tèëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugÿjt reeman laaman, per ni yayon dxej yabanman.

²³ Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tédzaman guixie guixie abi' guidnalaman naj.

²⁴ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj, zajpaman guialnaban tiblayaa con Dios.

²⁵ ¿Xhie gan güün bejn gapaman gra ni yu' loj guidxliuj abi' nitaman loj Dios?

²⁶ Bal chu ratu guza't naj nè da diidxan, ziangajc naj najn Bén guxhaal Dios, yatunë'n laaman chi guialan con da guialrniabeen loj xbiani da Dadan nëtëë loj xbiani ree xianjlaman.

²⁷ Per diidxliczi rnin lojdi, yu' ree bén za' guie ad zëjt xt guguaa reeman xguialrniabee Dios.

Bidxaa Jesús loj choon ree xbejnman
(Mt. 17:1-8; Mr. 9:2-8)

²⁸ Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binëman Béd con Waj con Jacob.

²⁹ La'tgaj cabejdx canabaman Dios, bidxaa lojman guiáad xabaman gojcan naquichbëj bidiin tëën bacha'.

³⁰ Dxejczy gulentie tio'p ree bejn, caneenë reeman laaman. Tijbaman naj Moisejs zatijbaman naj Elías.

³¹ Yu' reeman galay biani cayü reeman diidx guial guiët Jesús Jerusalén.

³² Majsi yu' bacaal loj Béd në loj ree xcompniaraman, batie'ch xbaacal reeman persi baguaiaa reeman xbiani Jesús con zatio'p ree bén za'nëman.

³³ Chi ma baza ree bén caneenë Jesús, rëb Béd lojman:

—Mextr, jzagdxen nadxu' ree guie! Zajc yaguieenan choon ranch, tijban par lÿj, tijban par Moisejs zatijban par Elías.

Per ad ragbeet Béd xhienin caneeman.

³⁴ La'tgaj caneeman zian, biguiajt tijb zaj xt guijc reeman, chi ma yu' reeman lën zaj guin dád bidxeb reeman.

³⁵ Dxel loj zaj guin biguien cha' bejn, rëbaman:

—Bén guie naj da Xi'nan bén rën da'tan. Gol bacaagdiajg xtiidxaman.

³⁶ Chi gulox biguien cha'man loj zaj guin, baguaiaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczy loj rëb reeman ni baguaiaa reeman.

Rayÿjn Jesús tijb xin yu' xindxab luxdoo
(Mt. 17:14-21; Mr. 9:14-29)

³⁷ Bareguaiaa, chi baguiajt reeman guijc guia' guin, dád benzien brii bigchaagloj Jesús.

³⁸ Abi' tijb bén no'ch loj reeman guridxa', rëbaman lojman:

—¡Mextr!, been wen baguaiaa da xi'nan din tijbzi laax ra'pan.

³⁹ Tijb xindxab ru luxdoox abi' rucwixdiajx laax, rugÿjtya'x laax rbëë tëëx bichijn ro'x. Dád rusagdiajx laax ad rëntix guslaax laax.

⁴⁰ Ma gunaaban loj ree xbejnl din nabëë reeman xindxab guin, per ad gojct reeman.

⁴¹ Badxi' Jesús laan rëbaman:

—¡Benguijdx, bén ad riladxt! ¿Xt goc gazunë'n lëjt gadaan tëën lëjt? Tanë xi'n! guie.

⁴² Chi cabig xin guin basajb xindxab guin laax luyuj, bagÿjtya'x laax zatijb. Per gunabee Jesús barii xindxab guin, bayÿjnman laax dxel bayüman laax loj xdadix.

⁴³ Graczi reeman badxaloj guialrniabee ni rajp Dios.

Rugojn Jesús zatijb guial guiétaman
(Mt. 17:22-23; Mr. 9:30-32)

La'tgaj caydxa loj reeman ni cayÿjn Jesús, rëbaman loj ree xbejnman:

⁴⁴ —Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

⁴⁵ Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman niniabdiidx reeman lojman xhie rën guiëb ni rëbaman.

¿Chu mazri zobjloj?
(Mt. 18:1-5; Mr. 9:33-37)

⁴⁶ Dxel guzuloj ree xbejnman rëb loj lasa' reeman chu loj gra reeman mazri zobjloj.

⁴⁷ Per gogbee Jesús xgab ni cayüjn reeman abi' cwa'man tijb xindoo, bazujman laax cwé'man,

⁴⁸ dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zojbloj lojdi.

Bén ad za't contr dunuj ree za'man con dunuj ree

(Mr. 9:38-40)

⁴⁹ Rëb Waj loj Jesús:

—Mextr, baguiaa tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

⁵⁰ Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

Gudilë Jesús Jacob con Waj

⁵¹ Chi ma cadxin dxej yayé'p Jesús xanyabaa, dxel beenman xgab guial rüjn naguiejn cheman Jerusalén.

⁵² Guxhaalaman bén guned ree, wej reeman tijb guiedxdo nulen Samaria bitil reeman lod yaya'n reeman.

⁵³ Per ad cwëjbt ree bén Samaria guin nudëéd reeman lod naya'nman guial gogbee reeman cheman Jerusalén.

⁵⁴ Chi baguiaa Waj con Jacob zian, rëb reeman lojman:

—Dad, ¿rën! ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

⁵⁵ Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëéd ni rnieedi?

⁵⁶ Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

Bén rën chinal Jesús

(Mt. 8:19-22)

⁵⁷ Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëéz guin chel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

⁶⁰ Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdxë. Ziangajc bén rën guidnal naj, bal id zusa'nman graczi tibläd ad zile't chu'man loj xguialrniabee Dios.

10

Rxhial Jesús gayojnchii bejn

¹ Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman.

² Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bén gulüü laa reeman yu'. Zeel gol gurejdx gunab Dios din guixhiaalaman mazri zien bén gullüü laa reeman.

³ Gol chej, naj rxhial lëjt zi'c rej ree xiil galay ree cuyojt.

⁴ Ad chinëdi guijxh, ni'qui milia, ni'qui zatib nejz xgurëchidi, ad sudxedi guinieenëdi bejn ree runejz.

⁵ Bantëéz lënu chu'di, yalojxgaj gol güjdx: “Dios yabe'cdxe luxdoodi.”

⁶ Abi' bal lënüzi yu' ree bën rayal guialnaza'c guin, zaya'n nan yagaj. Guiáad bal id rayal reeman laan zajejcan con lëjt.

⁷ Yagaj gol baya'n, gol gudaw, gol gu' ni gunee reeman. Din bën rijn dxiin rayal gaxaman. Yagajzi gol baya'n ad bal yaya'ndi lood ren.

⁸ Chi guidxindi tijb guiedx lod yaca' reeman lëjt, gol gudaw ni gunee reeman.

⁹ Gol bayüjn ree bënragxuu yu' ree luguiedx guin, gol güjdx tēē loj reeman: “Ma zēēd xguialrniabee Dios gajxh par lëjt.”

¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman:

¹¹ “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zēēd xguialrniabee Dios gajxh par lëjt.”

¹² Naj rni lëjt guial dxej yadēēd ree bejn cwent loj Dios, mazri casti narooob yayal reeman guial loj ree bën gure guiedx Sodoma.

Bén ad bazoobt ree xtiidx Dios

(Mt. 11:20-24)

¹³ Rēb tēē Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro nē guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tēē cobdēj guijc reeman zi'c tijb sen guial ma bayüjn reeman xgab por xtol reeman.

¹⁴ Per nnin lojdi guial dxej yadēēd ree bejn cwent loj Dios, mazri casti narooob yayalidi guial loj ree bën Tiro nē ree bën Sidón.

¹⁵ Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

¹⁶ Dxel rēb Jesús loj ree xbejnman:

—Bén ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

Badxin ree bën gayojnchii guxhaal Jesús

¹⁷ Chi badxin ree bën gayojnchii guxhaal Jesús, dád rabaá reeman rēb reeman lojman:

—Dad, xt ree xindxab ruzoob dux tiidxan chi raza'tan lajl.

¹⁸ Abi' rēb Jesús loj reeman:

—Waliquidi, naj baguia, zi'czi rē'p nijs basēēb xguialrniabee xindxab.

¹⁹ Naj baneē lëjt guialrniabee din gulēēdi guijc ree bēēl nē guijc ree nixüb, nē par güündi gan loj xguialrniabee xindxab sin guial güünx lëjt xhienin.

²⁰ Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

Rabaá Jesús

(Mt. 11:25-27; 13:16-17)

²¹ Loj hor ziigajc babaa da't Jesús por xSprijt Dios, abi' rēbaman:

—Ruzatan lüj zagdxē, Dad, lüj rniabee xanyabaa nē loj guidxliuj, din ni baquie'chil loj ree bën rajc nē loj ree bën rignia', laan ma balüül loj ree bën ad rajcza'ct. Zian gojcan Dad, din zian guyēn.

²² Da Dadan baneē gra lon. Abi' achut nünbee Jesucrist Xi'n Dios, tijbzi Dios, achu tēēt nünbee Dios, tijbzi Jesucrist xi'nman con ree bën rēnman güünbee Dios.

²³ Dxel baguiaaman loj ree xbejnman, abi' rēbaman lojzi reeman:

—Xiquilbaa ree bën guguiaa ni cuguiaadi.

²⁴ Din naj rni lojdi, zien ree bën badēē xtiidx Dios loj ree bejn nē ree rey guyēn nuguiaa ni cuguiaadi, per ad baguiaat reeman laan. Guyēn reeman nucaagdiajg reeman ni cucaagdiajguidi, per ad bacaagdiajgt reeman laan.

Xcwent tijb bën Samaria

²⁵ Tijb mextr rajc ley guzuliman guneeñēman Jesús. Abi' din güünman laaman prueb, gunabdiidxaman lojman rēbaman:

—Mextr, ¿xhie rayal günan din ga'pan guialnaban tiblyaa con Dios?

²⁶ Badxi' Jesús laan rēbaman:

—¿Xhie ca loj ley badēē Dios loj Moisejs? ¿Xhienaag rignia'lan?

²⁷ Abi' rēb mextr guin:

—“Guyēn xDadil Dios guidib guijc guidib ladxil guyēn tēē ben ren zi'c rēn lüj gajc.”

²⁸ Badxi' Jesús laan, rēbaman:

—Zagdxēqui badxi'lan. Bal güünl zian zajpil guialnaban tiblyaa con Dios.

²⁹ Per guyēn mextr guin naya'nman zagdxē, gunabdiidxaman loj Jesús, rēbaman:

—¿Chu bēnan guīēnan zi'c rēn naj gajc?

³⁰ Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman.

³¹ Dxel gudëd tijb bixhioz niz yagaj, per chi baguiaaman bén guin, zijt bicaaman volt, zëtaman.

³² Në tijb bén Levita bén rüjn yudar bixhioz ree, gudëd niz yagaj, chi baguiaaman bén guin, zijt bicaaman volt, zëtaman.

³³ Per tijb bén Samaria gudëd niz yagaj, chi baguiaaman bén guin, bayaman laaman,

³⁴ dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lënü lod raya'n ree bejn. Yagaj gunajman laaman.

³⁵ Chi bareguiaal, chi ma yaguij bén Samaria guin, gulëëman milia xieen tio'p dxej dxiin badëëman laan loj bén naj lidxan, rëbaman lojman: “Gunaj bén guie, bal gunijtil mazri, naj yaguix laan chi yaye'can.”

³⁶ Dxel rëb Jesús loj mextr guin:

—Yan, loj guiyon ree bén guin, çchu bénan guyën bén gudin ree xingubaan guin?

³⁷ Badxi' mextr guinan rëbaman:

—Bén baya laaman.

Dxel rëb Jesús lojman:

—Baguij, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart.

³⁹ Yu' tijb xbëlim lam Li. Gurej Li guin guia' Jesús cucaagdiajguim ni caneeman.

⁴⁰ Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, çnid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil.

⁴² Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

11

Ruliü Jesús xhienaag cwedx guiniab bejn Dios

(Mt. 6:9-15; 7:7-11)

¹ Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bén baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respejt.

Gac zi'c rniabeel.

Gac zi'c rën loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon bén rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

⁵ Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidxix, guiëbidi: “Miw, baneesii choon guidxtil gagui'nan,

⁶ din bi't tijb da miwan abi' achet ra'pan gudëdan lojx.”

⁷ Dxel nax diizd lënü guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.”

⁸ Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguejnx chixchex din guneex ni ryaadxidi chitëë guslenridi laax.

⁹ Zeel rnin lëjt: Gol gunab loj Dios, laaman guneex ni rniabidi. Gol baguiilaman, zadxejlidi laaman. Gol gurejdx gunabaman, zidxga'man lëjt.

¹⁰ Din bén rniab, zaca'man. Abi' bén rguuil, zadxejlaman guiáad bén rbejdx rniab laaman zidxga'man laaman.

¹¹ ¿Lějt najdi dad, wen zudēēdi tijb guiaj loj xi'ndi ya chi guiniabix guiadxtil?, ¿o zudēēdi tijb bēēl ya chi guiniabix bējl?

¹² ¿o zudēēdi nixüb ya chi guiniabix dxijt?

¹³ Nacli lějt najdi bēndol rajc rudēēdi ni zagdxē loj xi'ndi. ¡Diidxgui xDadidi bēn yu' xanyabaa, nid zudēē xSprijtaman loj ree bēn rniab laaman ya!

Rēb ree bejn ca' Jesús xguialrniabee Beelzebú

(Mt. 12:22-30; Mr. 3:19-27)

¹⁴ Caybēē Jesús tijb xindxab basa'n tijb bejn gop. Abi' chi barii xindxab guin guzuloj canee bēn guin. Dxel dád badxalōj ree bejn.

¹⁵ Per yu' reeman rēb:

—Bēn guin rabēē xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par güün reeman laaman prueb, rēb reeman lojman din güünman milagr zēēd xanyabaa.

¹⁷ Per Jesús ragbee gajcaman xgab cayüjn reeman, abi' rēbaman:

—Gra nacion bal id nadxag riga' bejn por wadjil, rlia' lasa' reeman, ziangajc tijb famil bal id nadxag riga' reeman por wadjil, rlia' lasa' reeman.

¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabee. Canin zian guial rēbidi por xguialrniabee Beelzebú rabēn xindxab luxdoo ree bejn.

¹⁹ Per bal rabēn xindxab luxdoo ree bejn por xguialrniabee Beelzebú, ¿chuza rudēēd guialrniabee loj ree xbejndi din yabēē reeman xindxab? Zeel laagajc reeman rulüü guial ad laat rnieedi.

²⁰ Per por xguialrniabee Dios rabēn xindxab luxdoo ree bejn, laan rēn guiēb guial ma za'nē xguialrniabee Dios lějt.

²¹ 'Bal tijb bēngojl da't ca' xguuibaman, rajp lidxaman. Ad zajct cwan bejn ni rajpaman.

²² Per bal guidxin bēn mazri gojl guial lojman güünman laaman gan abi' chisüdaman guiib ni ca'man tia' tēēman gra ni rajpaman.

²³ 'Bēn ad za't con naj, za'man contr naj, guiáad bēn ad ruto'pt bejn par naj rtie'chaman laa reeman.

Xindxab rayejc

(Mt. 12:43-45)

²⁴ 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: "Zagdxeli yaye'can lod bariin."

²⁵ Abi' chi rayejquix ruguiaax luxdoo bēn guin, najn zi'c tijb lēnü lod bilioob lod najcchaaw tēē.

²⁶ Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bēn guin. Dxel piorli raya'nman guial zi'c gocaman yaloj.

Xiquilbaa ree bēn ruzoob xtiidx Dios

²⁷ La'tgaj canee Jesús diidx guin ree, gurixdiaj tijb bēngunaa no'ch loj ree benzien guin, rēbaman:

—¡Xiquilbaa bēngunaa bazuj lüj loj guidxliuj, bēn baslaa tēē lüj!

²⁸ Per badxi' Jesús laan rēbaman:

—¡Mazri xiquilbaa ree bēn rucaagdiajg xtiidx Dios ruzoob tēē reeman xtiidxaman!

Rniab ree bejn güün Jesús tijb milagr

(Mt. 12:38-42; Mr. 8:12)

²⁹ Zi'cri cado'p ree bejn lod za' Jesús, abi' guzulōj rēbaman loj reeman:

—Bēn riga' ree loj guidxliuj yan, naj reeman benmal. Abi' rniab reeman tijb milagr, per achet guguaaa reeman, tijbzi zi'c guzac Jonás bēn badēē xtiidx Dios loj ree bejn.

³⁰ Zi'c goc Jonás tijb sen par ree bēn gure guiedx Nínive, ziangajc Bēn guxhaal Dios najman tijb sen par ree bēn naban yan.

³¹ Abi' bēn goc reina guiedx Sabá, zabanman chi yadēēd ree bejn cwent loj Dios dxel guiēbaman guial ree bēn riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'nē'n lějt, mazri lasajcan guial loj rey Salomón.

³² Ziangajc ree bēn guban guiedx Nínive, zaban reeman chi yadēēd ree bejn cwent loj Dios abi' guiēb reeman guial ree bēn riga' yan, yayal reeman xcasti Dios. Din bēn Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'nē'n lějt mazri lasajcan guial loj Jonás.

*Guiaalaj bejn naj zi'c biani**(Mt. 5:15; 6:22-23)*

³³ 'Achu rucaaguij tijb guij par sun lod naguie'ch, achu tēēt ruta'cw laan lēn tijb yagalm. Rayal sun lod guiguianan din gusnin loj bēn chu' lēnū.

³⁴ Guiaalaj bejn naj zi'c tijb biani par xcuerpaman. Bal por ni ruguiaal rūjnī ni zagdxē, guidib xcuerpil naj biani. Per bal por ni ruguiaal rūjnī ni mal, guidib xcuerpil naj zi'c lod nacay.

³⁵ Gojp cudad chitēē chinē guiaalojl lūj loj nejz mal luar loj nejz zagdxē.

³⁶ Abi' bal ni'qui tībda'n xcuerpil ad rūjnt ni mal, guidibczan gac nayni zi'c chi rusni guij con xbacha'n.

*Ni rūjn ree mextr rajc ley nē ree bēnfarisew**(Mt. 23:1-36; Mr. 12:38-40; Lc. 20:45-47)*

³⁷ Chi gulox guneenē Jesūs laa reeman, tijb bēnfarisew rēb loj Jesūs din chitaw Jesūs lidxaman. Chi guyuman, zianz gurejman xan mex.

³⁸ Abi' bēnfarisew guin badxalojman chi baguiaaman ad banaat Jesūs chi ma gawaman zi'c naj xcostumbr reeman.

³⁹ Per rēbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubanaan nē ni mal.

⁴⁰ ¡Bennad! ¿Nid bēn been gajc xcuerpidi been luxdoodi ya?

⁴¹ Zeel gol been yudar bēn achet rajp din guiguian guial najquidi benza'c.

⁴² '¡Probza lējt bēnfarisew! Rbēēcadi ni naj par Dios, rūjndi chū lala' ni rajpidi zi'c bidxtil nē rud nē graloj ni rxūbindi abi' rudēēdi tijban loj Dios. Per ad rūjntidi zi'c rayal ad rēn tēētidi Dios. Gol bidxga' Dios ad gucwēēz tēē gudēēdi ni rudēēdi lojman.

⁴³ '¡Probza lējt, bēnfarisew! guial ruladxidi cwedi lod rbej ree bēn zojbloj lēn ree yadoo, ruladx tēēdi gugajpdioz ree bejn lējt zagdxē nīz lunejz.

⁴⁴ '¡Probza lējt, mextr rajc ley nē lējt bēnfarisew, bēn rusquiee!, din najdi zi'c baa ni ad rguient, abi' ad ragbeet ree bejn rē'p reeman guijcan.

⁴⁵ Dxel gunee tijb mextr rajc ley, rēbaman loj Jesūs:

—Mextr, nē dunujn caneeguijdxil guial rēbil zian.

⁴⁶ Badxi' Jesūs laan rēbaman:

—¡Ziangajc lējt mextr rajc ley, probza lējt!, guial rniabeedi bejn ree gūn reeman ni nawēēgdāt abi' rniabeezidi gūn bejn zian guíaad lējt ni'qui ta'n ad rūjntidi laa reeman yudar din gūn reeman zi'c rēndi.

⁴⁷ '¡Probza lējt!, guial rūjnchaawidi xbaa ree bēn badēē xtiidx Dios loj ree bejn, bēn bagūjt gajc ree xbēngulalidi.

⁴⁸ Zian ragbee ree bejn guial ruladxidi ni been ree xbēngulalidi. Laa reeman bagūjt ree bēn badēē ree xtiidx Dios loj ree bejn, guíaad lējt rayūjnchaawidi xbaa reeman.

⁴⁹ 'Zeel Dios guial ragbeeman gra ni gac, rēbaman: "Gaxhalan bēn rudēē ree xtiidx Dios loj ree bejn, nē ree apóstoles, yu' reeman gugūjtidi yu' tēē reeman sunalidi din gūūndi laa reeman xhienin."

⁵⁰ Abi' bēn naban ree yan, laa reeman yadēēd cwent loj Dios por rejn ni guxhie' ree bēn badēē xtiidx Dios loj ree bejn, bēn gūt ree diizd chi go'tchaaw guidxliuj,

⁵¹ diizd xrejn Abel xt xrejn Zacarías bēn bagūjt reeman ro' yadooro' Jerusalén. Zeel rnin lējt guial ree bēn naban yan, laa reeman quix por gra reeman.

⁵² '¡Probza lējt, mextr rajc ley!, guial ad rtīējtidi chu' ree bejn loj xnejz Dios, ni'quiza lējt ad rūjnt naguiejn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesūs zian, dād bidxe'ch ree bēnfarisew guin nē ree mextr rajc ley. Abi' guzuloj zien ree ni rniabdiidx reeman lojman,

⁵⁴ din guidoon xhie guiebaman din chile' gutedia' reeman laaman.

12*Xlevadur ree bēnfarisew*

¹ La'tgaj canee Jesūs zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesūs rēbaman yalōj loj ree xbejnman:

—Gol gojp cudad con xlevadur ree bēnfarisew, rēn guieban gapidi cudad con ni rusquiee reeman.

² Din achet ni naguie'ch yu' ni ad zaguiant, ad yu' tēēt ni ralan ni ad zagbeet bejn.

³ Zeel gra diidx ni ma guneedi lod nacay, zaguien ree bejn laan lod nayni. Guíaad ree diidx ni ma guneedi ralan lēnū, yu' chi cwidxa' reeman guiniee reeman diidx guin ree diizd guijc ree yu.

*Chu rayal guidxeb bejn
(Mt. 10:28-31)*

⁴ 'Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan.

⁵ Ganin lëjt chu rayal guidxebidi: gol bidxeb Dios bën rajp guialrniabee guial chi ma biguiedaman xguialnabandi zajc guzaalaman lëjt gabijl. Zeel gol bidxebaman.

⁶ 'Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb.

⁷ Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

*Bën rëb loj ree bejn guial najman xbejn Jesucrist
(Mt. 10:32-33; 12:32; 10:19-20)*

⁸ 'Rnin lëjt, chutëez bën guiëb loj ree bejn guial najman da bejnan, ziangajc naj najn Bën guxhaal Dios guiën loj ree xianjl Dios guial da bejnan najman.

⁹ Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

¹⁰ 'Chutëez bën guinieeguijdx Bën guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

¹¹ 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman.

¹² Din chi guidxin hor ni guinieedi, xSprijt Dios gunee diidx guinieedi.

Xcwent tijb xinrijcw

¹³ Tijb bën no'ch loj ree benzien guin rëb loj Jesús:

—Mextr, güjdx loj da bichan din gunee ni rayalan.

¹⁴ Per rëb Jesús lojx:

—¿Chu bazuj naj günan guialguxtis o gagui'san ni tia'di?

¹⁵ Rëb tēeman loj reeman:

—Gol gojp cudad; ad sēēbladxidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax.

¹⁷ Dxel beenx xgab naladxix: “¿Xhienaag günan? Ad ra'ptan lod gagu'chaawan guialnaza'c guin ree.”

¹⁸ Abi' gunaladxix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu narooob ree lod gagu'chaawan laa reen, në graczi ni ra'pan.

¹⁹ Dxel guiën, dád zien guialnaza'c ra'pan par zien ijz, yaziiladxan, gawan, guië'n yabaa tēën.”

²⁰ Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

²¹ Zian rzajc bën rgu'chaaw ni za'c par laagajcaman, per loj Dios achet rajpaman.

*Achetzi rayal chu' bejn xgab
(Mt. 6:25-34)*

²² Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi.

²³ Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman.

²⁴ ¿Gol baguiaa balo ree! Ad rxübint reeb ad rato'p tēët reeb guialnaza'c, ad rajp tēët reeb lod yagu'chaaw reeb guialnaza'c guin, per Dios rudëäd ni raw reeb. ¡Abi' mazri lasajquidi guial loj reeb!

²⁵ ¿Wen guial ru da'tidi xgab ma güün lëjt gajc mazri ziool ya?

²⁶ Abi' bal ni'qui zian ad zile't güündi, ¿xhieczi gan rudi xgab por ni ren ree?

²⁷ '¿Gol baguiaa xhienaag rini's ree guiaa dajn! Ad rüjnt reen dxiin ad rguib tēët reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman.

²⁸ Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lëjt, bën ad riladxza'ct ree laaman nid zuneeman ni gacwidi ya!

²⁹ Zeel ad rudi xgab xhie gawidi o xhie guië'di, ad bal tib yu'zidi laan xgab.

³⁰ Din bën ad nünbeet ree Dios rüjn zian. Laa reeman ru xgab por gra ree ni guin. Per lëjt yu' xDadidi, laaman ragbeechaaw xhienin riaadxidi.

³¹ Per yaloxgaj gol baguuil güündi zi'c rniabee Dios, laaman gunee gra ni ryaadxidi.

Guialnaza'c yu' xanyabaa

(Mt. 6:19-21)

³² Lëjt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenëdi laaman.

³³ Gol bato' ni rajpidi din gudëedan loj ree bënprob. Gol been naguiejn güündi gan guialnaza'c ni ad ararat ni yu' xanyabaa, lod ad zut xingubaan cwan laa reen lod ad zacabe tëët reen.

³⁴ Din lod rajpidi guialnaza'c guin, yagaj za' xquiarguejndi.

Gol guzujsin

³⁵ 'Gol guzujsin zi'c bën ma najcw xab ca' tëë xguijman par griiman.

³⁶ Gol been zi'c ree mojs cabëz yadxin xpatron reex, bën zë loj guialruxhliaa, din diob guixhial reex ro' port yayuman chi gucaaman.

³⁷ ¡Xiquilbaa ree mojs naga'naa cabëz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudëeman ni gaw reex.

³⁸ Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya.

³⁹ Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiëjtaman chu'x lidxaman.

⁴⁰ Zianan zeel gol guzujsin din ad ragbeetidi dxejczy gui't Bén guxhaal Dios.

Mojs za'c në mojs gujdx

(Mt. 24:45-51)

⁴¹ Dxel gunabdiidx Bëd loj Jesús, rëbaman:

—Dad, ¿par dunuzan bel cwent guin ya o par gra ree bejn?

⁴² Badxi' Jesús laan, rëbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenz gra ree mojs rudëë tëëx ni raw reex chi rajl hor?

⁴³ Xiquilbaa mojs cayüjn dxiin zagdx chi yadxin xpatronx.

⁴⁴ Din diidxliczi rnin lëjt, zusa'n gra xieen patron guin loj mojs guin.

⁴⁵ Per bal naladx mojs guin: “Zaglaari yaguaad da patron”, zianz sulojx gusagzix gra ree bën rüjn dxiin yagaj, zi'c béngunaa zi'c xinguaaaw, dxel suloj gawix, guië'x südx tëëx,

⁴⁶ abi' yadxin xpatronx tijb dxex ni ad rbëztix në tijb hor ni ad ragbeetix. Dxel dád casti narooob gudëed patron guin laax, guixhiaalaman laax lod rayal ree bën ad ruzoobt diidx.

⁴⁷ 'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëëx.

⁴⁸ Per mojs ad ragbeet ni rën xpatronx güünx abi' güünx ni rayal casti, ta'nz tëdex casti. Din bën badëed Dios quiarguejn, mazri zien ni rayal güünman por quiarguejn ni badëed Dios lojman. Ziangajc bën badëed Dios guialrniabee, mazri zien ni rayal güünman por guialrniabee ni badëed Dios lojman.

Por Jesús rlia' lasa' ree bejn

(Mt. 10:34-36)

⁴⁹ 'Zialan loj guidxliuj zi'c tijb bën zidgacaaguij xhienin, abi' ¡ma rën nejzdoon tiaguijn!

⁵⁰ Gazaagdiajn guiët tëën, abi' ¡dád yu'nayan diizd yan xt chi gacan cumplid!

⁵¹ Ad naladxidi zialan loj guidxliuj par yabecdxen luxdoo bejn, zialan din guial guililadx reeman naj chu' wadijl.

⁵² Din diizd yan, lod naj reeman gaay loj tijb famil, til choonman contr tio'paman, tio'paman contr choonaman.

⁵³ Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

Sen rguien xanyabaa

(Mt. 16:1-4; Mr. 8:11-13)

⁵⁴ Rëb tëë Jesús loj ree benzien guin:

—Chi ruguaadi ririi zaj niz lod rëéz gubijdx, rëbidi: zal guia, abi' rajc gajc zian.

⁵⁵ Abi' chi ririi bi niz sur, rëbidi: gac nalaa, abi' rajc gajc zian.

⁵⁶ ¡Bën rusquiee! Ragbeedi xhie rën guiëb sen rguien xanyabaa në loj guidxliuj, ¿chexquiza zeel ad ragbeetidi xhie rën guiëb ni cayajc loj guidxliuj yan?

Babex zagdx con bën rdxe'ch lüj

(Mt. 5:25-26)

⁵⁷ ¿Chexc ad rüjnt lëjt gajc xgab conin naj ni zagdxe?

⁵⁸ Bal chu bën rudëed lüj loj guxtis, been naguiejn baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin yayü lüj loj ree bën cu' lüj ladxguiib.

⁵⁹ Naj rni lüj, ad zariitil ladxguiib guin xtczi quixil gra ni na guxtis guin.

13

Gol bayüjn xgab por xtolidi

¹ Lën gajc ree dxejzi wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea, abi' bago'chaman xrejn reeman con xrejn ree be bagüjt reeman par gudëed reeman loj Dios zi'c gon.

² Dxel rëb Jesús:

—Ad bal naladxidi guzajc ree bën Galilea guin zian guial naj reeman mazri bëndol guial loj gra ree bën Galilea.

³ Din naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

⁴ Ad bal naladxidi bën chiinbichoon güt ree chi guxa't torre ni la Siloé laa reeman, naj reeman mazri bëndol guial loj gra ree bën zojb Jerusalén.

⁵ Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni ad rtiat

⁶ Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetctzi bidxaaglojman.

⁷ Dxel rëbaman loj bën rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetctzi rdxaaglojn. Batüügan din nawëëgzi rüjnan loj guidxliuj guie.”

⁸ Per rëb bën rajp guidxliuj guin: “Dad, basa'nsiin zatib ijz, yabeclaan yuj xanan gagu' tëënan abon.

⁹ Rupent zian tian, per bal id zacan dxel tügan.”

Bayüjn Jesús tijb béngunaa ca bëw xijch

¹⁰ Tijb dxej raziiladx ree bejn, culüü Jesús bejn ree lën tijb yadoo,

¹¹ yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rila'tctzi yaliman.

¹² Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

¹³ Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdxe.

¹⁴ Per bën rniabee lën yadoo guin dád bidxe'chaman guial bayüjn Jesús bën guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

¹⁵ Badxi' Dad Jesús laan rëbaman:

—Bën rusquiee, ¿nid rxhiee xgo'ndi o xburidi dxej raziiladx ree bejn ya par chiquië'di laa reeb nijs?

¹⁶ Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

¹⁷ Chi rëb Jesús zian, gra ree bën rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnan.

Xcwent xhaj moxtajs

(Mt. 13:31-32; Mr. 4:30-32)

¹⁸ Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman?

¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

Xcwent levadur

(Mt. 13:33)

²⁰ Rëb Jesús zatijb:

—¿Xhienaag ganin naj xguialrniabee Dios?

²¹ Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

*Port nadëë**(Mt. 7:13-14, 21-23)*

²² Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman.

²³ Abi' tijb bejn gunabdiidx lojman rëbaman:

—Dad, ¿ta'nz ree bën gac perdon ya?

Badxi' Jesús laan rëbaman:

²⁴ —Gol been naguiejn din chu'di niz ro' port nadëë, din naj rni lëjt, zien ree bën rën chu', per ad zile't chu' reeman.

²⁵ Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.”

²⁶ Dxel suloj guiëbidi: “Tijbzi badaaw ree, tijbzi badu' ree, niz lad dux nejzan balüül dunujn.”

²⁷ Per naman lojdi: “Ma rnin, ad ragbeetan ban guzadi. Gol biquied lon bëndol.”

²⁸ Ni goondi gaw tëë layidi chi guguaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi.

²⁹ Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios.

³⁰ Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

*Roon Jesús por Jerusalén**(Mt. 23:37-39)*

³¹ Hor guin gajc bidxin tio'p choon ree bënfarisew, abi' rëb reeman loj Jesús:

—Baguiaj, baza niz guie, din rën rey Herodes gugüjtaman lüj.

³² Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bënragxuu ree, abi' widx gulooxan.”

³³ Per naj rayal gusnuu da nejzan yan në guixie në widx, din ad najt guial guiët tijb bën rudëë xtiidx Dios loj ree bejn luguiedx ren bal id najn Jerusalén.

³⁴ ‘bén Jerusalén, bën Jerusalén, rugüjtidi bën rudëë ree xtiidx Dios loj ree bejn rucaaguaiaj tëëdi gra ree bën rxhiaal Dios lojdi! ¡bëlczí volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi!

³⁵ Zianan zeel yaya'n ladxidi zi'c tijb guiedx lod achut zojb. Abi' rnin lëjt, diizd yan ad zuguaatridi naj xt chi guidxin dxej guiëbidi: “¡Nüjnle' Dios bën zëëd por laaman!”

14*Rayün Jesús tijb bën rzaaguij*

¹ Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman,

² guial za' tijb xinragxuu lojman rzaaguijx.

³ Dxel gunabdiidx Jesús loj ree mextr rajc ley në loj ree bënfarisew guin, rëbaman:

—¿Zajc yayüjn bejn bënragxuu dxej raziiladx ree bejn ya o ad zajctan?

⁴ Per laa reeman achetczí rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguaiajx.

⁵ Dxel rëbaman loj ree bënfarisew guin:

—¿Bal tijb xburidi o tijb xgo'ndi yab lën tijb bizë, nid zabëëdi laab ya, majsi naj dxej raziiladx bejn?

⁶ Abi' achet gojc nadxi' reeman.

Bën rej ree loj guialruxhliaa

⁷ Chi baguiaa Jesús rbe ree biooz luar lod rbej ree bën mazri zojbloj, rëbaman loj reeman:

⁸ —Bal chu guinee lüj chel loj tijb guialruxhliaa, ad cwel luar rbej ree bën mazri zojbloj. Din zajc guidxin zatijb biooz mazri zojbloj guial lojl,

⁹ abi' gui't bën gunee gropidi naman lojl: “Badëëd lod zojbil cwe bën guie.” Dxel rayal chel guidib ratul chisobil loj yagxhil bigra.

¹⁰ Zeel chi guinee reeman lüj, zagdxeli bisob loj yagxhil bigra, din chi gui't bën gunee lüj naman lojl: “Miw, badëd loj tijb luar mazri zojbloj.” Zian, gra ree bën zojbnël xan mex guza't lüj zagdxë.

¹¹ Din bën rlies xvalor gajc, yaya'nxtuman. Guiáad bën rüjn naya zajs xvaloraman.

¹² Dxel rëb Jesús loj bën gunee laaman:

—Bal goc cu'l gualraw, ad guinee xmiwil, ni'qui lasa'l, ni'qui bijchil, ni'qui benrijcw zojbnèl gajxh. Din laa reeman yu' dxej guinee reeman lùj, abi' zian yanee reeman ni gudaw reeman lidxil.

¹³ Zagdxeli naj, chi güünl tijb lanij, guneé bènprob ree, nè ree bèn ad nadaant yaa, nè ree bencoj con ree bénlutia'p.

¹⁴ Xiquilbaal bal güünl zian, din laa reeman ad zajct yanee ni badëédil. Per chi guidxin dxej yaban ree bèn bazoob xtiidx Dios, Dios yaguijx laan lojl.

Xcwent bèn been tijb lanij

¹⁵ Chi bigueijn tijb bèn zojbnè Jesús xan mex ni rëbaman, rëbaman loj Jesús:

—¡Xiquilbaa ree bèn yayal gaw lod rniabee Dios!

¹⁶ Dxel rëb Jesús lojman:

—Tijb bejn badxe' gualraw par xche, abi' guneeman zien da't ree bejn.

¹⁷ Chi ma gojl hor gaw reeman xche, guxhaal xmojsaman din chex chiguedxix loj ree biooz guin: “Gol guda din graczi ma najcchaaw.”

¹⁸ Per graczi reeman guzuloj caynab perdon. Bèn yaløj guin, rëbaman: “Yan gajczi guzin tijb guidxliuj, rayal chiqiuanan; been wen güjdx lojman din güünman naj perdon.”

¹⁹ Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.”

²⁰ Zatijbaman rëb: “Yan gajczi baxhlian zeel ad zile't gualan.”

²¹ Chi badxin mojs guin bagojn xpatronx gra ni rëb ree bèn guin, dád balenman, dxel rëbaman lojx: “Baquiejn wej niz galay ni, nè niz lad ree nejz, tanë gra ree bènprob nè ree bèn ad nadaant yaa, nè ree bencoj con ree bénlutia'p.”

²² Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.”

²³ Dxel rëbaman lojx: “Wej niz loj carreter nè niz loj ree nejz la's, been naguiejn ben ren ree din gui't reeman din cha lëñü lidxan.

²⁴ Din naj rni lojdi, ni'czi tijb ree bèn gunen yaløj ad zajwt gualraw benchaawan par xche.”

Ni rayal güün ree bèn rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, nè guial loj xi'ndi, o bijchidi o bizandi, rayal tée guiëndi naj mazri guial loj xguialnabandi, din bal id züjndi zian ad zajct gaquidi da bejnan.

²⁷ Bèn ad rënt sagdiaj guidnal tēēman naj, ad zajct gacaman da bejnan.

²⁸ “Bal chu rën güün tijb yu narooob, çnid yaløjxgaj cweman ya din cwēēman cwent zadaan xmiliaman ya din gulooxaman laan?”

²⁹ Din bal sulojman xcimiantan abi' ad zulooxtaman laan, graczi ree bèn guguaa laan guze' laaman,

³⁰ guiëb reeman: “Guzuloj cayüjn bèn guin yu abi' ad gojct nulooxaman laan.”

³¹ “O bal tijb rey güün wadijl contr zatijb rey, çnid yaløjxgaj cweman ya güünman xgab züjn chi mil xsuldadaman gan loj stjib rey zidnë gajl mil suldad ya?”

³² Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bèn chinë ree xrusonman din yaya'n reeman diidx ad zut wadijl.

³³ Yan, ziangajc rnin lojdi, chutëëz lëjt bal id zusa'n gra ni rajpidi din guidnalidi naj, ad zajct gaquidi da bejnan.

Bal id zajcri zëd naxij

(Mt. 5:13; Mr. 9:50)

³⁴ Dxel rëb Jesús:

—Ni zagdxë naj zëd. Per bal id zajcran naxij, çxhieza naag yayajcan naxij zatijb?

³⁵ Ad rüjntan sirv par luyuj ni'qui par loj abon, rzëëbzán. ¡Bèn rën ree gucaagdiajg, gol bacaagdiajg!

15

Xcwent xiil gunit

(Mt. 18:10-14)

¹ Gra ree bèn ruquijx impuest nè gra ree bëndol, bibig reeman lod za' Jesús din gucaagdiajg reeman ni rnieeman.

² Guiáad ree bënfarisew con ree mextr rajc ley rnieeguidx reeman laaman, rëb reeman:

—Ruchajg bèn guin bëndol ree rawnë tēēman laa reeman.

³ Dxel rëb Jesús loj reeman:

⁴—Bal tijb bejn rajp tibgayuu xiil abi' rnijt tijbib, ζnid rusa'nman zatajppajlchiinbitapib dajn ya abi' rigdiilaman xiil gunit guin xt lodzi radxejlaman laab?

⁵Abi' chi radxejlaman laab rabaaman, rudxiibaman laab dxidyēnman.

⁶Dxel chi radxin lidxaman, ruto'p ree xmiwaman nē ree bēn zojbnēman gajxh abi' rēbaman loj reeman: “Gol babaa zi'c rabaan, din ma badxejlan da xiilan be gunit.”

⁷Yan, rniin lējt, ziangajc rabaanē Dios tijb bēn rayūjn xgab por xtol guial loj tajppajlchiin-bitap benza'c ad ryaadxt yayūjn xgab por xtol.

Xcwent milia ni bizēēb

⁸'O bal tijb bēngunaa rajpaman chii milia plajt abi' rusēēbaman tijban, ζnid ruze'caman guij ya ruloob tēēman lēnū abi' raguiilaman laan zagdxe da't xt lodzi radxejlan?

⁹Abi' chi radxejlaman laan, ruto'p ree xmiwaman nē ree bēn zojbnēman gajxh, abi' rēbaman loj reeman: “Gol babaa zi'c rabaan din ma badxejlan milia basēban.”

¹⁰Yan, naj rni lojdi, ziangajc rabaa ree xianjl Dios por tijb bēndol rayūjn xgab por xtol.

Xcwent bēn rūjn perdon xi'n

¹¹Rēb tēē Jesús loj reeman:

—Tijb bejn yu' tio'p xi'nman.

¹²Abi' xin naj mazri xinguaiag, rēb loj xdadix: “Dad, banee ni rayal gaca'n.” Dxel badēēman ni rayal tijbgaj reex.

¹³Ad gojct xchej ni cwa' reex ni rayal reex, xin naj xinguaiag guin bato'gajquix graczi ni badēēd xdadix lojx, abi' con milia guin wejx zijt bignijt xlia'x graczi xmiliax guial beenx ni rēntzix.

¹⁴Per chi ma banijtx gran, dxel guyu gubijn niz lod za'x abi' guzuloj biaadx ni gawix.

¹⁵Dxel wejx bignabix dxiin loj tijb bēn zojb yagaj, abi' guxhaalaman laax chigajpjc cūch ree dajn.

¹⁶Guial tant rliaanx xt guyēnx niajwix ni raw ree cūch guin, per achut rudēē laan.

¹⁷Dxel beenx xgab naladxix: “iZien ree xin rūjn dxiin lidx da Dadan xt sobr rūjn ni raw reex, guiaad naj guie ma guiētan bējz!

¹⁸Yan, yazaan yaya' lidx da dadan din guiēn lojman: Dad, ma benan dol loj Dios nē lojl.

¹⁹Ad rayaltri guinieel naj xi'n; been naj cwent zi'c tijb ree xmojsil.”

²⁰Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxūnman bigchaa-glojman laax, abi' gudiidxaman laax gudaw tēēman laax xid.

²¹Dxel rēbix lojman: “Dad, ma benan dol loj Dios nē lojl, ad rayaltri guinieel naj xi'n.”

²²Per rēb xdadix loj ree xmojsaman: “Gol baquiejn gol tanē lajd zagdxe, gol basca-jcwixan, gol badxe' tijb guiibnil yaax gol baslēē tēēx gurēch,

²³gol chica' go'n mazri nadaan, gol bagūjtib din yadaaw ree yaguieen ree lanij.

²⁴Din par naj ma gūjt da xi'nan abi' yan ma babanx, gunijtx abi' ma badxejlax.” Dxel guzuloj cayūjn reeman lanij.

²⁵'La'tgaj xi'nman xingol guin cayūjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tēē reeman.

²⁶Dxel gurejdxix tijb xmojs xdadix, gunabdiidxix xhienin cayajc lidxix.

²⁷Badxi' mojs guinan rēbix: “Guial baguiaad bijchil zeel gunabee xdadil gūjt tijb go'n mazri nadaan guial nadaanx baguiaadix.”

²⁸Per dād bidxe'ch xingol guin, abi' ad guyēntix nayux. Zeel wej xdadix biguiedxaman lojx din yayux.

²⁹Dxel rēb loj xdadix: “Lūj ragbee ma gojc xchej cayūnan xchiinl, zianczi ruzoban xtiidxil; per ni'czi tijb ad waneetil tijb dxibdobēz din gūnnē' ree da miwan lanij.

³⁰Guiaad yan baguiaad xi'n, xin ma bignijt xlia' xmiliaal con ree bēngunaa dxuudx, abi' gunabeel gūjt go'n mazri nadaan par laax.”

³¹'Dxel badxi' xdadix laan rēbaman: “Xi'n, zianczi za'l con naj, graczi ni ra'pan naj xieenl.

³²Per yan rayal yaguieen ree lanij yabaa tēē ree, din bijchil xin ma gūjt par naj, ma babanx, gunijtx abi' ma badxejlax.”

16

Xcwent tijb mojs rniabee ree mojs

¹Rēb tēē Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman.

²Dxel gurejdxaman laax rēbaman lojx: “ζXhie rēn guiēb ni riguejnan cayūjn! Banee cwent lon xcwent xchiinl, din achetri dxiin gunen lojl.”

³ Dxel guzuloj beenx xgab gunaladxix: “¿Xhienaag gūnan yan ma gusa'n da patronan naj sin dxiin? Ad yu'tan gojl gūnan dxiin dajn, ratu tēen ganaaban carda.

⁴ Ma ragbeen xhienaag gūnan din guiēn ree bejn naj chi ad zūntran dxiin.”

⁵ Dxel gurejdxix tijb gaj ree bēn ral loj xpatronx, rēbix loj bēn bidxin yaloj: “¿Plac ralil loj da patronan?”

⁶ Abi' rēbaman: “Ralan tibgayuu barril sejt lojman.” Dxel rēbix: “Cwa' gui'ch guie lod ca ni ralil lojman, been zatijban bacaa lojn ralil tū'pchiizan.”

⁷ Dxel gunabdiidix loj zatijbaman rēbix: “Laadx lūj, ¿plac ralil?” Abi' rēbaman: “Tib gayuu ingujch trigo.” Zianz rēbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.”

⁸ Dád badxaloj patron guin guial nasin mojs mal guin por ni beenx. Din mazri nasin ree bēn ad zinalt xnejz Dios con lasa' reeman guial loj ree bēn zinal xnejz Dios.

⁹ Rnin lojdi, gol beennē dxiin ni rajpidi loj guidxliuj guie par gagnēdi bejn din chu' xmiwidi, din chi yaran ma yu' bēn yaca' lējt lod gapidi guialnaban tiblayaa.

¹⁰ Bal chu rūjn zi'c rayal con ta'n ni rudēēd bejn lojman, zūjnman zi'c rayal con zro'n. Ziangajc bēn ad rūjnt zi'c rayal con ta'n ni rudēēd bejn lojman, ad zūjn gajctaman zi'c rayal con zro'n.

¹¹ Yan, ziangajc bal id zūjndi zi'c rayal con ni za'c yu' loj guidxliuj guie, ¿chu gap lējt confianz con guialnaza'c yu' xanyabaa?

¹² Bal id zūjndi zi'c rayal con ni ad najt xieendi, ¿chu gunee lējt ni rayalidi?

¹³ Ni'qui tijb mojs ad zajct gūnux sirv loj tio'p patron; din zadxe'chix tijbaman abi' zēnx zatijbaman; o zajquix xinza'c con tijbaman abi' zūjnx tiblad zatijbaman. Zeel ad zajct gūndi sirv loj Dios, nē loj milia.

¹⁴ Abi' ree bēnfarišew guial mazri rēn reeman milia, chi biguiejn reeman ni rēb Jesús guzuloj cuze' reeman laaman.

¹⁵ Dxel rēb Jesús loj reeman:

—Rūjndi benza'c niz loj ree bejn, per Dios nūnbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ Xley Moisejs nē ni bacaa ree bēn badēē xtiidx Dios loj ree bejn, naga'loj been reen dxiin xt chi bi't Waj bēn baroobnijs bejn ree. Abi' diidz nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rūjn naguiejn chu' loj xguialrniabeeman.

¹⁷ Adli nawēēgt nit xanyabaa nē guidxliuj, guial yaya'n tijb diidz zēēd loj ley guin guial ad zajctan cumplid.

Rulūi Jesús xcwent guial rala' lasa'

(Mt. 19:1-12; Mr. 10:1-12)

¹⁸ Bal tijb xinguaaw rala' lacheelix abi' rtia'x ben ren, dolan cayūjnx. Ziangajc xin rtia' tijb bēngunaa bala' lacheel, dolan cayūjnx.

Xinriwc con Lazr

¹⁹ Basnuu Jesús, rēbaman:

—Guyu tijb xinriwc, guzujchaawix con ganaxczi lajd zagdxe, abi' guixie guixieczi rūjnx lanjro'.

²⁰ Guyu tēē tijb xinprob brii lajx Lazr, rbejx ro' xport xinriwc guin abi' guidibлагаax ca guiadx.

²¹ Rēn nejzdoos Lazr guin gawix ni riajb xan xmex xinriwc guin. Abi' xt ree bē'cw rbig rlie' reeb loj ree guiadx ni cax.

²² Chi bidxin dxej gūjt Lazr dxel bignē ree xianjl Dios laax lod naj nix da't, lod za' Abraham. Nē xin rijcw guin gūjt, abi' biguie'chix.

²³ Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwē' Abraham.

²⁴ Dxel gurixdiajx rēbix: “Dad Abraham, baya naj, guxhaal Lazr din gugajdx lupunt xbacwēnx din gui'tix yasiaalyujx lūdxan, din dád cazaagdiajn loj bajl guie.”

²⁵ Per badxi' Abraham xtiidxix rēbaman: “Xi'n, basaaladx guial dád nix guyu luxdool chi guban loj guidxliuj, guiáad Lazr dád naya gubajnx. Yan, rayalix lod yabaax guiáad lūj rayalil lod sagdiaj.

²⁶ Nētēē yan bēn za' ree guie ad zajct tēd reeman yagaj, ni'qui ree bēn za' yagaj ad zajct tēd reeman guie, din za' bala'ro' du galay ree.”

²⁷ Dxel rēb xinriwc guin lojman: “Rniaaban lojl dad, been wen guxhaal Lazr lidx da dadan,

²⁸ Iod zojþ gaay ree da bichan din chicojnx laa reex chitëë në laa reex gui't luar guie, lod yu' zro' casti."

²⁹ Per rëb Abraham lojx: "Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex."

³⁰ Abi' rëb xinrijcw guin: "Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex."

³¹ Per rëb Abraham lojx: "Bal id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt."

17

Bën ruzaalguiiw bejn din güünman dol

(Mt. 18:6-7, 21-22; Mr. 9:42)

¹ Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per jprobza naj bën ruzaalguiiw zatijb bejn guial güünman dol!

² Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bën qui rliladxri naj din güünman dol.

³ jGol gojp cudad!

⁴ Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon.

⁵ Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: "Been naj perdon ad züntran zian", rayal güün! laaman perdon.

Guialrniabee në guialrliladx

⁶ Dxel rëb ree xi apóstoles Jesús lojman:

—Banee dunujn mazri guialrliladx.

⁷ Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: "Bia'xh guie, bisob loj nijsdoo", zuzooban xtiidxidi.

Ni rayal güün tijb mojs

⁸ Bal tijb lëjt rajp tijb mojs, abi' chi yaguaaad mojs guin bigla'x yuj o bigajpix begui'xh ree ya, ¿wen zëjbidi lojx ya: "Guyu, gurej din gawil"?

⁹ Ad zëjbtidi zian, guiëblidi: "Bachaa xabil, been ni gawan, guda'n. Chi lox gawan guië' tëën dxel ma zajc gawil guië' tëël."

¹⁰ Abi' wed ni'qui quixtëë ad zudëëtidi lojx din cayüjnzix ni rayal güünx.

¹¹ Ziangajc lëjt chi loox güündi gra ni gunabee Dios dxel guiëbidi: "Nayajcan mojs ni ad rüjnt sirv, din baguieenzan ni rayal yaguieenan."

Rayüjn Jesús chii ree bën rajc guialguijdx la lepra

¹² Chi ma cadxin Jesús Jerusalén, gudëdaman guiedx riga' ree niz Samaria në niz Galilea.

¹³ Abi' chi cayuman tijb luguiedx dobëz, bigchaagloj chii ree bën rajc guialguijdx la lepra laaman. Per zijt guzuj reeman,

¹⁴ rbixdiaj reeman, rëb reeman:

—jJesús, Mexti, baya dunujn!

¹⁵ Chi baguiaa Jesús laa reeman, rëbaman loj reeman:

—Gol chej loj ree bixhioz din guguiaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman.

¹⁶ Dxel tijbaman chi gogbeeman ma bayajcaman, bayejcaman, rbixdiajman rudëëman quixtëë loj Dios.

¹⁷ Abi' bazuxibaman loj Jesús, basajb lojman xt luyuj persi badëëman quixtëë lojman. Abi' najman bën Samaria.

¹⁸ Dxel rëb Jesús:

—¿Nid chii naj ree bën bayajc ya? ¿Con zagaa reeman?

¹⁹ ¿Tijbzi benzit guie bayejc ya rudëëman quixtëë loj Dios?

²⁰ Dxel rëbaman loj bën guin:

—Bisu. Baguiaj, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²¹ Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguiaa bejn.

²² Abi' achut guiëb: "Laan za' guie", o "Laan za' ni" ya, din xguialrniabee Dios mal za'n galaydi.

²² Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxexzi, per ad zuguaatidi laaman.

²³ Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman.

²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj.

²⁵ Per yalojxgaj sagdiajman abi' ad zënt ree bén riga' yan laaman.

²⁶ Zi'c goc gulal chi guban Noé, zian gac chi gui't Bén guxhaal Dios.

²⁷ Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman.

²⁸ Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree.

²⁹ Per chi brii Lot luguiedx Sodoma, guzuloj biyajb gui' xanyabaa në azufre, abi' güjt gra reeman.

³⁰ Ziangajc gac dxej ni gui't Bén guxhaal Dios.

³¹ 'Dxej ni gac zian, bén yë'p gui'c yu ad zuguaajttaman chiglëë ni nagu'man lënu. Abi' bén za' dajn, ad zayejct lidxaman.

³² Gol basaaladx ni guzac lacheel bén brii laj Lot.

³³ Bén mazri rën guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

³⁴ Naj rni lëjt, guxhinzi' lod naga' tio'p bejn tijbzi loj loon, tijbaman sa zatijbaman yaya'n.

³⁵ Guiaad lod cayojt tio'p ree béngunaa, tijbaman sa zatijbaman yaya'n.

³⁶ Abi' lod za' tio'p ree xinguaaw dajn, tijbix sa zatijbix yaya'n.

³⁷ Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

18

Xcwent tijb béngunaa bizëjb në tijb juejs

¹ Be Jesús tijb cwent loj ree xbejnman, persi balüüman laa reeman guial zianci rayal cwedx guiniab reeman Dios ad zadxagtczi reeman.

² Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëëtaman bejn ree.

³ Luguiedx zügajc zojb tijb béngunaa bizëjb, rniabaman loj juejs guin din güünman guialguxtis gagnëman laaman loj bén rdxe'ch laaman.

⁴ Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëëtan bejn ree,

⁵ per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

⁶ Dxel rëb Jesús loj reeman:

—Zian gunee juejs mal guin.

⁷ Diidxgui Dios, çnid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya?

⁸ Naj rni lëjt guial ad zaglaat gagnëman laa reeman. Per chi gui't Bén guxhaal Dios, çchuj ni zadxaaglojraman bén rliladx Dios loj guidxliuj ya?

Xcwent bénfarisew con bén ruquijx impuest

⁹ Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

¹⁰ —Tio'p ree xinguaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest.

¹¹ Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaa, benmal, bén za'në béngunaa ren, ni'qui zi'c naj bén ruquijx impuest guin.

¹² Rba'nán tio'p volt lën xuman, abi' gra ni rünan gan rünanan chii lala' persi runen tijban lojl.”

¹³ Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¡Dios, baya naj najn tijb xindol!”

¹⁴ Naj rni lëjt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din bën rlies xvalor gajc achet lasajcaman loj Dios, guíaad bën rijn naya laaman mazri lasajc loj Dios.

Rüjnle' Jesús xindoo ree

(Mt. 19:13-15; Mr. 10:13-16)

¹⁵ Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bën zinë ree laa reex.

¹⁶ Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree bën naj zi'c laa reex.

¹⁷ Din naj rni lëjt, bën ad riladxt xgualrniabee Dios zi'c tijb xindoo, ad zile't chu'man loj xgualrniabee Dios.

Xcwent tijb xin rijcw

(Mt. 19:16-30; Mr. 10:17-31)

¹⁸ Tijb xin rniabee, gunabdiidx loj Jesús rëbix:

—Mextrza'c, çxhie rayal günan din ga'pan gualnaban tiblayaa con Dios?

¹⁹ Badxi' Jesús laan, rëbaman:

—çChexc zeel nal lon benza'c? Achut naj benza'c, tijbzi Dios.

²⁰ Lùj rajc ree mandamient: "Ad sunël béngunaa ren, ad gugüjtijl bejn, ad cwanl, ad cwëël xtiidx bejn, gojp respejt xdad xniaal."

²¹ Dxel rëbix loj Jesús:

—Gra ree ni guin cayünan diizd xindoon.

²² Chi bigueijn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëël milia guin loj ree bënprob. Zian gapil gualnaza'c xanyabaa, dxel gui'til guidnalil naj.

²³ Chi bigueijn xin guin zian, dád guyunayax guial dád xinrijcwan.

²⁴ Chi baguiaa Jesús guial dád yu'nayax, rëbaman:

—jDád nawëëg naj chu' benrijcw loj xgualrniabee Dios!

²⁵ Adli nawëëgt téd tijb camell xan gagux, guial chu' tijb bën rijcw loj xgualrniabee Dios.

²⁶ Abi' ree bën bigueijn ni rëb Jesús, rëb reeman:

—çChu za zajc laa loj xcasti Dios?

²⁷ Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

²⁸ Dxel rëb Béd lojman:

—Dad, ma basa'nan graczi ni raya'pan persi zudnaalan lùj.

²⁹ Zianz rëb Jesús:

—Diidxliczi rnin lojdi, chutëëz bën rusa'n lidx, lacheel, bijch, o xdad, o xniaa, o xi'n guial rijnman zi'c rniabee Dios,

³⁰ mazri zien ni tia'man loj guidxliuj guie. Abi' zajpaman gualnaban tiblayaa con Dios.

Rugojn Jesús zatijb guial guiëtaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tiblad, abi' rëbaman loj reeman:

—Yan, ziyo' ree Jerusalem lod gac zi'c bacaa ree bën badëë xtiidx Dios loj ree bejn xcwent Bën guxhaal Dios.

³² Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojp xhiejn reeman lojman.

³³ Quin reeman laaman dxel gugüjt reeman laaman, per ni yayon dxex yabanman.

³⁴ Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nigña' reeman xhie rën guieb ni guneeman.

Rajajc guiaaloj tijb bënlutia'p

(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bënlutia'p, zojbaman cwë' nejz rniabaman carda.

³⁶ Chi gogbeeman cadéd zien ree bejn, gunabdiidxaman xhie cayajc.

³⁷ Abi' rëb reeman lojman guial Jesús bën Nazaret cadéd niz yagaj.

³⁸ Dxel gurixdiajman rëbaman:

—jJesús, xdiaa Davi, baya naj!

³⁹ Bën ned ree rdilë reeman laaman din gucwëëz ro'man, per mazri rbixdiajman, rëbaman:

—jXdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

⁴¹ —¿Xhie rën! gūnan por lūj?

Badxi'man laan rëbaman:

—Dad, rënan yani lon.

⁴² Dxel rëb Jesús lojman:

—¡Ma zile! guguaial! Ma bayajquil guial bililadxil naj.

⁴³ Hor guin gajc bani loj bën guin, abi' binalaman Jesús rudëëman quixtëë loj Dios. Në gra ree bën baguiaa ni goc rudëë quixtëë loj Dios.

19

Wej Jesús lidx Zaqueo

¹ Guyu Jesús luguiedx Jericó abi' guzuloj cadëdaman luguiedx guin.

² Yagaj zojb tijb benrijcw laman Zaqueo. Laaman rniabee ree bën ruquijx impuest.

³ Rën Zaqueo guin güünbeeman Jesús, per ad rilet' guguaaman laaman guial dád zien ree bejn abi' laaman najman bendop.

⁴ Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod téd Jesús.

⁵ Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús.

⁷ Chi baguiaa ree bejn zian, gra reeman guzuloj caneeguijdx Jesús rëb reeman zi-gya'nman lidx tijb bëndol.

⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bën baquijxan mazri guial loj ni naj quixaman, yayünan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bën zojb lidx Zaqueo guial rliladxaman Dios zi'cgajc Abraham.

¹⁰ Din Bën guxhaal Dios zëëdaman zidgadilaman bën ad zët ree loj xnejz Dios din laa reeman loj xcasti Dios.

Xcwent milia

¹¹ Bën cucaagdiagj ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xgualrniabee Dios.

¹² Dxel rëbaman loj reeman:

—Guyu tijb bejn, zëëdaman loj tijb famil zojbloj. Zëman zijt lod tia'man gualrniabee din gacaman rey dxel yayejcaman nabee ladxaman.

¹³ Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yagualan.”

¹⁴ Per ree bën ladxaman guial rdxe'ch reeman laaman, guxhaal reeman tibcwaa ree bën zinal laaman persi biguiedx reeman guial ad rënt reeman gac bën guin xrey reeman.

¹⁵ Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan.

¹⁶ Mojs bidxin yaloj rëbix: “Dad, milia ni baneel ma beenan gan chii volt mazri.”

¹⁷ Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lūj nabeel chii guiedx.”

¹⁸ Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.”

¹⁹ Ziangajc rëb rey guin loj mojs guin: “Lūj nabee gaay guiedx.”

²⁰ Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo,

²¹ din bidxeban lūj guial ad rayatil bejn. Raca'l ni ad najt xieenl abi' rato'pil gualnaza'c lod ad guxübintil.”

²² Dxel rëb rey guin: “Mojs guiidx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen gualnaza'c lod ad guxübintan.

²³ ¿Chexc ad badëëttil da milian nigui'n bejn din chi nuguialan naca'nan con guidib xi'nan?”

²⁴ Dxel rëb rey guin loj ree bën za' yagaj: “Gol baca' milia zii lojx, gol badëëdan loj xin ca' mazran.”

²⁵ Abi' rëb reeman loj rey guin: “Dad, per ma ca'x zro'n.”

²⁶ Badxi'man laan rëbaman: “Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman.

²⁷ Abi' ree bén rdxe'ch naj bén ad guyënt ree niajcan rey, gol tanë reeman guie, gol bagüjt reeman lon.”

Ru Jesús Jerusalén

(Mt. 21:1-11; Mr. 11:1-11; Jn.12 :12-19)

²⁸ Chi gulox rëb Jesús zian, dxel basnuu zëman Jerusalén.

²⁹ Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman,

³⁰ rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb.

³¹ Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

³² Wej ree bén guxhaalaman bidxaagloj gajc reeman zi'cgajczi rëb Jesús loj reeman.

³³ Abi' chi caxhiec reeman bur guin, gunabdiidx ree bén naj xbur laab, rëb reeman:

—¿Chexc zeel caxhiequidi bur guin?

³⁴ Badxi' reeman laan, rëb reeman:

—Din Dad Jesús cayaadx laab.

³⁵ Dxel binë reeman bur guin lod za' Jesús, zianz badxiib xab reeman xijchib abi' bejn reeman laaman yudar persi gudxibaman laab.

³⁶ Abi' ree bejn rguijxh xab reeman lunejz lod zë Jesús.

³⁷ Chi ma zë reeman gajxh laguiajt ni naj guia' la Olivos, gra ree bén zinal Jesús guzuloj rbixdiaj reeman guial däd rabaa reeman abi' ruza't reeman Dios zagdxë por gra ree milagr ni ma baguiaa reeman.

³⁸ Rëb reeman:

—¡Nüjnle! Dios bén zëëd por laaman! ¡Yu' guialrabaa xanyabaa! ¡Benza'c bendxoon naj Dios bén yu' xanyabaa!

³⁹ Dxel ree bénfariw no'ch loj ree bén zinal laaman, rëb reeman lojman:

—Mextr, gudilë ree bén guin chitëë rniee reeman zian.

⁴⁰ Per badxi'man laan rëbaman:

—Naj rni lëjt, bal yacwëëz ro' reeman, guiaj ree cwixdiaj zian.

⁴¹ Chi bidxinman gajxh Jerusalén, dxel baguiaaman guiedx guin, zianz biinman por laan.

⁴² Rëbaman:

—¡Bén Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan.

⁴³ Din guidxin dxej ni güün ree bén rdxe'ch lëjt tijb ze' gadëd ladxidi, abi' gra lad gusiaaw reeman lëjt,

⁴⁴ gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

Rabëë Jesús bén ruto' ree ro' yadooro' Jerusalén

(Mt. 21:12-17; Mr. 11:15-19; Jn.2 :13-22)

⁴⁵ Chi bidxin Jesús ro' yadooro' Jerusalén, guzuloj caybëëman bén cuto' ree në ree bën cazii,

⁴⁶ rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nüjndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguuil reeman mod din gugüjt reeman laaman.

⁴⁸ Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

20

Xguialrniabee Jesús

(Mt. 21:23-27; Mr. 11:27-33)

¹ Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel,

² abi' rëb reeman lojman:

—Guna, ¿chu na güün ni guin ree? ¿Chu banee guialrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n:

⁴ ̣chu guxhaal Waj bidgaroobnijsaman bejn ree, Dios ya o bénguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “̣Chexquiza zeel ad bililadxtidi laaman?”

⁶ Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman rililadx guial Waj gojc bën badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree.

⁸ Dxel rëb Jesús loj reeman:

—Ni'qui naj ad zanitan lojdi chu baneë guialrniabee günan ni guin ree.

Xcwent ree mojs guiidx

(Mt. 21:33-44; Mr. 12:1-11)

⁹ Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bën güün dxiin lojn, zëtaman zijt.

¹⁰ Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bën rüjn dxiin loj guiniaa guin gudijn reeman mojs guin abi' badxi' reeman laax zezi.

¹¹ Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi.

¹² Zianz guxhaalaman zatijbix, per gudiilguiidx reeman laax abi' babëë reeman laax loj guiniaa guin.

¹³ Dxel rëb bën naj xguidxliuj laan: “̣Xhienaag günan yan? Gaxhal da xi'n'an xin rën da'tan, wed zajp reeman laax respejt.”

¹⁴ Per chi baguiaa ree bën guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.”

¹⁵ Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bën caneenëman, rëbaman:

—Yan, ̣xhie naladixidi güünnë bën naj xguidxliuj laan bën guin ree?

¹⁶ Naj rni lojdi guial zi'taman din gugüjtaman bën guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—̣Gagnë Dios ad zajct zian!

¹⁷ Per Jesús baguiaaman loj reeman, abi' rëbaman:

—Bal id zajc zian ̣xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bën rüjn yu,

laan naj ni mazri been sirv gojcnë yu guin.

¹⁸ Chutëëz bën yab guiç guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

¹⁹ Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree.

²⁰ Abi' guxhaal reeman bën zigla'ch ree laaman din güünzi reeman guial gulüü naj reeman benza'c, din yaguuil reeman mod guiniee Jesús diidx ni gudxiib reeman guijc, din chile' yayü reeman laaman loj gobernador Rom.

²¹ Dxel gunabdiidx reeman lojman, rëb reeman:

—Mextr, dunujn rayagbee guial rnieel rülüü tëël zi'c rayal, din par lüj tiblojzi naj bejn, abi' walil rülüül guial xhienaag rën Dios guiban bejn.

²² ̣Zagdxen ya radijxan impuest loj rey César, o ad zagdxetan?

²³ Per gogbee gajc Jesús xgab mal ni cayüjn reeman abi' rëbaman loj reeman:

²⁴ —Gol balüü tijb cintabl lon. ̣Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

²⁵ Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

²⁶ Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

Xcwent guial yaban ree bengüt

(Mt. 22:23-33; Mr. 12:18-27)

²⁷ Tio'p choon ree bénsaducew bignaj Jesús, bénsadusew guin ree ad rliadxt reeman guial yaban ree bengüt, zeel rëb reeman loj Jesús:

²⁸ —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xingüt guin guxhliaanë béngunaa bizëjb guin din chu' xi'n reex zi'c gulüü xi'n xin güit guinan.

²⁹ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix.

³⁰ Dxel bijch barojpix baxhliaanë béngunaa guin, per güjtigajquix ad guyu gajct xi'n reex.

³¹ Zianz baxhliaanë xin bayon guin béngunaa bizëjb guin, zianz baxhliaanëman guigajdx reex abi' gra reex güjt achut xi'n reex guyu con laaman.

³² Ni bigratë në béngunaa guin güjt.

³³ Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhliaanë laaman?

³⁴ Dxel rëb Jesús loj reeman:

—Loj guidxliuj guie ruxhliaa ree bejn abi' rudëëd xi'n reeman ruxhliaa.

³⁵ Per ree bën yaban zatijb, bën royal ree gap guialnaban tiblyaa con Dios, ad zuxhliaatri reeman ad zudëë tëetri xi'n reeman guxhliaa,

³⁶ din ad zëjttri reeman, gac reeman zi'c ree xianjl Dios. Gac tëë reeman xi'n Dios guial ma baban reeman.

³⁷ Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob.

³⁸ Din Dios ad najtaman xDios ree bengüt, najman xDios ree bën naban, din par laaman gra ree bejn naban.

³⁹ Dxel yu' ree mextr rajc ley, rëb lojman:

—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëëd Cristo

(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn guial zëëd Cristo loj xdiaa rey Davi?

⁴² Awa Davi guin gajc gunee loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guia'l.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley

(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiajg gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdx ruladx tëë reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree bën zojbloj, ziangajc rüjn reeman lod ritaw reeman.

⁴⁷ Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

21

Gon badëëd tijb béngunaa bizëjb

(Mr. 12:41-44)

¹ Chi culüü Jesús bejn ree lën yadooro' Jerusalén, dxel gules lojman baguaaaman cagu' ree benrijcw gon lën alcancia.

² Baguaa tëëman tijb béngunaa bizëjb prob, cagu'man tio'p cintabldoo lën alcancia guin.

³ Dxel rëb Jesús loj ree xbejnman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin.

⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

Rëb Jesús guial yaze'n yadooro' Jerusalén

(Mt. 24:1-2; Mr. 13:1-2)

⁵ Tio'p choon ree xbejn Jesús cayü reeman diidx xcwent ree guiaj zagdxe najcchaawnë yadooro' Jerusalén, në ree ni lasajc ni rudëed ree bejn par suchaaw yadoo guin. Dxel rëb Jesús loj reeman:

⁶—Gra ni cuguiaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Mr. 13:3-23)

⁷ Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rëb Jesús loj reeman:

—Gol gojp cudad achu gusquiee lëjt. Din zien ree bën gui't guiëb reeman guial por naj zëed reeman guiëb tëë reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman.

⁹ Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

¹⁰ Rëb tëë Jesús loj reeman:

—Til nacion con stijb nacion, til tëë bën rajp guialrniabee con stijb bën rajp guialrniabee,

¹¹ gui't tëë xudoxh, në gubijn, në guialguijdxdoxh niz ni niz guie abi' xanyabaa guiguien ree ni nadxeb.

¹² Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguib chinë tëë reeman lëjt loj ree rey në loj ree gobernador guial najdi da bejnan.

¹³ Zian gac din chile' güdi da diidxan loj reeman.

¹⁴ Ad aal chu'di xgab xhie guiëbidi loj reeman.

¹⁵ Din naj gune diidx ni guinieedi gune tëën quiarguejn. Abi' ni'qui tijb bën rdxe'ch lëjt ad züjnt gan loj xtiidxidi ad zanee tëët reeman contr lëjt.

¹⁶ Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman.

¹⁷ Gra bénguidxliuj guidxe'ch lëjt guial najdi da bejnan.

¹⁸ Per ni'qui tijb guidxguijquidi ad zanjitt por zian.

¹⁹ Abi' bal sudxi'chidi loj xnejz Dios, zajpidi guialnaban tiblyaa con Dios.

²⁰ Chi guguiaadi nayaw ree suldad Jerusalén, ma qui nit guiedx guin.

²¹ Dxejzii ree, bën za' ree niz Judea, gol bigxüün niz dajn ree, abi' ree bën za' guiedx Jerusalén gol brii luguiedx guin, guiaad ree bën za' dajn ad bal yayudi luguiedx guin.

²² Din dxej guin ree gudëed Dios bejn ree casti din gac cumplid zi'c ca loj xtiidxaman.

²³ ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin.

²⁴ Yu' ree bën guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb

(Mt. 24:29-35, 42-44; Mr. 13:24-37)

²⁵ Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman guial gac naquie' loj nijsdoo gac tëë naquie' por xtüjp nijs.

²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiaad ree ni rguien xanyabaa guiniib reen.

²⁷ Abi' guguiaa reeman Bén guxhaal Dios, rdiinman bacha' zëédaman loj zaj con xguialrniabeeman.

²⁸ Chi suloj gac ree ni guin, gol bagu' luxdoodi zagdxe gol gules tëë lojdi din ma zidyob dxej ni laadi loj casti.

²⁹ Rëb tëë Jesús loj reeman:

—Gol baguiaa yag higo o xhietëez zatijb yagan.

³⁰ Chi ma caydxib ree xbalagan, lëjt ragbee guial ma zëed tiamp nalaa.

³¹ Ziangajc chi guguiaadi ma cayajc ree ni guin, zagbeedi guial ma zëed xguialrniabee Dios gajxh.

³² Diidxli rnin lojdi guial gra ree ni guin gac chi gad gra ree bën naban yan guiët.

³³ Guidxliuj në xanyabaa zanjit reen, per da diidxan ad zadëdt gacan cumplid.

³⁴ Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt

- ³⁵ Zi'c tijb tramp. Din zian gac dxej guin par gra ree bénguidxliuj.
³⁶ Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tée sudi loj Bén guxhaal Dios.
³⁷ Radxe ruluü Jesús bejn ree lèn yadooro' Jerusalén guiáad guxhin raya'nman ruguia' la Olivos.
³⁸ Abi' rsildoo rej gra ree bejn lèn yadoo guin ricaagdiajg reeman ni rnieeman.

22

Baya'n reeman diidx xhienaag guiniaaz reeman Jesús

(Mt. 26:1-5, 14-16; Mr. 14:1-2, 10-11; Jn.11 :45-53)

- ¹ Chi ma zidyob lanij pascw, chi raw reeman guiadxtil ni ad yu't levadur.
² Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.
³ Dxel guyu xindxab luxdoo tijb ree xi apóstoles Jesús, bén la Judas Iscariote.
⁴ Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman.
⁵ Dád babaa reeman abi' rëb reeman guial gudëed reeman milia lojman.
⁶ Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche

(Mt. 26:17-29; Mr. 14:12-25; Jn.13 :21-30; 1Co.11 :23-26)

- ⁷ Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil,
⁸ dxel guxhaal Jesús Bëd con Waj, rëbaman loj reeman:
 —Gol biguieen ni yadaaw ree guxhin pascw.
⁹ Abi' gunabdiidx reeman lojman rëb reeman:
 —¿Ban guin rënl yuguieenan laan?
¹⁰ Zianz rëb Jesús loj reeman:
 —Chi chu'di luguiedx guin, guguiaadi tijb xinguaaw ca'x tijb re yu' nijs. Gol chinalix xt lod yayux,
¹¹ gol güjdx loj bén naj lidxan: “Na mextr: ¿Con lënu gawnë ree xbejnman guxhin pascw?”
¹² Dxel gulüüman lëjt tijb lënu ni rarojp pijs, ma najcchaaw lënu guin. Yagaj gol been ni yadaaw ree xche.
¹³ Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman gualraw guin ni gaw reeman guxhin pascw.
¹⁴ Chi bidxin hor, Jesús con ree bén naj apóstoles gurej reeman xan mex.
¹⁵ Dxel rëbaman loj reeman:
 —¿Diizd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan!
¹⁶ Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.
¹⁷ Dxel cwa'man tijb cojp yu' vin, chi gulox badëëman quixtëe loj Dios, rëbaman loj reeman:
 —Gol cwa' vin guie, gol gudi'san loj gradi.
¹⁸ Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.
¹⁹ Dxel cwa'man guiadxtil badëëman quixtëe loj Dios, zianz gula'man laan, gudi'saman laan loj reeman, rëbgajman:
 —Guiadxtil guie naj da cuerpan ni ma bayün din guiëtan por lëjt. Chi güüdi zian, gol been zian guial rusaaladxidi naj.
²⁰ Abi' ziangajc beenman con cojp ni yu' vin guin, chi gulox gudawaman xche, rëbaman:
 —Vin guie naj da rejnan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.
²¹ 'Per yan bén yayü naj, laa yaaman xoob loj mex lod xoob gajc yan.
²² Per Bén guxhaal Dios, naj sagdiajman abi' guiëtaman. Per jproba bén yayü laaman!
²³ Dxel guzuloj rniabdiidx loj lasa' reeman chu reeman yayü laaman.

Chu mazri zojbloj

- ²⁴ Dxel guzuloj reeman cadildiidx reeman chu loj gra reeman naj mazri bén zojbloj.
²⁵ Per rëb Jesús loj reeman:
 —Bén naj ree rey loj guidxliuj guie rniabee reeman bén ladx reeman zi'ctzi rën reeman, abi' ree bén rniabee, rëb reeman guial rün reeman ni zagdx.
²⁶ Per lëjt ad rayalt güüdi zian, bén mazri zojbloj lojdi rayal güün laagajcaman zi'c tijb bén ad zojblojt. Guiáad bén rniabee lojdi rayal güün laagajcaman zi'c tijb mojs.

²⁷ ¿Chu naj mazri bén zojbloj loj guidxliuj guie? ¿Bén rbej xan mex par gaw ya o bén rbe'c guialraw? ¿Nid bén rbej xan mex guin naj mazri bén zojbloj ya? Guiáad naj za'n lojdi zi'c tijb bén rbe'c guialraw.

²⁸ Lëjtci za'në naj loj ree dxej cazaagdiajn.

²⁹ Zeel gunen guialrniabee lojdi zi'c baneé da Dadanan lon,

³⁰ abi' gawidi loj da mexan lod ganabeen cwe tëëdi loj ree yagxhil lod güündi guialguxtis loj gra ree bén za loj guidxiptio'p xdiaa Israel.

Rëb Jesús guial guiëb Bëd ad nünbeetaman laaman

(Mt. 26:31-35; Mr. 14:27-31; Jn.13 :36-38)

³¹ Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo.

³² Per naj ma guredx gunaaban Dios por lüj chitëë cwëz chilliladxil naj. Guiáad lüj chi yazudxi'chil loj ni rililadxil naj zatijb, gognë ree lasa'l din sudxi'ch reeman loj ni rililadxil reeman naj.

³³ Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguuib o xt guiëtnë'n lüj.

³⁴ Abi' rëb Jesús:

—Naj rni lüj Bëd, yan guxhin gajc chi gad gujd cwdixa', choon volt mal rëbil ad nünbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

³⁶ Dxel rëbaman loj reeman:

—Sa'n yan bén rajp milia në bols, gol cwa'n. Guiáad bén ad rajpt espad, gol bato' xabidi din siidi tijban.

³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

³⁸ Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

Rbejdx rniab Jesús Dios lod la Getsemani

(Mt. 26:36-46; Mr. 14:32-42)

³⁹ Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman.

⁴⁰ Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios,

⁴² rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

⁴³ Dxel balüüloj tijb anjl guza xanyabaa lojman persi badëëman laaman gojl.

⁴⁴ Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneeyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman.

⁴⁶ Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús

(Mt. 26:47-56; Mr. 14:43-50; Jn.18 :2-11)

⁴⁷ Sta caneenë Jesús bén naj ree xbejnman chi bidxin ree benzien. Në bén brii laj Judas, bén goc tijb ree xbejn Jesús, nedaman loj ree bén guin abi' bibigaman loj Jesús gudawaman laaman xid.

⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree bén za'në Jesús ni cayajc, rëb reeman lojman:

—Dad, ¿zalëë dux espadan ya?

⁵⁰ Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbeeman.

⁵¹ Per rëb Jesús loj reeman:

—Guzujr ree bénan. Ma gojczy.

Dxel baqui' Jesús guidiajg mojs guin abi' bayünman laan.

⁵² Zianz rëb Jesús loj ree bixhioz rniabee ree bixhioz, con ree bén rniabee ree bén rajp yadooro' Jerusalén con xguxtis ree bén Israel, bén bidxin ree par chinë laaman:

—¿Chexc zeel zëëdidi con espad con yag din chinëdi naj zi'c tijb xingubaan?

⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús

(Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt.

⁵⁵ Yagaj gule'c ree bén guin guij galay lule', abi' gurej reeman rudëj guin. Në Bëd gurejnë laa reeman.

⁵⁶ Per tijb béngunaa rüjn dxiin yagaj, chi baguiaaman Bëd zojbaman rudëj guin, baguiaaaman lojman, abi' rëbaman:

—Në bén guin za'në Jesús.

⁵⁷ Per gurexuu Bëd, abi' rëbaman loj bén guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

⁵⁹ Gudëd cost tib hor, dxel rëb zatijb bejn:

—Nëczy bén guie za'në laaman din nëman naj Bén Galilea.

⁶⁰ Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb gujd.

⁶¹ Dxel badxi' loj Jesús baguiaaaman loj Bëd, abi' basaaladx Bëd guial rëb Jesús lojman: "Yan guxhin gajc chi gad gujd cwidxa', choon volt mal rëbil ad nünbeetil naj."

⁶² Dxel barii Bëd yagaj, abi' dád naya biinman.

Baze' reeman Jesús gudijn tëë reeman laaman

(Mt. 26:67-68; Mr. 14:65)

⁶³ Bén cayajp ree Jesús, baze' reeman laaman gudijn tëë reeman laaman.

⁶⁴ Guxhii reeman lojman abi' gudijn reeman laaman, dxel rëb reeman lojman:

—¿Guneeya' chu gudín lüj!

⁶⁵ Abi' zien ree diidxguijdx rëb reeman lojman.

Za' Jesús loj ree guxtis Israel

(Mt. 26:59-66; Mr. 14:55-64; Jn. 18 :19-24)

⁶⁶ Chi bareguiaa, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi.

⁶⁸ Abi' bal xhie ganabdiidxan lojdi, ad zadxi'tidan.

⁶⁹ Per diidz yan, Bén guxhaal Dios cweman xladbee Dios, bén ca' gra guialrniabee.

⁷⁰ Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

⁷¹ Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidix.

23

Binë reeman Jesús loj Pilato

(Mt. 27:1-2, 11-14; Mr. 15:1-5; Jn. 18 :28-38)

- 1 Dxel wajs gra reeman binë reeman Jesús loj Pilato.
 2 Yagaj guzuloj cutedia' reeman Jesús lojman, rëb reeman:
 —Badxaaglojn xin guie cusqueeex Bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.
 3 Dxel gunabdiidx Pilato lojman rëbaman:
 —¿Lüjn naj xrey ree Bén Israel ya?
 Badxi! Jesús laan, rëbaman:
 —Waliquil, najcan.
 4 Dxel rëb Pilato loj ree bixhioz rniabee ree bixhioz në loj gra ree Bén riga' yagaj:
 —Achet xfalt xin guie radxejlan.
 5 Per laa reeman naguiejczi rüjn reeman, rëb reeman:
 —Cusqueeex bejn ree guidib niz Judea con ree ni rulüüx laa reeman. Guzulojx niz Galilea abi' yan cayüjnx zian niz guie.

Binë reeman Jesús loj Herodes

6 Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús.

7 Abi' chi rëb reeman guial najman Bén Galilea, guxhaalaman laaman loj Herodes Bén rniabee Galilea, guial lën ree dxej guin në Herodes za' Jerusalén.

8 Chi baguiaa Herodes Jesús dád babaaman guial diizd gocli rënman guguaaaman laaman guial bacaagdiajgaman ruza't ree bejn laaman, abi' rbëzaman guguaaaman güünman tijb milagr.

9 Zien ree ni gunabdiidxaman lojman, per Jesús achetzi badxi'man.

10 Në ree bixhioz rniabee ree bixhioz za' yagaj con ree mextr rajc ley, ad ruwëëzt rutedia' reeman laaman.

11 Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb.

12 Abi' dxejzii bazuløj baneenë Herodes Pilato zagdxe, din gocli rdxe'ch lasa' reeman.

Gunabee reeman guiët Jesús

(Mt. 27:15-26; Mr. 15:6-15; Jn. 18 :39-19 :16)

13 Dxel bachajg Pilato lasa' ree bixhioz rniabee ree bixhioz con ree guxtis, con ree Bén luguiedx guin,

14 abi' rëbaman loj reeman:

—Bidnëdi xin guie nadi cusqueeex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi.

15 Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix.

16 Yan, gudëdan laax casti dxel guslaan laax.

17 Lën ree dxej lanij guin ruslaa Pilato tijb Bén yu' ladxguiib zi'c goc xcostumbr reeman.

18 Per graczi reeman guzuløj rbixdiaj, rëb reeman:

—¡Bagüjt xin guin! ¡Baslaa Barrabás!

19 Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn.

20 Guneenë Pilato laa reeman zatijb guial guyënman nuslaaman Jesús,

21 per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

22 Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

23 Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman.

24 Dxel cwëjb Pilato beenman zi'c rën reeman.

25 Abi' baslaaman Barrabás Bén guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'tctzi rën reeman.

Bacaa reeman Jesús loj crüjz

(Mt. 27:32-44; Mr. 15:21-32; Jn. 19 :17-27)

26 Chi zinë reeman Jesús din gucaa reeman laaman loj crüjz, gunaaz reeman tijb Bén za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

²⁷ Zien da't bejn zinal laaman, abi' zien ree béngunaa roon rbixdiaj guial raya reeman laaman.

²⁸ Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi.

²⁹ Din zaxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.”

³⁰ Dxel suloj guiëb ree bejn loj ree guia': “Gol guxa't du guijcan”, guiaad loj ree lom guiëb reeman: “Gol baquie'ch dunujn.”

³¹ Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

³² Abi' në tio'p ree xingubaa zinë reeman din tia reex loj crüjz con Jesús.

³³ Chi bidxin reeman lod la Calaver, bacaa reeman Jesús loj crüjz, con grop ree xingubaa guin: tijbix cwa ladbee zatijbix cwa ladruvejs.

³⁴ Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guijc xabaman din yala' reex laan.

³⁵ Zien ree bejn riga' yagaj cuguaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

³⁶ Në ree xin suldad ruze' laaman, rbig reex rudëed reex vinagr guië'man,

³⁷ rëb reex lojman:

—Bal lüj naj xrey ree bën Israel, baslaa lüj gajc.

³⁸ Abi' guijc crüjz guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree bën Israel.”

³⁹ Tijb xingubaa ni ca loj crüjz guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tée dunujn.

⁴⁰ Per zatijbix gudilë xcompniarix, rëbix lojx:

—¿Staczi ad rdxehtil Dios ya majsi lasa'gajc casti guin cadëdil?

⁴¹ Dunuj rayalczi cayzaagdiaj din zian caydijx ni baguieen. Per bën guie achetczy ni mal wayüjnman.

⁴² Dxel rëbix loj Jesús:

—Basaaladx naj chi ma canabeel.

⁴³ Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

Güjt Jesús

(Mt. 27:45-56; Mr. 15:33-41; Jn.19 :28-30)

⁴⁴ Chi gol garol dxej, bicajy guidibczy guidxliuj xt raca choon wadx.

⁴⁵ Bicajy logbijdx guiaad lajd nal lën yadooro' Jerusalén goxya'n, gojcan tio'p lala'.

⁴⁶ Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷ Chi baguiaa suldad rniabee ree suldad ni goc, baza'tix Dios zagdx, rëbix:

—Walican achet xtol bën guin yu'.

⁴⁸ Chi baguiaa gra ree bën za' yagaj ni goc, dád guyunaya reeman zia reeman riga'pgaj luxdoo reeman.

⁴⁹ Per gra ree bën nünbee Jesús, con ree béngunaa nal laaman diidz Galilea, zijt guzuj reeman baguiaa reeman gra ree ni goc.

Biguie'ch Jesús

(Mt. 27:57-61; Mr. 15:42-47; Jn.19 :38-42)

⁵⁰ Guyu tijb bejn, brier lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tée'man tijb xguxtis ree bën Israel.

⁵¹ Nëman rbëz nabee Dios, abi' ad nëtaman bachajg xixgab ree bën bagüjt Jesús.

⁵² Wejman loj Pilato bignabaman xcuerp Jesús.

⁵³ Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidëen lën guiaj lod achutczy waguie'ch.

⁵⁴ Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵ Abi' ree béngunaa zidnë Jesús diidz Galilea, në reeman binal abi' baguiaa reeman xbaa Jesús baguiaa tée reeman xhienaag gudijxh reeman xcuerpaman.

⁵⁶ Chi bayejc reeman, zianz beenchaaw reeman perfum në zaj ni rliaa nejxh ni guidëebaman. Dxel baziiladx reeman dxej raziiladx ree bejn zi'c rniabee ley.

24

*Raban Jesús**(Mt. 28:1-10; Mr. 16:1-8; Jn.20:1-10)*

¹ Chi dumingw rsildoo, wej ree béngunaa guin ro' xbaa Jesús biné reeman perfum ni beenchaaw reeman.

² Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran.

³ Abi' guyu reeman, per ad bidxaaglojtri reeman xcuerp Dad Jesús.

⁴ La'tzi cadxeb reeman ni'quid radxejlt xhie güün reeman, dxejczí baguiaa reeman tio'p ree bejn za'li reeman gajxh lod za' reeman, najcw reeman lajd bacha'.

⁵ Abi' guial tant bidxeb reeman, basajb loj reeman xt luyuj, dxel rëb ree bén guin loj reeman;

—¿Chexc zeel raguilidi tijb bén naban loj ree bengüt?

⁶ Achutri laaman guie din ma babanman. Gol basaaladx ni naman lojdi chi guzuman niz Galilea.

⁷ Naman lojdi guial yayü reeman Bén guxhaal Dios loj ree béndol din gucaa reeman laaman loj crüjz, abi' ni yayon dxej yabanman.

⁸ Dxel basaaladx reeman diidx ni rëb Jesús loj reeman,

⁹ abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman.

¹⁰ María Magdalena, con Xuan, con Li xniaa Jacob con ree béngunaa ren, laa reeman bignë rusion guin loj ree xi apóstoles Jesús.

¹¹ Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

¹² Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalójman por ni goc.

*Balüüloj Jesús loj tio'p ree xbejnman**(Mr. 16:12-13)*

¹³ Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén.

¹⁴ Chi zë reeman lunejz cayü reeman diidx xcwent gra ree ni goc.

¹⁵ La'tgaj cayü reeman diidx, gubig Jesús cwë' reeman abi' guzuloj cazanëman laa reeman.

¹⁶ Per majsi cuguaa reeman laaman, yu' ni badxoon nayünbee reeman laaman.

¹⁷ Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

¹⁸ Badxi' tijb bén la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj Bén guzu Jerusalén ad gogbeetil ni goc ya?

¹⁹ Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús Bén Nazaret, laaman goc tijb Bén badëë xtiidx Dios loj ree bejn, Bén gop guialrniabee zi'c ni beenman në ree diidx ni guneeaman niz loj Dios në niz loj ree bejn.

²⁰ Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz.

²¹ Par dunujn laaman naj Bén yabëë ree Bén Israel loj ree Bén rom, per yan gojc choon dxej ni goc ree ni guin.

²² Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin,

²³ Abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús.

²⁴ Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

²⁵ Dxel rëb Jesús loj reeman:

—¡Xi nawëëg naj chignia'di abi' xi raglaa par chililadxidi gra ni gunee ree Bén badëë xtiidx Dios loj ree bejn!

²⁶ ¿Wen id naj ya guial sagdiaj Cristo, dxelri yayë'paman xanyabaa?

²⁷ Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bën badëë xtiidx Dios loj ree bejn.

²⁸ Chi bidxin reeman guiedx lod zë reeman, been Jesús zi'c bën che mazri zijt.

²⁹ Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman.

³⁰ Abi' chi zojbnëman laa reeman xan mex, cwa'man guidxtil abi' chi gulox badëëman quixtëë loj Dios, gula'man laan persi badëëman laan loj reeman.

³¹ Hor guin gajc guzajc reeman zi'c bën baxal guiaalaj, abi' bayünbee reeman laaman. Per laa gunidloj gajcaman,

³² zianz rëb loj lasa' reeman:

—¿Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

³³ Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman.

³⁴ Rëb reeman loj grop ree bën guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guidxtil.

Balüüloj Jesús loj ree xbejnman

(Mt. 28:16-20; Mr. 16:14-18; Jn. 20 :19-23)

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxalaj reeman abi' bidxeb reeman guial gunaladx reeman anman cuguiaa reeman.

³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi?

³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

⁴⁰ Chi rëbaman zian, balüü yaaman në guia'man.

⁴¹ Per laa reeman staczi ad rilaladx reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

⁴² Dxel badëë reeman tiblia' bëjl biguie'.

⁴³ abi' cwa'man laab gudawaman niz loj reeman.

⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

⁴⁵ Dxel guxhalaman xquiarguiejn reeman persi bignia' reeman ni ca loj xtiidx Dios,

⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman.

⁴⁷ Abi' diidx Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtól guililadx tëë reeman naj.

⁴⁸ Lëjt naj testiw xcwent gra ree ni guin.

⁴⁹ Naj gaxhal par lëjt ni ma na da Dadan. Per gol guzujsi luguedx Jerusalén xt tia'di guialrniabee ni gui't diidx xanyabaa.

Bayë'p Jesús xanyabaa

(Mr. 16:19-20)

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman.

⁵¹ Abi' la'tgaj cayüjnle'man laa reeman, wajsaman ziaman xanyabaa.

⁵² Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman.

⁵³ Abi' guixie guixie yu' reeman lën yadooro' Jerusalén ruza't reeman Dios zagdxë rudëëd tëë reeman quixtëë lojman.

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diidz guia'xchej chi gad guidxliuj gacchaaw, mal yu' bén naj xtiidx Dios. Laaman za'në Dios abi' laagajcaman naj Dios.

² Laaman mal za'në Dios diidz guia'xchej.

³ Laaman been graczi ni yu'. Achetczi ni yu' niajc bal id laaman.

⁴ Laaman rajp gualnaban, guiáad gualnaban guin naj bajl par gra bénguidxliuj.

⁵ Bajl guin rusni bén nacay xquiarguejn, abi' ad rajct rutëë gualnacay guin loj bajl guin.

⁶ Guyu tijb bén brii laj Waj, Dios guxhaal laaman,

⁷ bidgaguieman diidx xcwent bén naj xbajl Dios, din gac chililadx gra ree bejn laaman.

⁸ Per ad Wajt goc bajl guin, bi'tzaman bidgaguieman diidx xcwent bajl guin.

⁹ Din bén naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman.

¹¹ Bi'taman loj ree bén Israel, abi' majsi gojcaman bén Israel, per ad bidxga't reeman laaman.

¹² Per, gra ree bén bidxga' laaman bililadx tëë reeman laaman, beenman laa reeman xi'n Dios.

¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o gual rën bejn chu' xi'nman, por gual rililadx reeman ma naj reeman xi'n Dios.

¹⁴ Jesús, bén naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyëman bejn ree gunee tëëman ganax diidxli. Dunujn baguiaa xgualrniabee-man, gualrniabee ni ca'man gual tijbzi laaman naj Xi'n Dios.

¹⁵ Chi be Waj xtiidxaman loj ree bejn, gunee-man rejs, rëbaman:

—Jesús guie naj bén ruzatan, chi rnin gual bén zëëd xichan mazri lasajcaman gual lon, din diidz gocli mal yu'man gual lon.

¹⁶ Dád rënman dunuj ree, gra dxejczy raca' dugra ree xgualnaza'caman.

¹⁷ Por Moisejs banee Dios xleyaman duloj ree, per por Jesucrist bayagbee ree xhienaag rën Dios dunuj ree xhie tëë naag naj xtiidxliiman.

¹⁸ Ad yu't dxej waguiaa bejn Dios. Bén naj tijbzi xi'nman. Bén nabannë laaman balüü duloj ree xhienaag naj Dios.

Waj bén baroobnijs rëbaman chu naj Jesús

(Mt. 3:11-12; Mr. 1:7-8; Lc. 3:15-17)

¹⁹ Diidz Jerusalén guxhaal ree xguxtis ree bén Israel bixhioz ree con ree bén naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, rëbaman:

—Ad najtan naj Cristo.

²¹ Abi' gunabdiidx reeman lojman stijb rëb reeman:

—¿Chuzá najl? ¿Lüjn naj Elías ya, bén badëë xtiidx Dios loj ree bejn?

Badxi' Wajn rëbaman:

—Ad najtan.

Dxel gunabdiidx reeman stijb rëb reeman:

—O, ¿lüjn naj bén naj diidx gui't ya, bén gudëë xtiidx Dios loj ree bejn?

Badxi'man laan rëbaman:

—Ad najtan.

²² Abi' rëb reeman:

—¿Chuzá najl? Din rayal yugnë'n ruson loj ree bén guxhaal dunujn. Guna chu najl.

²³ Dxel rëb Waj loj reeman:

—Naj naj tijb bén rbidxa' loj yujbidx: “Gol guxhal tijb nejz nali par bén ca' gualrniabee” —zi'c rëb Isaias bén badëë xtiidx Dios loj ree bejn.

²⁴ Abi' ree bén guxhaal ree bënfarisew din guineenë reeman Waj,

²⁵ gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui bén naj diidx gui't, bén gudëë xtiidx Dios loj ree bejn, ¿chexquiza zeel ruroobnijsil bejn?

²⁶ Badxi' Waj laan rëbaman:

—Naj ruroobnijs con nijs, per lojdi no'ch tijb bén ad wayünbeetidi.

²⁷ Laaman naj bën zëed xichan, ni'qui xgurëchaman ad rayalt gaxhiecan guial najman bën mazri lasajc guial lon.

²⁸ Gra niguie gojc lod la Betábara, ni naj stiblad ro' guiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bénguidxliuj.

³⁰ Laaman bazatan lojdi chi rnin: “Xichan zidnal bën mazri lasajc guial lon, din laaman mal yu' diizd gocli guial lon.”

³¹ Ni'qui naj ad gogbeetan guial laaman naj bën gui't, per naj zialan din gurobnijsan bejn ree con nijs din chile' güünbee ree bën Israel laaman.

³² Rëb tée Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman.

³³ Majsi ad nünbeetan laaman, per bën guxhaal naj baroobnijsan con nijs, laaman na lon: “Chi guguaal guiat xSprijt Dios xt guijc tijb bejn, laaman naj bën runee xSprijt Dios.”

³⁴ Naj ma baguia laaman, abi' ragbeechaawan guial laaman naj Xi'n Dios.

Bën binal ree Jesús yaloj

³⁵ Chi bareguiaal, za' Waj yagaj stijb, za'në tio'p ree xbejnman.

³⁶ Abi' chi baguiaaman cadëd Jesús, dxel rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bénguidxliuj.

³⁷ Chi bigueijn reeman rëb Waj zian, dxel binal reeman Jesús.

³⁸ Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguillidi?

Badxi' reeman laan rëb reeman:

—Mextr, ¿ban zojbil?

³⁹ Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxe.

⁴⁰ Tijb ree xbejn Waj bën binal Jesús, bën bacaagdiajg ni rëb Waj, laaman brii laj Andrejs, bijch Simón Bëd.

⁴¹ Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bën naj Mesías —rën guiëban Cristo.

⁴² Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

Gurejdx Jesús Felip në Natanael

⁴³ Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Bëd.

⁴⁵ Dxel bigdiil Felip Natanael, abi' rëbaman lojman:

—Ma badxaaglojn bën ruza't Moisejs loj xlibr xleyaman, bën ruza't ree bën badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bën Nazaret.

⁴⁶ Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

⁴⁷ Chi baguiaa Jesús zëed Natanael, rëbaman:

—Guie zëed tijb bën naj quijb bën Israel, abi' ad rusquieetaman.

⁴⁸ Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

⁴⁹ Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰ Badxi' Jesús laan rëbaman:

—¿Riladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaal.

⁵¹ Rëb tëeman:

—Naj ragbeechaaw, zuguaadi zobjyal xanyabaa, abi' zuguaadi xianjl ree Dios yay'e'p reeman xanyabaa yaguiajt t'ëe reeman xt guijc Bén guxhaal Dios loj guidxliuj.

2

Wej Jesús loj tijb gualruxhliaa

¹ Ni goc choon dxej guyu tijb gualruxhliaa luguiedx Caná, ni riga' niz Galilea. Dxel në xníaa Jesús za' yagaj,

² abi' në Jesús con ree xbejnman gunee reeman persi wej reeman loj lanij guin.

³ Chi babidx vin, dxel rëb xníaa Jesús lojman:

—Achetri vin rajp reeman.

⁴ Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

⁵ Per xníaaaman rëb gajcaman loj ree bén cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijr.

⁷ Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen,

⁸ abi' rëbaman loj reeman:

—Yan gol gulëe ta'nán, gol bigdëen loj bén canabee loj lanij guie.

Dxel bigdëe reeman laan lojman,

⁹ abi' bén canabee loj lanij guin beenman prueb nijs bayajc vin guin, sin gual niagbeeman ban guzan, bén cayüjnz ree mandad guin ragbee, din laa reeman bica' nijs guin. Dxel gurejdxaman xin cushliaa guin,

¹⁰ rëbaman lojx:

—Graczi bejn rgui's yaloy vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloy been Jesús, beenman milagr guin Caná, guiedx riga' niz Galilea. Zian balüü gualrniabee ni rajpaman abi' bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xníaaaman, con ree bijchaman con në ree xbejnman. Ni guzu reeman tio'p choon dxej.

Babëe Jesús bén ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma ziyob pascw xlanij ree bén Israel, wej Jesús Jerusalén.

¹⁴ Abi' ro' yadooro' bidxaaglojman bén cuto' ree go'n, con ree xiil con ree palom, në ree bén zobj xan mex ruchaa reeman xmilia ree bén ziaad lood ren.

¹⁵ Chi baguiaa Jesús zian, dxel beenchaawaman tijb duu persi babëeman gra reeman, con gra ree xgo'n reeman në ree xiil. Gutie'chaman xmilia ree bén ruchaa milia guin barexguiat t'ëeman xmex reeman.

¹⁶ Dxel rëbaman loj ree bén cuto' palom:

—¡Gol babëe reeb guie! ¡Ad rüjnnëdi lidx da Dadan zi'c luguaia'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bén Israel lojman:

—¿Xhie milagr guliüü du lojn din yayagbeen gual rajpil gualrniabee güün! zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bén Israel guin lojman:

—Tiubixho'p ijz goglaa reeman been reeman yadoo guie, ¿guiaad lüj ya yayüjnlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin.

²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx t'ëe reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman.

²⁴ Per laaman ad rëbtaman loj reeman chu najman, din laaman nünbeechaaw xhienaag naj xixgab reeman.

²⁵ Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

3

Bigneenē Nicodemo Jesús

¹ Guyu tijb bēnfarisew brieri lajman Nicodemo, gojcaman tijb guxtis loj ree bēn Israel.

² Abi' wejman bignajman Jesús tijb guxhin, dxel rēbaman lojman:

—Mextr, rayagbeen guial Dios guxhaal lūj din gulūül dunujn, din achutctzi zajc güün lasa' ree milagr ni rüjnl bal id za'nē Dios laaman.

³ Dxel rēb Jesús:

—Diidxliczi rnin lūj, bēn ad zajlt stijb, ad zajct guguaaman xguialrniabee Dios.

⁴ Abi' rēb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lēn xniaaman ya abi' galaman stijb?

⁵ Badxi' Jesús laan rēbaman:

—Diidxliczi rnin, bēn ad rirobnijst ad nabannē tēētaman xSprijt Dios ad zile't yayuman loj xguialrniabee Dios.

⁶ Bēn naban zi'c naj xixgabaman, lojzi guidxliuj guie rajpaman guialnaban, per bēn nabannē xSprijt Dios, por Sprijt guin rajpaman stijb guialnaban.

⁷ Ad bal radxa lojl guial rnin: “Rūjn naguiejn gal bejn stijb.”

⁸ Din zi'c rbi' bi gralad abi' majsi riguejnl chi rbi'n, per ni'quid ragbeetil ban zēēdan o ban zēn. Ziangajc naj xSprijt Dios con gra ree bēn nabannē laaman.

⁹ Dxel rēb Nicodemo lojman:

—¿Xhienaag rajc zian?

¹⁰ Badxi' Jesús an rēbaman:

—¿Lūj, naj mextr loj ree bēn Israel, ad rignia'til gra ree ni guin ya?

¹¹ Diidxliczi rnin lojl, raneen ni rayagbeen ni baguiaa tēēn, per lējt ad rliladxtidi ni ranan.

¹² Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

¹³ 'Achut wayej xanyabaa, tijbzi bēn biguiat diizd xanyabaa, Bēn guxhaal Dios loj guidxliuj.

¹⁴ Abi' zi'c bacaa Moisejs bēēl guuib loj yag niz loj yujbidx, ziangajc Bēn guxhaal Dios loj guidxliuj, gucaa reeman laaman loj crūjz,

¹⁵ din gra bēn chililadx laaman ad zanjitt reeman loj Dios, gap reeman guialnaban tiblayaa con laaman.

Rēn Dios bejn

¹⁶ 'Guial tant rēn Dios bēnguidxliuj, majsi tijbzi xi'nman, per guxhaalaman laaman loj guidxliuj, din graczi bēn chililadx laaman ad zanjitt reeman loj Dios, gap reeman guialnaban tiblayaa con laaman.

¹⁷ Din Dios ad guxhaalt xi'nman loj guidxliuj din gudēēdaman bejn casti, guxhaalaman laaman din gap ree bejn perdon loj Dios.

¹⁸ 'Bēn rliladx Xi'n Dios ad rayaltaman xcasti Dios. Per bēn ad rliladxt, laaman ma rayal casti guial ad rliladxtaman Xi'n Dios, bēn naj tijbzi xi'nman.

¹⁹ Bēn ad rliladxt ree rayal reeman casti, din yan ni bi't bēn naj xbajl Dios, mazri bayuladx reeman nejz mal, guial rūjn reeman ganax ni mal.

²⁰ Graczi ree bēn rūjn ni mal ad ruladxtctzi reeman bajl guin, ad rbigt reeman lojn, chitēē guiguien ni mal cayūjn reeman.

²¹ Per ree bēn naban zi'c rayal loj Dios, laa reeman rbig loj xbajlaman din guiguien guial graczi ni cayūjn reeman naj ni rēn Dios.

Waj bēn baroobnijs ruza'taman Jesús stijb

²² Chi gudēd gojc zian, Jesús con ree xbejnman wej reeman niz Judea, lod guzunēman laa reeman tio'p choon dxej, ni baroobnijs reeman bejn ree.

²³ Nēgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman.

²⁴ Laan goc chi gad Waj chu' ladxguuib.

²⁵ Per bēlzi ree xbejn Waj, con za tio'p choon gajc ree bēn Israel guzuloj cadildiidx reeman por xcostumbr reeman guial xhienaag gac reeman naya.

²⁶ Dxel biguiedx reeman loj Waj:

—Mextr, bēn guzunēl stiblad ro' guiiw Jordán, bēn bel xtiidx du lojn, nē laaman curoobnijs bejn ree abi' gra reeman zinal laaman.

²⁷ Badxi' Waj laan rēbaman:

—Achut zajc gap guialrniabee bal id Dios gudēē laan.

²⁸ Lèjt ragbee guial bigueiejndi rën guial ad najtan naj Cristo, naj guneed lojman zidgago-jnan por laaman.

²⁹ Dunuj ree rayagbee guial loj guialruxhliaa, xin za'nè biingunaa guin, laaxan cuxhliaa, guiaad xmiwix xin za' con laax rabaanè da'tix laax chi rigueijnx rnieex. Ziangajc naj dád rabaanè'n laaman.

³⁰ Abi' laaman gusnuu gacaman mazri bën zobjbloj, guiaad naj gusnuu gacan bën ad lasajct guial lojman.

Bën zëéd xanyabaa

³¹ 'Din bën zëéd diidz xanyabaa, laaman naj bën rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bën zëéd diidz xanyabaa laaman rniabee gra,

³² abi' rüman ni ma baguiaaman ni ma bigueijn tēeman, per achut rliiladx ni rnieeman.

³³ Bal yu' bën rliiladx xtiidxaman, zian rguien guial ni diidxli naj xtiidx Dios.

³⁴ Abi' bën zëéd por Dios, laaman rü xtiidx Dios guial guidiblagaa badëéd Dios xSprijta-man lojman.

³⁵ Dios rën Xi'nman abi' basa'nman gra lojman.

³⁶ Abi' chutëez bën rliiladx Xi'nman, laaman rajp guialnaban tiblyaa loj Dios. Per bën ad rtiëjbt chililadx, ad rajptaman guialnaban guin, laaman rayal xcasti Dios.

4

Jesús con béngunaa Samaria

¹ Gogbee ree bënfarisew guial mazri zien bejn ma zinal Dad Jesús mazri zien tēe bejn ruroobnijsaman guial loj Waj,

² majsi diidxliczi ad Jesústan ruroobnijs bejn ree, bën naj ree xbejnman ruroobnijs.

³ Chi gogbeeman zian dxel briiman niz Judea zëman niz Galilea stjib.

⁴ Per chi zëman niz Galilea been naguiejn gudédaman niz Samaria.

⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb.

⁶ Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej.

⁷⁻⁸ Guiaad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹ Per guial ad rnieenët lasa' ree bën Israel zagdxe con ree bën Samaria, badxi' béngunaa guinan rëbaman:

—¿Chexquiza zeel rniabil nijs lon najl bën Israel awa bën Samaria naj?
(Din bën Israel ree ad rnieenët reeman bën Samaria ree zagdxe.)

¹⁰ Badxi' Jesús laan rëbaman:

—Bal zian ragbeel ni rën Dios guneeman lüj, chutëë bënan canab nijs lojl, zanabil nijs lon abi' naj zunen nijs runee guialnaban.

¹¹ Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban?

¹² Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³ Badxi' Jesús laan rëbaman:

—Graczi ree bën rë' nijs guie re'c reeman nijs stjib.

¹⁴ Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblyaa.

¹⁵ Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tēëtran guidca'n nijs guie.

¹⁶ Rëb Jesús lojman:

—Bignee lacheelil, dxel yaguaadil guie.

¹⁷ Badxi' béngunaa guinan rëbaman:

—Achut da bénguaawan yu'.

Dxel rëb Jesús:

—Waliquil achut lacheelil yu',

¹⁸ din ma gojc gaay xinguaaw rtia' lüj, abi' yan xin zobjbnël ad lacheeltilan. Zeel waliqui ni nal.

¹⁹ Chi bigueijnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn.

²⁰ Dux béngulalan gunajchi' reeman Dios ruguia' guie, per lëjt najdi bén Israel rëbidi guial Jerusalén naj lod guiniajchi' bejn laaman.

²¹ Badxi' Jesúsan rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tēētridi Jerusalén.

²² Lëjt ni'quid ragbeetidi chunin rnaijchi'di, per dunujn rayagbeen chunin ranajchi'n, din loj ree bén Israel grii bén güün bejn ree perdon.

²³ Abi' ma bidxin dxej ni gra ree bén diidxli rnaijchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bén rnaijchi' laaman.

²⁴ Dios naj Sprijt, abi' bén rnaijchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxel rëb béngunaa guin lojman:

—Naj ragbee gui't Bén naj Mesías, bén la gajc, Cristo. Abi' chi gui'taman, laaman gusignia' dunuj ree gran.

²⁶ Abi' rëb Jesús:

—Najn naj bén zii, laaman caneenë lüj.

²⁷ Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidxt lojman xhie rënman o xhie diidxan cayü reeman.

²⁸ Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹ —Gol taquiaa tijb bén ma na graczi ni ma benan. ¿Nid laaman naj Cristo ya?

³⁰ Dxel brii reeman luguiedx guin zë reeman lod za' Jesús.

³¹ Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³² Per rëbaman loj reeman:

—Laa da guialrawan yu', ni ad nünbeetidi.

³³ Dxel guzuloj canabdiidx loj lasa' reeman rëb reeman:

—¿Ni yu' chu bidné ni gudawaman ya'n?

³⁴ Dxel rëb Jesús loj reeman:

—Da guialrawan naj günan zi'c rën Dios, bén guxhaal naj abi' guloox günan ni naman.

³⁵ Lëjt rëb: “Ryaadx zatajp bëwë din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen.

³⁶ Abi' bén rato'p loj guiniaa guin, rtia'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblyaa. Dxel zi'c Bén rxübin zi'c Bén rato'p, rabaa reeman tiblojzi.

³⁷ Waliqui ni rëb ree bejn: “Ben ren rxübin, ben ren rato'p guialnaza'c.”

³⁸ Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

³⁹ Zien ree Bén Samaria bililadx Jesús guial be béngunaa guin diidx loj reeman rëbaman: “Ma gunaman graczi ni benan.”

⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej.

⁴¹ Abi' mazri zien reeman bililadx laaman chi bigujejn reeman ni rnieeman,

⁴² dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma bagujejn ni rnieeman, abi' rayagbeen walican laaman naj Cristo, bén yabëë bénguidxliuj loj dol.

Bayün Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zëman niz Galilea,

⁴⁴ majsi laagajcaman rëb guial ni'qui tijb Bén rudëë xtiidx Dios loj ree bejn ad rajpt reeman laaman respejt ladx gajcaman.

⁴⁵ Per chi badxinman niz Galilea, Bén niz ni ree baca' reeman laaman zagdxe. Din në laa reeman wej lanij pascw Jerusalén, abi' baguiaa reeman gra ni beenman ni.

⁴⁶ Chi za'man niz ni wejman Caná stijb, lod bayünman nijs vin. Abi' luguiedx Capernaum guyu tijb xbejn rey ragxuu xi'nman.

⁴⁷ Chi gogbee Bén guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayünman xi'nman guial zamer guiëtix.

⁴⁸ Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

⁴⁹ Per rëb Bén guin:

—Dad, yo' yan gajc, naga gad da xi'nman guiët.

⁵⁰ Dxel rëb Jesús lojman:

— Baguiaj lidxil, ma bayajc xi'nl.

Bililadx bén guin ni rëb Jesús, abi' zia lidxaman.

⁵¹ La'tgaj ziaman, bigchaagloj ree xmojsaman laaman, abi' rëb reeman:

— Ma bayajc xi'nl.

⁵² Dxel gunabdiidxaman loj reeman, rëbaman:

— ¿Xhie hor guzuluj banaa da xi'n'an?

Abi' rëb reeman lojman:

— Níeey cost raca tijb wadxé bariix xliaa.

⁵³ Dxel basaaladx bén guin guial hor ziin rëb Jesús lojman: “Ma bayajc xi'nl.” Abi' laaman në gra bén zojb lidxaman bililadx reeman Jesús.

⁵⁴ Ni ne naj milagr barojp ni been Jesús niz Galilea chi bazaman niz Judea.

5

Bayüjn Jesús tijb bén ad rajct rza

¹ Chi gudëd gojc zian, guyu tijb xlanij ree bén Israel, abi' wej Jesús Jerusalén.

² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran.

³ Yagaj riga' zien ree bënëragxuu, zi'c ree bënëlutia'p, në ree bencoj con ree bén ad rajctczi rza, cabëz reeman guiniib nijs yu' lën tanc guin.

⁴ Din gocli goc rguaajt tijb xianjl Dios runiibaman nijs guin, abi' bén ru lojnijs guin yaloj chi caniiban, rayajcaman xhietëez guialguijdaxan rajcaman.

⁵ Dxel loj ree bén guin no'ch tijb bejn, ma gojc zi'ctiubichoon ijz ragxuuman.

⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

— ¿Rënl ya yayajquil?

⁷ Badxi' bënëragxuu guinan rëbaman:

— Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸ Dxel rëb Jesús lojman:

— Bixche, baca' ni naal loj, baguiaj.

⁹ Loj hor guin gajc bayajc bén guin, baca' ni naaman loj abi' guzuluj cazaman. Per guial dxej zii naj dxej raziiladx ree bén Israel,

¹⁰ zianz bén Israel zinal ree ley rëb reeman loj bén bayajc guin:

— Yandxej naj dxej raziiladx bejn, ad zajct yaca' ni go'til loj.

¹¹ Badxi' bén guinan rëbaman:

— Bén bayüjn naj naman: “Baca' ni naal loj, baguiaj.”

¹² Dxel gunabdiidx reeman lojman rëb reeman:

— ¿Chu na lojl: “Baca' ni naal loj, baguiaj”?

¹³ Per bén guin ad ragbeetaman chunin bayüjn laaman guial bi'ch Jesús loj ree benzien riga' yagaj.

¹⁴ Chi badxaag Jesús laaman lën yadooro' Jerusalén, abi' rëbaman lojman:

— Baguiaa ma bayajquil, ad güünril dol chitëe gaquil mazri guial loj ni goquil.

¹⁵ Dxel zia bén guin abi' biguiedxaman loj ree bén Israel guial Jesús naj bén bayüjn laaman.

¹⁶ Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn.

¹⁷ Per rëb Jesús loj reeman:

— Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸ Zianan zeel mazri rejs guzuj reeman din gugüjt reeman laaman, ad gualzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rëb Jesús loj reeman:

— Diidxliczi rmin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman.

²⁰ Din Dios rën xi'nman abi' rulüüman laaman gra ree ni rüjnman. Abi' mazri naj ni gultüü loj xi'nman ni yadxá da't lojdi.

²¹ Din zi'c rasban Dios bengüt ree rudëe tëeman guialnaban loj reeman, ziangajc rudëe xi'nman guialnaban loj ree bén rüjnman xgab.

²² Abi' ad Diost rüjn guialguxtis, bazuj xi'nman din güünman guialguxtis,

²³ din gap gra ree bejn xi'nman respejt zi'cgajc rajp reeman laaman respejt. Bén ad rajpt Xi'n Dios respejt, ad rajp gajctaman respejt xDadaman Dios, bén guxhaal laaman.

²⁴ 'Diidxliczi rnin: Bén ruzoob da diidxan rliadx tēēman Dios, bén guxhaal naj, laaman ma rajp guialnaban tiblayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman.

²⁵ Diidxliczi rnin ma bidxin hor, abi' yandxej gajcan, bén naj ree zi'c bengüt loj Dios gucaagdiaj reeman cha' xi'nman. Abi' ree bén guzoob xtiidxaman zajp reeman guialnaban tiblayaa con Dios.

²⁶ Din zi'c rajp Dios guialnaban, lasa'gajc guialnaban guin ma badēē loj xi'nman,
²⁷ abi' badēēman guialrniabee lojman din güünman guialguxtis, din laaman naj Bén guxhaal Dios loj guidxliuj.

²⁸ Ad bal radxa lojdi ni rnin, din zadxin dxej guien gra ree bengüt cha' Xi'n Dios,

²⁹ abi' yarii reeman lēn baa. Dxel bén been ree ni ruladx Dios, yaban reeman, din gap reeman guialnaban tiblayaa con laaman. Guiáad ree bén been ni mal, yaban reeman din yayal reeman casti ni rayal reeman.

Ni ruliüü guialrniabee rajp Jesús

³⁰ 'Achet zajc günan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaben, rünanan zi'c rēn da Dadan bén guxhaal naj.

³¹ Bal gü da diidx gajcan, achet lasajcan.

³² Per yu' ben ren rü da diidxan, abi' ragbeechaawan guial diidxlin.

³³ Lējt guxhaal bén bignabdiidx ree loj Waj, abi' laaman ganax ni diidxli gunaman.

³⁴ Majsi ad ryaadxt yadxi'n ni guneer ree bejn por naj, per canin lojdi ni guna Waj din chililadxidi gap tēēdi perdon.

³⁵ Waj goc zi'cgajczi tijb bajl ni re'c abi' rusnin, guiáad lējt dád babaadi bidxga'di tijb tiamp ni balüüman lējt.

³⁶ Per naj mazri naj ni gulün lējt guial loj ni balüü Waj lējt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj.

³⁷ Nē da Dadan bén guxhaal naj, laagajcaman be da diidxan, majsi ad waguiejtidi cha'man ad waguiaa tēētidi laaman.

³⁸ Ad yu'guijc tēētidi xtiidxaman zeel ad rliadxtidi bén guxhaalaman.

³⁹ Lējt con cudad da't roolidi loj xtiidx Dios, guial ragbeedi con laan gapidi guialnaban tiblayaa con Dios. Abi' majsi loj xtiidx gajcaman ruza't naj,

⁴⁰ per ad rēntidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran.

⁴² Abi' ragbeechaawan guial ad walit rēndi Dios.

⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di.

⁴⁴ ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxe loj bén naj tijbzi Dios.

⁴⁵ Ad bal naladxidi naj gabec xguialquiadi loj Dios, din bén cwe'c xguialquiadi naj Moisejs, bén rbēzidi güün lējt yudar.

⁴⁶ Bal bililadxidi ni rēb Moisejs, nē naj zaliladxidi, din Moisejs bacaa loj xtiidx Dios lod ruza't naj.

⁴⁷ Per bal id rliadxidi ni bacaaman, ¿xoza chililadxidi ni rnin lējt?

6

Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

¹ Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias.

² Bénguixiuj binal laaman, guial ruguiaa reeman milagr ree ni rüjnman rayüjnman bénragxuu ree.

³ Dxel wē'paman tijb ruguia' abi' gurenē ree xbejnman.

⁴ Dxejzii ree ma zidyob pascw, xlanij ree bén Israel.

⁵ Chi guiles loj Jesús, abi' baguiaaman zēēd ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bén guin?

⁶ Per rēbzaman zian din guidoon xhie guiēb Felip, din Jesús mal ragbeeman xhie güünman.

⁷ Dxel badxi' Felipan rēbaman:

—Ni'qui ni rüjn bejn gan loj xhujn bëew ad zadaan yo' guiadxtil din gaw tijbgaj reeman majsi tibia'dogajzan.

⁸ Dxel gunee stibj xbejn Jesús, bén la Andrejs bijch Simón Béd, rëbaman:

⁹ —Laa tijb xindo ca' gaay guiadxtil con zatio'p bëjl za' guie. Per, ¿tè'czi taan ni guin par gra bén guin?

¹⁰ Dxel rëb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw.

¹¹ Dxel cwa' Jesús guiadxtil guin ree. Chi gulox badëeman quixtëe loj Dios, badëeman laa reen loj ree xbejnman persi gudi's reeman laa reen loj gra ree bén zojb yagaj. Ziangajc beenman con ree bëjl guin, badëeman laa reen zi'ctzi guyën reeman.

¹² Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëe xhie guizëëb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin.

¹⁴ Chi baguiaa ree bejn milagr narooob ni been Jesús, rëb reeman:

—Walican bén guin naj bén rudëe xtiidx Dios loj ree bejn, bén naj gui't loj guidxliuj.

¹⁵ Per gogbee Jesús guial rën reeman chinë nagueijn reeman laaman din güün reeman laaman rey, dxel bazaman yagaj, wë'paman mazri ladya guijc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo,

¹⁷ guyu reeman loj tijb barcw, abi' cadëd reeman loj nijs guin din guidx reeman Capernaum. Ma bicajy, bidiad Jesús gadaman yadxin.

¹⁸ Dxel guzuloj cabi' bidoxh abi' wajs xtüjp nijs guin.

¹⁹ Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman.

²⁰ Per rëbaman loj reeman:

—¡Najn, ad rdxebidi!

²¹ Dxel guyën reeman niuman loj barcw guin, per hor guin gajc bidxin reeman lod zë reeman.

Bigdiil ree bén bayaan Jesús laaman

²² Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman.

²³ Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëëd Jesús quixtëe loj Dios.

²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bén rudëëd guialnaban

²⁵ Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

²⁶ Badxi' Jesúsán rëbaman:

—Ragbeechaawan, raguiilidi naj guial gudawidi xt bigdxinladxidi, ad guial baguiaatidi milagr ree ni rünan.

²⁷ Ad chu'di xgab guialraw rara, gol guyu xgab guialraw runee guialnaban tiblyaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjnl?

³¹ Dux bëngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëeman guiadxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëëd guiadxtil guin, da Dadan naj bén runee quijb guiadxtil za xanyabaa.

³³ Guiadxtil runee Dios, laan bi't diizd xanyabaa abi' runeen guialnaban loj bënguidxliuj.

³⁴ Abi' rëb reeman lojman:

—Dad, banee guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc bén chililadx naj, ad yu't dxej che'caman nijs.

³⁶ Per zi'c rnin lojdi, majsi ma baguiaadi naj, ad rliadxtidi naj.

³⁷ Gra ree bén ma banee da Dadan lon, gui't reeman lon, abi' bén gui't lon, ad zasiejectan laaman.

³⁸ Din naj zial diidz xanyabaa, zidgaguienan zi'c rën da Dadan bén guxhaal naj, ad par güntan zi'c rënan.

³⁹ Da Dadan bén guxhaal naj, ni rënman naj guial gra ree bén baneeman lon ni'qui tijb reeman ad zunijttan, rënman yashaban laa reeman chi nit guidxliuj.

⁴⁰ Din rënman guial gra ree bén yayagbee Xi'nman chililadx tëë reeman laaman, gap reeman guialnaban tiblyayaa con laaman, gui'áad naj yashaban laa reeman chi nit guidxliuj.

⁴¹ Dxel guzuloj ree bén Israel caneeguijdx reeman Jesús, guial rëbaman: “Naj naj guiadxtil ni biguiajt diidz xanyabaa.”

⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

⁴³ Dxel rëb Jesús:

—Gol bacwëëz rnieeguidxidi naj loj lasa'di.

⁴⁴ Dios naj bén guxhaal naj. Achut zile' gui't lon bal id zëëdaman por da Dadan, abi' naj yashaban laaman chi nit guidxliuj.

⁴⁵ Loj ree libr ni bacaa ree bén badëë xtiidx Dios loj ree bejn, rëb: “Dios gultüü gra ree bejn.” Zeel gra ree bén rucaagdiajg xtiidxaman, rusiid tëë reeman ni rulüüman laa reeman, laa reeman zëëd lon.

⁴⁶ Achutdzi waguiaa da Dadan Dios, tijbzi bén guxhaalaman loj guidxliuj ma baguiaa laaman.

⁴⁷ Diidxliczi rnin, bén rliadx naj rajpaman guialnaban tiblyayaa con Dios.

⁴⁸ Naj naj guiadxtil ni runee guialnaban.

⁴⁹ Xbéngulalidi gudaw mana loj yujbidx, per ni'czi zian güjt gajc reeman.

⁵⁰ Per naj canin lojdi xcwent guiadxtil za xanyabaa, bén gaw laan gapaman guialnaban tiblyayaa con Dios.

⁵¹ Naj naj guiadxtil naban ni biyajb diidz xanyabaa. Bén gaw guiadxtil guie zajpaman guialnaban tiblyayaa con Dios. Guiadxtil ni rudëdan, laan naj quijb da cuerpan, gudëdanan dïn gap ree bénguidxliuj guialnaban.

⁵² Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejnman, ad zajptidi guialnaban.

⁵⁴ Per bén gaw da cuerpan guië' tëëman da rejnan, zajpaman guialnaban tiblyayaa con Dios, abi' naj yashaban laaman chi nit guidxliuj.

⁵⁵ Dïn da cuerpan naj quijb guialraw, gui'áad da rejnan naj quijb ni guië' bejn.

⁵⁶ Abi' bén raw da cuerpan rë' tëëman da rejnan, laaman nabannë naj, gui'áad naj nabannë' laaman.

⁵⁷ Da Dadan bén guxhaal naj, rajpaman guialnaban, abi' naj naban por laaman. Ziangajc bén gaw da cuerpan, zajpaman guialnaban tiblyayaa con Dios por naj.

⁵⁸ Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, dïn laa reeman majsi gudaw reeman mana guin, per güjt gajc reeman. Gui'áad bén gaw guiadxtil guie zajpaman guialnaban tiblyayaa con Dios.

⁵⁹ Zian balüü Jesús bejn ree lën yadoo Capernaum.

Diidx runee guialnaban tiblyayaa

⁶⁰ Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjnmaa ni rnin lëjt ya?

⁶² ¿Xhieza güündi bal guguaadi Bén guxhaal Dios yayë'paman lod guzuman gocli?

⁶³ Tijbzi por xSprijt Dios rajp bejn guialnaban tiblyayaa, bejn ad zile't güün laazaman xhienin. Abi' naj por xSprijt Dios zëëd ree diidx ni gunen lojdi, por ree diidx guin rajp bejn guialnaban.

⁶⁴ Per lëjt yu'di ad waliladxt.

Rëb Jesús zian guial ragbeechaawaman diizd yaloj chu ree ad rlladxt laaman chu tëë yayü laaman.

⁶⁵ Rëb tëëman loj reeman:

—Zeel ma rnin lojdi guial achut zile' gui't lon bal id zëëdaman por da Dadan Dios.

⁶⁶ Diizd nadxel, zien ree bën zinal Jesús guro'nladx laaman, abi' ad guzanëtri reeman laaman.

⁶⁷ Dxel rëb Jesús loj guidxiptio'p ree xbejnman:

—¿Në lëjt rën yaguiaj ya?

⁶⁸ Per badxi' Simón Béd laan, rëbaman:

—Dad, ¿chu loj yo'n? Awa xtiidxil zidnë guialnaban tiblayaa con Dios.

⁶⁹ Dunujn ma baliduladx rayagbee tëën guial lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj bën bayü laaman, majsi tijb gajc xbejnman najman.

7

Ad rlladxt ree bijch Jesús laaman

¹ Chi gudëd gojc zian, wej Jesús loj ree guiedx riga' niz Galilea. Ad güyëntaman niejman niz Judea, guial cayguuil ree bën Judea guin laaman din gugüjt reeman laaman.

² Per guial ma zidyob lanij ni rüjn ree bën Israel, chi rbej reeman lën ranch,

³ rëb ree bijch Jesús lojman:

—Brii, wej niz Judea, din në ree xbejnl bën riga' ree niz ni guguiaa milagr rüjnl.

⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad rlladxt laaman.

⁶ Dxel rëb Jesús loj reeman:

—Ad wadixnt da horan, per par lëjt xhietëëz horan naj zagdx.

⁷ Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laa naj ni rüjn reeman.

⁸ Gol wej lanij guin, sa'n naj ad zazaagajtan, din ad wadixnt hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bën Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëë chu gagbee.

¹¹ Per yu' ree bën Israel raguiil laaman loj lanij guin, rëb reeman:

—¿Con bën guin ya'n?

¹² Loj gra ree benzien we lanij guin, zienloj ni rniece reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutctzi ruza't laaman loj gra bejn, guial rdxeb reeman guxtis Israel ree.

¹⁴ Chi guroi xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree.

¹⁵ Guiáad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiiditix?

¹⁶⁻¹⁷ Dxel rëb Jesús loj reeman:

—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya.

¹⁸ Bën rulüü ganaxzi ni rbëëguyicaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniece ni diidxli, ad rusquieetaman bejn.

¹⁹ Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰ Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

²¹ Abi' rëb Jesús loj reeman:

—Por tijbzi milagr ni benan radxalojdi.

²² Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn.

²³ Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn?

²⁴ Ad rüjndi xgabmal por ni ruguiaazidi rüjn bejn, yaloj xgaj gol gogbee zagdex xhie cayünman.

Rëb Jesús ban zaman

²⁵ Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguil reeman ya din gugüjt reeman laaman?

²⁶ Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo?

²⁷ Per dunuj ree rayagbeechaaw ban zaman, guiáad chi gui't Cristo, achut gagbee ban saman.

²⁸ Chi bigueijn Jesús zian, la'tgaj culüüman bejn ree lën yadooro' Jerusalén, dxel guneeman rejs rëbaman:

—¡Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi.

²⁹ Per naj nünbee laaman guial zialan diizd lod za'man, laa tëëman guxhaal naj.

³⁰ Chi bigueijn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman.

³¹ Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³² Bigueijn ree bënfarisew ni rníee ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús.

³³ Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj.

³⁴ Yaguilidi naj, per ad zadxejtidi naj, din ad zile't gui'tidi lod gazun.

³⁵ Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bën guin din ad zadxejltaman? ¿Ni zejman lod zobj ree bën Israel loj ree benzit ya, chiglüüman laa reeman në ree bën ad najt bën Israel?

³⁶ ¿Xhie rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷ Dxej rliox lanij guin naj mazri dxej zobjloj, dxejzii guzuli Jesús guneeman rejs, rëbaman: —Bal chu lëjt re'c nijs, gol guda lon din guië'dan.

³⁸ Din bën rliadx naj zi'c ca loj xtiidx Dios, lën luxdooman gach nijs runee guialnaban.

³⁹ Chi guneé Jesús zian, rën guiëb xtiidxaman guial gra ree bën chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰ Yu' ree bën no'ch loj ree benzien guin, chi bacaagdiaj reeman ni guneé Jesús, rëb reeman:

—Walican, bën guin naj gui't guidgadëë xtiidx Dios loj ree bejn.

⁴¹ Yu'za reeman rëb:

—Bën guin naj bën bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman.

⁴² Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³ Zian gojc dxel gula' lasa' reeman por Jesús.

⁴⁴ Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

⁴⁵ Chi bayejc ree bën rajp ro' yadoo guin lod za' ree bënfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnëetidi laax?

⁴⁶ Dxel rëb ree bën rajp ro' yadoo guin:

—¡Ad goct wayu bën guinee zi'c rnieex!

⁴⁷ Abi' rëb ree bënfarisew guin:

—¿Në lëjt ma cwëjb basquieex lëjt ya?

⁴⁸ ¿Wen yu' ree dux guxtis ree, o bënfarisew ree ma bililadx laax ya?

⁴⁹ ¿Nid ragbeedi ya guial zien ree bën guin banijt loj Dios guial ad nünbeet reeman ley?

⁵⁰ Per bënfarisew la Nicodemo bën bignaj Jesús tijb guxhin, rëbaman loj reeman:

⁵¹ —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

⁵² Badxi' reeman laan rëb reeman:

—¿Wen në lüj za'në ree bën Galilea ya? Basiid zagdxe loj xtiidx Dios din gagbeel ad gocc warii bën rudëë xtiidx Dios loj ree bejn niz Galilea.

⁵³ Dxel bare'ch reeman zia lidx lidx reeman.

8

Béngunaa banaaznë xinguaaw ren

¹ Per Jesús zëman ruguia' Olivos.

² Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman.

³ Abi' mextr rulüü ree ley con ree bënfarisew bidxinnë tijb béngunaa banaaznë tijb xinguaaw, dxel bazuj reeman laaman galay ree bën guin,

⁴ zianz rëb reeman loj Jesús:

—Mextr, banaaz béngunaa guie loj mer hor ni yu'nëman xinguaaw ren.

⁵ Abi' loj ley basa'nne Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

⁶ Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman.

⁷ Per guial laa reeman canabdiidxzi canabdiidx reeman lojman, abi' babejliman, rëbaman loj reeman:

—Chutëëz bën ad wayüjnt dol, yaloj laaman gucaaguaiaj béngunaa guie.

⁸ Dxel basajb lojman stijb, basnuu bacaaman luyuj guin.

⁹ Chi biguejn reeman ni guneeman, guzuloj cayza tijbgaj reeman, diidz mazri bengol xt bara reeman baza. Tijbzi béngunaa guin baya'n con Jesús loj ree bën riga' yagaj.

¹⁰ Dxel babejliman, rëbaman loj béngunaa guin:

—¿Con ree bën bidnë lüj? ¿Ni'qui tijb reeman achut xhie been lüj ya?

¹¹ Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

Jesús naj bajl par bénguidxliuj

¹² Dxel gunee Jesús stijb, rëbaman loj ree bën riga' yagaj:

—Naj naj bajl rusni bénguidxliuj. Abi' bën guzoob da diidxan, zani xquiarguejnman xhiënaag gapaman guialnaban tiblyaa con Dios, ad yu' tëët dxej guicajy xquiarguejnman.

¹³ Abi' ree bënfarisew rëb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëë gan, sa'n léjt ad ragbeetidi ban zialan ban tëë gan.

¹⁵ Léjt rnieedi bejn zi'ctizi naj xixgabidi, sa'n naj achut ruzatan.

¹⁶ Abi' bal guzatan bejn, ganen diidxli, din ad zanetan zi'c naj da xgaban, në da Dadan bën guxhaal naj ragbee guial diidxli naj ni ganen.

¹⁷ Abi' loj xleydi ca guial chi yu' tio'p bën rniee tiblojzi, diidxliqui naj ni rniee reeman.

¹⁸ Yan, naj gajc naj tijb bën rniee por naj, abi' da Dadan bën guxhaal naj, naj stijb bën rniee por naj.

¹⁹ Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Léjt ad nünbeetidi naj, ad nünbee tëëtidi da Dadan, din bal nünbeedi naj, ziangajc nünbeedi da Dadan.

²⁰ Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaaz laaman, din ad wadxint hor guiniaazaman.

Lod gan ad zile't gui'tidi

²¹ Gunee Jesús stijb, rëbaman:

—Chi ma gan, zaguilidi naj, per zëjtnë xtolidi, din lod gan ad zile't gui'tidi.

²² Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³ Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj.

²⁴ Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

²⁵ Dxel gunabdiidx reeman lojman, rëb reeman:

—¿Chuja lüj?

Badxi'man laan rëbaman:

—Ma rnin lojdi diidz yaloj.

²⁶ Zien ni ra'pan gulün lëjt ni ganenë' tëën lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rnieeman naj diidxli.

²⁷ Per laa reeman ad gogbeet guial Diosan ruza'taman.

²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëëdi guial achetdzi rünan por da xgabzan, naj rnie ni ma balüü da Dadan naj.

²⁹ Din laaman guxhaal naj, laaman za' con naj, abi' ad yu't dxej cwëëladxaman naj, guial zianczi rünan ni rayuladxaman.

³⁰ Chi rëb Jesús zian, zien ree bejn bililadx laaman.

Bén wali naj xbejn Dios

³¹ Rëb Jesús loj ree bën Israel bililadx laaman:

—Bal gusnuu guzoobidi da diidxan, waliqui najdi da bejnan,

³² abi' züjnbeedi conin naj diidxli, abi' por diidxli guin zalaadi.

³³ Badxi' reeman laan rëb reeman:

—Dunuyn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

³⁴ Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol.

³⁵ Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan.

³⁶ Zeel bal Xi'nman guslaa lëjt, ad najtridi zi'c bën nado'.

³⁷ Ma qui ragbeen guial loj xdiaa Abraham zëëdidi, per lëjt rën gugüjt naj guial ad rayuladxidi da diidxan.

³⁸ Naj rni ni ma balüü da Dadan naj, sa'n lëjt rüjndi zi'c na xDadidi güüdi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman.

⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nünman zian!

⁴¹ Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunuyn achut mazri xi'n nayajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj.

⁴³ Abi' ad rignia'tidi ni rnin, guial ad rëntidi gucaagdiajguidi da diidxan.

⁴⁴ XDadidi naj xinxab, abi' rüjndi zi'c rënx güüdi, din diidz yaloj ruladx xinxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad gualrusquiee.

⁴⁵ Per guial naj rni lëjt ganax diidxli, ad rliladxtidi naj.

⁴⁶ ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj?

⁴⁷ Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rëb ree bën Israel guin loj Jesús:

—Waliqui ni ranan guial xinxab yu' luxdool naj tëël bën Samaria.

⁴⁹ Badxi'man laan rëbaman:

—Achut xinxab yu' luxdon, naj cuzob xtiidx da Dadan, per lëjt ganax diidxguijdx rnieedi naj.

⁵⁰ Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis.

⁵¹ Diidxli rnin lëjt, bën guzoob da diidxan, ad yu't dxej guiëtaman.

⁵² Dxel rëb ree bën Israel guin lojman:

—Yanri ma rayagbeechaawan guial xindxabqui yu' luxdool. Abraham nè gra ree bën badëë xtiidx Dios loj ree bejn, güjt reeman, guiáad lüj nal: “Bën guzoob da diidxan, ad yu't dxej guiëtaman.”

⁵³ ¿Wen mazri lasajquil ya guial loj dux béngulal ree Abraham? Güjtaman, güjt tëë ree bën badëë xtiidx Dios loj ree bejn. ¿Laad lüj chu naladxil najl?

⁵⁴ Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi.

⁵⁵ Lëjt ad nünbeetidi laaman, sa'n naj nünbeen laaman. Abi' bal ganin ad nünbetan laaman, nêgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman.

⁵⁶ Xbéngulalidi Abraham, babaaman guial guguiaaman dxej ni guialan. Abi' chi baguiaaman dxej guin, mazri babaaman.

⁵⁷ Dxel rëb ree bën Israel guin lojman:

—Ni'qui gadil chu' tü'pchiü ijz, ¿guiáad lüj ya nal baguiaa Abraham?

⁵⁸ Abi' gunee Jesús rëbaman:

—Diidxli rnin lojdi, mal nabanani chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

9

Rayüjn Jesús tijb xin ad ranit loj

¹ Chi cadëd Jesús tiblajt, baguiaaman tijb xin ad ranit loj diüzd chi golix.

² Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diüzd chi golaman? ¿Por xtol ree xDadaman ya, o por xtol gajcaman?

³ Badxi' Jesúsani, rëbaman:

—Najman zian ad por xtoltaman ad por xtol tëtë ree xDadaman. Gojlaman zian din chi yayaajcaman, guguiaa ree bejn xguialrniabee narooob Dios.

⁴ Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac.

⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeaman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin.

⁷ Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx.

⁸ Dxel bën zojb ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguenzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹ Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.”
Dxel wan, chi gulox gudiib lon, max bani lon.

¹² Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bënfarisew loj xin guin xhienaag guzuloj rani lojx

¹³ Loj hor zii binë reeman xin bayajc guiaaloj guin loj ree bënfarisew,

¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn.

¹⁵ Dxel gunabdiidx ree bënfarisew guin lojx xhienaag guzuloj rani lojx. Abi' rëbix loj reeman:

- Jesús gudëeb bajn guiaalon, dxel bitiib lon, yan ma ranin.
¹⁶ Yu' ree bënfarisew guin rëb:
 —Bén bayüjn guiaalojl ad xbejnt Diosan, din ad rajptaman respejt dxej razililadx bejn.
 Per yu'za reeman rëb:
 —¿Xhienaag güünman milagr guie ree, bal najman bëndol?
 Garent garen rëb reeman.
¹⁷ Abi' gunabdiidx reeman loj xin bayajc guin zatijb, rëb reeman:
 —¿Laadx lüj xhie nal chu naj bën bayüjn guiaalojl?
 Badxi'xan rëbix:
 —Naj rni guial laaman naj bën rudëe xtiidx Dios loj ree bejn.
¹⁸ Per bën Israel guin ree ad rililadxt reeman, din ad banit lojx abi' yan ma ranin, dxel gurejdx reeman xdadix con xniaax,
¹⁹ abi' gunabdiidx reeman loj reeman, rëb reeman:
 —¿Xin guien naj xi'ndi ya, xin rëbidi ad ranit loj diizd gojljix? Yan, ¿xhienaag gojc zeel ma ruguiaax?
²⁰ Badxi' reeman laan rëb reeman:
 —Dunuyn rayagbee guial du xi'nanan, rayagbee tëen guial diizd chi golix ad ranit lojx.
²¹ Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.
²² Rëb ree xdadix zian guial rdxeb reeman xguxtis ree bën Israel, din ma baya'n reeman diidx, chutëez bën guiëb guial Jesús naj Cristo, ad zatiëjbtri reeman chu'man lën yadoo.
²³ Zianan zeel rëb reeman: “Gol gunabdiidx lojx, ma najx xingol.”
²⁴ Dxel gurejdx reeman laax zatijb, abi' rëb reeman:
 —Laa Dios ruguiaa, guna diidxli, din dunuyn rayagbee guial bëndol naj bën bayüjn lüj.
²⁵ Badxi'xan rëbix:
 —Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.
²⁶ Dxel gunabdiidx reeman lojx stijb, rëb reeman:
 —¿Xhienaag beennëman lüj? ¿Xhienaag beenman persi rani lojl?
²⁷ Badxi'xan rëbix:
 —Ma rnin lojdi, abi' lëjt ad rililadxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?
²⁸ Dxel gudilë reeman laax rëb reeman:
 —Lüj bal najl xbejnman, sa'n dunuyn xbejn Moisejs nayajcan.
²⁹ Din dunuyn rayagbee Dios guneë Moisejs, per bën guin ni'quid rayagbeetan ban zaman.
³⁰ Badxi'xan rëbix:
 —jXhiechalinin zeel ad ragbeetidi ban zaman! Guiáad naj por laaman ma rani lon.
³¹ Dunuj ree rayagbeechaaw guial ad ridxga't Dios xtiidx ree bëndol, ridxga'man xtiidx ree bën ruzoob xtiidxaman rüjn tëë reeman zi'c rënman.
³² Ad goct wacaagdiajg ree guial chu' bën yayüjn loj bën ad ranit loj diizd gojlamán.
³³ Yan, bal id por Dios zëed bën guin, achetczi nile' nüjnman.
³⁴ Dxel rëb reeman lojx:
 —Lüj gojl con dol, ¿wed lüj guluü dunuyn?
 Abi' babëë reeman laax yagaj.
Bililadx xin bayajc guin Jesús
³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:
 —¿Rililadxil bën guxhaal Dios loj guidxliuj ya?
³⁶ Badxi'xan rëbix:
 —Dad, guna chunin, din chililadxan laaman.
³⁷ Dxel rëbaman lojx:
 —Ma baguiaal laaman, laaman naj bën caneenël.
³⁸ Abi' bazuxib xin guin lojman, rëbix:
 —Rililadxan lüj, Dad.
³⁹ Zianz rëb Jesús:
 —Bialan loj guidxliuj guie din günan guialguxtis, din por naj yani loj ree bën ad ranit loj, guiáad ree bën rani loj, ad zanit loj reeman.
⁴⁰ Yu' ree bënfarisew za'në laaman. Chi biguiejn reeman rëbaman zian, rëb reeman:
 —¿Wen në dunuyn ad ranit duloj ya?
⁴¹ Dxel rëb Jesús loj reeman:
 —Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tëë Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj béngubaan.

² Per bén ru niz ro' xgurajl reeb, laaman naj bén rniaj laa reeb.

³ Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin.

⁴ Abi' chi ma brii gra reeb, dxel rnedaman loj reeb, guiáad laa reeb rnal laaman, guial nünbee reeb cha'man.

⁵ Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox guneë Jesús zian, ad bignia't ree bén riga' yagaj xhie rën guiëb ni guneeman.

Jesús naj zi'c bén rniaj xiil ree zagdxë

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb.

⁸ Gra ree bén bi't chi gad naj guial naj reeman zi'c béngubaan, rban reeman rusagzi tëë reeman. Per ree bén naj da bejnan ad bidxga't reeman laa reeman.

⁹ Naj naj ro' port, abi' bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

¹⁰ 'Béngubaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan.

¹¹ Naj naj zi'c tijb bén rniaj xiil ree zagdxë. Abi' bén rniaj xiil ree zagdxë xt xguialnabanman rudëëman por laa reeb.

¹² Per bén rniaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bén rniaj ree xiil, dxel rniaaz cuyojt guin laa reeb abi' rtie'chib laa reeb.

¹³ Laaman rbëëladx laa reeb, din por miliazi rniajman laa reeb abi' achet naladxaman por laa reeb.

¹⁴⁻¹⁵ 'Naj naj zi'c bén rniaj xiil ree zagdxë. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanman gudëdan por laa reeb.

¹⁶ Ra'p tëën stibcwaä ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaä reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb.

¹⁸ Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

¹⁹ Chi biguiejn ree bén Israel guin ni rëbaman, gojc reeman tio'p lala' stijb.

²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooman rajc tëë guijcaman.

²¹ Per yu' reeman rëb:

—Ni'qui tijb bén yu' xindxab luxdoo ad rnieet zian. ¿Wen zajc yaxhal xindxab guiaaloj ree bén ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayüjn ree bén Israel lanij ni rüjn reeman gazobijz par yadooro' Jerusalén.

²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón.

²⁴ Dxel biyaw ree bén Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesúsän rëbaman:

—Ma rnin lojdi, per lëjt ad rliadxtidi naj. Abi' ree ni rünan con xguialrniabee da Dadan Dios, laa reen rulüü chu najn.

²⁶ Per ad rliadxtidi, guial ad najtidi da bejnan.

²⁷ Bén naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj.

²⁸ Naj rudë guialnaban tiblayaa loj reeman, ad yu't dxej nit reeman. Abi' achut zajc chiquied laa reeman lon.

²⁹ Din da Dadan, bén banee laa reeman lon, rajpaman mazri guialrniabee guial loj gra. Achut zajc chiquied laa reeman lojman.

³⁰ Da Dadan con naj, nayajcan tijbzi.

³¹ Dxel cwa' ree bën Israel guiaj din gucaaguaiaj reeman Jesús.

³² Per rëbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

³³ Badxi' reeman laan rëb reeman:

—Ad por ree ni zagdxe ni beentilan yacaaguaiajn lüj, yacaaguaiajn lüj guial ad rajptil Dios respejt, din bënguixdliujzi lüj, abi' rüjn lüj gajc zi'c Dios.

³⁴ Dxel rëb Jesús:

—Loj xleydi rëb: “Naj rni guial lëjt naj dios.”

³⁵ Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëlaaj dios bën basa'nnë ree xtiidxaman, bën gojp ree guialrniabee loj ree bën Israel.

³⁶ Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj?

³⁷ Bal id cayünan zi'c na da Dadan, ad chililadxidi naj.

³⁸ Per bal cayünan zi'c naman, majsi ad zaliladxtidi naj, per gol bililadx guial por laaman zëëd ni rünan din gagbeedi guial da Dadan za'në naj, guiaad naj za'në'n laaman.

³⁹ Dxel guyën reeman niniaaz reeman Jesús, per gulaaman loj reeman.

⁴⁰ Abi' zëman zatiblad ro' guiiw Jordán, lod baroobnijs Waj bejn ree yaloj, yagaj baya'nman.

⁴¹ Abi' zien ree bën bidxin yagaj rëb:

—Walin, majsi achet milagr been Waj, per gra ni guneeman xcwent bën guie naj diidxli.

⁴² Dád zien reeman bililadx Jesús yagaj.

11

Güjt Lazr

¹ Guyu tijb bënragxuu, brier lajman Lazr. Laaman con re bizanman Li con Mart, naj ladx reeman Betania.

² Abi' Li bizan Lazr, laam baroob perfum guia' Jesús abi' bacwiidximin con guidxguijqum.

³ Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

⁴ Chi biguiejn Jesús zian, rëbaman:

—Gualguijdx guin ad zëëditan par gugüjtan, zëëdan din gac guguaia bejn xguialrniabee Dios në par guguaia reeman xguialrniabee Xi'n Dios.

⁵ Majsi rën da't Jesús Mart con Li në Lazr,

⁶ per chi cwa'man ruson ragxuu Lazr, sta goglaaman zatio'p dxej lod za'man.

⁷ Dxel rëbaman loj ree xbejnman:

—Yo' ree niz Judea zatijb.

⁸ Abi' rëb reeman lojman:

—Mextr, ad wayajct xchej guyën ree bën zojb niz ni nucaaguaiaj reeman lüj. ¿Abi' chel ni zatijb ya?

⁹ Dxel rëb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie.

¹⁰ Per bën rza guxhin, yu' ni rirejl guia'man, din achet bajl guin rajpaman.

¹¹ Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

¹² Dxel rëb ree xbejnman:

—Dad, bal naayëjsix, rën guiëban yayajquix.

¹³ Per ni rëb Jesús rën guiëban guial ma güjt Lazr, guiaad ree xbejnman gunaladx reeman rëbaman naga'yëjsizix.

¹⁴ Dxel bagojn Jesús laa reeman, rëbaman:

—Ma güjt Lazr.

¹⁵ Rabaan por lëjt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, bën rniee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bën rusban bejn runee tëëman guialnaban

¹⁷ Chi bidxin Jesús Betania, ma gojc tajp dxej biguie'ch Lazr.

¹⁸ Betania guin raya'nan gajxh Jerusalén, zi'ct choon kilometro.

¹⁹ Abi' zien ree bèn Israel bignaj Mart con Li din yagu' reeman luxdoo reem guial güjt bizan reem.

²⁰ Chi gogbee Mart ma zëäd Jesús gajxh, briim bigchaaglojm laaman, guiáad Li baya'nm lèñü.

²¹ Dxel rëb Mart loj Jesús:

—Dad, bal nizujl guie, ad ziant niëjt da zanan.

²² Per naj ragbee guial ni'qui yan zunee Dios ni guiniabil lojman.

²³ Dxel rëb Jesús:

—Naj rni yaban bizanl.

²⁴ Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialgux-tis Dios.

²⁵ Abi' rëb Jesús:

—Naj naj bèn rusban ree bengüt rudë tëën guialnaban loj ree bejn. Bèn chililadx naj, majsí guiëtaman, per zajpaman guialnaban loj Dios.

²⁶ Guiáad gra bèn naban rliladx tëë naj, zajpaman guialnaban loj Dios. ¿Rliladxil ni canin lüj ya?

²⁷ Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bèn naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm Jesús.

³⁰ Abi' Jesús gadzaman chu' luguiedx guin, sta za'man lod bigchaagloj Mart laaman.

³¹ Guiáad ree bèn Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguiaaman roon Li con ree bèn Israel nal laam, dád gognaa luxdooan guyu naya tëëman.

³⁴ Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

³⁵ Dxel biinman.

³⁶ Abi' rëb ree bèn Israel guin:

—Gol baguiaa nial dád guyënman laax.

³⁷ Per yu' reeman rëb:

—Bèn guinan baxhal guiaaloj tijb bèn ad ranit loj. Yan, ¿niche niajc nüjnman ya'n chitëë niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n.

³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesúsán rëbaman:

—¿Nid rnin ya, bal rliladxil, guguaal xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin.

⁴² Naj ragbeechaaw guial zianczi rucaagdiajguil ni rnin. Per rnin zian por ree bèn riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—¡Lazr, barii yagaj!

⁴⁴ Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

*Baya'n reeman diidx xhienaag guiniaaz Jesús
(Mt. 26:1-5; Mr. 14:1-2; Lc. 22:1-2)*

- ⁴⁵ Dád zien ree b́en binal Li bililadx Jeśus, guial baguiaa reeman milagr beenman.
- ⁴⁶ Per yu' reeman bicojn b́enfarisew ree ni been Jeśus.
- ⁴⁷ Dxel b́enfarisew ree ńe ree bixhioz rniabee, bachajg lasa' reeman con los demazri ree guxtis, ŕeb reeman:
—¿Xhienaag yaguieen ree ya'n, din dád zien milagr caýujn xin guin?
- ⁴⁸ Bal yad́eéd ree mod, graczi bejn guililadx laax, dxel guxtis Rom ree guidganijt reeman dux yadoo ree ńe dux nacion ree.
- ⁴⁹ Per loj reeman yu' b́en la Caifás, bixhioz zobjloj rniabee loj ijszi, ŕebaman loj reeman:
—¿Nid ragbeedi ya,
- ⁵⁰ nid rignia' t́eédi ya, zagdxe naj guiét tijbzi bejn por gra b́en Israel, luar nit dux nacion ree?
- ⁵¹ Per Caifás guin ad ni naladxtzaman ŕebaman. Guial najman bixhioz zobjloj rniabee loj ijszi, zeel bad́eéd Dios ni guneeman, guial guiét Jeśus por gra ree b́en Israel.
- ⁵² Abi' ad por laatzí reeman, par gac reeman tijbzi con gra ree xbejn Dios, b́en riga' ree guidib guidxliuj.
- ⁵³ Zeel diidz dxejzi baya'n reeman diidz guǵujt reeman Jeśus.
- ⁵⁴ Zianan zeel ad contzi rulúulojtraman loj ree b́en Israel, bazaman yagaj ziaman guiedx la Efraín, najn gajxh yujbidx, yagaj guzuné ree xbejnman.
- ⁵⁵ Dxejzi ree ma zidyob pascw, lanij ŕujn ree b́en Israel, dád zien ree b́en guiedx ree źe Jerusalén din güün reeman zi'c naj xcostumbr reeman par gac reeman naya loj Dios chi gad pascw gal.
- ⁵⁶ Dxel raguil reeman Jeśus, abi' rniabdiidx loj lasa' reeman ĺen yadooro' Jerusalén, ŕeb reeman:
—¿Xhie nadi? ¿Zi'taman lanij ya o ad zi'ttaman?
- ⁵⁷ B́enfarisew ree con ree bixhioz rniabee, gunabee reeman bal chut́eéz b́en ragbee ban za' Jeśus, gugojnman din chile' guiniaaz reeman laaman.

12

Baroob Li perfum guia' Jeśus (Mt. 26:6-13; Mr. 14:3-9)

- ¹ Za xho'p dxej riaadx gal pascw, chi we Jeśus Betania, lod zobj Lazr, xin basbanman.
- ² Ni been reeman tijb guialraw par xche ni gudawné reeman Jeśus. Mart gule'c guialraw guin, guíaad Lazr naj tijb b́en gurené laa reeman xan mex.
- ³ Dxel cwa' Li cost garol lijtr perfum ni lasajc wayéjx, najcchaawnén ganax nardo, baroobimin guia' Jeśus abi' bacwiidxné guidxguijquimin. Guidibczi ĺenú guin baree nejxh.
- ⁴ Dxel Judas Iscariote, xin naj tijb ree xbejn Jeśus, xin bayú laaman, ŕebix:
⁵ —¿Chexc ad gudo't perfum guin? Zagdxeli nido'n zi'ct ŕujn tijb bejn gan tib ijz, din nújnán yudar b́enprob ree.
- ⁶ Ad guial yu'tix xgab b́enprob guin ree zeel ŕebix zian, ŕebix zian guial najx xin gubaan. Abi' guial laax naaz bols yu' milia, rbanx ni rudéé reeman rgu'chaawix.
- ⁷ Dxel ŕeb Jeśus lojx:
—Guzujr biinan. Ma badxe'xgajm naj perfum guin par chi guidxin dxej guiguie'chan.
- ⁸ Din b́enprob guin ree zianczi za'né reeman ĺejt, per naj ad ziantczi gazun'é'n ĺejt.

Baya'n reeman diidz guǵujt reeman Lazr

- ⁹ B́en guixiuj b́en Israel gogbee za' Jeśus Betania, abi' wej reeman yagaj, ad par guguiaatzí reeman Jeśus, ńe par guguiaa reeman Lazr, xin basbanman.
- ¹⁰ Zeel baya'n ree bixhioz rniabee diidz guial ńe Lazr guǵujt reeman.
- ¹¹ Din por laax dád zien ree bejn cayrii loj reeman, abi' caliladx reeman Jeśus.

Bagajpdioz ree bejn Jeśus zi'c rey

(Mt. 21:1-11; Mr. 11:1-11; Lc. 19:28-40)

- ¹² Chi bareguiaal, zien da't ree b́en źe lanij pascw Jerusalén gogbee guidxin Jeśus yagaj,
- ¹³ dxel cwa' reeman zijn, b́rii reeman bigchaagloj reeman laaman, rbidxa' reeman ŕeb reeman:
—¡Benza'c bendxoon naj Dios! ¡Núnjle'man B́en guxhaalaman! ¡Núnjle'man b́en naj rey Israel!
- ¹⁴ Bidxaagloj Jeśus tijb burdoo, abi' gudxibaman laab, persi gojc zi'c ca loj xtiidx Dios lod ŕeb:
- ¹⁵ B́en Sión, ad rdxebidi.
Gol baguiaa, laa xreydi źeéd,
dxibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bén guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman diidx loj ree bejn ni baguiaa reeman.

¹⁸ Zeel zien ree bejn brii bigchaagloj laaman, guial gogbee reeman milagr beenman.

¹⁹ Dxel rëb loj lasa' ree béñfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bén grieg raguuil Jesús

²⁰ Loj gra ree bén we lanij bignajchi' reeman Dios Jerusalén, no'ch bëlzi ree bén grieg,

²¹ bugib reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²² Abi' wej Felip biguiedxaman loj Andrejs, dxel wej grop reeman bicojn reeman Jesús.

²³ Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman.

²⁴ Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn.

²⁵ Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëëz sacaman, zajpaman guialnaban tiblyaa con laaman.

²⁶ Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

Rugojn Jesús guial guiëtaman

²⁷ Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan.

²⁸ Dad, balüü xguialrniabeel.

Dxel biguieen cha' bejn xanyabaa rëbaman:

—¡Ma balü da guialrniabeen, per gulünan stijb!

²⁹ Riguiejn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

³⁰ Dxel rëb Jesús:

—Ad por najtan biguieen cha' bejn, por lëjtan.

³¹ Ma bidxin dxej gac guialguxtis loj guidxliuj, yan yarii bén rniabee lojn.

³² Per chi guilies reeman naj ya loj guidxliuj guie, dxel gui't graloj bejn lon.

³³ Zian basignia'man xhienaag guiëtaman.

³⁴ Badxi' ree bén guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëëd xanyabaa? ¿Chunin naj Bén zëëd xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bén rza loj xcay, ad ragbeetaman ban cheman.

³⁶ Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

Ad bililadxt ree bejn Jesús

³⁷ Majsí been Jesús zien da't milagr baguiaa reeman, ad bililadxt reeman.

³⁸ Zian gojc cumplid ni bacaa Isaías bén badëë xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaal loj reeman,

bascajy tëëman xquiarguiejn reeman,

chitëë guguiaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree bén zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree béñfarisew laa reeman lod ricaagdiaj reeman xtiidx Dios,

⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bén rliładx naj, ad najtzan rliładxaman, në da Dadan bën guxhaal naj.

⁴⁵ Bén ruguiaa naj, në bën guxhaal naj ruguiaaman.

⁴⁶ Naj naj bajl, bialan loj guidxliuj guie, chitëe yaya'n ree bën rliładx naj loj xcay.

⁴⁷ Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol.

⁴⁸ Bén ad rënt naj ad rucaagdiajg tëtëtaman da diidxan, mal yu' ni gudëd laaman casti: diidx ni rën, laan gudëd laaman casti chi guidxin dxej.

⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü tëen,

⁵⁰ zeel ragbeen, ni rniabee da Dadan runee guialnaban tiblayaa. Zianan zeel ni rnin rulünan zi'c rniabeeman.

13

Gudiib Jesús guia' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguiaj loj xDadaman. Zianczi guyën ree xbejnman, bën riga' ree loj guidxliuj, rënman laa reeman goctëez.

²⁻⁴ Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bën gugüjt laaman. Ragbee Jesús guial badëed xDadaman gra guialrniabee lojman, laa tëtëman guxhaal laaman, zeel yaguiajman lod za'man. La'tgaj cayaw reeman, bisuman xan mex, gulëeman tijb lajd najcwaman luya, dxel cwa'man tijb tuay guxhui xizaman.

⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tëtëman laan con tuay naxii xizaman.

⁶ Chi bayal quiibaman guia' Simón, bën rniee reeman Bëd, rëbaman loj Jesús:

—Dad, ¿luj quiib guia'n ya?

⁷ Badxi'man laan rëbaman:

—Ad rignia'til ni cayüman yan, per qui chignia'rilan.

⁸ Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

⁹ Zeel rëb Bëd lojman:

—Dad, ad bal guia'zan quiibil, gudiib në yan con guican.

¹⁰ Badxi'man laan rëbaman:

Bën goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

¹¹ Ma ragbeeman chu yayü laaman, zeel rëbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya?

¹³ Rnieedi naj Mextr në Dad, waliquidi najn.

¹⁴ Bal najn Mextr në Dad, gudiiban guia'di, ziangajc quiib guia' lasa'di.

¹⁵ Ma balün lëjt, din güündi zi'c benan.

¹⁶ Diidxliczi ganin, achut mojs naj mazri guial loj bën rxhiaal laaman.

¹⁷ Bal rignia'di nine güün tëtëdan, yabaanë Dios lëjt.

¹⁸ “Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bën rawnë'n tijbzi, bayejcaman contr naj.”

¹⁹ Ma rugojnan lëjt din gagbeedi chi gac zian, din chililadxidi chu najn.

²⁰ Diidxliczi ganin, bën rucaagdiajg ni rëb bën rxhialan, najn rucaagdiajgaman, guiäad bën rucaagdiajg da diidxan, xtiidx bën guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹ Chi gulox gunee Jesús zian, däd guyunayaman, dxel rëbaman loj reeman zagdxe:

—Diidxliczi ganin, tijb lëjt yayü naj loj ree bën gugüjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman.

²³ Tijb bën guyën da'taman zojb cwë'man, hor zii chi cayaw reeman xche,

²⁴ dxel been Béd sen lojman din guiniabdiidxaman chunin ruza't Jesús.

²⁵ Zeel mazri bigigaman cwè' Jesús gunabdiidxaman, rëbaman:

—Dad, ¿chunin?

²⁶ Badxi' Jesúsán rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote.

²⁷ Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

²⁸ Per achutctzi ree bën zobj xan mex guin bignia' chexc zeel rëbaman zian.

²⁹ Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree bën rzagdiaj ya.

³⁰ Chi ma gudawix guiadxtil guin, dxel briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xguiarlriabee Bén guxhaal Dios din gagbee ree bejn xhienaag naj guialrriabee gudëë Dios lojman.

³² Din bal gulüü Bén guxhaal Dios xguiarlriabee Dios, ziangajc gulüü Dios xguiarlriabee-man, zeel ma gudëëdaman laan.

³³ Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod gan.

³⁴ Ganin tijb nicüb ganabeen: Gol guyën lasa'di zi'c rënan lëjt.

³⁵ Bal guien lasa'di, zian gagbee gra bejn guial najdi da bejnan.

Guiëb Béd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Béd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Béd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

³⁸ Badxi' Jesúsán rëbaman:

—¿Walil ya rën guiëtil por naj? Diidxliczi ganin, chi gad gujd cwidxa', mal rëbil choon volt, ad nünbeetil naj.

14

Jesús naj nejz guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj.

² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi.

³ Chi ma benchaawan luar guin, dxel yaguialan guidgaxin lëjt din sudi lod gazun.

⁴ Ma nünbeedi nejz zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan.

⁷ Bal nünbeedi naj, në da Dadan güünbeedi. Per ma nünbeedi laaman diizd yan, din ma baguiaadi laaman.

⁸ Dxel rëb Felip:

—Dad, baneë mod majsi yaguiaazan bën naj xDadil.

⁹ Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaa da Dadan?

¹⁰ ¿Nid rililadxil ya, naj za'në' da Dadan, guiáad laaman za'në naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin.

¹¹ Gol bililadx naj za'në' da Dadan, guiáad laaman za'në naj. Balgui majsi ni rünzan gol bililadx.

¹² Diidxliczi ganin: Bén rililadx naj, nëgajcaman güün ni rünan, güünman ni mazri naroo, din naj yaya' lod za' da Dadan.

¹³ Graczi ni guiniabidi lojman por naj, günanan din gulün xguiarlriabee-man.

14 Günan xhietëez ni guiniabidi.

Guixhiaal Jesús xSprijtaman

15 'Bal rëndi naj, gucaagdiajguidi ni balün.

16 Din guië loj da Dadan guixhiaalaman Sprijt sunë lëjt,

17 Sprijt gulüü diidxli, din zianczi sunëman lëjt. Bén ad riladxt ree Dios ad zajt tia' reeman Sprijt guin, din ad ruguiaat reeman ad nünbee tëët reeman laaman. Per lëjt nünbee laaman, din sunëman lëjt yaya'n tëëman luxdoodi tiblayaa.

18 Ad zusa'tan xtijbidi, yaguialan stijb guidganan lëjt.

19 Sta'nz riaadx ad zuguaatri ree bénguidxliuj naj, per lëjt guguaadi naj, guibandi din nabanan.

20 Dxej zii ree, gagbeedi za'në' da Dadan, lëjt za'në' naj, guiáad naj za'në'n lëjt zianczi.

21 Bén rucaagdiajg ni rniabeen rüjn tëëman laan, walicaman rënman naj. Guiën da Dadan bén rën naj, në naj guiën laaman din güünbeeman naj.

22 Gunabdiidx Judas (ad bén bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

23 Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman.

24 Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan bén guxhaal naj.

25 'Canin lojdi gra nine, la'tgaj za'në'n lëjt.

26 Per xSprijt Dios, bén sunë lëjt zianczi, bén guixhiaal da Dadan por naj, graczi gulüüman lëjt din gusaaladxidi ni canin.

27 'Chi yaya'n, yabedczen luxdoodi, gunen gualnaza'c lojdi, ad zi'c runeet ree bénguidxliuj, ad bal ru nayadi ad rdxeb tëëdi.

28 Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxe, gual gagbeedi yaya' loj da Dadan, din mazri zobjlojman gual lon.

29 Ma rugojnan lëjt, din chi gac zian, chililadxidi.

30 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabee.

31 Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

15

Rën Jesús yadxu'në' reeman zianczi

1 Basnuu rëb Jesús:

—Naj naj zi'c yag rtia ni nejxh zagdxe, guiáad da Dadan naj zi'c Bén rxübin laan.

2 Da bejn reen naj zi'c ree xidx yag guin. Bal id rtia reen gutiüg da Dadan laa reen. Per bal rtia reen, gusiaman laa reen din tia reen mazri.

3 Lëjt ma nayadi, gual basia diidx rnin lëjt.

4 Gol gubajnnë naj zi'c nabannë'n lëjt. Ad zajt tia xidx yag, bal id najnën yag guin tijbzi. Ziangajc lëjt ad zajt güüdi ni rën Dios bal id za'nëdi naj.

5 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüdi.

6 Bén ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

7 —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan.

8 Bal güüdi ni rën da Dadan, gaquidi quijb da bejnan, din guza't ree bejn laaman zagdxe.

9 Rënan lëjt zi'c rën da Dadan naj, gol basaaladx rënan lëjt.

10 Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeem rënan naj.

11 'Rnin lojdi zian din chu' luxdoodi zagdxe zi'c yu' luxdon zagdxe, zagdxe da't chu' luxdoodi.

12 Gol guyën lasa'di zi'c rënan lëjt, laan rniabeem güüdi.

13 Achut rën xmiw mazri gual loj Bén rëjt por laa reeman.

14 Lëjt naj da miwan bal güüdi ni rënan.

15 Ad zanetran lëjt mojs, din mojs ad ragbeetaman xhie rüjn Bén rniabee laaman. Ganen lëjt miw, din balün lëjt graczi ni na da Dadan lon.

16 Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj.

17 Rniabeem: Guiën lasa'di.

Ralen ree bejn Jesús con ree xbejnman

¹⁸ Rêb tēē Jesús:

—Bal ralen ree bénguidxliuj lējt, gol basaaladx, yaloj naj balen reeman.

¹⁹ Bal niajquidi bénguidxliuj, niēn reeman lējt zi'c rēn lasa' reeman. Per naj gule lējt loj reeman, zeel ralen reeman guial ad najtidi bénguidxliuj.

²⁰ Gol basaaladx ni rnin: “Achut mojs naj mazri guial loj bēn rniabee laaman.” Bal basagzi reeman naj, ziangajc gusagzi reeman lējt, bal bazoob reeman da diidxan, ziangajc guzoob reeman xtiidxidi.

²¹ Graczi nine güünnē reeman lējt por naj, din ad nünbeet reeman bēn guxhaal naj.

²² Achet xtol reeman niu, bal idan nial ninienē'n laa reeman, per yan yu' xtol reeman.

²³ Bēn ralen naj, nēgajc da Dadan ralenman.

²⁴ Achet xtol reeman niu, bal idan nün ree ni benan loj reeman ni achutdzi wayüjn, per ma baguiaa reeman laa reen, majsi zian ralen gajc reeman naj nē da Dadan.

²⁵ Per rajc zian din gac cumplid ni ca loj xley reeman, rēban: “Achet rünan ralen reeman naj.”

²⁶ Per chi gui't Sprijt gaxhalan din sunēman lējt gulüü tēēman diidxli, Sprijt zēēd loj da Dadan, laaman gü da diidxan.

²⁷ Nēgajc lējt gü laan, din diizd yaloj za'nēdi naj.

16

¹ Rnin zian, din ad zabējzt chililadxidi naj.

² Yabēē reeman lējt lod ricaagdiajg reeman xtiidx Dios, zadxin dxej, chutēēz bēn gugüjt lējt naladx reeman Dios cayüjn reeman wen.

³ Güün reeman zian din ad nünbeet reeman naj ni'quai da Dadan.

⁴ Per ma rnin lējt, din chi guidxin dxej guin gusaaladxidi guial ma bagojnman lējt.

Ni rüjn xSprijt Dios

'Ad rnitān lojdi zian diizd yaloj, din naj guzunē' lējt.

⁵ Per yan yaya'n loj bēn guxhaal naj. Achutczidi rniabdiidx ban gan,

⁶ aal yu'nayadi guial canin zian.

⁷ Per diidxliczi rnin: zagdxē najn yaya'n. Din bal idan yaya', ad zi'tt xSprijt Dios sunē lējt, per bal yaya'n, naj gaxhal laaman.

⁸ Chi gui'taman, laaman gulüü ree bénguidxliuj ni naj dol, ni naj ni zagdxē, nē xguialguxtis Dios.

⁹ Gagbee reeman yu' xtol reeman, guial ad rililadxt reeman naj.

¹⁰ Ni zagdxē guin naj guial yaya' loj da Dadan din ad zuguaatrīdi naj.

¹¹ Guiaád Dios ma been xguialguxtisaman con xindxab rniabee guidxliuj.

¹² Yu'ri ni rēnan ganin, per dād zien gacan par lējt.

¹³ Chi gui't Sprijt gulüü lējt diidxli, din ad züt xtiidx gajcaman, guinieeman graczi ni guienman, laaman gulüü lējt ni gac.

¹⁴ Guza'taman naj zagdxē, din naj gudēd ni gulüüman lējt.

¹⁵ Graczi ni rajp da Dadan naj par naj, zeel rnin, Sprijt guin tia' ni gudēdan din gulüüman laan lējt.

Guguaa ree xbejn Jesús laaman zatijb

¹⁶ Ma guidxin dxej ad zuguaatrīdi naj, per ad zajct xchej, guguaadi naj stijb.

¹⁷ Chi rêb Jesús zian, dxel guzuloj ree xbejnman canabdiidx loj lasa' reeman, rêb reeman: —¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaaj loj xDadaman?

¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rēn reeman guiniabdiidx reeman, zeel rēbaman: —Ma rnin lojdi, ma guidxin dxej ad zuguaatrīdi naj, per ad zajct xchej, guguaadi naj stijb. ¿Ni nen canabdiidxidi ya?

²⁰ Diidxli ganin, goondi chu't tēē luxdoodi naya, guiaád ree bénguidxliuj yabaa reeman. Per majsi chu' luxdoodi naya, guidxin dxej yabaadi.

²¹ Chi gal xi'n béngunaa, rdēdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoooman zagdxē, guial ma gojl xi'nman.

²² Ziangajc lējt cadēdidi tarbajw yan, per chi guguan lējt zatijb, chu' luxdoodi zagdxē, achutdzi zajc yabēē laan luxdoodi.

²³ Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman.

²⁴ Guiaád yan achet wanabidi por naj, gol gunaban din tia'dan, din chu' luxdoodi zagdxē tiblyaa.

Yaguaiaj Jesús lod guzaman

²⁵ Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan.

²⁶ Dxej zii ree guiniabidi loj da Dadan por naj, ad rüjnt nagueijn ganaaban por lëjt lojman,

²⁷ din rënman lëjt, rënman lëjt guial rëndi naj riladx tëëdi guial laaman guxhaal naj.

²⁸ Briin lod za' da Dadan persi bialan loj guidxliuj guie, yan gusa'nan laan din yaya'n lojman.

²⁹ Dxel rëb ree xbejnman:

—Yanri ma cusignia'l zagdxe.

³⁰ Rayagbeen rajquil graczi, ad rüjnt nagueijn chu guiniabdiidx lojl. Zianan zeel raliduladxan guxhaal Dios lüj.

³¹ Badxi' Jesús laan rëbaman:

—¿Ma riladxidi yan ya?

³² Gol gogbee, ma bidxin hor yare'chidi, tijb gajdi yaguaiaj lidx, gusa'ndi da xtijsban. Per ad za't da xtijsban, da Dadan za'në naj.

³³ Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17*Gurejdx gunab Jesús xDadaman por ree xbejnman*

¹ Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel.

² Baneel guialrniabee lon din ganabeen gra bejn gudëd tëën guialnaban tiblyaa loj gra bën baneel.

³ Guiban reeman tiblyaa bal güünbee reeman lüj, tijbzi lüj naj quijb Dios, güünbee tëë reeman najn guxhaalil.

⁴ Naj bazat lüj zagdxe loj guidxliuj; yan ma gulox benan ni nal.

⁵ Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

⁶ Rëb tëë Jesús:

—Bën guel loj guidxliuj baneel lon, ma balün laa reem chü lüj. Gojc reeman xbejnl, per baneel laa reeman lon, ma bazoob reeman xtiidxil.

⁷ Yan ma gogbee reeman guial gra ni benan gra tëë ni balün naj xieenl.

⁸ Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tëë reeman lüj guxhaal naj.

⁹ Rbedx rniaaban lüj por laa reeman, guial naj reeman xbejnl baneel tëël laa reeman lon, ad rbedx rniaabtan por ree bénguidxliuj.

¹⁰ Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bën baneel.

¹¹ Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bën naya nali, gunaj reeman con gra guialrniabee ca'l ni baneel tëël lon, din gac reeman tijbzi zi'c nayajc.

¹² Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëëb, tijbzi xin ma naj diidx bizëëb, din gac cumplid ni ca loj xtiidxil.

¹³ Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe.

¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj.

¹⁵ Ad rniaabtan yabëel laa reeman loj guidxliuj, rënan guinal laa reeman, chitëë güün reeman ni mal.

¹⁶ Ad najt reeman bénguidxliuj, zi'cgajc naj.

¹⁷ Basia reeman con xtiidxil, din laan naj ni diidxli.

¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman.

¹⁹ Por laa reeman rudëd da guialnabanan din gac reeman xbejnl diidxliczi.

²⁰ Basnuu Jesús, rëbaman:

—Ad por laatzí reeman rbedx rniaaban lüj, në por ree bën chililadx chi gucaagdiajg reeman ni guinee reeman.

²¹ Rniaaban lojl din guchajg lasa' reeman din yayajcnë' reeman tijbzi, Dad, zi'c za'nëel naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj.

²² Badëdan guialrniabee baneel loj reeman, din gac reeman tijbzi zi'c nayajc,

²³ naj za'nè' laa reeman, guiáad lüj za'nël naj. Zeel gac reeman tijbzi din gagbee ree bejn, lüj guxhaal naj rën téël laa reeman zi'c rën'l naj.

²⁴ Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyënl naj diizd chi gad guidxliuj gacchaaw.

²⁵ Dad, lüj rüjn guialguxtis zagdx. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj.

²⁶ Balün laa reeman chu najl, gulüran laa reeman mazri, din gagbee reeman rën'l laa reeman zi'c rën'l naj, gazunè' téën laa reeman.

18

Bayü Judas Jesús

(Mt. 26:47-56; Mr. 14:43-50; Lc. 22:47-53)

¹ Chi gulox guneel Jesús zian, dxel briinë ree xbejnman, zè reeman stiblad ro' guiiv la Cedrón, bidxin reeman lod yu' ree yag.

² Në Judas, xin yayü laaman, nünbee yagaj, guial zien volt binëman laa reeman ni.

³ Zeel bidxinnëx tibcwaa ree suldad në ree bën rajp ro' yadoo, guxhaal quijb ree bixhioz laa reeman në ree bënfarisew, ca' reeman bajl rusni ree, në ree espad con ree lans.

⁴ Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguilidi?

⁵ Badxi' reeman laan rëb reeman:

—Jesús bën Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman.

⁶ Chi rëbaman loj reeman: “Najn”, dxel baguiadruxan reeman biajb reeman luyuj.

⁷ Gunabdiidxaman zatijb rëbaman:

—¿Chu raguilidi?

Rëb reeman:

—Jesús bën Nazaret.

⁸ Zeel rëbaman:

—Ma rnin, najn. Bal naj raguilidi, gol baslaa ree bën guie yaguiaj reeman.

⁹ Zian gojc cumplid ni rëb loj xDadaman: “Achut ree bën baneel lon bizëëb.”

¹⁰ Dxel gulëë Béd espad, gutü'man guidiajg ladbee xin la Malco, najx xmojs quijb bixhioz zobjloj.

¹¹ Dxel rëb Jesús loj Béd:

—Bagu'chaaw espad zii. Bal rën da Dadan gazaagdiajn zian, gaza'canan.

Bimiaaz Jesús

(Mt. 26:57-58; Mr. 14:53-54; Lc. 22:54)

¹² Suldad guin ree con xin rniabee laa reex con ree bën rajp ro' yadoo gunaaz reeman Jesús, guxhii reeman laaman.

¹³ Dxel binë reeman laaman yaløj lidx bën la Anás, din laaman naj xdadsuegr Caifás quijb bixhioz zobjloj loj ijz zii.

¹⁴ Laagajcaman rëb loj gabilt, mazri zagdx guiet tijbzi bejn por gra ree bën Israel.

Rëb Béd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bën rniee reeman Béd, stjibaman naj bën nünbee quijb bixhioz zobjloj, zeel guyunëman Jesús lënü guin,

¹⁶ guiáad Béd baya'nman lule'. Zeel barii bën nünbee bën rniabee ree bixhioz, guneenëman biin rajp ro' port guin, persi guyu Béd lënü.

¹⁷ Gunabdiidxim lojman rëbim:

—¿Nid lüjn naj tijb xbejn bën guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bën naj ree mojs con ree bën rajp ro' yadoo nabe'c reeman guij rucha' reeman. Nëgajc Béd cucha'në reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bën la Anás canabdiidxaman loj Jesús xcwent ree xbejnman në xcwent ni rulüüman.

²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan.

²¹ ¿Chexc zeel rniabdiidx lon? Gunabdiidx loj ree bën bacaagdiajg ni rën, laa reeman na xhie gunen, laa reeman ragbee.

²² Chi rëbaman zian, tijb bën rajp ro' yadoo guin wëëz ro'man, rëbaman:

—¿Zian yadxi' l xtiidx bën rniabee guin ya?

²³ Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxe, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, bën naj quijb bixhioz zojbloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bën guin ya?

Badxi' Bëd laan rëbaman:

—A'n, ad xbejntaman naj.

²⁶ Dxel tijb xmojs bixhioz zojbloj guin, bën naj lasa' bën gutü' Bëd guidiajg, rëbaman loj Bëd:

—¿Nid lüjn baguian ya za'nël laaman guia' ree yag olivos?

²⁷ Rëb Bëd stijb guial ad nünbeetaman Jesús, loj hor zii gajc guridxa' tijb gujd.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree bën Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw.

²⁹ Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰ Badxi' reeman laan rëb reeman:

—Bal najman benza'c, ad ziant nudnë'n laaman lojl.

³¹ Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

³² Zian gojc cumplid xtiidx Jesús chi bagojnman xhiënaag guiëtaman.

³³ Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bën Israel ya?

³⁴ Badxi' Jesúsán rëbaman:

—¿Lüjczí rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen bën Israel naj ya? Bën ladx gajc reel con ree bixhioz rniabee bidnë lüj lon. ¿Xhie beenl?

³⁶ Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bën nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezanin naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xguialquia xin guin radxejlan.

³⁹ Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰ Dxel gurixdiajg ree bën Israel guin, rëb reeman:

—¿Ad laataman guslaal! ¿Zagdxeli baslaa Barrabás!

Abi'za Barrabás guin béngubaanan.

19

¹ Dxel gunabee Pilato gudijn ree suldad Jesús.

² Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's.

³ Dxel gubig reeman lojman, rëbgaj reeman:

—¡Guibanri xrey ree bén Israel!

Dxel rëëzgjaj reeman lojman.

⁴ Brii Pilato stijb, abi' rëbaman loj ree bén Israel guin:

—Gol baguiaa, gabën laax din gagbeedi, achet xguialquiaux radxejlan.

⁵ Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bén rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtlox radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman.

⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan.

¹⁰ Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bén bidnë naj guie yu' guial loj.

¹² Diizd hor zii gajc raguiil Pilato mod, xhienaag guslaaman Jesús, per rbidxa' ree bén riga' yagaj, rëb reeman:

—¡Bal guslaal laax, ad najtil xmiw bén naj César! ¡Din chutëëz bén rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj.

¹⁴ Chi guixiez gal lanij pascw, cost garol dxej rëb Pilato loj ree bén Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota.

¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man.

¹⁹ Gunabee Pilato cwa lejtr guijc crüjz guin, rëban: “Jesús bén Nazaret, xrey ree bén Israel.”

²⁰ Dád zien ree bén Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg.

²¹ Rëb ree bixhioz rniabee ree bixhioz loj Pilato:

—Ad rucaal: “Xrey ree bén Israel”, bacaa: “Bén rëb naj xrey ree bén Israel.”

²² Badxi' Pilato laan rëbaman:

—Ni ma bacan yaya'nan zian.

²³ Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diizd yëjnan xt guia'n, najn tijbzi lajd.

²⁴ Zeel rëb loj lasa' reex:

—Ad zaroxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

²⁵ Gajxh cwè' crüzj ca Jesús za' xniaaman con xbël xniaaman con Li xbéngunaa Cleofas con Li bën guneë reeman Magdalena.

²⁶ Chi baguiaa Jesús xniaaman, za' tijb ree xbejnman cwè'man, bën rën da'taman, rëb loj xniaaman:

—Na, laa xi'nl yagaj.

²⁷ Dxel rëb loj xbejnman:

—Laa xniaal yagaj.

Diizd dxej zii bignéman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man.

³⁰ Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guiib cwè'lën Jesús

³¹ Ma cayün ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüzj dxej raziiladx reeman, dín dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüzj dín guiët reeman yalet tëë reex laa reeman.

³² Zeel wej reex. Yaløj gudi'ch reex xdxijt bën ca cwè' Jesús, dxel gudi'ch reex xdxijt bën ca stiblad cwè'man.

³³ Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guiib ca'x, dxel briin rejn con nijs.

³⁵ Bën rü diidx guie baguiaaman, zeel ragbeeman najn diidxli, rüman laan dín nê lëjt chililadx.

³⁶ Gra nine gojc dín gac cumplid ni ca loj xtiidx Dios, rëban: “Ad rayalt gach xdxijt xiildoo.”

³⁷ Stibljajt rëb: “Guguaa reeman bën guxhálnë reeman guiib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bën zëëd guiedx la Arimatea, bignabaman diidxbee loj Pilato dín yaletaman xcuerp Jesús dín chiquie'chaman laaman. Nê bën la Xiëb bililadx Jesús, per ralanzi, guial bidxebaman bejn ree. Badëëd Pilato diidxbee, zeel wej Xiëb bigxiiman xcuerp Jesús.

³⁹ Nê Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloë, rureen nejxh.

⁴⁰ Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt.

⁴¹ Lod cwa Jesús loj crüzj naga' tijb guidxliuj lod yu' ree yag. Yagaj naj tijb baa cüb lod achutctzi waguie'ch.

⁴² Yagaj gudixh reeman xcuerpaman, guial najn gajxh, guial ma suløj tëë dxej raziiladx reeman.

20

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin.

² Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brii Bëd con bën guin, zë reeman ro' baa guin.

⁴ Grop reeman ruxüün zë reeman. Per Bén guin mazri ruxüünman guial loj Béd, abi' yaloj laaman bidxin ro' baa guin.

⁵ Dxel gudixlojman baguiaaman vend bidüüb Jesús, per ad guyutaman.

⁶ Dxelri bidxin Simón Béd, abi' guyuman lën baa guin. Nêgajcaman baguiaa vend guin

⁷ Baguiaa tëëman lajd bidüüb guiç Jesús, nadüüban naga'n lood ren, ad naga'tan tijbzi con vend guin.

⁸ Dxel guyu Bén bidxin ro' baa guin yaloj, baguiaaman ni goc, zianz bililadxaman,

⁹ guial gocli ad bignia't reeman ni ca loj xtiidx Dios guial yaban Jesús loj ree bengüt.

¹⁰ Dxel zia ree xbejn Jesús lidx reeman.

Baliüloj Jesús loj María Magdalena

(Mr: 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin,

¹² abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guiçcaman, zatijbaman lod go't gua'man.

¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman.

¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguüülil?

Gunaladx Li, Bén rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan Bén naj gajc xDadidi, loj da Diosan Bén naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

Baliüloj Jesús loj ree xbejnman

(Mt. 28:16-20; Mr: 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús.

²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guiçt reeman, rëbaman:

—Gol gubajnnë xSprijt Dios.

²³ Bén güüнди perdon xtol, chiquied xtol reeman, guiáad Bén ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, Bén rníee reeman Cwajch, achut laaman za' chi balüüloj Jesús loj ree xbejnman.

²⁵ Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguan yaaman lod wëëz clav, abi' bal id zagu' da bacwënan lod wëëz clav guin, bal id zagu' tëë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwēnl guie, baguiaa ree yan, baneē yaal guie badxe'n cwē' lēnan. Ad runawēēgril, bililadx.

²⁸ Dxel rēb Tumajs lojman:

—jDa Dadan, da Diosan!

²⁹ Abi' rēb Jesús lojman:

—Rliladxil guial ma baguiaal naj. Xiquilbaa ree bēn rliladx, majs ad waguiaat reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie.

³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblyaa con Dios.

21

Baliüloj Jesús loj ree xbejnman ro' nijs

¹ Chi gudēd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman:

² Chi nadxag lasa' ree Simón Bēd con Tumajs bēn rniee reeman Cwajch, nē Natanael bēn za Caná guiedx riga' niz Galilea, con ree xi'n Zebedeo, nētēē zatio'p xbejn Jesús,

³ dxel rēb Bēd loj reeman:

—Gan chignaazan bējl.

Badxi' reeman laan rēb reeman:

—Nē dunujn yadxoo.

Abi' wē'p reeman loj barcw zē reeman, per guxhin zii achutczī bējl gunaaz reeman.

⁴ Chi ma cayreguiaal, bidxin Jesús ro' nijs guin, per ad bayünbeet reeman laaman.

⁵ Dxel gunabdiidxaman loj reeman rēbaman:

—Xi'n, ¿nid chu bējl wanaazidi ya?

Badxi' reeman laan rēb reeman:

—Achutczī.

⁶ Abi' rēb Jesús loj reeman:

—Gol bazaal xguijxhidi xladbee barcw guin din guiniaazidi bējl.

Zian been reeman, abi' ad rajctri rabēē reeman guijxh guin, guial dād zien bējl yu' lojn.

⁷ Dxel xbejn Jesús, bēn rēn da'taman, rēbaman loj Bēd:

—jDad Jesúsān!

Biguiejnzi Simón Bēd zian, laa got gajc xabaman ni gulēēman, abi' gutiajsaman lojnijs guin.

⁸ Guiaad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bējl, guial zi'ctzi tibgayuu mejtr ryaadx yadxin reeman ro' nijs guin.

⁹ Chi baguiaajt reeman, baguiaa reeman laa guij ma riga', dxilib tijb bējl lojn, nē guidaxtil riga' yagaj.

¹⁰ Dxel rēb Jesús loj reeman:

—Gol tanē tio'p choon bējl gunaaz nejzidi.

¹¹ Dxel wē'p Bēd loj barcw guin, guxoobyujman guijxh guin guidxan bējl narooob ree, xt ro' nijs guin. Tibgayuu tü'pchiibichoon bējl yu' lojn. Abi' majsi zienb, per ad goxya'tan.

¹² Zianz rēb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bēnan, guial ragbee reeman Dad Jesúsān.

¹³ Dxel gubigaman cwa'man guidaxtil badēēman loj reeman, ziangajc beenman con bējl guin.

¹⁴ Ni ne bayon volt balüüloj Jesús loj ree xbejnman chi babanman loj ree bengüt.

Guneenē Jesús Bēd

¹⁵ Chi gulox gudaw Jesús con ree xbejnman, gunabdiidxaman loj Simón Bēd, rēbaman:

—Simón, xi'n Waj, ¿walil ya rēnl naj mazri guial loj ree bēn guie?

Badxi' Bēdan rēbaman:

—Dad, ragbeequil rēnan lüj.

Zeel rēb Jesús:

—Gunaj ree da xiildoon.

¹⁶ Abi' rēb Jesús zatijb:

—Simón, xi'n Waj, ¿walil ya rēnl naj?

Badxi' Bēdan rēbaman:

—Dad, ragbeequil rēnan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rën! naj ya?

Dád guyunaya Béd, guial ma gojc choon volt gunabdiidx Jesús bal rënman laaman. Zianz rëb Béd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan.

¹⁸ Diidxliczi ganin, chi goquil xinguiag, rajcw xabil persi rej! lod rën! Per chi ma naj! bengol, gusli xu'quil din gusajcw ben ren xabil din chinë reeman lüj lod ad rëntil chel.

¹⁹ Rëb Jesús zian guial basignia'man xhienaag guiët Béd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bën guyën da'taman

²⁰ Chi badxi' loj Béd, baguiaaman laa bën rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tēëman loj Jesús rëbaman: “Dad, ¿chu yayü lüj?”

²¹ Chi baguiaa Béd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesús san rëbaman:

—Bal rënan guibanx xt yaguialan, ¿xhie güün! Lüj tanal naj.

²³ Zianan zeel bire'ch diidx loj ree xbejnman guial ad zëjt bën guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güün!”

²⁴ Bën guin gajcan rü diidx xcwent ree nine, laa tēëman bacaa laan, rayagbee tēë ree rüman diidxli.

²⁵ Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman

² xt chi ziaman xanyabaa. Chi gadaman yaguaiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman.

³ Chi mal guzagdiaj da'taman loj xgualgütaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xgualrniabee Dios.

⁴ Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi.

⁵ Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijs par lējt.

Zia Jesús xanyabaa

⁶ Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

⁷ Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzí da Dadan ragbee laan din laaman ca' gualrniabee.

⁸ Per chi ma nabannēdi xSprijt Dios, tia'di gualrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

⁹ Gulox guneeman, ruguiaa reeman laaman dxejlczí wajsaman ziaman xanyabaa, abi' biguiajt tijb bēj bata'cwán laaman, dxel ad baguiaatri reeman laaman.

¹⁰ La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman,

¹¹ abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguaiaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén.

¹³ Chi badxin reeman, wē'p reeman lēnū ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob.

¹⁴ Gra reeman rüjn tijbzí xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

Gulej reeman bēn baya'n xluar Judas

¹⁵ Lēn ree dxej zii bado'p ree bēn riladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman,

¹⁷ gojquix tijb dux compniaran, nē laax been lasa' dxiin raguieenan.

¹⁸ Per con milia ni gudix reeman laax por ni mal beenx, bio' guidxliuj lod gudidya'x, bazuj guijquix, goxya'x abi' brii gra xziix.

¹⁹ Chi gogbee gra ree bēn Jerusalén ni goc, guneē reeman guidxliuj zii Acéldama, rēn guiēban guidxliuj rejn.

²⁰ Dín rēb loj libr la Salmos:

Yaya'n dējch lidxix,
achutziri cwe lēnan.

Rēb tēē lojn:

Yayu ben ren guia'x.

²¹ Zeel loj gra ree bēn za'nē dunuj ree guidib tiamp ni guzunē Jesús dunuj ree,

²² diidx chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn gual walican babanman loj ree bengüt.

²³ Dxel gulej reeman tio'p reeman: tijb bēn la Xiēb (rnieē reeman laaman Barsabás, rnieē tēē reeman laaman Justo), gulej tēē reeman bēn la Matias.

²⁴ Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl

²⁵ din gacaman apóstol luar Judas, din banijitx delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diizd xanyabaa

¹ Chi bidxin dxej gojl lanij la Pentecostés, gra ree bén riladx Jesucrist bado'p tijbzi luar.

² Dxejlci gojc naquie' xanyabaa zi'c bidoxh xt bayu bi lëñü lod riga' reeman,

³ abi' gulentie zi'c bajl dobéz ree, biguiajt reen guijc tijb gaj reeman.

⁴ Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵ Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios.

⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniece gra ree bén riladx Jesús xtiidx tijb gaj reeman, ad badxejlt xgab nünj reeman.

⁷ Dád badxa loj reeman xt ni'quid badxejlt xhie nünj reeman, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya?

⁸ ¿Chexc zeel raguiejn ree rniece reeman dux tiidx ree?

⁹ Du loj ree no'ch ree bén zëéd guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor,

¹⁰ bén zëéd tëë ree guiedx riga' ree niz Frigia, Panfilia, Egipto, nè ree guiedx nulen Libia ni riga' ree gajxh Cirene, nè ree bén zëéd Rom, yu' reeman gojl Israel per naban reeman Rom, yu' tëë reeman naj quijb ben Rom per riladx reeman ni riladx ree bén Israel.

¹¹ Nè ree bén zëéd niz Creta nètëë ree bén zëéd guiedx riga' ree niz Arabia no'ch du loj ree. ¿Per dugraczi ree caycaagdiajg con dux tiidx ree niza'cdxoon rünj Dios!

¹² Graczi reeman badxa da't loj xt ni'quid badxejlt xgab nünj reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

¹³ Per garol reeman baze' laa reeman, rëb reeman:

—Rë' reeman.

Ni rëb Bëd loj ree bejn

¹⁴ Dxel guzuli Bëd con zachibtib ree apóstoles guin, guneeman rejs rëbaman:

—Lëjt bén Judea nè graczi ree bén zojb Jerusalén, gol bacaagdiajg gol bignia' tëë ni ganin.

¹⁵ Ad rë't ree bén guin zi'c naladxidi, din qui gojlri raca gaa rsil.

¹⁶ Guie cayajc cumplid ni guneë bén brii laj Joel, bén badëë xtiidx Dios loj ree bejn, chi rëbaman:

¹⁷ Na Dios,

guidxin dxej gaxhal da Sprijtjan luxdoo gra ree bejn, abi' xi'ndi xinguaaw con biingunaa gudëéd reex da diidxan, zien ree ni gulüüloj loj ree xinguiag,

guiáad ree bengol zien ree ni guinie'xhaal reeman.

¹⁸ Dxej zii ree gaxhal da Sprijtjan luxdoo ree bén rünj da dxiinan,

xinguaaw ree nè ree béngunaa,

abi' gudëéd reeman da diidxan.

¹⁹ Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn nè bajl nètëë go'xh.

²⁰ Guicajy loj gubijdx, guiáad bëëw yayajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios bén rniabee,

dxej guiguien guidib xbianiman.

²¹ Abi' graczi ree bén cwedx guiniab laaman

güünman laa reeman perdon.

²² Rëb tëë Bëd loj reeman:

—Yan, gol bacaagdiajg ni ganin lëjt bén Israel: Lëjt ragbee guial Jesús bén Nazaret najman bén guxhaal Dios, been tēeman milagr ree në ree ni radxa loj ree bejn zi'c sen din gagbeedi guial Dios guxhaal laaman.

²³ Diizd gocli mal nūjn Dios xgab guial zian güünnēdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz.

²⁴ Per basban Dios laaman stijb, babēeman laaman loj guialgüjt, din ad gojct nutēē guialgüjt guin laaman.

²⁵ Chi gunee rey Davi xcwent Jesús, rēbaman: Zianczi baguian dux Dad ree Dios za'nēman naj.

Za'man da ladbeen, achetczy zajc guchejb naj.

²⁶ Zeel yu' luxdon nix, ruzat tēen Dios zagdxē.

majsi guiētan ad rdxebtan,

²⁷ din ad zusa'ntil naj lēn baa,

ad zatiējbtil xhin xcuerp xi'nl bén naya nali.

²⁸ Balüül naj nejz runee guialnaban,

chu' tēē luxdon zagdxē guial guibannēl naj.

²⁹ Basnuu gunee Bēd, rēbaman:

—Ganin loj gradi compniar, diidxcliczi dux bēngulal ree Davi güjtaman biguie'ch tēeman, abi' laa xbaaman sta raguiāa ree yan.

³⁰ Per gojcaman bén badēē xtiidx Dios loj ree bejn, abi' gogbeeman been Dios promejs guial loj xdiaaman grii Cristo bén nabee.

³¹ Rulüü ma cuguiaaman gra ni gac, rēbaman guial yaban Cristo loj ree bengüt, ad zaya'ntaman lēn baa ad zaxin tētē xcuerpaman.

³² Yan ma basban Dios Jesús, dugran nayajc testiw guial walican babanman.

³³ Zia tēeman xanyabaa zisobaman xladbee Dios, persi badēē xSprijt Dios lojman zi'c ma rēbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tēēdi.

³⁴ Ad Davitan zia xanyabaa, din laagajcaman rēb:

Rēb dux Dad ree Dios loj bén rniabee naj:

“Gurej da ladbeen,

³⁵ xt gabecan xin rdxē'ch ree lūj guial'.”

³⁶ 'Gradi bén Israel gol gogbee guial Jesús bén bacaadi loj crüjz, Dios bacaabee laaman din gacaman Dad, bén nabee dunuj ree.

Bachajg zien ree bejn bén rliladx ree Jesús

³⁷ Chi biguiejn ree bén riga'l yagaj ni rēb Bēd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rēb reeman:

—Dad, gol guna, ¿xhie rayal yaguieenan?

³⁸ Dxel rēb Bēd loj reeman:

—Gol bayagbee xtolidi, gol badxi' tēē lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi.

³⁹ Din promejs guin naj par lëjt në par ree xi'ndi në par gra ree bén riga' zijt, par gra ree bén cwe Dios par laaman.

⁴⁰ Con ree diidx guie në mazri ree diidx ren guneeñē Bēd laa reeman, rēbaman:

—¡Gol bariica loj ree bén rüjn ni mal!

⁴¹ Zian gojc, graczi bén bazoob diidx ni rēbaman gurobnijs. Dxej zii gajc bachajg cost choon mil bejn bén rliladx ree Jesús.

⁴² Graczi reeman binal ni balüü ree xi apóstoles Jesús laa reeman, gubajnnē lasa' reeman zagdxē, gurejdx gunab reeman Dios abi' rado'p reeman persi raw reeman guidxtil tijbzi zi'c gunabee Jesucrist güün reeman.

Ze gubajn ree bén bililadx Jesús yaloj

⁴³ Graczi ree bejn radxa da't loj milagr në los demazri ree ni been ree apóstoles guin.

⁴⁴ Graczi ree bén bililadx Jesucrist gubajnnē lasa' zagdxē, rgui's tēē ni rajp reeman loj lasa' reeman.

⁴⁵ Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman.

⁴⁶ Guixie guixie rado'p reeman lēn yadooro' Jerusalén, dxel raguiā reeman lidx xcompniar reeman rtaw reeman, dád nix yu' luxdoo reeman rēn tēē lasa' reeman,

⁴⁷ ruza't reeman Dios zagdxē, guiāad gra bejn guyēn laa reeman. Guixie guixie ragnē Dios din gaxchiej mazri bén rliladx Jesucrist, persi gojc xtol reeman perdon.

3

Bayajc tijb bén ad rajct rza

¹ Tijb dxej zé ree Béd con Waj lèn yadooro' Jerusalén raca choon wadxe, hor zii naj hor ni rbejd̥x rniab reeman Dios.

² Ro' xpört yadoo guin zojb tijb bén ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, d̥in guiniabaman carda loj ree bén ru lèn yadoo guin.

³ Chi baguiaaman Béd con Waj ma chu' reeman lèn yadoo guin, gunabaman carda loj reeman.

⁴ Baguiaa reeman lojman, d̥xel rēb Béd lojman:

—Baguiaa du lojn.

⁵ Chi bigueijnman rēb Béd zian, d̥xel baguiaaman loj reeman, naladxaman milia nudēēd reeman lojman.

⁶ Per rēb Béd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xguialrniabee Jesucrist bēn Nazaret, guzuli, guza.

⁷ D̥xel gunaazaman yaaman ladbee, bazuliman laaman. Loj hor zii gajc guyu ree guia'man gojl,

⁸ abi' gutiajsaman, guzuliman guzuloj cazaman. D̥xel guyunēman laa reeman lèn yadoo guin, cazaman, catiajsaman cuza't tēēman Dios zagd̥xe.

⁹ Graczi ree bēn cuguaiaa laaman cazaman cuza't tēēman Dios zagd̥xe,

¹⁰ dād badxa loj reeman bidxeb tēē reeman guial gojc zian guial nūnbee reeman bēn guin, ragbee tēē reeman laaman rbej ro' xpört yadoo guin ni la Port Za'cdxoon, rniabaman carda.

Gunee Béd loj ree bejn lod la xcurdur Salomón

¹¹ Ad riro'n̄ladxt bēn bayajc guin Béd con Waj. Dād badxa loj ree bejn, abi' baxūūn reeman wej reeman lod la xcurdur Salomón lod za' ree Béd con Waj.

¹² Chi baguiaa Béd zian, rēbaman loj reeman:

—Bēn Israel, ¿chexc zeel radxa lojdi ni goc? Ad naladxidi por dunujn rza bēn guie guial naca'n̄ guialrniabee o guial nayajcan naya delant loj Dios ya.

¹³ XDios dux bēngulal ree Abraham, Isaac nē Jacob, laaman badēē guialrniabee loj Jesús, bēn bayūdi loj guxtis. Abi' chi guyēn Pilato nuslaaman laaman, ad cwējb̄t̄idi.

¹⁴ Luar niniabidi nuslaa Pilato bēn naya nali, bēn rūjn zi'c rayal, gunabidi baslaaman tijb xin bagūjt̄ bejn.

¹⁵ Zian bagūjt̄idi bēn runee guialnaban. Per basban Dios laaman stijb, abi' dunujn nayajc testiw guial babanman.

¹⁶ Bēn guie, bēn ruguaiaadi nūnbee tēēdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguaiaa graczi.

¹⁷ 'Ganin lējt compniar, ragbeen guial lējt con ree bēn rniabee lējt ni'quid gogbeetidi xhienin beendi chi bagūjt̄idi Jesús.

¹⁸ Per zian been Dios persi gojc cumplid ni rēbaman loj ree bēn badēē xtiidxaman loj ree bejn diizd gocli guial sagdiaj Cristo.

¹⁹ Zeel gol bayagbee xtolidi gol badxi' tēē lojdi loj Dios d̥in gūnman xtolidi perdon. D̥xel yayaalyuj luxdoodi,

²⁰ guixhiaal tēēman Jesús stijb, bēn naj Cristo diizd gocli par lējt,

²¹ majsi yan rayalri suman xanyabaa, xt ma bazuxnejz Dios gra, zi'c rēbaman loj ree bēn badēē xtiidxaman loj ree bejn diizd gocli, bēn gubajn ree naya delant lojman.

²² Abi' rēb Moisejs loj ree dux bēngulal ree: "Loj xdiaadi cwēē Dios tijb bēn gudēē xtiidxaman loj ree bejn zi'c naj, gol bazoob xtiidxaman graczi ni naman lojdi,

²³ d̥in graczi ree bēn ad zuzoob xtiidxaman nit reeman, ad zajc tēētri reeman cwent zi'c xbejn Dios."

²⁴ 'Gra ree bēn badēēd xtiidx Dios loj ree bejn, diizd Samuel con los demazri ree bēn badēē xtiidx Dios diizd gulal, mal bagojn reeman ni cayajc ree lèn ree dxej guie.

²⁵ Lējt naj xdiaa reeman, lojdi gac cumplid ni cwēb Dios loj ree dux bēngulal ree chi rēbaman loj Abraham: "Por xdiaal gūnle'n gra ree bēnguidxliuj."

²⁶ Abi' chi basban Dios xi'nman Jesucrist, yaloj lojdi guxhaalaman laaman d̥in gūnle'man lējt d̥in yabēēcaman gradi loj ni mal rūjndi.

4

Bazuj reeman Béd con Waj loj ree guxtis

¹ Sta canee ree Béd con Waj loj ree bejn, chi bidxin ree xbxihioz ree bén Israel në suldad rniabee suldad rniay ree ro' yadooro' Jerusalén, nètëë ree bénsaducew.

² Dád ralen reeman guial culüü ree Béd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist.

³ Zeel gunaaz reeman laa reeman, per guial ma gudxe, zeel badxe' reeman laa reeman ladxguuib la'tgaj rareguiaa.

⁴ Per dád zien ree bén bacaagdiajg ni rëb ree Béd con Waj bililadx xtiidx Dios, gojc reeman cost gaay mil xinguaaw xcwentqui ree béngunaa.

⁵ Chi bareguiaa, guxtis Jerusalén në ree bengol në ree mextr rulüü ley, bado'p reeman loj ciuda guin.

⁶ Në Anás bidxin yagaj, bén naj bixhioz mazri zobjloj rniabee graczi ree bixhioz, bidxin tëë bixhioz la Caifás në Waj në Lejandr; nètëë gra ree bén naj lasa' ree bixhioz rniabee guin.

⁷ Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman:

—¿Chu bane diidxbee o chu por rüjndi ni guin?

⁸ Per guial yu' xSprijt Dios luxdoo Béd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis,

⁹ rniabdiidxidi dunujn xhienaag baguieenan béngogxuu guin yudar, xhie tëë naag gojc zeel bayajcaman.

¹⁰ Yanan lojdi din gagbeedi gagbee tëë gra bén Israel xhienaag bayajc bén za' lojdi. Bayajcaman por xguialrniabee Jesucrist bén Nazaret, bén bacaadi loj crüzj abi' basban Dios laaman stijb.

¹¹ Beennëdi laaman zi'c rüjn ree bén rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin.

¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³ Chi baguiaa ree guxtis guin ad rdxebt ree Béd con Waj guial rniee reeman, abi' gogbee reeman ad bén basiidt ree mazran achu tëët naj reeman, badxa loj reeman bayünbee tëë reeman laa reeman guial bén binal ree Jesúsán.

¹⁴ Abi' yagaj gajc za' bén bayajc guin, zeel ad bile'tri xhie niëjb reeman contr laa reeman.

¹⁵ Dxel gunabee ree guxtis guin barii ree Béd con Waj din yaya'n laaz reeman din gü reeman diidx.

¹⁶ Rëb reeman:

—¿Xhienaag yaguieennë' ree xin guin ree? Graczi ree bén Jerusalén ma ragbee milagr been reex. Abi' ad zajct yarexuu ree.

¹⁷ Per chitëë guire'ch xtiidx Jesús, yachejb reex din diidz yan achutziri loj guza't reex laax.

¹⁸ Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman.

¹⁹ Per badxi' Béd con Waj laan, rëb reeman:

—Lëjt gajc gol been xgab: ¿Zagdxe naj yazooban xtiidxidi luar yazooban xtiidx Dios ya?

²⁰ Per ad zajct yacwëëz yaguie'chan gra ni baguiaa baguiejn tëën.

²¹ Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëëd reeman laa reeman casti, din graczi ree bejn ruza't Dios zagdxe por ni goc.

²² Nadëd tiuu ijz yu' bén bayajc guin.

Rbejdx ree bén rliiladx Jesús Dios

²³ Chi baslaa ree guxtis guin Béd con Waj, baguiaj reeman lod riga' xcompniar reeman bén rliiladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee.

²⁴ Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bén been xanyabaa në guidxliuj nètëë nijsdoo con gra ni yu' loj reen.

²⁵ Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree b́en Israel n̄t̄ēe ree b́en ad najt b́en Israel, badxajg lasa' reeman luguiedx guie persi guzuj reeman contr xi'nl Jesús, b́en naya nali, b́en bacaabeel.

²⁸ Zian gojc, been reeman zi'c ma beenl xgab diidz gocli.

²⁹ 'Abi' yan Dad, baguiaa yan ruchejb reeman dunujn. Gogn̄e dunujn nayajcan xbejn din gac yatie'chan xtiidzil sin gualrdxeb,

³⁰ n̄e con xguialrniabeel yasiajcan b́enragxuu ree, yaguieen t̄ēen milagr ree por xguialrniabee xi'nl Jesús, b́en naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidz Dios sin gualrdxeb.

Ragn̄e lasa' ree b́en r̄liladx Jesús

³² Graczi ree b́en r̄liladx Jesucrist bidxajg gubajjn reeman, r̄ijn reeman tijbzi xgab, ni'qui tijb reeman ad r̄ebt guial xieenzi reeman naj ni rajp reeman, din najn par gra reeman.

³³ Gogn̄e Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman.

³⁴ Ni'czi tijb reeman ad biaadxt xhienin, din graczi ree b́en rajp guidxliuj o b́en rajp yu ya ruto' reeman laan, abi' milia guin

³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman.

³⁶ Loj reeman no'ch tijb b́en b̄rii laj Xīeb, najman xdiaa b́en b̄rii laj Leví, z̄ēedaman yuj la Chipre ni riga' loj nijsdoo. Gunee ree apóstoles guin laaman Bernabé, r̄en guīeban B́en ragu' luxdoo ree bejn zagdxe.

³⁷ Gojpaman tijb guidxliuj, abi' bato'man laan persi bad̄ēeman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb b́en b̄rii laj Ananías, xb́engunaaman b̄rii laj Safira. Bato' tijb xguidxliuj reeman,

² per baya'nn̄e xb́engunaaman diidx persi baya'nn̄eman ta'n milia guin. Sta'nan bad̄ēeman loj ree apóstoles guin, r̄ebaman laan naj gran.

³ 'Abi' r̄eb B̄ed lojman:

—Ananías, ¿chexc zeel cw̄ejbil gunabee xindxab l̄uj? ¿Chexc zeel guȳenl nusquieel loj xSprijt Dios, din naya'nn̄el ta'n milia ni bato' xguidxliujl?

⁴ ¿Wen nid xguidxliujl gojcan ya? 'Abi' chi bato'lan, ¿nid xmilialan ya? ¿Chexc zeel balablaxil beenl zian? Loj Diosan nuȳenl nusquieel, ad lojt bejnan.

⁵ Chi biguejn Ananías ni r̄ebaman, biajbaman abi' ḡj̄taman. Graczi ree b́en gogbee ni guzacaman dád bidxeb reeman.

⁶ Dxel bibig b̄elzi ree xinguiag, batüüb reex laaman lajd persi biquie'ch reex laaman.

⁷ Chi gud̄ed cost choon hor, dxel bidxin xb́engunaa Ananías, ad ragbeetaman ni goc.

⁸ Dxel gunabdiidz B̄ed lojman r̄ebaman:

—Guna, ¿bato' xguidxliujdi zi'c na lacheelil ya?

Abi' r̄ebaman:

—An, zianqui bato'nan.

⁹ Dxel r̄eb B̄ed lojman:

—¿Chexc zeel baya'ndi diidx persi nuȳendi nusquieedi xSprijt Dios? Laa ree xin biquie'ch lacheelil ziaad ni, yan n̄egajc l̄uj chiquie'ch reex.

¹⁰ Loj hor zii gajc biajb Safira lod za' B̄ed, abi' ḡj̄taman. Chi bayu ree xin guin baguiaa reex ma ḡj̄taman, dxel bales reex laaman biquie'ch reex laaman cw̄e' lacheelaman.

¹¹ Graczi ree b́en r̄liladx Jesucrist n̄e gra ree b́en gogbee ni goc, dád bidxeb reeman.

Zien ree milagr been ree apóstoles

¹² Zien ree milagr naroo been ree apóstoles guin loj ree bejn. Graczi ree b́en r̄liladx Jesucrist radxajg lasa' ro' curdur lod r̄niee reeman xcurdur Salomón.

¹³ Zagdxe ruza't ree b́en luguiedx guin laa reeman, per ad rayaxt reeman guchajg reeman laa reeman.

¹⁴ 'Abi' guixie guixie cayajcxhieje ree b́en r̄liladx Dad Jesús, zi'c xinguaaw zi'c b́engunaa.

¹⁵ Xt rb̄ēe reeman b́enragxuu ree lunejz, rguijxh reeman laa reeman loj ree loon n̄e loj ree da, din chi t̄ed B̄ed, majsi xbalazaman t̄ed guijc reeman.

¹⁶ N̄e ree b́en zojb guiedx riga' ree gajxh Jerusalén, zien reeman bidxin Jerusalén, bidxinn̄e reeman b́enragxuu ree n̄e ree b́en yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷ Bixhioz mazri zobjloj rniabee graczi ree bixhioz nē ree bénsaducew za'nē laaman, guyu guialnadēdloj luxdoo reeman,

¹⁸ abi' gunabee reeman biniaaz ree apóstoles guin persi badxe' reeman laa reeman ladxguuib.

¹⁹ Per guxhin zii tijb xi anjl Dios guxhal ro' ree xport ladxguuib guin, abi' babēēman laa reeman, rēbaman:

²⁰ —Gol chej lēn yadooro', gol biguiedx loj ree bejn xhie naag gap reeman guialnaban tiblayaa con Dios.

²¹ Chi biguiejn reeman ni rēb anjl guin, bareguiaal rsildoo wej reeman lēn yadoo guin, guzuloj culūū reeman bejn ree xtiidx Dios.

Guiáad bixhioz zobjloj guin con ree bēn za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguuib guin.

²² Per chi bidxin reex ro' ladxguuib guin, achutri ree apóstoles guin ree yu'. Dxel bicojn reex guxtis guin ree,

²³ rēb reex:

—Chi badxinan, baguiaan nayaaw ro' ladxguuib guin zagdxē, laa ree suldad rajp ro' ladxguuib guin za', per chi baxhalan, achutczi yu' lēnan.

²⁴ Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rēb loj lasa' reeman, ¿ban xt guin chigdiblagaa ree ni guie?

²⁵ Loj hor zii gajc bidxin tijb xin rēb loj reeman:

—Laa ree bēn badxe'di ladxguuib yu' lēn yadoo culūū reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex.

²⁷ Chi badxinnē reex laa reeman, bayū reex laa reeman loj guxtis. Dxel rēb bixhioz zobjloj guin loj reeman:

²⁸ —¿Nid ranan ya guial ad zajctri gulūūdi bejn ree xtiidx Jesús? Abi' yan graczi loj ree bēn Jerusalén ma gutie'chidi xtiidxix, nētēē yan rēndi gudxiibidi du guijcan guial dunujn bagūjt laax.

²⁹ Abi' badxi' Bédan nē gra ree apóstoles guin, rēb reeman:

—Rayal yazooban xtiidx Dios luar yazooban xtiidx ree bénguidxliuj.

³⁰ XDios dux béngulal ree basban Jesús, bēn bacaadi loj crūjz.

³¹ Abi' nūjn Dios laaman bēn zobjloj, nabe'caman laaman xladbeeman, laaman naj bēn rniabee rabēē tēēman bejn ree loj xtol reeman, abi' zian guxhalaman nejz par ree bēn Israel din cwēēladx xtol reeman yadxi' tēē loj reeman loj Dios din gūūnman laa reeman perdon.

³² Dunujn nē xSprijt Dios bēn rudēēman loj ree bēn ruzoob xtiidxaman, rayagbeen guial gra ree ni guin naj diidxli.

³³ Chi biguiejn ree guxtis guin ni rēb reeman, dád balen reeman abi' guyēn reeman nugūjt reeman laa reeman.

³⁴ Per loj ree guxtis guin no'ch tijb bēnfarisew laman Gamaliel, najman mextr rulūū ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt.

³⁵ Dxel rēbaman loj ree guxtis guin:

—Bēn Israel, gol been xgab xhienin gūūnnēdi bēn guin ree.

³⁶ Gol basaaladx, guyu tijb xin brii laj Teudas, rēbix yu' chu najx abi' cost tajp gayuu ree bejn binal laax. Per chi bagūjt ree bejn laax, bire'ch gra ree bēn binal laax, yagaj gulox gra ni beenx.

³⁷ Abi' tēē lēn ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagūjt ree bejn laax, gra ree bēn binal laax bire'ch.

³⁸ Zeel rnin lojdi, ad bal chu'ridi con ree bēn guin, gol baslaa reeman. Din bal bénguidxliuj rniabee ni rūjn reeman, zadxin dxej loxan.

³⁹ Per bal por Dios cayūjn reeman ni guin ree, ad zajct gutēēdi loj ni cayūjn reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rēb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman.

⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús.

⁴² Abi' ad rucwëézt rulüü reeman rniee tëë reeman xtiidx Jesús, gra dxejczy rulüü reeman lën yadooro' Jerusalén nētëë lidx lidx ree bejn.

6

Bíbee gajdx ree bén güün yudar

¹ Lën ree dxej zii chi canuu cayajcxhiey ree bén rliadx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczy chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

² Dxel guidxibtio'p ree apóstoles guin bato'p reeman graczi ree bén rliadx Jesucrist, abi' rëb reeman:

—Ad zagdxet naj guial yacwëéz yalüün xtiidx Dios par yadi'san ni gaw ree bejn.

³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tëë ree xquiarguiejn, din yazuj reeman güün reeman dxiin guin.

⁴ Guiáad dunujn yasnuu yarejdx yanaaban Dios, yalüü tëën xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rliadx Jesucrist guidib luxdooan, rniabee tëë xSprijt Dios luxdooan guidiblagaa. Gulej tëë reeman Felip, Prócoro, Nicanor, Timón, Parmenas nē Nicolás bén zëéd Antioquia, nēman bililadx ni rliadx ree bén Israel chi gadaman chililadx Jesucrist.

⁶ Dxel binë reeman laa reeman loj ree apóstoles guin, persi gurejdx gunab reeman Dios por laa reeman badxiib tëë yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhiey ree bén rliadx Jesucrist, nē zien ree bixhioz Israel bililadx laaman.

Biniaaz Esteban

⁸ Dád gognë Dios Esteban badëë tëëman guialrniabee persi rüjnman zien loj milagr delant loj ree bejn.

⁹ Abi' bëlzi ree bén yadoo ni la Libertados nē ree bén Cirene con ree bén Alejandría con ree bén niz Cilicia nētëë ree bén zëéd niz Asia, guzuloj cadildiidxnë reeman Esteban,

¹⁰ per ad gojct nadxi' reeman xtiidxaman guial cayagnë xSprijt Dios laaman.

¹¹ Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios nē contr Moisejs.

¹² Zian been reeman persi bidxe'ch ree bén luguiedx guin, nē ree bengol nē ree mextr rulüü ley. Dxel gunaaz reeman Esteban, binë reeman laaman loj guxtis.

¹³ Gudiil tëë reeman bén basquiee ree persi rëb reeman loj ree guxtis guin:

—Ad rucwëézt rnieeguidjdx xin guie xley Moisejs nē xyadoo Dios.

¹⁴ Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tëëx costumbr basa'n Moisejs du loj ree.

¹⁵ Abi' guxtis guin ree nē gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rëb Esteban loj ree guxtis

¹ Dxel bixhioz mazri zobjloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

² Badxi' Esteban laan, rëbaman:

—Dad guxtis, nē lëjt compniar, gol bacaagdiajg ni ganin. Dios bén yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán.

³ Abi' rëb Dios lojman: “Basa'n ladxil nē gra ree lasa'l, wej loj yuj ni gulün lüj.”

⁴ Dxel brii Abraham ladx ree bén Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan.

⁵ Per chi bi't Abraham guie, achetczy guidxliuj badëéd Dios lojman, ni'czy tibda'nan ad badëëtaman. Per beenman promejs loj Abraham guial gudëëman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham.

⁶ Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz.

⁷ Per rëb tëë Dios lojman: “Gudëdan gra ree bén gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.”

⁸ Chi chuneenē Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennē Isaac xi'nman Jacob, ziangajc beennē Jacob guidxiptio'p ree xi'nman, bēn goc ree dux bēngulal ree.

⁹ 'Bēn goc ree dux bēngulal ree gudēdloj reeman Xiēb bēn naj bijch reeman, abi' bato' reeman laaman loj ree bēn zē Egipto, per ad guro'nladxt Dios laaman,

¹⁰ gognēman laaman loj ni guzagdiajman badēē tēēman xquiargueijnman, gognē tēēman laaman persi biajb rey guin laaman zagdxē, abi' beenman laaman gobernador Egipto, bazuj tēēman laaman dīn nabeeman gra ni rajp rey guin.

¹¹ 'Chi guyu gubijn guidibczi Egipto nē niz Canaán, dxel guzagdiaj da't ree dux bēngulal ree guial achet ni gaw reeman.

¹² Per chi gogbee Jacob guial yu' trigo Egipto, guxhaal ree xi'nman bēn naj dux bēngulal ree, dxel wej reeman Egipto.

¹³ Chi barojp volt wej reeman, rēb Xiēb guial laaman naj bijch reeman, dxel gogbee rey Egipto xhie diaa zēēdaman.

¹⁴ Dxel rēb Xiēb loj ree bijchaman dīn chigxii reeman xDadaman nē gra ree lasa'man dīn chisob reeman Egipto. Gojc reeman gayojnchiin bejn.

¹⁵ Zianan zeel bisob Jacob Egipto, ni gūtaman ni gajc gūt ree xi'nman, dux bēngulal ree.

¹⁶ Gojc xchej dxel bignē reeman xdxijt ree dux bēngulal ree guiedx Siquem, persi biguie'ch reen lēn baa guzii Abraham loj ree xi'n Hamor.

¹⁷ 'Chi ma zidyob tiamp gac ni rēb Dios loj Abraham, zien ree bēn Israel ma gojcxhie Egipto.

¹⁸ Abi' guzuloj gunabee rey ren Egipto, bēn ad beenbeet Xiēb.

¹⁹ Rey zii basagzi bēn du ladx ree, gunabeeman chigsēēb reeman xindo niguaaaw golnejz ree dīn guiēt reex.

²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bēēw.

²¹ Chi bidxin dxej bigsa'n reeman laax lod bigsēēb reeman laax, xi'n gajc rey guin baca' laax, persi baslaaman laax zi'c xi'nman.

²² Basiid Moisejs gra ni rajc ree bēn Egipto, abi' lasajc ni guneex ni been tēēx.

²³ 'Chi guyu Moisejs tiuu ijz, bidyajb guijcaman bignaj lasa' bēn Israelaman.

²⁴ Abi' chi baguaaman caguin tijb bēn Egipto tijb bēn Israel, balajman laaman, bagūjtaman bēn Egipto guin.

²⁵ Naladx Moisejs niagbee ree bēn Israel guial por laaman yabēē Dios laa reeman loj ree bēn Egipto, per ad gogbeet reeman.

²⁶ Chi bareguiaal, bidxaagloj Moisejs tio'p ree bēn Israel caga'p reeman, abi' guyēnman nabe'cdxeman laa reeman, rēbaman: "¿Chexc zeel rdilidi? Awa bēn Israel naj gropidi."

²⁷ Abi' bēn caguin bēn zatijb guin bacadxaaman Moisejs, rēbaman: "¿Chu bazuj lūj dīn nabeel dunujn, dīn na tēēl ni rayal yaguieenan?"

²⁸ ¿Wen rēnl ya gugūjtil naj zi'c bagūjtil bēn Egipto ni nieey?"

²⁹ Chi biguiejn Moisejs ni rēb bēn guin, baxūūnman wejman niz Madián. Ni gureman zi'c benzit, abi' cwa'man bēngunaa, zianz guyu tio'p ree xi'ngaanman.

³⁰ 'Chi gudēd tiuu ijz, dxel balūūloj tijb xi anjl Dios loj Moisejs loj xbajl tijb yag ni cayzbajl lod naj yujbidx, gajxh guia' la Sinaí.

³¹ Dád badxa loj Moisejs guial baguaaman bajl guin. Abi' chi bibigaman dīn guguaaman laan mazri zagdxē, biguiejnman cha' Dios rēbaman lojman:

³² "Naj naj xDios xbēngulal reel, Abraham, Isaac nē Jacob." Dxel guzuloj canij Moisejs guial bidxebaman, ad bayaxtaman nuguiaaman bajl guin.

³³ Dxel rēb Dios lojman: "Gulēē xgurēchil, dīn nagle' lod za'l.

³⁴ Naj cuguia xhienaag cazagdiaj ree da bejnan Egipto, rigueijnan roon reeman zeel biguia'tan dīn yabēn laa reeman. Yan, guda dīn gaxhalan lūj Egipto."

³⁵ 'Abi' majsi ad guyēt ree bēn Israel nuzoob reeman xtiidx Moisejs yaloj, rēb reeman lojman: "¿Chu bazuj lūj dīn nabeel dunujn na tēēl ni yaguieenan?" Per por anjl balūūloj loj bajl guin, badēēd Dios guialrriabee lojman, abi' guxhaalaman laaman dīn gūūnman laa reeman yudar yarii reeman Egipto, zi'c rēb anjl balūūloj lojman loj yag caye'c.

³⁶ Moisejs guin naj bēn babēē dux bēngulal ree Egipto, been tēēman milagr ree niz Egipto, nē niz ro' nijsdoo ni la Nijs Xnia, nē loj yujbidx lod guzu reeman tiuu ijz.

³⁷ Laagajc tēēman rēb loj ree bēn Israel: "Loj gajquidi cwe Dios tijb bēn gudēēd xtiidxaman loj ree bejn zi'c guleman naj. Gol bazoob xtiidxaman."

³⁸ Dxel chi guzunē Moisejs dux bēngulal ree niz loj yujbidx, laaman naj bēn guneenē xi anjl Dios ruguia' la Sinaí, persi badēēman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ Per dux béngulal ree ad bazoobt reeman xtiidx Moisejs. Ad guyënt reeman niniabee-man laa reeman, tib guyuguijczy reeman nayejc reeman Egipto.

⁴⁰ Dxel rëb reeman loj Aarón: "Been dios ree, din ned reeman du loj ree, din ad rayagbeet ree gonczy Moisejs bën babëë dunuj ree Egipto."

⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëëd reeman laa reeb zic'c gon loj ni been reeman, been reeman lanij guial babaanë reeman ni been gajc reeman.

⁴² Dxel guro'nladx Dios laa reeman, baslaaman guyën reeman gubijdx con bëw con bajl yu' ree xanyabaa. Din zian ca loj xtiidx Dios ni bacaa ree bën badëëd xtiidxaman loj ree bejn, lod rëb:

Bën Israel, loj tiuu ijz ni guzudi loj yujbidx,
 çwen bagüjtidi be ree ya din guneedi laa reeb lon zic'c gon?

⁴³ Per mazri guyëndi xdxandi Moloc biala tëëdi lidxan,
 në xbjal dxan Refán, dxan been gajquidi din guzuxibidi loj reen.
 Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zic'c yadoo, lod guyuchaaw ree guiaj ni ca xley Dios. Been reeman yadoo guin zic'c gunabee Dios Moisejs, chi rëbaman lojman guial güünman laan zic'c ma baguiaaman.

⁴⁵ Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt bidxin dxej guzuloj gunabee rey Davi.

⁴⁶ Guyën Dios rey Davi, abi' laaman guyënman nüjman tijb yadoo par Dios, bën naj dux Dios ree nayajc ree bën Israel.

⁴⁷ Per rey Salomón naj bën been laan,

⁴⁸ majsí Dios bën yu' xanyabaa ad rëjtaman lën yadoo ni rüjn ree bejn, zic'c rëb bën badëëd xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabeen,
 guiaád loj guidxliuj naj lod ruzu guia'n.

çXhienaag gac yu güündi par naj?

çO xhienaag naj lod yaziiladxan?

çId naj ben graczi ree ni guie ya?, rëb Dios.

⁵¹ 'Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëëtidi chignia'di, zianczy za'di contr xSprijt Dios, zic'cgajc been ree xbéngulalidi.

⁵² çChu bën badëëd xtiidx Dios loj ree bejn ad beennaat ree xbéngulalidi? Xt bagüjt reeman bën badëëd ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëëdi güjtaman.

⁵³ Majsí cwa'di xley Dios loj ree xi anjlaman, per ad rüjntidi zic'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman.

⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios.

⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tëën Bën guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman signaaz reeman Esteban,

⁵⁸ babëë reeman laaman loj ciuda guin, bicüjt reeman laaman con guiaj, guiaád xab reeman basa'nsii reeman loj xinguiag la Saulo persi canajxan.

⁵⁹ La'tgaj cucaaguiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwentil dol cayüjn ree bën guin yan.

Naabczi gulox rëbaman zian, laa güt gajcaman.

8

Guzunal Saulo bën rliladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bën Jerusalén ree bën rliladx ree Jesucrist, dxel bire'ch reeman guidib niz Judea në niz Samaria, bën najzi ree apóstoles baya'n.

² Guyu bëlzi ree xinza'c, laa reex biquie'ch Esteban, abi' dád biin reex guijcaman.

³ Guíaad Saulo rzunalaman b́en rliiladx ree Jesucrist, ruman yu yu din cwéé nagueijnman laa reeman, zi'c xinguaaw zi'c béngunaa, persi rgu'man laa reeman ladxguuib.

Bacaagdiajg ree b́en Samaria xtiidx Dios

⁴ Per b́en b́rii ree Jerusalén, lod zé'tzi reeman rtie'ch reeman xtiidx Dios.

⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn.

⁶ Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēe reeman milagr ree ni rúnman.

⁷ Zien ree b́en nējt tib lajt xcuerp bayüjn Felip, nē ree b́en ad rzat zagdx, bayüjn tēeman b́en yu' ree xindxab luxdoo abi' rbixdiaj reex rarii reex.

⁸ Zianan zeel babaa da't ree b́en luguiedx zii.

⁹ Per luguiedx zii guyu tijb b́en b́rii laj Simón, diizd gocli rúnman guialbidxaa persi rusqueeman b́en Samaria ree, rúnman b́en lasajc.

¹⁰ Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp b́en guie.

¹¹ Bidxga' reeman laaman guial ma gojc xchej cusqueeman laa reeman con guialbidxaa ni rúnman.

¹² Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguaaw zi'c ree béngunaa gurobnijs reeman.

¹³ Xt nē Simón bililadx gurobnijs tēeman, abi' ad riro'nladxtaman Felip radxa tēe lojman graløj ree milagr ruguiaaman rún Felip.

¹⁴ Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni.

¹⁵ Chi bidxin reeman, gurejdx gunab reeman Dios por ree b́en Samaria b́en ma rliiladx ree xtiidx Dios din chu' xSprijt Dios luxdoo reeman,

¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús.

¹⁷ Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyēnman nudēeman milia loj reeman,

¹⁹ rēbaman:

—Nē lon gol banee guialrniabee guin din chi gaxhob yan chutēez guijc b́enan, nē luxdooan chu' xSprijt Dios.

²⁰ Dxel badxi' Béd xtiidxaman rēbaman:

—Nítil con guidib xmilia, din rúnjñl xgab guial zajc siil guialrniabee razaladx Dios.

²¹ Ad rayalt ad zajc tēet güünl zi'c raguieenan, din ni'quid zinaltil xnejz Dios.

²² Bayüjn xgab por ni mal been, gurejdx gunab tēe Dios, रुपent güünman lüj perdon por ree xixgabmalil,

²³ din ragbeen ganax guialralen yu' luxdool, abi' dol guin naj ni rniabee lüj.

²⁴ Dxel badxi' Simón xtiidxaman, rēbaman:

—Gol gurejdx gunab Dios por naj, chitēē gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudēd reeman gutie'ch reeman xtiidxa'c Jesucrist.

Felip con b́en Etiopía

²⁶ Chi ma gudēd gojc zian, gunee tijb xi anjl Dios Felip rēbaman:

—Wej niz sur nejz ni zē Jerusalén xt lod la Gaza, niz lod naj ganax yujbidx.

²⁷ Dxel b́rii Felip zēman. Runejz guin banaazaman tijb b́en Etiopía, najman b́en zøjbloj guial laaman rgu'chaaw xmilia Candace, b́en naj reina Etiopía. Wejman Jerusalén bignajchi'man Dios,

²⁸ abi' ma bayunejaman zia ladxaman, zøjb lēn xcarrejt zagdxeman, roolaman loj gui'ch ni bacaa Isaías, b́en badēd xtiidx Dios loj ree bejn.

²⁹ Dxel rēb xSprijt Dios loj Felip:

—Bibig gajxh cwē' carrejt guin.

³⁰ Chi bibigaman, bigueijnman cayool b́en guin loj gui'ch bacaa Isaías. Dxel gunabdiidxaman lojman rēbaman:

—Dad, ¿rignia'l ni cayoolil ya?

³¹ Badxi' b́en guinan rēbaman:

—¿Xoza chignia'nan? Awa achut gusignia' naj.

Dxel rēbaman loj Felip din chē'paman loj carrejt guin, cweman cwē'man.

³² Loj xtiidx Dios lod cayool b́en guin rēban:

Zi'c rinē reeman tijb xiiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bën gugaj guidxladib.

³³ Chi beennë reeman laaman zi'ctzi rën reeman,

achut been gualguxtis por laaman.

Yan achut guza't xdiaaman,

din ma bisüd reeman laaman loj guidxliuj.

³⁴ Rëb bën guin loj Felip:

—Guna sii, çchu xcwent rníee bën bacaa diidx guie ree? Çxcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman.

³⁶ Abi' chi gudëd reeman lod yu' nijs, dxel rëb bën guin loj Felip:

—Guie yu' nijs. Çnid zajc garobnijsan guie ya?

³⁷ Zeel rëb Felip lojman:

—Bal rliadxil guidib luxdool, zajcan.

Badxi' bën guinan rëbaman:

—Rliadxan gual Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman.

³⁹ Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman.

⁴⁰ Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guiáad Saulo ad rucwëëzt rdxe'chaman bën rliadx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz,

² din gac tijb gui'ch din gac cheman lën ree yadoo Damasco chigdiilaman bën rliadx ree Jesucrist, zi'c ree inguiaaw zi'c ree béngunaa, din chignëman laa reeman ladxguuib Jerusalén.

³ Per chi ma cadxinman gajxh guiedx Damasco, dxejlczi brii tijb guij xanyabaa balaan bacha' lod zëman.

⁴ Abi' bireeyujman, chi naga'man luyuj guin bigueijnman cha' bën rëb:

—Saulo, Saulo, çchexc zeel rzunalil naj?

⁵ Abi' gunabdiidxaman rëbaman:

—ÇChu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶ Rnij Saulo gual tant bidxebaman, abi' rëbaman:

—Dad, çxhie rën l gūnan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

⁷ Abi' ree bën në Saulo dád bidxeb reeman gual bigueijn reeman cha' bejn, per achutczii baguiaa reeman.

⁸ Chi bixcheman luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco.

⁹ Ni guzuman choon dxej, ad rajct ruguiaaman, achetctzi rawaman ache tëëtctzi rë'man.

¹⁰ Damasco gure tijb bën rliadx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëëd Tarso, lax Saulo. Din laax cabejdx canab naj,

¹² abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnëx bën rliladx ree lüj Jerusalén.

¹⁴ Yan zëëdix guie con xguialrniabee ree bixhioz rniabee ree bixhioz, din guiniaazix gra ree bën rliladx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel.

¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lëñü lod za' Saulo. Chi guyuman, guxhoob yaaman gujcaman, rëbaman:

—Bijch Saulo, Dad Jesús bën balüüloj lojl runejz lod zëëdil, laaman guxhaal naj din yaguaal, chu' tëë xSprijt Dios luxdool.

¹⁸ Loj hor gajc zi'c ruliüu yu' xhie biquied guiaalojman abi' baguiaaman stijb. Dxel guzuliman gurobnjnsaman,

¹⁹ gudaw tëëman persi bayuman gojl. Dxel guzujman Damasco tio'p choon dxej con ree bën rliladx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios.

²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëëd guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojib ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo,

²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman.

²⁵ Per ree bën rliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist.

²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneeñë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb.

²⁸ Zian baya'n Saulo Jerusalén abi' nayuman laa reeman.

²⁹ Ad rdxebtaman ruza'taman Dad Jesús, abi' xt gudijldiidxnëman bën Israel rniee ree diidx grieg, per guyën reeman nugüjt reeman laaman.

³⁰ Chi gogbee ree bën rliladx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bën rliladx Jesucrist, bën zojib ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhie reeman.

Bayajc Eneas

³² Chi biza Bëd bitixlojman bën rliladx ree Jesucrist, dxel wej gajcaman bitixlojman bën rliladx ree Jesucrist guiedx Lida.

³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajet rzax.

³⁴ Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex.

³⁵ Chi baguiaa gra ree bën zojib guiedx Lida në ree bën zojib niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶ Loj tiamp zii guyu tijb bëgunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar bënprob ree.

³⁷ Lën ree dxej zii gogxuu Dorcas abi' gÿjtaman. Chi gulox bagajz reeman laaman, dxel bitixh reeman laaman lënü ladya.

³⁸ Abi' gajxh guiedx Jope raya'n guiedx Lida lod za' Béd. Chi gogbee ree bën rililadx Jesucrist guial za'man ni, guxhaal reeman tio'p ree xinguiaw bisajc reex Béd liaadx, rëb reex:

—Been wen yo' ree Jope yan gajczi.

³⁹ Laa zinë gajcaman laa reex. Chi bidxinman, binë reeman laaman lënü lod naga' xcuerp Dorcas. Ni riga' zien ree béngunaa bizëjb roon reeman, abi' bibig reeman loj Béd culüü reeman gra lajd ni been Dorcas chi sta nabanman.

⁴⁰ Dxel gunabee Béd barii gra reeman, abi' bazuxibaman gurejdx gunabaman Dios. Dxel baguaaaman bengüt guin, rëbaman:

—¡Tabita, bixche!

Laa guxhal gajc lojman. Chi baguaaaman Béd, gureliman,

⁴¹ dxel gunaaaz Béd yaaman persi guzuliman. Abi' gurejdxaman bën rililadx ree Jesucrist con ree bën bizëjb guin, persi baguaiaa reeman guial ma baban Dorcas.

⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian.

⁴³ Guiaád Béd baya'nman mazri dxej luguiedx guin, lidx Simón bën rÿjnchaaw guid.

10

Wej Béd lidx Cornel

¹ Luguiedx Cesarea gurej tijb bën brii laj Cornel. Laaman goc suldad gunabee tibcwaaw ree suldad brii laj Italiano.

² Gojcaman benza'c, laaman në gra ree bën zobj lidxaman guyën reeman Dios, abi' dád beenman yudar bën Israel ree, bën naj ree bënprob, në zianczi rbejdx rniabaman Dios.

³ Tijb dxej cost raca choon wadxe, guzajcaman zi'c ruluü cane'xhchaalaman. Zagdxeczi baguaaaman guyu tijb xi anjl Dios lënü lod za'man, abi' rëb anjl guin lojman:

—¡Cornel!

⁴ Baguaaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguejn Dios xtiidxil ma baguaiaa tëëman xhienaag rÿjnl yudar bënprob ree.

⁵ Guxhaal ree bën che luguiedx Jope din chica' reeman Simón, bën la gajc Béd.

⁶ Zobjaman lidx tijb bën la gajc Simón, bën rÿjnchaaw guid, bën zobj gajxh ro' nijsdoo. Béd guin na ni rayal güünl.

⁷ Chi zia anjl guneec Cornel, gurejdxaman tio'p ree xmojsaman, zatijb suldad rajpaman confians rililadx tëëman Dios.

⁸ Gulox beman diidx loj reeman ni guzacaman, dxel guxhaalaman laa reeman Jope.

⁹ Chi bareguiaal, la'tgaj cadxin reeman gajxh Jope, cost garol dxej wë'p Béd guijc yu lod zobjaman din cwedx guiniabaman Dios.

¹⁰ Dád gulaanman, guyënman niajwaman, per la'tgaj cayÿjn reeman ni gawaman guzajcaman zi'c ruluü cane'xhchaalaman.

¹¹ Baguaaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan.

¹² Loj lajd guin yu' gra loj ree be yu' tajp guia', në ree bëël, nëtëë ree be rzuj.

¹³ Dxel biguejnman cha' bën rëb:

—Béd, bisu, bagÿjt be gawil.

¹⁴ Per badxi' Béd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵ Abi' rëb cha' bën guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayë'p lajd guin xanyabaa stijb.

¹⁷ La'tgaj cayÿjn Béd xgab xhie rën guieë ni baguaaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman.

¹⁸ Chi bidxin reeman, gunabdiidx reeman bal ni zobj Simón bën la gajc Béd.

¹⁹ Guiaád Béd sta cayÿjnman xgab ni baguaaaman, chi rëb xSprijt Dios lojman:

—Laa choon ree xinguiaw raguuil lÿj.

²⁰ Bisu, biguiajt binë reex, ad chu' luxdool tio'p, din naj guxhal laa reex.

²¹ Dxel baguiajt Béd lod za' ree bën guxhaal Cornel, abi' rëbaman loj reeman:

—Naj naj bën raguuilidi, ¿chexquiza zeel raguuilidi naj?

²² Dxel badxi' reeman laan rëb reeman:

—Guxhaal b́en la Cornel dunujn, b́en rniabee tibcwaa ree suldad, najman benza'c, rdxebaman Dios, abi' graczi ree b́en Israel ŕen laaman. Tijb xi anjl Dios ŕeb lojman, guial rayal guixhiaalaman dunujn yudca'n ĺuj din yo' ree lidxaman, din gucaagdiajgaman ni rayal guíebil.

²³ Dxel badxe' Béd laa reeman ĺenü, ni gudéd reeman guiaal. Chi bareguiaal, binéman laa reeman. Nè b́elzi ree b́en zojb Jope b́en rliladx ree Jesucrist biné laaman.

²⁴ Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man nè ree xmiwaman, din cwéz reeman guidxin reeman.

²⁵ Chi bidxin Béd lidx Cornel, laa brii gajc Cornel bigchaaglojman laaman, dxel bazuxibaman loj Béd per si gojpaman laaman respejt.

²⁶ Per bazuli Béd laaman, ŕebaman:

—Guzuli, din lasa' bejn gajcan ĺuj.

²⁷ La'tgaj cadxin reeman ruyu guin cayü reeman diidx. Abi' chi guyu reeman, baguiaa Béd zien da't ree bejn riga' ni.

²⁸ Dxel ŕeb Béd loj reeman:

—Ma qui ragbeedi xhienaag naj xley ree b́en Israel, guial ad zajct go'ch reeman loj ree b́en ad najt b́en Israel o chu' reeman lidx reeman. Per ma balüü Dios naj guial achutctzi rayal ganen bendxuudx, b́en nabixhladx.

²⁹ Zeel chi bidca' reeman naj, laa bial gajcan achet guijc badxiban. Yan ŕenan gagbeen, ¿chexquiza zeel gurejdxidi naj?

³⁰ Badxi' Cornelan ŕebaman:

—Ma gojc tajp dxej cost hor guie gajc, chi zoob lidxan, raca choon wadx, cabedx canaaban Dios, loj hor zii balüüloj tijb bejn lon najcwaman lajd nayni.

³¹ Abi' naman lon: “Cornel, ma biguiejn Dios xtiidxil, yu'guijc t́eéman xhienaag ŕujnl yudar b́enprob ree.

³² Zeel guxhaal ree xin che luguiedx la Jope din chica' reex Simón, b́en la gajc Béd. Zojbaman lidx tijb b́en la gajc Simón, b́en ŕujnchaaw guid, b́en zojb gajxh ro'nijdsdoo. Béd guin na ni rayal güünl.”

³³ Zianan zeel laa guxhal gajcan xin bidgadiil ree ĺuj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios ĺuj nal du lojn.

Ni gunee Béd lidx Cornel

³⁴ Dxel guzuloj canee Béd, ŕebaman:

—Ma ragbeen yan guial tiblojzi ruguiaa Dios bejn.

³⁵ Din Dios, chutééz b́enguidxliuj ridxga' laaman ŕujn t́eéman zi'c rayal, nêgajc Dios ridxga' laaman.

³⁶ Dios ma gunee b́en Israel ree, ma bagojnman guial por Jesucrist rabadxe luxdoo bejn, b́en naj Dad par gra ree b́enguidxliuj.

³⁷ Ĺejt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs.

³⁸ Ragbee t́eédi guial ma badéé Dios xSprijtaman con xguialrniabeeman loj Jesús b́en Nazaret, abi' bizaman biguieenman ni zagdxe, bayúnman gra ree b́en cazagdiaj por xindxab. Gojc beenman zian guial za'né Dios laaman.

³⁹ Abi' dunujn baguiaa gra ni been Jesús guidib niz Judea, nè niz Jerusalén. Dxelri bagújt reeman laaman, bacaa reeman laaman loj crújz.

⁴⁰ Per Dios basban laaman ni bayon dxej, abi' cwéjb Dios bidgalüülojman du lojn.

⁴¹ Ad balüülojtaman loj gra ree bejn, tijbzi du lojn nayajcan b́en gule Dios diizd yalój din yaguaan graczi ni beenman. Abi' dunujn badaawné' laaman badü'né' t́eén laaman chi babanman stíjb.

⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadééd gra ree bejn cwent loj Dios, zi'c ree b́en naban zi'c ree b́en ma güjt.

⁴³ Nétéé diizd gocli graczi ree b́en badééd xtiidx Dios loj ree bejn, gunee reeman xcwent Jesús, ŕeb reeman guial graczi ree b́en chililadx laaman, gac xtol reeman perdon.

Guyu xSprijt Dios luxdoo ree b́en ad najt b́en Israel

⁴⁴ Sta canee Béd, chi guyu xSprijt Dios luxdoo gra ree b́en cucaagdiajg ni cayébaman.

⁴⁵ Dxel b́en Israel rliladx ree Jesucrist, b́en biné ree Béd, dád badxa loj reeman guial nè ree b́en ad najt ree b́en Israel guyu xSprijt Dios luxdoo,

⁴⁶ guial riguiejn reeman ma rniee ree b́en guin graloj ree diidx, abi' ruza't reeman Dios zagdxe.

⁴⁷ Dxel ŕeb Béd loj reeman:

—¿Chu zajc gudxoon tiobnijs ree bèn guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Béd din sunēman laa reeman za tio'p choon dxej mazri.

11

Guyu xSprijt Dios luxdoo ree bèn ad najt bèn Israel

¹ Bèn naj ree xi apóstoles Jesús con ree bèn Judea, bèn rliiladx ree laaman, gogbee reeman guial nē ree bèn ad najt bèn Israel bililadx xtiidx Dios.

² Abi' chi badxin Béd Jerusalén, bèn Israel ma rliiladx ree Jesucrist, bèn sta zinal ree ley, gudilē reeman Béd.

³ Rēb reeman lojman:

—¿Chexc zeel bichu'l lidx ree bèn ad najt bèn Israel abi' gudawnēl laa reeman?

⁴ Dxel guzuloj cayü Béd diidx diidz guia'xchej xhienaag gojc zeel wejman lidx ree bèn guin abi' rēbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diidz xanyabaa xt lod za'n.

⁶ Chi baguian zagdxe xhie yu' loj lajd guin, baguian bedoxh ree nē ree be yu' tajp guia' nē ree bēēl con ree be rzuj.

⁷ Dxel biguejnan cha' bejn, naman: “Béd, guzuli, bagüjt be gawil.”

⁸ Per badxi'n nan rēn: “Yajqui, Dad, din ad goctczi wayawan nidxuudx, ni ad rayalt gaw bejn.”

⁹ Abi' guneeman diidz xanyabaa stijb, naman: “Ni ma basia Dios, ad rnieelan nidxuudx.”

¹⁰ Choon volt gojc zian, dxel bayē'p gra ni guin xanyabaa.

¹¹ Loj hor zii gajc bi't choon ree xinguaaw lod guren, zēēd reex diidz Cesarea, cayguuil reex naj.

¹² Abi' na xSprijt Dios lon guial chinē'n laa reex, ad chu' luxdon tio'p. Nē guixo'p ree bèn guie bèn naj dux compniar ree binē'n. Abi' dugraczan badxu' lidx bèn guin.

¹³ Dxel beman diidz du lojn xhienaag balüüloj tijb xi anjl Dios lojman lidxaman, rēb anjl guin lojman: “Guxhaal ree bèn che luguiedx Jope din chica' reeman Simón, bèn la gajc Béd,

¹⁴ laaman na xhienaag gac ree xtolil perdon, con gra ree bèn zojb lidxil.”

¹⁵ Chi guzuloj canenē'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj.

¹⁶ Dxel basaaladxan xtiidx Dad Jesucrist chi naman: “Walican baroobnijs Waj con nijs, per lējt chu' xSprijt Dios luxdoodi.”

¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸ Chi biguejnj ree bèn guin ni rēb Béd, dxel achetri rēb reeman lojman abi' baza't reeman Dios zagdxe, rēb reeman:

—¡Ma rayagbee ree yan guial nē ree bèn ad najt bèn Israel ma balüü Dios guial rayal yayüjn xgab por xtol reeman yadx' tēē loj reeman lojman din gap reeman guialnaban tiblayaa delant lojman!

Bililadx ree bèn Antioquía Jesucrist

¹⁹ Chi mal bagüjt ree bejn Esteban, dxel guzuloj rzunal reeman bèn rliiladx ree Jesucrist persi bire'ch gra ree bèn rliiladx guin niz Fenicia, niz Chipre nē Antioquía. Abi' gutie'ch reeman xtiidxza'c Jesucrist, per ganaxzi loj ree bèn Israel.

²⁰ Per loj reeman no'ch bēlzi ree bèn Chipre nē ree bèn Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bèn ad najt bèn Israel.

²¹ Gognē Dios laa reeman, dád zien ree bejn bililadx ni rēb reeman abi' bililadx reeman Jesucrist.

²² Chi gogbee ree bèn Jerusalén rliiladx Jesucrist ni goc, guxhaal reeman Bernabé xt guiedx Antioquía.

²³ Chi bidxinman ni, dád babaaman chi baguiaaman xhienaag cayagnē Dios bèn guin ree. Dxel guneenēman gra reeman din con guidib luxdoo reeman gusnuu chinal reeman xtiidx Jesucrist.

²⁴ Benza'c gojc Bernabé, dád gognē xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo.

²⁶ Chi badxejlaman laaman, dxel binëman laaman xt Antioquía. Ni guzunë reeman bën rliładx ree Jesucrist tibij, dád zien ree bejn balüü reeman. Abi' luguiedx Antioquía naj lod gulëläj reeman bën rliładx ree Jesucrist, cristian.

²⁷ Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía.

²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczí guidxliuj. Laan gojc loj tiamp gunabee rey Claudio.

²⁹ Abi' ree bën rliładx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëéd tijb gaj reeman, din gagnë lasa' reeman, bën rliładx ree Jesucrist, bën zobj ree niz Judea.

³⁰ Abi' zian been reeman. Dxel guxhaalnë reeman laan Saulo con Bernabé din gudëéd reeman laan loj ree bën rniabee ree bën rliładx Jesucrist niz Judea.

12

Guyu Béd ladxguuib

¹ Lën ree dxej zii guzuloy rey Herodes cusagziman bëlzi ree bën rliładx Jesucrist.

² Abi' gunabeeman bagüjt reeman Jacob bijch Waj, con espad.

³ Chi baguiaaman bayuladx ree bën Israel ni beenman, dxel gunabeeman gunaaz reeman Béd. Ni ne goc lën ree dxej lanij pascw chi raw reeman guiadxtil ad yu't levadur.

⁴ Chi gunaaz reeman Béd, badxe' reeman laaman ladxguuib abi' gunabee rey Herodes tajp cwaa ree suldad din guinia reeman ro' ladxguuib guin, tib cwaa gaj reeman naj tajp suldad. Din beenman xgab nuzujman Béd loj ree bën guiedx guin chi nidëd pascw.

⁵ Zian guyu Béd ladxguuib, gojp da't reeman laaman. Per gra ree bën rliładx Jesucrist ad rucwëzt rbejdx rniab reeman Dios por laaman.

Babëë Dios Béd ladxguuib

⁶ Guxhin zii gajc chi yareguiaal cwëë Herodes Béd loj ree bën guiedx guin, naga'yëjs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguuib guin.

⁷ Dxejzci bidxin tijb xi anjl Dios abi' basni tijb guij lën ladxguuib guin, dxel baqui' anjl guin cwë'lën Béd persi bacwëenman laaman, rëbaman lojman:

—jCari bixche!

Loj hor zii gajc biajb ree caden naxii yaa Béd,

⁸ abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Béd zian dxel rëb anjl guin:

—jGojt xcajpil, tanal naj!

⁹ Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman.

¹⁰ Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguuib ni rarii runejz guin, dxel xtijbzán bixal abi' barii reeman. Abi' chi bidxin reeman tijb xquin, yagaj basa'n anjl guin Béd.

¹¹ Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nüjnnë ree bën Israel naj.

¹² Chi bayagbee Béd ni guzacaman, dxel baguiajman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios.

¹³ Chi gulajw Béd ro' port, dxel brii tijb biin la Rode ziquiaam chunin.

¹⁴ Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin.

¹⁵ Abi' rëb reeman lojm:

—jRajc guijquul!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶ Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman.

¹⁷ Abi' been Béd sen loj reeman din yacwëëz ro' reeman, dxel beman diidx xhienaag babëë Dios laaman ladxguuib. Abi' rëbaman loj reeman:

—Gol be ni guie loj Jacob në loj gra ree bën rliładx Jesucrist.

Dxelri briiman yagaj zëman lood ren.

¹⁸ Chi bareguiaal, ad radxejt xhie güün ree suldad guin guial ad ragbeet reeman xhienaag barii Béd ladxguuib guin.

¹⁹ Dxel gunabee Herodes chigdiil reeman Béd, per ad badxejl't reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bën Tiro nê ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën brii laj Blasto zagdx, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëéd ni raw reeman.

²¹ Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guineenëman laa reeman.

²² Dxel guzuloj gurixdiaj ree bën guin, rëb reeman:

—¡Ad bejntan canee, tijb diosan!

²³ Loj hor zii gajc badëë tijb xi anj Dios tijb guialguidx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdx luar nuza't reeman Dios zagdx.

²⁴ Per xtiidx Dios care'chzi care'chan gra ladczi abi' gra ladczi cayajcxhie ree bën rliladx laaman.

²⁵ Chi ma badëéd ree Bernabé con Saulo ni guxhaal ree bën Antioquia, dxel baza reeman Jerusalén, binë reeman Waj, bën la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree bën rliladx Jesucrist, bën zojb ree Antioquia, no'ch ree bën rudëéd xtiidx Dios loj ree bejn nê ree bën rulüü xtiidxaman. La reeman Bernabé, Simón bën rníee reeman Benya's, Lucio bën Cirene, Saulo con Manaén bën guni'snë Herodes tijbzi, bën gunabee Galilea.

² Tijb dxej chi naba'n reeman, la'tgaj cabejdx canab reeman cuza't tëë reeman Dios zagdx, rëb xSprijt Dios loj reeman:

—Gol bacaabee Bernabé nê Saulo din güün reeman dxiin rënan güün reeman.

³ Chi gulox guba'n reeman gurejdx tëë reeman Dios, dxel guxhoob yaa reeman guijc Bernabé con Saulo din gagnë Dios laa reeman abi' bazaadiidxnë reeman laa reeman.

Bernabé con Saulo wej reeman Chipre

⁴ XSprijt Dios naj bën guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo.

⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree bën Israel. Nê Waj binë reeman din güünman laa reeman yudar.

⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bën Israel laman Barjesús, rajcaman guialbidxaa, rusquieeman bejn ree, rëbaman guial laaman naj bën rudëéd xtiidx Dios loj ree bejn.

⁷ Barjesús guin rnieenëman Sergio Paulo zagdx, bën naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios.

⁸ Per bënbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios.

⁹ Abi' Saulo, bën la gajc Pab, rniabee xSprijt Dios luxdooman guidiblagaa, baguiaadxi-jchaman loj bënbidxaa guin,

¹⁰ rëbaman:

—¡Xi'n xindxab lüj, ganax rusquieel, ganax niguijdx rüjn! ad rëntczil ni zagdx! ¿Xt goc gudëél mod chinal ree bejn xnejz nali Dios?

¹¹ Yan gudëéd Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcayj Elimas abi' ad gojctri nuguaaman, dxel raguuilaman chu guiniaaz yaaman guial ad rajctri ruguaaman.

¹² Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén.

¹⁴ Dxel barii reeman guiedx Perge, zë reeman luguiedx Antioquia ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman.

¹⁵ Dxel chi gulox biil bén biil tib lajt loj libr bacaa Moisejs nè loj libr bacaa ree bén badëë xtiidx Dios loj ree bejn, gunee ree bén rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bén riga' guie din gudëedi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëëz ro' reeman, dxel rëbaman:

—Bén Israel, nè gra ree bén rdxeb Dios, gol bacaagdiajg:

¹⁷ Dux Dios ree, nayajc ree bén Israel, gulejman dux béngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xgualrniabeeman babëëman laa reeman Egipto.

¹⁸ Abi' baslejnguijcaman laa reeman loj tiuu ijz ni guzu reeman niz lod naj ganax yujbidx,

¹⁹ banijt tëëman gajdx ree nacion ni gure Canaán persi badëëman guidxliuj guin ree loj dux béngulal ree.

²⁰ Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bén badëëd xtiidx Dios loj ree bejn gojc xjuejs bigra reeman.

²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bén zëëd loj xdiaa Benjamín persi gunabeeman laa reeman tiuu ijz.

²² Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tëëx cumplid da diidxan guial güünx gra zi'c rënan.”

²³ Abi' yan zi'c gajdzi rëb Dios, loj gajc xdiaa rey Davi, brii Jesús bén guxhaalaman din yabëëman bén Israel ree loj dol.

²⁴ Chi gad Jesús gui't, Waj bén baroobnijs bejn ree, bagojnman gra ree bén Israel guial rayal yayün reeman xgab por xtol reeman tiobnijs tëë reeman.

²⁵ Chi ma zidyob yadiblagaa xgualnaban Waj, dxel rëbaman: “Ad najtan bén naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

²⁶ Yan, dugra ree nayajc ree xdiaa Abraham nè gra los demazri ree bén rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol.

²⁷ Per ree bén Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bén badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios.

²⁸ Abi' majsi achetdzi xtol Jesús guyu, per ni'czi zian rëb gajc reeman loj Pilato guial nabeeman guiëtaman.

²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crüzjz abi' baquie'ch reeman laaman.

³⁰ Per Dios basban laaman,

³¹ dxel loj zien dxej balüülojman loj ree bén binë laaman chi briiman niz Galilea zëman Jerusalén, abi' yan laa reeman naj bén rniee por laaman loj ree bejn.

³² Zeel caygojnman lëjt diidxza'c guin ree, guial promejs been Dios loj ree dux béngulal ree,

³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diizd yan ma rajpil gualrniabee zi'cgajc naj.”

³⁴ Dios rëb guial yasanman Jesús abi' ad zaxint xcuerpaman zi'c gajdzi ca loj xtiidx Dios lod rëb: “Naj günle' lëjt zi'c benan promejs loj Davi.”

³⁵ Abi' rëb tëë stib lajt loj xtiidxaman: “Ad zatiëjbtli xhin xcuerp xi'nl, bén naya nali.”

³⁶ Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman.

³⁷ Per xcuerp Jesús bén basban Dios, ad guxintan.

³⁸ Zeel caygojnman lëjt compniar din gagbeedi guial por laaman ma yu' perdon par dux tol ree.

³⁹ Graczi bén rililadx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs.

⁴⁰ Zeel gol gojp cudad chitëë saquidi zi'c bacaa ree bén badëë xtiidx Dios loj ree bejn, lod rëb:

⁴¹ Gol bacaagdiajg, lëjt bén ruze' ree da diidxan,

gol badxalojdi gol gunidloj tëë.

Din loj ree dxej nabandi gün reen ni xt ni'quid zaliladxtdi, majsi chu na laa reen lojdi.

⁴² Chi barii Pab con Bernabé lèn xyadoo ree bén Israel guin, gunab reeman favor loj Pab, din chi guidxin stibj dxej raziiladx ree bejn chiguieman mazri diidx loj reeman xcwent ni beman dxej zii.

⁴³ Chi barii ree bén guin lèn yado guin, zien da't reeman binal Pab con Bernabé, zi'c ree bén Israel zi'c ree bén ad najt bén Israel, bén rën ree Dios zi'cgajc ree bén Israel. Abi' rëb Pab con Bernabé loj reeman din sudxi'ch reeman loj nejz zagdx guredx Dios laa reeman guial rënman laa reeman.

⁴⁴ Chi bidxin dxej ni raziiladx ree bejn, gra bén luguiedx guin bado'p din gucaagdiajg reeman xtiidx Dios.

⁴⁵ Per chi baguiaa ree bén Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab.

⁴⁶ Dxel sin guialrdxeb badxi' Paban con Bernabé loj reeman, rëb reeman:

—Yaløj lëjt rayal yagojnan xtiidxza'c Dios, lëjt najdi bén Israel, per yan ad rëntidi gucaagdiajgudi laan, dxel lëjt gajc culüü guial ad zajct yayalidi guialnaban tiblyaa con Dios. Yan ma yugtie'chan diidxza'c guin ree loj ree bén ad najt bén Israel.

⁴⁷ Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion, din chel guidibchicniaa loj guidxliuj chicojnl xhienaag gac ree bejn perdon.

⁴⁸ Chi bigueijn ree bén ad najt bén Israel zian, dxel babaa reeman, guzuloj rëb reeman guial zagdx naj xtiidx Dios, abi' graczi bén ma naj yayal guialnaban tiblyaa con Dios, bililadx reeman xtiidxaman.

⁴⁹ Zianan zeel bire'ch xtiidxza'c Dios guidib niz ni.

⁵⁰ Per ree bén Israel batiaalguiiw reeman béngunaa rej ree laydoo zianczi naj tëë reeman bén zobjloj luguiedx zii, në ree xinguaaw naj gajc xin zobjloj, din sunal reeman Pab con Bernabé xt yabëë reeman laa reeman ni.

⁵¹ Dxel Pab con Bernabé gudxijp guxyuj guia' reeman zi'c tijb sen guial ad bazoobt ree bén guin diidx, dxel zë reeman Iconio.

⁵² Per ree bén bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman lèn xyadoo ree bén Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bén Israel zi'c ree bén ad najt bén Israel.

² Per ree bén Israel ad bililadxt batiaalguiiw reeman bén ad najt ree bén Israel persi guzuloj been reeman xgab mal por ree bén rililadx Jesucrist.

³ Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badëëd guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios.

⁴ Per ree bén luguiedx zii gojc reeman tio'p lala', garol reeman guzunë ree bén Israel zagarol reeman guzunë apóstoles guin ree.

⁵ Dxel zi'c ree bén Israel zi'c ree bén ad najt bén Israel, baya'n reeman diidx con ree guxtis din tilë reeman Pab con Bernabé gucaaguaiaj tëë reeman laa reeman.

⁶ Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni,

⁷ gunee reeman xtiidxza'c Jesucrist.

Bacaaguaiaj reeman Pab Listra

⁸ Luguiedx Listra guyu tijb xinguaaw ad rajct rza, ad guzatzciz guial naxin guia'x diidx chi golix abi' zobjix

⁹ cucaagdiajguix ni rëb Pab. Chi baguiaa Pab laax, gogbeeman guial rililadxix par yayajquix.

¹⁰ Abi' gunee man rejs, rëbaman:

—jBisu, guzuli zagdx!

Loj hor zii gajc gutiajs xin guin, guzulix abi' guzuloj cazax.

¹¹ Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹² Abi' rëb reeman guial Bernabé naj dios Júpiter, guíaad Pab naj dios Mercurio guial laaman naj bën rniee loj reeman.

¹³ Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guíaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman.

¹⁴ Per chi gogbee Pab con Bernabé zian, gudixya' xab reeman, guzëeb reeman lađ ree bën guin, rbixdiaj reeman rëb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetctzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen.

¹⁶ Tiamp gualal Dios baslaa been ree bejn ni guyëntzi reeman.

¹⁷ Per ni'czi zian, zianczi balüüman chu najman por ree ni zagdxé ni rüjnman. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdxé.

¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bën luguiedx guin ree. Dxel bacaaguiaj reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin.

²⁰ Per chi bido'p ree bën rliiladx Jesucrist gadëd lod naga'man, dxel bixchëman, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía.

²² Luguiedx zii ree badxe' reeman luxdoo ree bën rliiladx Jesucrist. Rëb reeman loj reeman din sudxi'ch reeman loj ni rliiladx reeman laaman, din dád sagdiaj reeman din yayu reeman lod rniabee Dios.

²³ Abi' tëë loj tijb gaj ree guiedx guin bacaabee reeman bengol nabee ree loj ree bën rliiladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia.

²⁵ Abi' gunee reeman xtiidx Dios luguiedx Perge, dxel zë reeman guiedx Atalia.

²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliiladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman.

²⁷ Dxel chi bidxin reeman Antioquía, bato'p reeman bën rliiladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bën ad najt bën Israel Jesucrist.

²⁸ Ni guzu Pab con Bernabé xchej, guzunë reeman bën Antioquía rliiladx ree Jesucrist.

15

Guyu gabilt Jerusalén

¹ Lën ree dxëj zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliiladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon.

² Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliiladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bën rliiladx Jesucrist din guguiaa reeman xhünaag güün reeman xcwent sen guin.

³ Abi' badxe'nejz ree bën Antioquía rliiladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliiladx ree Jesucrist, bën zojb ree niz ni guial ma rliiladx ree bën ad najt ree bën Israel xtiidx Dios. Abi' graczi bën ma rliiladx Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree bën rliiladx Jesucrist laa reeman, con ree apóstoles, con ree bengol rniabee loj ree bën rliiladx Jesucrist. Abi' be ree Pab diidx con Bernabé gra ni been Dios con laa reeman.

⁵ Per yu' ree bënfarisew ma rliiladx Jesucrist, guzuli reeman abi' rëb reeman:

—Bén ad najt ree bén Israel abi' ma rliadx reeman Jesucrist, rüjn naguiejn chu' reeman sen ru ree bén Israel, gagbee tëë reeman guial rayal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree bén rliadx Jesucrist din guidoon xhienaag güün reeman.

⁷ Guial tant canee reeman por zian, dxel guzuli Béd, rëbaman loj reeman:

—Gradi compniar raliduladx ree Jesucrist, lëjt ragbee guial diidz gocli gulej Dios naj lojdi din chignen xtiidxza'c Jesucrist loj ree bén ad najt bén Israel din chililadx reeman laaman.

⁸ Abi' Dios bén nünbee luxdoo graczi ree bejn, balüüman guial naj reeman xbejnman guial ma badëëd xSprijtaman loj reeman zi'cgajc baneeman du loj ree.

⁹ Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliadx reeman Jesucrist.

¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree bén rliadx Jesucrist ley ni ni'qui dunuj ree ni'qui dux béngulal ree ad gojct naguieen ree zi'c rniabee ley guin?

¹¹ Dunuj ree rayagbee guial por ni zagdxé ni been Dad Jesucrist, been Dios dux tol ree perdon zi'cgajc laa reeman.

¹² Dxel bacwëëz ro' gra reeman abi' bacaagdiajg reeman ni cayü ree Bernabé con Pab, xcwënt gra ree xmilagr Dios ni been reeman loj ree bén ad najt bén Israel.

¹³ Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg:

¹⁴ Simón Béd be diidz duloj ree xhienaag guzuloj gulej Dios bén ad najt ree bén Israel din gac reeman xbejnman.

¹⁵ Gra ni ma gojc naj zi'c ni bacaa ree bén badëë xtiidx Dios loj ree bejn loj xtiidxaman lod rëb:

¹⁶ Chi ma gojc zian, yayünxhiey ree da bejnan mazri zi'c goc chi naban Davi, gacxhiey reeman por ree bén sta naban, zi'c guban ree bejn xtiamp Davi abi' por laa reeman yayajcxhiey ree da bejnan.

¹⁷ Din yaguiil ree los demazri ree bejn guial guiën reeman naj, gra ree bén nacion ren, yaguiil guial guiën reeman naj, bén ma gule reen din gac reeman da bejnan, bén guiguiejn ree guza't ree bejn naj.

¹⁸ Zian na Dios, bén cugojn bejn ree gra ree nine diidz tiamp gual.

¹⁹ Zeel naladxan ad rayalt chu güün naguiejn bén ad najt ree bén Israel par chinal reeman ley, laa reeman guial ma basa'n xcostumbr reeman par chinal reeman xnejz Dios.

²⁰ Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren bén ad najt lacheel reeman, ad rayalt gaw reeman bëël rberejn ni'qui rejn.

²¹ Zian yaguie'ch ree loj reeman, din diidz tiamp gual tijb gaj guiedx yu' bén rulüü laa reeman xhie rën guiëb xley Moisejs ni rool reeman lën ree yadoo dxey razililadx ree bejn.

²² Dxel apóstoles guin ree con ree bengol rniabee loj ree bén rliadx Jesucrist, con los demazri ree bén rliadx Jesucrist, rëb reeman gucaabee reeman bén guixhiaalnë reeman Pab con Bernabé din che reeman Antioquía. Abi' bacaabee reeman Judas, bén la gajc Barsabás, në Silas, laa reeman rajp guialrniabee loj ree bén rliadx Jesucrist.

²³ Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bén rliadx laaman, në los demazri ree bén rliadx laaman. Ragajpdiozan lëjt bén ad najt ree bén Israel, per nayajc ree compniar raliduladx ree Jesucrist, lëjt zobjidi Antioquía, në los demazri ree bén zobj ree niz Siria nëtëë niz Cilicia.

²⁴ Ma bayagbeen guial yu' ree bén duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bén Israel güün tëëdi zi'c rniabee xley Moisejs, per ad dunujtan baxhaal laa reeman.

²⁵ Zeel bado'pan abi' raguië'chan guial zagdxé naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, bén rayën da'tan.

²⁶ Zien ree ni guijdx cuchaagloj reeman guial cayüjn reeman sirv loj Dad Jesucrist.

²⁷ Dxel cayxhaalnë'n laa reeman Judas con Silas, laa reeman na lojdi gra con quijb xtiidx reeman.

²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güündi, ni rayalzi cu'guijquidi naj guial,

²⁹ ad gawidi xbëel ree be ni rbe'c ree bejn loj ni naj xdios reeman, ad gaw tēdi bēel rberejn, ni'qui rejn, ad sunēdi ben ren bēn ad najt lacheelidi. Bal gapidi cudad ad zūjntidi gra ree nine, zagdxequi güündi. Gagnē Dios lējt."

³⁰ Zian gojcan, gui'ch guin naj ni guxhaalnē reeman guidap ree bēn guin par luguiedx Antioquia. Ni bato'p reeman bēn riladix ree Jesucrist abi' bayü reeman gui'ch guin loj reeman.

³¹ Chi biil reeman laan, dād nix guyu luxdoo reeman por ree diidx zagdx ni zēed lojn.

³² Abi' Judas con Silas guial nēgajc reeman rajp quiarguejn par gudēd reeman xtiidx Dios, dxel zien naj ni guneenē reeman bēn riladix ree Jesucrist, bagu' reeman luxdoo reeman con xtiidx reeman.

³³ Chi ma gudēd zien dxej za' ree Judas con Silas ni, bazaadiidxnē ree bēn riladix Jesucrist laa reeman din yaguiaj reeman lod za' ree bēn guxhaal laa reeman, rēb reeman loj reeman: "Chignē Dios lējt zagdx."

³⁴ Per Silas beenman xgab baya'nman ni mazri.

³⁵ Abi' Pab con Bernabé baya'n reeman Antioquia mazri, laa reeman con ree ben ren basnuu balüü reeman gutie'ch tēē reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudēd tio'p choon dxej, dxel rēb Pab loj Bernabé:

—Yo' stjib yugnaj dux compniar ree bēn riladix ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabé guyēn ninē reeman Waj, bēn la gajc Marcw.

³⁸ Per Pab ad cwējt ninē reeman laaman, din chi we reeman niz Panfilia guro'nladxaman laa reeman, ad binētraman laa reeman.

³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binē Bernabé Marcw, guyu reeman loj barcw zē reeman yuj la Chipre ni riga' loj nijsdoo,

⁴⁰ dxel gulej Pab Silas din chinēman laaman abi' rēb los demazri ree bēn riladix Jesucrist loj reeman guial chinē Dios laa reeman zagdx.

⁴¹ Zianz gudēd reeman niz Siria nē niz Cilicia, ragu' reeman luxdoo ree bēn riladix Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe nē guiedx Lистра abi' Lистра bidxaagloj reeman tijb bēn riladix Jesucrist, laman Timoteo, xniaaman naj bēn Israel, nēman riladix Jesucrist guiaad xdadaman naj bēn grieg.

² Graczi ree bēn riladix Jesucrist, bēn zojb ree guiedx Lистра nē Iconio ruza't laaman zagdx.

³ Dxel rēb Pab chinēman Timoteo, per yaloj badxe'man laaman sen ni ru ree bēn Israel, chitēē xhie guiēb ree bēn Israel riga' niz ni, din gra reeman ragbee guial naj xDadaman bēn grieg.

⁴ Graczi ree guiedx ni gudēd reeman bagojn reeman bēn riladix ree Jesucrist ni rayal güün reeman zi'c ma rēb ree apóstoles, con ree bengol rniabee loj ree bēn riladix laaman Jerusalén.

⁵ Zianan zeel guzudxi'ch ree bēn niz ni loj guialriladix reeman Jesucrist, abi' guixie guixie gojcxhiey mazri ree bēn riladix laaman.

Baliüloj tijb bēn Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudēdzinejz reeman niz Frigia nē niz Galacia

⁷ abi' bidxin reeman niz Misia. Ni been reeman xgab niej reeman niz Bitinia, per ad cwējb gajct xSprijt Dios niej reeman niz ni.

⁸ Dxelri gudēdzinejz reeman niz Misia, bidxin reeman guiedx Troas.

⁹ Yagaj, guxhinzii guzajc Pab zi'c ruluü cane'xhchaalaman. Baguiaaman tijb xinguaaw zēed niz Macedonia, za'lix rzajquix liadix loj Pab, rēbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bēn cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis.

¹² Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bëlzi ree dxej.

¹³ Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bën Israel par cwedx reeman Dios. Abi' badxu'n baneen xtiidzxa'c Jesucrist loj ree bēngunaa bado'p yagaj.

¹⁴ Tijb ree bēngunaa guin la Lidia, najman bën Tiatira, ruto'man lajd zagdxo ni culor murad. Diidxli rdxebaman Dios abi' cucaagdiajgaman. Dios guxhal xquiargueijnman din gucaagdiajgaman zagdxo gra ni rēb Pab.

¹⁵ Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliiladxidi guial ma rliiladxan Jesucrist, gol baya'n lidxan.

Dxel beenman nagueijn baya'n nan lidxaman.

¹⁶ Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdooom, abi' por xguialrniabee xindxab guin rnieeya'm guíaad ree bën guzii laam dád zro' milia rüjn reeman gan por dxiiin guin.

¹⁷ Dxel bidnalim Pab con dunujn, rbidxa'm rēbim:

—Bën guie ree rüjn xchiin Dios yu' xanyabaa, laa reeman gugojn lējt xhienaag gaquidi perdon.

¹⁸ Zien dxej da't beenm zian, xt chi balenya' Pab, dxel bayejcaman rēbaman loj xindxab yu' luxdooom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdooom.

¹⁹ Per chi gogbee ree bën guzii laam guial ad zajctri güünm gan milia par laa reeman, dxel gunaaz reeman Pab con Silas, binē reeman laa reeman roylay loj guxtis.

²⁰ Chi bayü reeman laa reeman loj ree guxtis guin, rēb reeman:

—Xin Israel guie ree rbēē reex wadijl du ladx ree,

²¹ abi' ruluü reex costumbr ree ni ad zatiēēbt ree yaguieen ree ad zajc tēēt yaguieen ree, din ben Rom dunuj ree.

²² Dxel wajs gra ree bën guin contr laa reeman, abi' gunabee ree guxtis guin gulēē xab Pab con Silas din quin reeman laa reeman con var.

²³ Chi gulox gudijn da't reeman laa reeman, dxel bilu' reeman laa reeman ladxguuib abi' gunabee reeman bën rajp ro' ladxguuib guin din gapdxi'chaman laa reeman.

²⁴ Chi bigueijn bën rajp ro' ladxguuib guin zian, dxel bilu'man laa reeman xt lēn cuart bigra yu' lēn ladxguuib guin, guxhiiman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tēē reeman cant par laaman, dxel cucaagdiajg los demazri ree bën yu' ladxguuib guin.

²⁶ Dxel tijbzi golp guzulox xudoxh, niz ni niz guie rurliia xcimiant ladxguuib guin. Loj hor zii gajc bixal gra ree xportan abi' baxiec ree caden naxii gra ree bën yu' lēnan.

²⁷ Chi baban bën rajp ro' ladxguuib guin abi' baguiaaman zojbyal gra ree xportan, gulēē xi espadaman din nugüjt laagajcaman guial gunaladxaman gra ree bën yu' ladxguuib guin ma baxüün.

²⁸ Dxel gurixdiaj Pab, rēbaman lojman:

—Ad güünnaa lüj gajc, laa dugran nadxu' guie.

²⁹ Laa gunab gajc bën guin tijb guij, dxel ruxüünman guyuman, rnijman guial rdxebaman, bigzuxibaman loj Pab nē loj Silas.

³⁰ Dxel babēēman laa reeman, gunabdiidxaman loj reeman, rēbaman:

—Dad, gol guna, çhie rayal günan din güün Dios naj perdon?

³¹ Badxi' reeman laan, rēb reeman:

—Bililadx Dad Jesucrist, zian gaquil perdon con xfamilil.

³² Abi' be reeman xtiidx Dios lojman con loj gra ree bën zojb lidxaman.

³³ Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman.

³⁴ Abi' bignēman laa reeman lidxaman, dxel badēēman ni gudaw reeman. Guíaad laaman dád niz yu' luxdoooman con gra xfamilaman Guial ma rliiladx reeman Dios.

³⁵ Chi bareguiaal, guxhaal ree guxtis guin suldad ree persi biguiedx reeman loj bën rajp ro' ladxguuib guin guial guslaaman Pab con Silas.

³⁶ Abi' rēb bën rajp ro' ladxguuib guin loj Pab:

—Ma na ree guxtis guial guslaan lējt. Yan ma zajc yaguiajdi ad chu'di xgab.

³⁷ Per rēb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bën guiedx, ni'quid baneet reeman mod nadēēdan cwent loj reeman con badxe' reeman dunujn ladxguuib. Abi' yan, çguslaa reeman dunujn ralan ya? ¡Ad zajctan zian! Gui't quijb laa reeman guidgalēē reeman dunujn.

³⁸ Abi' bicojn ree suldad guin guxtis guin ree zian, dxel dád bidxeb reeman chi bigueijn reeman guial ben Rom naj Pab con Silas.

³⁹ Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin.

⁴⁰ Chi barii reeman ladxguuib, wej reeman lidx Lidia. Zianz chi gulox guneenë reeman los demazri ree bën rliiladx ree Jesucrist din chu' luxdoo reeman sudxi'ch reeman loj ni rliiladx reeman, dxel baza reeman.

17

Bidxin ree Pab con Silas Tesalónica

¹ Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bën Israel.

² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios.

³ Bagojnman balüü tëëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nëtëë zien ree béngunaa zojbloj bililadx Jesús.

⁵ Per ree bën Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguuil reeman Pab con Silas din cwëë reeman laa reeman guzuj reeman laa reeman loj ree bën guiedx guin.

⁶ Per guial ad badxejlt reeman laa reeman yagaj, dxel guxoobyuj reeman Jasón në ree ben ben bën rliiladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie,

⁷ abi' lidx Jasón zojb reex. Laa reex con gra ree bën nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

⁸ Chi bigueijn ree guxtis guin zian con ree bejn, gra loj xgab been reeman.

⁹ Per Jasón con los demazri ree bën guyu ladxguuib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bën rliiladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bën Israel.

¹¹ Mazri benza'c naj ree bën Israel guin guial loj ree bën Israel zojb Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya.

¹² Zeel dád zien reeman bililadx Jesucrist, nëtëë zien bën grieg bililadx laaman zi'c ree xinguaaw zi'c ree béngunaa zojbloj niz ni.

¹³ Chi gogbee ree bën Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab.

¹⁴ Per ree bën rliiladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea.

¹⁵ Abi' ree bën biglu'nejz Pab, xt Atenas binë reeman laaman. Chi baza reeman ni, bigneë reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabëz Pab guidxin Silas con Timoteo luguiedx Atenas, guyunayaman guial baguaaman zien da't ni rajp ree bejn niz ni zi'c dios.

¹⁷ Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëëz bën rdxaaglojman niz galay guiedx guin.

¹⁸ Guneenë tëëman garol ree bën zinal ni balüü bën brii laj epicureo, në za garol ree bën estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bën ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb.

¹⁹ Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie?

²⁰ Din rül diidx du lojn ni ad rayagbeetan, zeel rayënan yayagbeen xhie rën guiëban.

²¹ Graczi ree bën Atenas, con los demazri ree benzit zobj ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópago, rëbaman:

—Bën Atenas, por graczi ni ma baguian, ma gogbeen guial dád zien ree xdiosidi.

²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn.

²⁵ Ad riaadx tëëtaman chu güün xhienin par laaman, din laaman naj bën razaladx bi nabajnnë' ree, laaman razaladx guialnaban duloj ree në ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman.

²⁷ Din yaguül reeman Dios majsi zi'c chi rgan bejn chi raguuilaman xhienin, zian güün reeman din yadxejlanan. Majsi diidxliczi ad zijtt za'man par gra bejn.

²⁸ Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbenrignia'di, chi rëb reeman: “Dunuj ree nayajc xi'n Dios.”

²⁹ Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman.

³⁰ Tiamp gulal cwëjb Dios been ree bejn zi'c naladx reeman guial achetctzi ragbee reeman, per yan gra ladczi canabeeman gra ree bejn din yayüjn reeman xgab por xtol reeman.

³¹ Din Dios ma gulej tijb dxej ni yadëed ree bejn cwent lojman, dxej ni güün xguialgux-tisaman. Ma gulej tëëman Jesucrist din güünman guialguxtis guin, abi' din guiguieen guial gulejman laaman par zian, basbanman laaman chi gütaman.

³² Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—jZatijb dxej yasnuu yacaagdiajgan ni canal!

³³ Dxel baza Pab lod za' reeman.

³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zobjloj lën Areópago laman Dionisio, në stijb bëngunaa la Dámaris në ree ben ren.

18

Bidxin Pab Corinto

¹ Dxel brii Pab Atenas zëman Corinto.

² Yagaj bidxaaglojman tijb bën Ponto laman Aquila, zëëdaman diaa Israel. Aquila con xbëngunaaman Priscila qui bazari reeman niz Italia guial gunabee rey Claudio yari gra ree bën Israel Rom. Dxel wej Pab bitixlojman laa reeman.

³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin.

⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeaman loj ree bejn, balüü tëëman bën Israel ree guial Jesús naj Cristo bën cabëz reeman.

⁶ Per guzuloj bidxe'ch reeman Pab abi' gunee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguieen xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman.

⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' gurobnijis reeman.

⁹ Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil,

¹⁰ naj za'në' lüj, achutctzi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bën guin ree xtiidx Dios.

¹² Per chi goc Galión gobernador Acaya, bèn Israel ree bachajg lasa' reeman persi gunaaz reeman Pab binè reeman laaman loj gobernador guin,

¹³ rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma niniee Pab, chi gunee Galión rëbaman loj ree bèn Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt.

¹⁵ Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güündi, ad rëntan günan guialguxtis xcwent ree ni guin.

¹⁶ Abi' laa babëë gajcaman laa reeman roylay guin.

¹⁷ Dxel yagaj gajc gunaaz gra reeman Sóstenes, bèn rniabee lën xyadoo ree bèn Israel abi' guidijn reeman laaman, per ni'quid beencwentt gobernador guin laa reeman.

Badxin Pab Antioquia

¹⁸ Zienri ree dxej baya'n Pab Corinto. Dxel bazaadiidx nëman los demazri ree bèn rliadx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guijc Pab, por tijb promejs ni beenman.

¹⁹ Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bèn Israel zojb ree ni, bigneenëman bèn Israel rado'p ree lën yadoo guin.

²⁰ Abi' guyën reeman niaglaa Pab ni mazri, per ad cwëjbtaman.

²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso.

²² Chi bidxinman Cesarea, dxel wejman Jerusalén bicajpdiozaman bèn rliadx ree Jesucrist, dxelri zëman Antioquia.

²³ Chi ma gojc xhej za'man Antioquia, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bèn rliadx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bèn Israel luguiedx Éfeso, laman Apolos, gojlaman Alejandria. Dád radxejlanan diidx par guinieeman abi' dád rajcaman xtiidx Dios.

²⁵ Basiidaman xtiidx Dios, dxel con gan balüüman bejn ree, zagdxë tëë rüman xtiidx Jesús loj reeman, majsi ad ragbeetaman par xhieri mazri riobnijs bejn, tijbzi xcwent xguial waroobnijs Waj ragbeeman.

²⁶ Abi' Apolos, sin guialrdxheb guzuloj caneeman xtiidx Dios loj ree bèn Israel lën xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios.

²⁷ Chi been Apolos xgab cheman niz Acaya, gra ree bèn rliadx Jesucrist bèn za'në laaman, badxe' reeman luxdooan din cheman, abi' guxhaal reeman tijb gui'ch loj ree bèn rliadx Jesucrist bèn zojb ree niz Acaya din yaca' reeman laaman zagdxë chi guidxinman niz ni. Chi bidxinman niz Acaya dád beenman yudar bèn ma rliadx ree Jesucrist guial gognë Dios laa reeman.

²⁸ Din delant loj gra ree bejn rëbaman guial ad laat zë ree bèn Israel, abi' achutczi gojc nadxi' xtiidxaman guial graczi ni rëbaman naj diidxli, balüü tëëman loj xtiidx Dios gra luar lod rëb guial Jesús naj Cristo bèn gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bèn rliadx Jesucrist.

² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bèn bayüjn ree xgab por xtol reeman. Per rëbaman guial rayal chililadx reeman bèn zëëd xijchaman abi' laaman naj Jesús, bèn naj gajc Cristo.

⁵ Chi bigueijn reeman zian, dxel gurobnijs reeman por Dad Jesús.

⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëed reeman xtiidx Dios loj ree bejn.

⁷ Loj gra reeman naj cost chiptio'p xinguaaw.

⁸ Choon bëew wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguiejn din giünman gan chililadx reeman xhienaag naj xguialrniabee Dios.

⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rililadx Jesucrist, binëman laa reeman lën tijb xzcuel bën la Tiranno. Ni balüüman laa reeman guixie guixie,

¹⁰ loj tio'p ijz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiajg reeman xtiidx Dad Jesucrist.

¹¹ Abi' por xguialrniabee Dios been Pab milagr narooob ree,

¹² xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

¹³ Per guyu bëlzi ree bën Israel ziza rabëë reeman xindxab luxdoo ree bejn, abi' guyën reeman nünjë reeman dxiin laj Dad Jesucrist dxel rëb reeman loj ree xindxab guin:

—jPor Jesús bën ruza't Pab, rniabeen lëjt, gol barii!

¹⁴ Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz.

¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëën chunin naj Pab, per lëjt ni'quid nünbeetan lëjt.

¹⁶ Abi' bën yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lëñü guin, ziladzi reeman nadxeelguijdx tëë reeman.

¹⁷ Graczi ree bën zojb Éfeso, zi'c ree bën Israel zi'c ree bën ad najt bën Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸ Në zien ree bën rililadx Jesucrist bidxin abi' delant loj gra ree bejn baneero' reeman gra ni mal ma been reeman.

¹⁹ Nëtëë zien ree bën been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tû'pchii mil milia plajt lasajc reen.

²⁰ Abi' zian bire'ch xtiidx Jesucrist biguien tëë xguialrniabeeman.

²¹ Chi ma gudëë gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman guial chi ma wejman Jerusalén dxelri cheman në Rom.

²² Abi' guxhaalaman tio'p bën rünj laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bën Éfeso nadxeb por xtiidx Jesús.

²⁴ Din Demetrio, bën rünj ree ni plajt, rünjman figur plajt ni naj ree form xyadoo dios la Diana, ragbeeman guial dád rünjman gan con ree bën rünjnëman dxiin.

²⁵ Dxel bato'paman laa reeman con ree ben ren bën rünj gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'.

²⁶ Per yan lëjt ruguiaa rigueijn tëëdi, Pab ziza cayëbix guial dios ni rünj ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, në guidib niz Asia.

²⁷ Dxel nadxeb yasëëb dux chiin ree, abi' ad tijbtizi dux chiin ree, në xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bën rën ree bejn guidib niz Asia në guidib loj guidxliuj.

²⁸ Chi bigueijn reeman zian, bidxe'ch reeman abi' gurixdiaj reeman rëb reeman:

—jBën zojbloj naj Diana, xdios ree bën Éfeso!

²⁹ Abi' gurixdiaj ree bën guiedx guin wajs reeman, gunaaaz reeman tio'p ree bën Macedonia, Gayo në Aristarco, bën rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bën guiedx.

³⁰ Guyën Pab niuman yagaj din ninieenëman bejn ree, per ad cwëjbt ree xcompniaraman, bën ma rililadx ree Jesucrist.

³¹ Nëtëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni.

³² Zianz gurixdiaj ree b́en guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj.

³³ Dxel galay ben zien guin babēē ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēēz ro' reeman din guinieeman por ree b́en Israel delant loj ree b́en guiedx guin.

³⁴ Per chi gogbee reeman guial najman b́en Israel, tiblazujzi gurixdiaj reeman cost tio'p hor, rēb reeman:

—jB́en zojbloj naj Diana, xdios ree b́en Éfeso!

³⁵ Dxel chi been squiarban luguiedx guin gan bacwēēz ro' reeman, dxel rēbaman:

—B́en Éfeso, gra b́enguidxliuj ragbee guial luguiedx guie zianczi rniaj ree bejn xyadoo dios Diana abi' rēn tēē ree bejn dios Diana biajb xanyabaa.

³⁶ Lējt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab.

³⁷ Din b́en bidnēdi achet ni mal been reeman yadoo guin, ad wanee tēēt reeman diidxgujdx dux dios ree.

³⁸ Bal Demetrio con ree xcompniaraman b́en rüjnnēman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman.

³⁹ Per bal xhieri mazri rēndi, chi gac xgabilt b́en guiedx dxel gacan reglad.

⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹ Chi gulox rēbaman zian, dxel bare'ch reeman.

20

Wej Pab Macedonia në Grecia

¹ Chi babedxe ree b́en Éfeso, gurejdx Pab b́en rliladx ree Jesucrist persi bagu'man luxdoo reeman. Dxelri bazaadiidxnēman laa reeman abi' zēman niz Macedonia.

² Bitixlojman b́en rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia

³ lod guzuman choon bēēw. Ma niuman loj barcw din niejman Siria, chi gogbeeman guial nyēn ree b́en Israel nüjn reeman laaman xhienin. Dxel mejorli beenman xgab bayejcaman niz Macedonia.

⁴ Binēman Sópater, b́en Berea, xi'ngaan Pirro, në Aristarco con Segundo, b́en Tesalónica ree, nētēē Gayo, b́en Derbe, con Timoteo, në Tíquico con Trófimo, b́en niz Asia ree.

⁵ Gra reeman guned abi' gulēz reeman Pab con naj Lujc guiedx Troas.

⁶ Guiáad dunujn chi gudēd lanij ni raw ree b́en Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenēman bejn ree, ⁸ guiáad lēnü ladya lod rado'pan dád zien ree guij re'c.

⁹ Tijb xinguiag zojb ro' ventan lax Eutico. Guial xchej da't guneenē Pab laa reeman, dxel xt garej gunaaz bacaal xin guin, abi' gudidya'x diidx yu bayon guin xt luyuj, ma güjtix chi bales reeman laax.

¹⁰ Dxel biguiajt Pab lod naga'x, bazuxibaman abi' gudiidxaman laax, dxel rēbaman loj reeman:

—Ad rdxebidi, nabanquix.

¹¹ Dxel bayē'p Pab zatijb, gula'man guiadxtil abi' gudaw reeman, dxel basnuu guneenēman laa reeman xt bareguiaal. Chi bareguiaal bayunejzaman ziaman.

¹² Abi' xin gudidya' ro' ventan guin, nabanx zignē reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guida'man ni.

¹⁴ Chi badxajg du lasa'n con laaman luguiedx Asón, dxel badxu'nē'n laaman loj barcw bio'n lod la Mitilene.

¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio.

¹⁶ Been Pab xgab ad zejtaman Éfeso, ad guyëntaman niaglaaman niz Asia guial nuyënman diob naxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxné Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zojb ree Éfeso.

¹⁸ Chi bidxin reeman dxel rëbaman loj reeman:

—Diüzd dxej yaløj ni bialan niz Asia xt yan, lëjt ragbee xhienaag cayünan.

¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj.

²⁰ Per majsi zian ad bacwëëzt rnin lojdi ni naj ni zagdx par lëjt, tant delant loj ree bejn në lidxidi balün lëjt.

²¹ Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tée loj reeman loj Dios chililadx tée reeman Dad Jesucrist.

²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni.

²³ Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't guialzi naj ni cabëz naj.

²⁴ Per par naj achet güünan por zian, majsi guiëtan per con nix yu' luxdon cayünan ni ryal günan xt lod gactizan, gün tée mandad ni banee Dad Jesús naj guial gatiechan xtiidxa'caman xhienaag rën Dios dunuj ree.

²⁵ Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatriddi naj.

²⁶ Zeel ganin lojdi yan guial ad achetri dol ra'pan bal id nabandi xnejz.

²⁷ Din ma bagojnan lëjt gra xhienaag naj xixgab Dios achetzi baquiechan.

²⁸ Yan, gol gojp lëjt gajc, gol gojp tée ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnmman ma gudijxaman por xtol reeman.

²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist.

³⁰ Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios.

³¹ Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

³² Yan, compniar raliduladx ree Jesucrist, gusa'nan lëjt con Dios con xtiidxa'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tée man lojdi ni ma rëbaman gudëëdaman loj ree bën ma naj xbejnman.

³³ Achut xmlia achu tée xab rzëëbladaxn.

³⁴ Lëjt ragbee zagdx guial con quijb yan benan dxiin persi gudawnë'n bën guzu ree con naj.

³⁵ Abi' balün lëjt guial zian ryal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman.

³⁷ Gra reeman biin, gudiidx reeman Pab abi' gudaw reeman laaman xid.

³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara.

² Ni badxaaglojn tijb barcw ni ma che niz Fenicia zianz badxu'n lojn.

³ Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin.

⁴ Ni badxaaglojn bën rliladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman loj Pab guial ad bal cheman Jerusalén.

⁵ Per chi baza' gajdx dxej guin, dxel badxoon luguiedx guin, dxel gra reeman con xbëgunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios.

⁶ Dxel bazaadiidxnē'n laa reeman abi' badxē'pan loj barcw guíaad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēēn bugneenē'n bēn zojb ree ni, bēn rliiladx ree Jesucrist abi' baya'n'an con laa reeman tib dxej.

⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprobi abi' baya'n'an lidxaman.

⁹ Yu' tajp xi'ndxa'paman biixntijb ree abi' laa reem rudēēd xtiidx Dios loj ree bejn.

¹⁰ Ma gojc zien dxej nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea.

¹¹ Chi bi'taman cwa'man xcinch Pab guxhii guia' gajcaman con yaaman, abi' naman: —XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayū reeman laaman loj ree bēn ad najt bēn Israel.

¹² Chi baguiejnan zian, dunujn con ree bēn rliiladx Jesucrist luguiedx guin baguieenan naguiejn loj Pab ad cheman Jerusalén.

¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitēē cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudēd ree dxej guin dxel baguieenan purvinid bio'n Jerusalén.

¹⁶ Bunē'n bēlzi ree bēn Cesarea rliiladx ree Jesucrist, laa reeman binē dunujn lod baya'n'an lidx tijb bēn Chipre, ma gojc xchej rliiladxaman Jesucrist, laman Mnasón.

Bignaj Pab Jacob

¹⁷ Abi' ree bēn Jerusalén rliiladx Jesucrist dád nix guyu luxdoo reeman baca' reeman dunujn.

¹⁸ Chi bareguiaal bunē'n Pab bugnajn Jacob, ni riga' gra ree bēn rniabee loj ree bēn rliiladx Jesucrist.

¹⁹ Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bēn ad najt bēn Israel.

²⁰ Chi biguiejn reeman zian, baza't reeman Dios zagdxē, zianz rēb reeman loj Pab:

—Lūj ragbee guial entr loj ree bēn Israel zien da't reeman ma bililadx Jesucrist, abi' gra reeman rēb guial rūjn naguiejn güün bejn zi'c rniabee xley Moisejs.

²¹ Ma biguiejn tēē reeman guial lūj culūū bēn Israel ree, bēn ad zojbt ree loj nacion Israel guial ad zūjncwentt reeman xley Moisejs, rēb tēēl loj reeman guial ad rūjnt naguiejn chu' xi'n reeman sen ru ree bēn Israel ad zinal tēēt reeman dux costumbr ree.

²² Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til.

²³ Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwēb reex loj Dios.

²⁴ Binē reex, gol been zi'c rēb loj ley din gaquidi naya, gudijx tēē por laa reex din gac ya guijc reex. Zian gagbee gra bejn guial rūjnquil zi'c rniabee ley, guial ad wali tēēt ni biguiejn reeman xcwentil.

²⁵ Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

Gunaaz ree bēn Israel Pab

²⁶ Dxel binē Pab guidap ree bēn guin, abi' chi bareguiaal been reeman zi'c rniabee ley par gac reeman naya. Dxel guyu reeman lēn yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinē tijb gaj reeman tijb be guiēt zi'c tijb gon par Dios.

²⁷ Chi ma yayaaloj gajdx dxej ni naj güün reeman zi'c rniabee ley, yu' ree bēn Israel zēēd niz Asia, baguiaa reeman Pab lēn yadooro' Jerusalén abi' gurixdiāj reeman wajs reeman, gunaaz reeman laaman,

²⁸ rēb reeman:

—jBēn Israel, gol been yudar! Xin guie naj xin ziza gra lad caneeguidxix bēn Israel ree nē dux yadoo ree, rēb tēēx loj ree bejn guial ad güün reeman zi'c rniabee dux ley ree. Abi'

ad tijbtzi laan, në ma badxe'x bën ad najt ree bën Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

²⁹ Rëb reeman zian guial baguiaa reeman Pab zizaman ni con tijb bën Éfeso bën la Trófimo, zeel gunaladx reeman binë Pab laaman lën yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree.

³¹ Za mer nugÿjt reeman laaman, chi bidxin ruson guin loj suldad rniabee ree suldad guial gra ree bën Jerusalén cayÿjn nadxeb.

³² Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bën guin. Chi baguiaa ree bën guin bidxin suldad rniabee guin con ree xsuldadix, dxel bacwëëz gudijn reeman Pab.

³³ Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman.

³⁴ Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad.

³⁵ Chi bidxin reex loj ree scliar lod yu' ree suldad guin, gulejn reex Pab guial dád nadoxh rÿjn ree bën zien nal laa reex,

³⁶ abi' gra reeman rbixdiaj, rëb reeman:

—¡Gol bagÿjtix!

Gunee Pab loj ree bejn

³⁷ Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lÿj ya?

Badxi' suldad guinan rëbix:

—¿Rajc rnieel diidx grieg ya?

³⁸ ¿Nid lÿj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bën bagÿjt ree bejn?

³⁹ Dxel rëb Pab lojx:

—Bën Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenë'n bën guie ree.

⁴⁰ Dxel cwëjb suldad guin, abi' guzuli Pab loj ree scliar guin beenman sen loj ree bën guin con yaaman din yacwëëz ro' reeman. Chi bacwëëz reeman, dxel guneenëman laa reeman diidx hebreo, rëbaman:

22

1 —Lëjt bengol në los demazridi, gol bacaagdiajg ni ganin por naj.

2 Chi bigueijn reeman caneenëman laa reeman diidx hebreo, mazri bacwëëz reeman. Abi' basnuuman rëbaman loj reeman:

3 —Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan.

4 Dxel guzunaalan bën riladx ree Jesucrist, xt bagÿjtan laa reeman abi' zi'c ree béngunaa zi'c ree xinguaaw gunaazan badxe'n ladxguüb.

5 Bixhioz mazri zobjloj rniabee graczi ree bixhioz në gra ree guxtis Israel ragbee guial najn ni wali. Din laa reeman baneë tijb gui'ch par gulün loj du lasa' bën Israel ree, bën zobj ree luguiedx Damasco din chile' yaguilan bën riladx ree Jesucrist luguiedx guin, gunaaz tëen laa reeman guidnë'n laa reeman Jerusalén din téd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

6 Per chi za'n lunejz par Damasco, chi ma cadxinan ni cost garol dxej, dxejczzi brii tijb guij xanyabaa balaan bacha' guidibczzi lod cazaan,

7 abi' breeyujn. Dxel bigueijnan cha' bën na: “Saulo, Saulo, ¿chexquiza zeel rzunalil naj?”

8 Abi' gunabdiidxan rën: “¿Chu lÿj Dad?” badxi'man laan naman: “Naj naj Jesús, bën Nazaret, bën rzunalil.”

9 Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj.

10 Dxel gunabdiidxan rën: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.”

11 Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

¹² Ni zojb tijb bén la Ananías, rünman cumplid gra zi'c rniabee xley Moisejs. Abi' gra ree bén Israel zojb luguiedx Damasco nünbee laaman guial nabanman xnejz.

¹³ Ananías guin bidganaj naj, chi bi'taman naman lon: "Saulo, ma zajc yaguaal stijb." Loj hor guin gajc baguian stijb abi' baguian laaman.

¹⁴ Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' yaguaal Jesucrist guien tëël cha'man, bén rünj zi'c rayal.

¹⁵ Din chigneel xtiidxaman loj gra ree bénguidxliuj, gü tëël diidx loj reeman ni baguiaa ni biguiejn tëël.

¹⁶ Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtolil."

Be Pab diidx xhienaag wejman loj ree bén ad najt bén Israel

¹⁷ Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'xhchalan.

¹⁸ Baguian Dad Jesús naman: "Baquiejn. Cari barii Jerusalén, din ad züjncwentt reeman ni guiëbil por naj."

¹⁹ Abi' rën lojman: "Dad, laa reeman ragbee guial naj wa gra lën ree yadoo gunaazan bén rililadx ree lüj, badxe'n laa reeman ladxguib gudin tëën laa reeman.

²⁰ Në chi bagüjt reeman Esteban, bén gunee xtiidxi, laagajc naj za' ni rën zagdxe naj guiëtaman abi' xt ganan xab ree bén bagüjt laaman."

²¹ Per na Dad Jesús lon: "Wej, naj gaxhal lüj zijt loj ree bén ad najt bén Israel."

Badxe' reeman Pab lod yu' ree suldad

²² Xt guintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—jAd rayalt guiban xin guin! jGol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tëë reeman yuj niz ladia.

²⁴ Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bén guin zian contr laaman.

²⁵ Per chi guxhii reex Pab din quin reex laaman, rëbaman loj tijb ree suldad rniabee za' ni:

—jZajc quindi tijb bén Rom ya, chi gadidi gagbee xhie beenman?

²⁶ Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:

—Gojpcudad ni güünnël xin guin, din xin Roman.

²⁷ Dxel wej suldad rniabee guin lod za' Pab, abi' gunabdiidxi lojman rëbix:

—jWalin ya xin Rom lüj?

Badxi' Paban rëbaman:

—Walican.

²⁸ Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diidz goolan najn bén Rom.

²⁹ Chi biguiejn ree suldad niguin Pab, guial bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaa, guyën suldad rniabee guin niagbeechaawix chexc zeel za' ree bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëëx Pab bazujx laaman loj gra reeman.

23

¹ Baguiaa Pab loj ree guxtis guin, abi' rëbaman:

—Compniar Israel, loj guidib ni nabanman xt yan, achet naladxan delant loj Dios din naj ragbee xhienaag nabanman.

² Dxel Ananías, bixhioz mazri zojbloj rniabee graczi ree bixhioz, gunabeeman bén za' ree gajxh cwë' Pab din ca'p reeman ro'man.

³ Per badxi' Paban rëbaman loj bixhioz guin:

—jZiangajc ca'p Dios ro'l, bén rusquiee! jId zojbil yagaj ya par güünl guialguxtis zi'c rniabee ley? Abi' jchexquiza zeel rüjnl zi'c ad rniabeet ley, rniabeel ca'p reeman ro'n?

⁴ Abi' ree bén za' yagaj rëb reeman lojman:

—jZian rusaglojl xbixhioz zojbloj Dios ya?

⁵ Dxel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: “Ad gusaglojl Bén rniabee ladxil.”

⁶ Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial rliadxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'.

⁸ Din bénsaducew ree ad rliadx reeman guial yaban ree bengüt, ad rliadx tëet reeman guial yu' ree anjl në ree sprijt, per ree bénfarisew rliadx reeman gra ree ni guin.

⁹ Abi' been reeman naquie' yagaj. Dxel guzuli bëlzi ree bénfarisew naj mextr ruluü ley, rëb reeman:

—Achet ni mal wayünj Bén guie. Wed tijb sprijt o tijb anjl gune laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëe reex laaman galay ree Bén guin, chinë tëe reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugÿjt reeman Pab

¹² Chi bareguiaal, garol ree Bén Israel baya'n reeman diidx din gugÿjt reeman Pab, rëb tëe reeman guial achet gaw reeman achet tëet guië' reeman xt gugÿjt reeman laaman.

¹³ Nadëd tiuu naj ree Bén rëb zian.

¹⁴ Abi' wej reeman bigneenë reeman bixhioz ree Bén rniabee ree bixhioz në ree xbengol ree Bén Israel, rëb reeman loj reeman:

—Dunujn ma raguie'ch guial achetczi yadaawan xt chi ma bagÿjtan Pab.

¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagÿjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab.

¹⁷ Zianz gune laax Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binëx laax tiblax, gunabdiidxix lojx rëbix:

—¿Xhie rënl nal lon?

²⁰ Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman.

²¹ Per ad bal chililadxil laa reeman, din nadëd tiuu naj ree Bén cwëz laaman guquie'chloj reeman lunejz, abi' ma rëb reeman guial achet gaw reeman ache tëet guië' reeman xt gugÿjt reeman laaman. Yan za'sin reeman cabëz reeman ni guiebil.

²² Dxel rëb suldad guin loj xin guin:

—Baguiaj. Achu loj guiebil ni ma nal lon.

Guxhaal reeman Pab loj gobernador Félix

²³ Dxel gune laax suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin.

²⁴ Abi' gunabee tëex güün reex porvinid way cwib Pab, rëbix loj reex guial guinia reex Pab din guidxinman zagdx loj gobernador Félix.

²⁵ Abi' guxhaalnëx laa reex tijb gui'ch ni rëb:

²⁶ “Naj Claudio Lisias, rugajpdiozan lÿj gobernador Félix, lÿj guial najl Bén zojbloj.

²⁷ Bén Israel ree gunaaz xin guie ma nugÿjt reeman laax. Per chi gogbeen guial xin Roman, dxel wan con ree da suldad buglëen laax loj reeman.

²⁸ Abi' guial rënan gagbeen xhie rüjnx zeel rdxe'ch reeman laax, dxel bazun laax loj ree guxtis Israel.

²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiëtix ni'qui guial chu'x ladxguiib.

³⁰ Nê guial ma gogbeen guial xixgab ree bën Israel naj gugÿjt reeman laax, zeel cayxhalan laax lojl. Abi' ma rën loj ree bën rdxe'ch laax guial con lÿj güün reeman reglad ni rajp reeman contr laax. Laanan rugojnan lÿj."

³¹ Been ree suldad guin zi'c gunabee suldad rniabee guin abi' guxhin binë reex Pab luguedx Antípatris.

³² Chi bareguiaal suldad zê ree guia' bayejc reex lod yu' ree suldad, guiáad ree suldad dxiib way zinë reex laaman luguedx Cesarea.

³³ Chi bidxin reex Cesarea, badëéd reex gui'ch guin loj gobernador guin, bayü tēē reex Pab lojman.

³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zëédaman,

³⁵ dxel rëbaman lojman:

—Chi gui't ree bën za' ree contr lÿj, dxel gucagdiagan ni nal.

Abi' gunabeeman gap reex Pab lën xpalas Herodes.

24

Ni guneë Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nê tijb licenciad laman Tértulo. Abi' wej reeman loj gobernador guin din cwe'c reeman xguialquia Pab.

² Chi bidxinnë reex Pab, guzuloj Tértulo caneeman contr laaman, rëbaman loj gobernador guin:

—Quixtëē lÿj dad gobernador, por lÿj nadxu'dxen, nê por xguialrajquil zien ree ni rÿjn sirv cayajc du ladxan.

³ Gra ladczi za' ree bejn conform por gra ni cayÿjnl dad gobernador Félix, lÿj naj bën zobjloj, quixtëēczi lÿj.

⁴ Per chitëē günlään lÿj mazri, rniabaan lojl din gucaagdiajguil ni yanan lojl tibrajtooczi.

⁵ Dunujn bayagbeen xin guie naj zi'c tijb guialguijdx loj ree bën Israel, guidibczi guidxliuj zizax rustijlix laa reeman abi' laax rniabee loj tib cwaa ree bën rniee reeman nazaren.

⁶ Abi' guyën tēēx nÿjnx dux yadooro'n zi'c tijb luar ad rÿjnt sirv, zeel banaazan laax bayënan naguieenan guialguxtis zi'c naj dux leyan.

⁷ Per laa bi't gajc suldad Lisias con ree xsuldadix, babëëxuu reex laax du lojn.

⁸ Abi' rëb suldad rniabee guin guial lojl gui't ree bën rbe'c xguialquia Pab, yan lÿj gajc zajc guiniabdiidx lojx din gagbeel zagdxe guial walican ni ranan xcwentix.

⁹ Abi' ree bën Israel za' ni rëb reeman guial waliqui gra ni guin.

¹⁰ Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican.

¹¹ Abi' lÿj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios.

¹² Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguedx guin.

¹³ Bën guie ree ad zajc na reeman lojl guial ni diidxli naj ni rudxiib reeman guican.

¹⁴ Per ni naj diidxli naj guial riladxan Jesucrist, nejzcüb guin naj ni zinaalan, cayünan sirv loj xDios dux bëngulalan, abi' na ree bën guie guial ad xnejzt Diosan, per cayünan zian guial riladxan gra ni zëéd loj ley nê ni bacaa ree bën badëéd xtiidx Dios loj ree bejn.

¹⁵ Abi' zi'cgajc riladx ree bën guie Dios, ziangajc riladxan laaman guial yaban ree bengüt stijb, zi'c ree bën goc benza'c nê ree bën goc benmal.

¹⁶ Zeel rünan naguiejn gabajnan zagdxe chitëē xhie ganaladxan delant loj Dios ni'qui delant loj ree bejn.

¹⁷ Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tēēn gon ni rayal gudëdan loj Dios.

¹⁸ Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tēētan wadijl.

¹⁹ Yan, bën gunaaz ree naj, laa reeman naj bën rayal su guie din na reeman xhie rünan xhie pornin rdxe'ch reeman naj.

²⁰ O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel.

²¹ Tijbzi ni benan chi za'n galay reeman gurixdiajn rën: “Guial rililadxan yaban ree bengüt, zeel za' ree bejn contr naj yan.”

²² Chi bigueijn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrililadx bejn Jesucrist.

²⁵ Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëëd ree bejn cwent loj Dios, dxel dád bidxeb gobernador guin abi' rëbaman loj Pab:

—Baguij. Ganetan lüj chi chu'n luar stijb.

²⁶ Per Félix në milian rbëzaman gudëëd Pab lojman din guslaaman laaman, zeel gurejdxaman laaman zien volt din guinieenëman laaman.

²⁷ Zian gudëd tio'p ijz abi' barri Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bén Israel, zeel basa'nman Pab ladxguuib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén.

² Yagaj, bixhioz rniabee ree bixhioz con ree bén Israel mazri zobjloj, wej reeman lojman bile'c reeman xguialquia Pab,

³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz.

⁴ Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguiajman ni,

⁵ abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab.

⁷ Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali.

⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxe loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe guial achet ni mal wayünan bén Israel ree.

¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

¹² Dxel chi gulox guneeenë Festo bén naj ree xbejnman, bén rëb ree ni rayal gac, rëbaman loj Pab:

—Lüj na tëdil loj rey César, yan lojman tëdil.

Za' Pab loj rey Agripa

¹³ Chi gudëd tio'p choon dxej, rey Agripa con xbëngunaaman Berenice bidxin reeman Cesarea bitixloj reeman gobernador Festo.

¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguuib.

¹⁵ Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xgualquiax, gunab reeman ganabeen guiëtix.

¹⁶ Per naj rën loj reeman guial guxtis Rom ree ad naj xcostumbr reeman nabee reeman guiët tijb bejn chi gadaman su loj ree bén cabe'c xgualquiaman din guiëbaman walín ya o ad walitan ni rudxiib reeman guijcaman.

¹⁷ Zeel chi bi't ree bén Israel guin guie, achet guial niaglaan, bareguiaal gajc gure loj da yagxhílan, abi' gunabeen bidné reex xin guin.

¹⁸ Per ree bén bi't gule'c xgualquiax, achet ni nadxeb na reeman zi'c gunaladxan ninia reeman por laax.

¹⁹ Tijbzi xgualquiax ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin.

²⁰ Abi' guial ad ragbeetan xhie günan por zian, dxel gunabdiidxan loj Pab bal rënch chex Jerusalén din gac reglad ni guin ree ni.

²¹ Per laax gunab téd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

²³ Chi bareguiaal, dád zagdxe ca' xab rey Agripa con Berenice bidxin reeman con ree bén rniabee suldad con los demazri ree bén zojbloj luguiedx guin, bidxin reeman guyu reeman lënú lod gucaagdiajg reeman ni guiëb Pab. Dxel gunabee Festo bica' reex Pab.

²⁴ Abi' rëb Festo:

—Rey Agripa në los demazridi dad za'nëdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix.

²⁵ Naj, achet xfaltix radxejlan guial rayal guiëtix. Guiáad laax gunab téd loj César Augusto lod gac reglad xcwentix, abi' ma benan xgab yaxhalan laax.

²⁶ Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax.

²⁷ Din naj ruluú ad xnejzt naj yaxhalan tijb bén yu' ladxguuib loj rey César abi' ad zëtan xhie beenman.

26

Ni gunee Pab loj rey Agripa

¹ Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

² —Dád nix yu' luxdon guial bile' za'n lojl yan rey Agripa, par ganen lojl yadxi' tëen gra ni rudxiib ree bén Israel guican.

³ Din lüj ragbee zagdxe gra xcostumbr ree bén Israel, në conin rüjn persi rdildiidx reeman. Zeel rniababan lojl gapil pasens gucaagdiajguil ni ganin.

Zi'c guban Pab gocli

⁴ Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diidz xindoon.

⁵ Ragbee tée reeman abi' zajc na reeman laan bal rën reeman, guial diidz xindoon najn bënfarisew, abi' ree bënfarisew naj bén mazri zinal xley ree bén Israel.

⁶ Abi' yan za'n guie, badëéd reeman naj loj ree guxtis guial rliadxan yasban Dios bengüt ree zi'c beenman promeys loj ree dux bégulal ree.

⁷ Gra guidxiptio'p cwa' ree bén Israel cabëz dxej güün Dios zian, zeel rën reeman laaman rüjn tée reeman sirv lojman dxej guiaal. Abi' yan guial rliadxan laan zeel rbe'c ree bén Israel da guialquian, rey Agripa.

⁸ ¿O naladxidi ya nawëég yasban Dios bengüt ree?

Be Pab diidz xhienaag guzunalaman bén rliadx ree Jesucrist

⁹ 'Guia'xchej benan xgab rayal günan xhienin bén rliadx ree Jesús, bén Nazaret,

¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bén rliadx Jesucrist badxe'n ladxguuib. Abi' chi rugjrt reeman laa reeman, në naj ré guiëtri reeman.

¹¹ Zien volt benan laa reeman xhienin din gūnan naguiejn gusa'n reeman guialrliladx reeman Jesucrist. Zian benan lēn gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

*Be Pab diidx stijb xhienaag bililadxaman Jesucrist
(Hch. 9:1-19; 22:6-16)*

¹² 'Abi' par zian za'n Damasco, con quijb xtiidx ree bixhioz rniabee ree bixhioz.

¹³ Per ganin lūj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bēn zinē'n.

¹⁴ Abi' dugraczan bareeyuj, dxel biguiejnan cha' bēn gunee naj con diidx hebreo, naman: "Saulo, Saulo, ¿chexc zeel rzunalil naj? Lūj gajc rguuil xguialnaal zi'c go'n rudxeguaia' loj yag rulaagnē reeman laab."

¹⁵ Dxel rēn: "¿Chu lūj Dad?" Badxi'man laan naman: "Naj naj Jesús bēn rzunalil.

¹⁶ Per bixche, guzulū, din balūlon lojl par gūūnl naj sirv gū tēēl diidx ni baguaial yan nē ni gulūn lojl.

¹⁷ Naj gaxhal lūj loj ree bēn Israel nē loj ree bēn ad najt bēn Israel, abi' naj gagnē' lūj chitēē xhie gūūn reeman lūj.

¹⁸ Gaxhalan lūj loj reeman din guixhialil loj reeman gusa'n reeman nejz mal, chinal reeman nejz zagdx. Ad tiēbri reeman nabee xindxab laa reeman, chinal tēē reeman xnejz Dios. Abi' chililadx reeman naj din gac xtol reeman perdon yayal tēē reeman ni rayal gra ree xbejn Dios, bēn ma naya ree delant lojman."

Bazoob Pab diidx ni balūūloj lojman

¹⁹ Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa.

²⁰ Yaloj luguiedx Damasco gutiechan xtiidxaman, dxelri Jerusalén nē guidib niz Judea nē loj ree bēn ad najt bēn Israel. Rēn loj reeman din yayūjn reeman xgab por xtol reeman, yadxi' loj reeman loj Dios gūūn tēē reeman ni rayal gūūn reeman din guiguien guial ma bidxaa mod naban reeman.

²¹ Abi' por zian, gunaaz ree bēn Israel naj lēn yadooro' Jerusalén, guyēn reeman nugūjt reeman naj.

²² Per con xyudar Dios laa naj guie xt yan cusnuu cayūn xtiidxaman loj gra ree bejn, zi'c ree bēn zojbloj zi'c ree bēn ad zojblojt. Abi' gra ni rēn loj reeman naj ganax ni bacaa ree bēn badēē xtiidx Dios loj ree bejn nē ni bacaa Moisejs xhienaag naj ni gac,

²³ guial Cristo naj guial tēdaman guialzi, guiētaman. Per chi ma gūjtaman yaloj laaman naj bēn yaban loj ree bengūt, abi' gugojnman bēn Israel ree nē ree bēn ad najt bēn Israel xhienaag gap reeman perdon.

Nuyēn Pab nililadx Agripa Jesucrist

²⁴ Chi cayēb Pab zian, dxel gudidxa' Festo rēbaman:

—Rajcguijquil Pab! guial tant rusiidil ma rajc guijquil.

²⁵ Per badxi' Pab laan rēbaman:

—Ad guictan rajc, gobernador Festo. Ni canin najn xnejz nē diidxli.

²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan.

²⁷ ¿Riladxil ni rēb ree bēn badēēd xtiidx Dios loj ree bejn ya, rey Agripa? Naj ragbee guial riladxil.

²⁸ Dxel badxi' rey Agripa laan rēbaman:

—Sta'nczi nūjn! naj gan nililadxan Jesús.

²⁹ Abi' rēb Pab:

—Majsi sta'nz o majsi ryaadxri, na Dios guial ad tijbtzi lūj, nē gra ree bēn cucaagdiajg ni canin yan, guidxin dxej chililadxidi Jesús zi'c naj, majsi ad nēt ree caden guie.

³⁰ Dxel bisu rey Agripa con gobernador Festo con Berenice nē gra ree bēn zojbnē laa reeman ni.

³¹ Chi bariica reeman tiblax guzuluj cayūnē lasa' reeman diidx, rēb reeman:

—Achet wayūjn xin guie ni rayal guiētix, o chu'x ladxguuib.

³² Dxel rēb rey Agripa loj Festo:

—Zile' naslaa reex, balidix niniab tēdix loj rey César.

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bén yu' ladxguuib loj tijb suldad rniabee la Julio, laax rniabee tib cwaa ree suldad la Augusto.

² Abi' Cesarea badxu'n loj tijb xbarcw ree bén Adramitio, barcw ni ma grii chen guiedx riga' ree niz Asia. Nê Aristarco bunë'n, bën Tesalónica, guiedx riga' niz Macedonia.

³ Chi bareguiaal, badxinan Sidón, lod goc Julio xinza'c da't con Pab, cwëjbx bitixloj ree xmiw Pab luguedx guin abi' badëëd reeman ni ryaadxaman.

⁴ Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin.

⁵ Badüüdan loj nijsdoo gajxh Cilicia nê Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandria ni che Italia, zianz nax yadxu'n lojn.

⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo.

⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab,

¹⁰ rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt nê dunuj ree nadxeb yayëjt ree.

¹¹ Per suldad rniabee guin mazri beencwentix bén rusa barcw guin nê bén naj xbarcw laan, guial loj ni rëb Pab.

¹² Abi' guial ad zagdxe tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëëd lad sur, abi' gunaladx reeman ma bile' zi'c ni xixgab reeman, zeel bariin bio'n loj nijsdoo gadëd ro' yuj Creta.

¹⁴ Per ad wayajct xchej zio'n chi birii tijb bidoxh la Euroclidón loj nijs guin.

¹⁵ Abi' guzuloj bi guin culadxaan barcw guin. Nê guial niz du lojn zëëd bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan.

¹⁶ Dxel badüüdan xijch tijb yujdobëz la Claudia riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin.

¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiëj barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan.

¹⁸ Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin.

¹⁹ Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin.

²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad naguieentri du luxdoon yalaan loj nijs guin.

²¹ Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëëb ree.

²² Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n.

²³ Din Dios rniabee naj, bën cayünan sirv guxhaal tijb xi anjlaman balüüloj lon yan guiaal.

²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bén zëëd loj barcw guie ad luslaat Dios guiët reeman.”

²⁵ Zeel yan dad, gol badxe' luxdoodi zagdxe, din naj riladxaan Dios, ragbee tëën zagdxe guial gac zi'c na anjl guin lon.

²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bén nulen barcw guin, guxhinzii zi'ct garol guiaal gogbee reeman guial zamer yadxinan loj yuj.

²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit.

²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdo reeman yareguiaal.

³⁰ Bén nulen ree barcw guin, been reeman bén sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman.

³¹ Per bagojn Pab suldad rniabee con ree xsuldadix, rëbaman loj reex:

— Bal id ree bén guin yaya'n loj barcw guie, ad zalaatrudi.

³² Dxel batüüg ree suldad guin ni naxii canu guin persi zinë nijs canu guin.

³³ Chi ma cayni luyuj, rëb Pab loj reeman din gaw reeman, rëbaman loj reeman:

— Ma gojc chiin gubijdx ni ad raayëjstidi achet tëët wayawidi.

³⁴ Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

³⁵ Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman.

³⁶ Dxel bayu luxdoo gra reeman, guzuloj nëgajc laa reeman cayaw.

³⁷ Tio'pgayuu gayojnchiibixho'p nayajc dugran zio'pan loj barcw guin.

³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaa, bén nulen ree barcw guin, ad bayünbeet reeman yuj badxin reeman. Per baguiaa reeman tilda'n nijsdoo guin riga' üx gadëëd ro'n, abi' been reeman xgab badxig reeman barcw guin yagaj.

⁴⁰ Dxel batüüg reeman ni naxinë ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiec reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin.

⁴¹ Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiaad niz xan guin guzuloj cayze'n nan con gojl rliaj nijs guin ladan.

⁴² Dxel nuyën ree suldad guin nugüjt reex bén prejs guin ree, chitëë nixoojnijs reeman abi' nuxüün reeman.

⁴³ Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bén rajc rxoobnijs ree, yalaj laa reeman chu' loj nijs guin güün reeman nagueijn yarii reeman ro' nijs guin.

⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs.

² Bén naj ree bén ni, dád benza'c gojc reeman con dunujn. Been reeman tijb bajl guial nayaag nëtëë guial cayal guia, abi' na reeman du lojn din yubiigan cwë' bajl guin.

³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëël lën yag guin por xi xliaa bajl guin, abi' gudawya'b yaa Pab nalbëztib yaaman.

⁴ Chi baguiaa ree bén Malta guin nalbëz bëël guin yaa Pab, dxel rëb loj lasa' reeman:

— Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' biajb bëël guin loj bajl guin, guiaad laaman achet gocaman.

⁶ Gra reeman cabëz saaguuj yaaman, o dxejlczi yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bén zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tëë gojcaman con dunujn.

⁸ Nadxel naga' xdadaman, ragxuuman, yu'man xliaa rajc tëëman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman gujcaman abi' bayajcaman.

⁹ Chi gogbee ree bënragxuü zojb ni ni goc, bi't reeman lod za' Pab persi bayüjnman laa reeman.

¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

Bidxin Pab Rom

¹¹ Choon bëëw badxu'n loj yuj zii, dxelri badxu'n loj tijb barcw Alejandria, ni bitëd ni tiamp nayaag. Niz lucwaj barcw guin ca tio'p ree dxan bën la ree Cástor në Pólux.

¹² Dxel badxinan tijb guiedx la Siracusa, yagaj badxu'n choon dxej.

¹³ Abi' yagaj badxoon bio'n gadëd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli.

¹⁴ Yagaj badxaagan tio'p choon ree bën naj ree bën ni në reeman riladx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom.

¹⁵ Guiáad ree dux compniaran bën riladx ree Jesucrist, bën zojb ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëëman quixtëë loj Dios.

¹⁶ Chi badxinan Rom, dxel bayü suldad rniabee guin bën prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bën Israel zojbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bën Israel ni'qui contr xcostumbr ree dux bëngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom.

¹⁸ Abi' ree bën Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan.

¹⁹ Per ree bën Israel guin badxoon reeman abi' zagdxeli gunaaban gadëëdan loj rey César, per ad guial ra'ptan xhienin contr ree bën Israel.

²⁰ Zeel guredxan lëjt, din guidganajdi naj din ganin lojdi guial por ni riladxan guial yaban ree bengüt zi'cgajc riladx gra ree du lasa' bën Israel ree, zeel naxiin con ree caden guie.

²¹ Dxel rëb reeman lojman:

—Dunujn ni'qui tijb xtiidx ree bën Judea ad waca'tan lod na reeman xcwentil, në ni'qui tijb bën duladx ree bën raza ree Judea achet wana reeman du lojn contr lüj.

²² Per rayënan yaguiejn nan xhienaag naj xixgabil, din dunujn rayagbee guial gra ladczi rnnee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diidz rsil xt wadxë guneeñeman laa reeman xhienaag naj xguialrniabee Dios. Beenman nagueijn chililadx reeman Jesús, baza't tëëman lod rnnee xcwent Jesús loj xlibr ley Moisejs në ni bacaa ree bën badëë xtiidx Dios loj ree bejn.

²⁴ Yu' reeman bililadx ni rëb Pab, per yu' reeman ad bililadxt.

²⁵ Abi' guial ad rdxaaagt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bën badëëd xtiidx Dios loj ree dux bëngulal ree guial rëb xSprijt Dios:

²⁶ Wej, güjdx loj ree bën guin:

Majsi rigueijn reeman, per achetdzi chignia' reeman, abi' majsi ruguiaa reeman, per rultüü ad ruguiaat reeman.

²⁷ Din been luxdoo reeman gojl,

abi' rüjn reeman zi'c rultüü ad ruguiaat reeman, ad rigueijn tëët reeman, chitëë guguiaa reeman,

abi' guien reeman chignia' tëë reeman.

Din ad rënt reeman gui't reeman con naj,

abi' günan laa reeman perdon.

²⁸ Zeel gol gogbee guial diidz yan, loj ree bën ad najt bën Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rëb Pab zian, dxel zia ree bën Israel guin, cadildiidxnë lasa' reeman.

³⁰ Tio'p ijz gurej Pab ni, yu lod gudixaman. Ni rnieneñeman gra ree bën rtixloj laaman.

³¹ Sin gualrdxëb rëbaman loj reeman xhienaag naj xguialrniabee Dios, abi' guneeñeman xtiidx Dad Jesucrist loj reeman sin guial chu nudxoon.

Gui'ch ni guxhaal San Pabl loj ree bèn Rom rliladx Jesucrist

Rxhial San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bèn badëë xtiidx Dios loj ree bejn,

³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bênguidxliuj, loj xdiaa rey Davi zaman.

⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee.

⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bèn chililadx laaman, bèn guzoob tëë xtiidxaman.

⁶ Abi' në lëjt ma nayab loj ree bèn gule Dios din gaquidi xbejn Jesucrist.

⁷ Zeel caxhalan gui'ch guie lojdi bèn rën ree Dios, bèn zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhienaag rliladxidi Jesucrist.

⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt.

¹⁰ Ad rucwëëz tëët rbedx rniaaban Dios din guneeman mod guidganan lëjt, zi'c naj da xgaban diizd gocli.

¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn.

¹² Din güün tëëdi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bèn chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt.

¹⁴ Par naj naladxan da cwentan naj guial gulün chutëëz benan xtiidx Dios, bal najman bèn ciuda o najman bèn guiedxdoo ya, bal rignia'man o ad rignia'taman.

¹⁵ Zeel rënnejzdoon guidganan lëjt din gatiechan xtiidx Dios Rom.

Xgualrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xgualrniabee Dios, din gra ree bèn chililadx laan laa reeman loj dol, zi'c ree bèn Israel zi'c ree bèn ad najt bèn Israel.

¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bèn naban zi'c rën Dios, guidib tiamp ni nabanman rliladxaman laaman."

Dol ni rajp bejn

¹⁸ Dunuj ree rayagbee guial diizd xanyabaa zëed xcastiro' Dios par ree bèn ad ridxga't laaman, bèn ad rüjnt ree zi'c rayal, abi' zi'c naban reeman ruquie'ch reeman xtiidxli Dios.

¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman.

²⁰ Majs ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xgualrniabeeman abi' laa tëëman naj Dios. Zeel ad zajct xhie gudxiib bejn gui'c guial achet ragbeeman xcwent Dios.

²¹ Din majs yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëë tëët reeman quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman.

²² Rëb reeman guial rajc da't reeman abi' mazri na tont reeman.

²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

²⁴ Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren.

²⁵ Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

²⁶ Zeel gulëëladx Dios laa reeman loj ree ni dxuudx rÿjn reeman. Abi' zien ree béngunaa ad nabantri ree xnejz, rën lasa' béngunaa gajc reeman.

²⁷ Ziangajc zien ree xinguaaw ad nabantri xnejz, rën gajc lasa' xinguaaw reex, xinguaaw con xinguaaw rÿjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, dïn güün reeman ganax ni ad rayalt güün reeman.

²⁹ Ganax ni ad rayalt güün reeman rÿjn reeman, za'në reeman xinguaaw ren o béngunaa ren, zien ree ni mal rÿjn reeman, rzëëbladx reeman gap reeman ni rajp ree ben ren. Dád nadëdloj reeman, rugÿjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxgijdx bejn.

³⁰ Rnieegijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rÿjn reeman benro'. Abi' rbëëgijc reeman ni mal ree, ad ruzoob tëët xtiidx xdá xniaa reeman.

³¹ Dád nad reeman, ad rÿjnt cumplid xtiidx reeman, ad rënt lasa' reeman, ad raya tëët lasa' reeman.

³² Ragbeechaaw reeman rëb Dios guial chi guiët ree bejn, dxel gra ree bén rÿjn gra ree ni guin yayal casti. Per majsi zian, rusnuu gajc rÿjn reeman ni mal guin ree abi' xt rabaa reeman chi rÿjn ree ben ren zian.

2

Xgualguxtis Dios

¹ Zeel chutëëz lÿj guial rëbil xhie casti rayal bejn, ad rajptil derejch guiëbil zian, dïn lÿj gajc rayal casti guin guial cayÿjnl zi'cgajc rÿjn reeman.

² Per dunuj ree rayagbee guial Dios rÿjn gualguxtis zi'c rayal, chi rudëëdaman casti bén rÿjn ree ni mal guin.

³ Abi' lÿj guial rëbil xhie casti rayal bejn abi' nëgajquiza lÿj rÿjn zi'c rÿjn reeman, ad naladxil laal loj xcasti Dios.

⁴ Ad rëntil gualnaza'c Dios con lÿj, ad rëntil guial rdaanman lÿj rajp tëëman lÿj pacens, ni'quid ragbeetil guial pacens guin rÿjn lÿj yudar dïn gapil tiamp par yayÿjnl xgab por xtolil.

⁵ Per guial dád nadil, ad rëntil yajejquil loj Dios, zeel lÿj gajc cayÿjnxhie xtolil par dxej ni gudëëd Dios casti, dxej ni güünman gualguxtis zi'c rayal.

⁶ Par gudëëman ni rayal tijbgaj bejn bal gonin beenman.

⁷ Gudëëdaman gualnaban tiblayaa loj ree bén ad radxagt rÿjn naguiejn guiban zagdxe guial rÿjn reeman naguiejn yayal reeman gualnaza'c yu' xanyabaa, rÿjn tëë reeman naguiejn yaya'n reeman zagdxe loj Dios dïn gap reeman cuerp ni ad yu't dxej nit.

⁸ Per ree bén ad ruzoobt diidx, rdxe'ch Dios laa reeman abi' gudëëdaman laa reeman casti, dïn luar chinal reeman xtiidxliman, zinal reeman nejz mal.

⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxel bén ad najt ree bén Israel.

¹⁰ Guiáad ree bén zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxelri bén ad najt ree bén Israel.

¹¹ Dïn Dios tiblojzi rÿjnman gualguxtis con gra bejn.

¹² Gra ree bén cayÿjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bén cayÿjn dol majsi ragbee reeman ley guin, laa reeman tëd casti zi'c rniabee ley guin.

¹³ Dïn ad guial guientzi bejn ley guin ma nayaman loj Dios, bén rÿjn ree zi'c rniabee ley guin laa reeman naj bén naya loj Dios.

¹⁴ Per chi ad najt bejn bén Israel, abi' cayÿjnman ni zagdxe sin guial güünbeeman ley guin, dxel ma cayÿjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxe con tëë nin naj ni mal, abi' guijc gajc reeman zëëd xley reeman.

¹⁵ Dïn zi'c naban reeman, rguien guial guijc reeman zëëd conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxe o chi ma been reeman ni mal.

¹⁶ Zian gac chi güün Dios gualguxtis por gra ree ni naguie'ch ni rÿjn bénguidxliuj. Abi' zi'c culün bejn ree guidibczi, laaman güün gualguxtis por Jesucrist.

Bén Israel ree në xley Moisejs

¹⁷ Yan, lÿj guial najl bén Israel yu'guijquil guial rajquil ley badëë Dios loj Moisejs, abi' rÿjnl nabë guial najl xbejn Dios,

¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxë güünl.

¹⁹ Abi' naladxil zile' guzuxnejzil bèn ad nünbeet ree ley guin nè ree bèn ad nünbeet xnejz Dios,

²⁰ naladxil zile' gulüül bèn ad rajct ree nè ree bèn rajc ta'nzi, guial por ley guin ragbeel gra, ragbee tëël conin naj diidxli.

²¹ Per zi'c nabanl, çchexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', çchexquiza zeel rbanl?

²² Rëbil guial ad laat sunë bejn bèn ad najt lacheelaman, abi' lüj, çchexquiza zeel rüjnl zian? Rëb tëël guial rdxe'chil ni naladx bejn naj dios, abi', çchexquiza zeel rbanl lën yadoo lod yu' ree Dios guin?

²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin.
²⁴ Ze'cli rëb loj xtiidx Dios: "Bèn ad najt ree bèn Israel rniee reeman Dios diidxguijdx por lëjt."

²⁵ Diidxli rüjnqui sirv guial ru xcuerp bejn sen ni ru ree bèn Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin.

²⁶ Per bal tijb bèn ad yu't sen guin nabanman zi'cgajc tijb bèn rajc xley Dios majsi ad nünbeetaman laan, dxel ma nayabaman zi'c tijb bèn yu' sen, majsi ad yu'taman sen guin.

²⁷ Bèn rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin.

²⁸ Din ad guial rajlt bejn loj nacion Israel, ad guial yu' tëëtaman sen ni ru ree bèn Israel ma najman bèn Israel loj Dios,

²⁹ bèn wali naj bèn Israel loj Dios, guidib luxdooan zinalaman xnejz Dios, ad por guial yu'taman sen ru ree bèn Israel, ad por xcostumbr tëët reeman, por guial naban reeman con xSprijt Dios. Abi' bèn naban zian, Dios rlies xvaloraman sa'n ad bénguidxliujt.

3

¹ Zeel zanadi lon xhieczy gan naj bejn bèn Israel o xhieczy gan chu'man sen ru ree bèn Israel.

² Per naj gani lojdi guial gadxagayaa mod lasajc guial naj bejn bèn Israel, din yalojxgaj loj ree bèn Israel badëed Dios xtiidxaman.

³ Yan ad naladxidi por guial yu' ree bèn ad zinalt xnejz Dios, ad zünjtraman cumplid ni rëbaman din xo güün Dios ni rëbaman güünman con ree bèn zinal xnejzaman.

⁴ Din laaman ad yu't dxej guchaa xtiidxaman, majsi gra bénguidxliuj naj bèn rusquiee, per Dios ad nëtaman rusquiee, zi'c rëb tiblajt loj xtiidxaman lod rëb:

Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

⁵ (Per yu' bejn rüjn xgab) guial bal por dol ni cayguieen ree rulüü guial benza'c naj Dios, çchexquiza zeel najman benmal rudëedaman bejn casti?

⁶ Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn bëndol.

⁸ Abi' mazri ma yaguieen ree ni mal din gui't ni zagdxë, zi'c rëb ree bejn culün bejn ree, per Dios gudëed casti bèn rëb ree zian.

Graczi bejn ma been dol

⁹ Zeel zi'c ma rnin por ree bèn Israel, nè por ree bèn ad najt bèn Israel, abi' ma ragbeedi guial ad zajct guiëbidi guial mazri benza'c naj ree bèn Israel guial loj ree bèn ad najt bèn Israel, din tiblojzi nayajc ree bëndol.

¹⁰ Zi'c ca tiblajt loj xtiidx Dios lod rëb:

Achutczl naj benza'c,

per ni'qui tijb bejn.

¹¹ Achutczl rignia'.

Achutczl raguuil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczl cayüjn ni zagdxë,

per ni'czi tijb bejn.

¹³ Zi'cgajczl tijb baa ni zojbyal,

zian ganax ni dxuudx ririi ro' reeman.

Ganax diidx rusquiee rniee reeman.

Abi' xtiidx reeman naj zi'c xvenen bëël.

¹⁴ Ganax diidx mal ririi ro' reeman, diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëez guin zë reeman, rüjn reeman ni dxuudx ree.

Abi' rusagzi reeman bejn ree.

¹⁷ Ad nünbee tëtë reeman xhienaag naj guialrbajn bejn zagdx.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zëäd loj xley Dios, naj par ree bén zinal ley guin, chitëë chu guiëb guial achut ragbee xhienin naj dol, laan naj par gagbee bejn guial najman béndol loj Dios.

²⁰ Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman béndol.

Por guialrliladx ma naya bejn loj Dios

²¹ Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin në por ni bacaa ree bén badëë xtiidx Dios loj ree bejn.

²² Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn.

²³ Din gra bejn ma been dol, achutzi naya niz loj Dios.

²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman loj crüjz.

²⁵ Dios guxhaal Jesucrist, din por xrejman chu' perdon par bénguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guida'xchej ad beent xguialguxtisaman por dol ni been ree bejn, laan naj por pacens ni rajpaman con bejn,

²⁶ guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

²⁷ Yan, ¿xhienaag yaguieen ree nabë? Achet yaguieennë' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist.

²⁸ Zeel rayagbeechaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn nagueijn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi guial Dios naj par gra bejn,

³⁰ din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel.

³¹ Ad naladixidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijct ree ley guin.

4

Xguialrliladx Abraham

¹ Yan, ¿xhie zajc yaguie'ch ree xcwent dux béngulal ree Abraham?

² Bal niyab Abraham zi'c tijb benë gad güün dol por ree ni beenman, guyu mod nünman nabë loj ree bejn, per ad lojt Dios.

³ Din rëb loj xtiidx Dios: "Guial bililadx Abraham Dios, zeel been Dios laaman cwent zi'c tijb bén ad beent dol."

⁴ Chi rüjn bejn dxiin, milia ni rajxaman ad ni razaladxt reeman, rtia'man laan por dxiin ni rüjnman.

⁵ Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëädan guial rliladx bejn Jesucrist, zeel rüjn Dios bejn cwent zi'c bén ad yu't xtol.

⁶ Zi'c gunee rey Davi guial xiquilbaa ree bén been Dios cwent sin dol sin guial güün reeman xhienin par yayal reeman perdon guin.

⁷ Rëbaman:

Xiquilbaa ree bén been Dios perdon xtol, bén ma badxi'caman xtol.

⁸ Xiquilbaa ree bén ma been Dios cwent sin dol.

⁹ Ad gunee Davi diidx guie ree naabzi par bén yu' ree sen ni ru ree bén Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman.

¹⁰ Abi' chi biyabaman zi'c bèn ad yu't xtol, ni'qui gadaman chu' sen ni ru ree bèn Israel, chi gad Abraham chu' sen guin mal nünj Dios laaman cwent zi'c bèn ad yu't xtol.

¹¹ Chi biabaman zi'c bèn ad yu't xtol, dxel guyuman sen guin din sen guin naj guial ma nünj Dios laaman cwent zi'c bèn ad yu't xtol guial bililadxaman laaman. Zeel naj Abraham dad par ree bèn rliadx Dios, majsi ad yu't reeman sen ni ru ree bèn Israel, per por guialrliadx guin nünj Dios laa reeman cwent zi'c bèn ad yu't xtol.

¹² Naj tëë Abraham dad par ree bèn majsi yu' sen guin per rliadx reeman zi'c bililadx Abraham Dios diidz chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham në loj ree xdiaaman, guial gudëëdaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bèn ad yu't xtol.

¹⁴ Yan bal ganaxzi ree bèn zinal ley guin tia' ni gudëë Dios, achet cwent naj guialrliadx ree bejn laaman, ache tëët cwent naj promejs ni been Dios loj Abraham.

¹⁵ Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

¹⁶ Zeel chi been Dios promejs loj Abraham guial gudëëdaman ni rëbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree bèn zinalt ley guin naj promejs guin, nëgajc par ree bèn rliadx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree.

¹⁷ Zi'c ca loj xtiidx Dios lod rëbaman loj Abraham: "Lüj gac dad par zien ree bënguidxliuj" Zian naj promejs ni been Dios loj Abraham, Dios bèn rusban ree bengüt abi' rnieeman xcwent ree ni gad chu' loj guidxliuj guie zi'c ruluü ma yu' reen.

¹⁸ Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bèn rliadx Dios zi'cgajc laaman. Zi'c rëb Dios lojman, chi rëbaman: "Zian gaquil famil, dád famil narooob gaquil."

¹⁹ Cost tibgayuu ijz ma yu' Abraham nadxel, ragbeeman guial ma naj reeman bengol në xbëngunaaman Sara guial chu' xi'n reeman, per ad guyunawëëgtaman, bililadxaman ni rëb Dios lojman.

²⁰ Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëë lojman,

²¹ din guidiblagaa bililadxaman guial rajp Dios guialrniabee güünman zi'c ma rëbaman.

²² Zeel been Dios cwent Abraham zi'c tijb bèn ad yu't xtol.

²³ Abi' lod rëb guial been Dios laaman cwent zi'c bèn ad yu't xtol guial bililadxaman laaman, ad tijbtzi Abraham ruza't yagaj,

²⁴ nëgajc dunuj ree din ma raliduladx ree Dios. Abi' në dunuj ree ma nünjman cwent zi'c bèn ad yu't xtol, Dios bèn basban Dad Jesucrist loj guialgüjt,

²⁵ Dad Jesucrist bèn güt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nünj Dios dunuj ree cwent zi'c bèn ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist.

² Din guial raliduladx ree Jesucrist ma zajc yadxin ree loj Dios abi' nadxu'gujic ree ni ma beenman por dunuj ree, zeel dád nix yu' du luxdoo ree din ralëëz ree yayal ree xanyabaa lod za'man.

³ Abi' ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens.

⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios.

⁵ Ni ralëëz ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bèn ma baneeman duloj ree.

⁶ Gocli babajn ree ad bile't naguien ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol.

⁷ Dunuj ree rayagbee guial nawëëg naj chu' bèn tiëb guiët por zatijb bejn. Ni'czi por tijb bèn naban xnejz, o wed yu' bèn tiëb guiët por tijb benza'c da't.

⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree bëndol.

⁹ Per yan ma naya ree loj Dios por xguialgüjt Jesucrist, abi' ad ziantzi, nè ad zayaltri ree xcasti Dios chi guidxin dxej.

¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bèn guxhal nejz par loj Dios.

¹¹ Abi' ad laatzan, nè guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdxe con Dios.

Adán në Cristo

¹² Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol.

¹³ Diizd chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol.

¹⁴ Per majsi zian, bidxinczi dxej ni güt reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bèn naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, nè ni mazri zagdxe par zien ree bejn.

¹⁶ Din garen naj dol ni been Adán guial loj perdon ni runeë Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol.

¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bèn rliladx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon nè guialnaban loj Dios.

¹⁹ Din por tijb bèn ad bazoobt diidx gra bejn naj bëndol. Per ziangajc por tijb bèn bazoob diidx ma zajc gap bejn perdon loj Dios.

²⁰ Abi' Dios badëë ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon.

²¹ Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nüjnman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bayëjt ree par dol per nabajnnë' ree Jesucrist

¹ Ad naladxidi canin lojdi guial yaguieen ree dol mazri din guiën Dios dunuj ree mazri.

² Din ad ziantan, ma bayëjt ree par dol ad rayaltri yaguieenz yaguieen ree dol.

³ Din gol bignia' guial chi barobnijs ree por Jesucrist, laan naj zi'c ruluü guial nè dunuj ree ma bayëjt con laaman.

⁴ Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

⁵ Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree.

⁶ Din dunuj ree rayagbee guial chi güt Jesucrist loj crüjz, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree.

⁷ Din bèn ma güjt por dol, ad rniabeetri dol guin laaman.

⁸ Abi' guial güjt Jesucrist por dux tol ree, zeel ma bayëjt ree par dol guin, yabajn tëe ree con laaman.

⁹ Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman.

¹⁰ Con tivoltizi güjt Jesucrist por xtol ree bejn, yan ma nabanman par Dios.

¹¹ Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëedi güün ree xgabdxuudx lëjt gan.

¹³ Ad cw e ladx l jt gajc loj dol par g iundi ni mal, zagdxeli gol cw ejb nabee Dios l jt, zi'c tijb b n ma g jt, abi' yabandi par laaman. Gol cw ejb nabeeman l jt par g iundi ni zagdx.

¹⁴ Zian ad zanabeetri dol l jt, per ad por guial yu'guijctidi ni r b ley ad g iundi, ad zanabeetri dol guin l jt por guial zinalidi guial r n Dios l jt.

Ma gulaa ree loj dol

¹⁵ Ad canitan por guial ma zunaal ree guial r n Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan.

¹⁶ L jt ragbee bal yu' chu rniabee dunuj ree, yazoob ree xtiidx b n rniabee dunuj ree. Yan bal dol guin rniabee l jt yayalidi casti, per bal ruzoobidi xtiidx Dios dxel ma rayalidi perdon.

¹⁷ Per quixt e Dios guial majsi guia'xchej gunabee dol l jt, per yan con guidib luxdoodi ma zinalidi xtiidx Dios zi'c ma basiididi.

¹⁸ Abi' yan guial ad rniabeetri dol l jt, ma nabandi din g iundi zi'c r n Dios.

¹⁹ (Canen n l jt con ganax diidx ni zajc chignia'di xhie r n gui b ni canin, din ragbeen guial naw eg naj chignia'di ni guin ree.) Zi'c gunabee dol l jt guia'xchej persi beendi ni dxuudx ree n  graloj ree ni mal, ziangajc yan guidiblagaa gol cw ejb nabee Dios l jt din gac g iundi ni zagdx guiban t edi zi'c r nman.

²⁰ Chi gunabee dol l jt ni'quid guyutidi xgab nibajndi zi'c r n Dios.

²¹ Per, xhieza gan beendi por ni mal ni beendi nadxel, ni mal ni ratun di yan guial ma ragbeedi por laan z ed xcasti Dios?

²² Per yan guial ad rniabeetri dol l jt ma zinalidi xnejz Dios, abi' laan naj ni zagdx din por zian ma zajc guibandi zi'c r n Dios gap t edi guialnaban tiblayaa con laaman.

²³ Din ni r jn bejn gan por dol laan naj casti, per ni razaladx Dios naj guialnaban tiblayaa par ree b n ma naj tijbzi con dux Dad ree Jesucrist.

7

Ni naj zi'c guialruxhliaa

¹ Compniar raliduladx ree Jesucrist, l jt ragbee xhienaag naj tijb ley. Ley guin naj ni rniabee bejn la'tgaj nabanman.

² Laan naj zi'c chi ruxhliaa bejn, ad zajct guxhliaan man ben ren la'tgaj naban lacheelaman. Per bal gui t lacheelaman dxel ad yu't ley ni gudxoon guial guxhliaan man ben ren.

³ Zeel bal naban lacheelaman abi' guchajgaman ben ren, dolan cay jnman. Per bal ma g jt lacheelaman dxel achet ley gudxoon guial guxhliaan man ben ren ad cay jn t etaman dol.

⁴ Ziangajcan l jt compniar raliduladx ree Jesucrist, por xguialg jt Jesucrist ma g jtidi par xley Moisejs. Yan ma najdi xbejn Cristo b n baban zatijb, abi' zian ma zajc yaguieen ree zi'c r n Dios yaguieen ree.

⁵ Din chi babajn ree zi'ctzi bay n ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti.

⁶ Per yan guial ma bay jt ree par ley guin, yan guial ad rniabeetri ley guin dunuj ree guial ma bidxaa t e mod ni nabajn ree, ma zajc yaguieen ree zi'c r n Dios por xSprijtaman b n nabajnn ' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee t etan guial dol naj guialrz e bladx, bal id r b loj ley guin: "Ad s e bladxil."

⁸ Per chi gogbeen guial ni mal naj guialrz e bladx, mazri gojcxhiey da dolan por gra ni guz e bladxan. Bal id yu' ley, ad zagbeet bejn xhienin naj dol.

⁹ Chi gadan g nbee ley guin, par naj zagdx nabanan. Per chi benbeen ley guin, gogbeen guial cay nan dol abi' por dol guin rayalan casti.

¹⁰ Bi't ley guin din gagbee bejn xhienaag guibanman, per par naj bi'tzan par gud edan naj casti.

¹¹ Din basquiee dol guin naj guial zile' g nan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios z edan abi' gra ni z ed loj ley guin loj Dios z edan, abi' zagdx xnejz t e naj ni r b loj ley guin.

¹³ Ad ley quint rajp dol guial rayalan casti, dol guinan naj ni basquiee naj din g nan ni rayal casti. Abi' por ley guin gogbeen guial ni dxuudx da't naj guial g n bejn dol.

¹⁴ Dunuj ree rayagbee guial por Dios z ed ley guin, per guial najn b nguidxliuj zeel zianczi r jn dol guin naj gan.

¹⁵ Ad rignia'tan xhienin rajcan, din ad r ntan ni r nan, aal ni ad r ntan r nan.

¹⁶ Abi' chi r nan ni ad r ntan g nan, zian ragbeen guial ni zagdxequi naj ley guin, din por ley guin ragbeen xhienin cay nan.

¹⁷ Zeel ad najtczi r n guial r nan ni ad r ntan, r nan laan guial najn b ndol, abi' zianczi r jn dol guin naj gan.

¹⁸ Din guial najn b nguidxliuj, ragbeen guial ni'czi ta'n ad najtan benza'c, majsi r nan g nan ganax ni zagdxe, per ad rajctan.

¹⁹ Ad r ntan ganax ni zagdxe ni r nan g nan, aal ganax ni mal r nan ni ad r ntan g nan.

²⁰ Yan bal r nan ni ad r ntan g nan, ad najtczi r n par g nan laan, r nan laan guial najn b ndol abi' zianczi r jn dol naj gan.

²¹ Ragbeen guial majsi r nan g nan ganax ni zagdxe, per laa za' gajc dol guin par g  nan naj gan.

²² D d ruladxan gra zi'c rniabee Dios g nan,

²³ per yu' ni rudxoon g nan laan, abi' ni rudxoon guin naj dol, guial sta naban dol guin luxdon abi' zianczi r jan naj gan.

²⁴  Prob naj!  Chu zajc yab   naj loj casti rayalan por dol ni r nan guial naj naj b nguidxliuj?

²⁵ Per quixt   Dios guial por dux Dad ree Jesucrist ma gulaan loj casti guin. Diidxiczi da xgaban naj guial g nan ganax ni rniabee Dios, per guial najn b nguidxliuj zeel zianczi r jn dol guin naj gan.

8

Guialnaban runee xSprijt Dios

¹ Gra ree b n rliadx Jesucrist ad rayaltri reeman xcasti Dios, b n ad nabantri ree zi'ctzi r n reeman, laa reeman ma r jn reeman naguiejn naban reeman zi'c rniabee xSprijt Dios.

² Din por xguialrniabee xSprijt Dios, b n runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal t etri ree xcasti Dios.

³ Guial nayajc ree b nguidxliuj ad bile't n jn ley dunuj ree yudar, ley ni bad  d Dios loj Moisejs. Per yan ma been Dios ni ad bile't n jn ley guin. Laaman guxhaal Xi'n loj guidxliuj zi'cgajczi tijb b nguidxliuj persi g jtaman por dux tol ree chit   nabeeri dol dunuj ree.

⁴ Laaman been zian, din yaguieen ree zi'c r nman zi'cgajc tijb b n cay jn zi'c rniabee ley guial ad nabantri ree zi'ctzi ray n ree, ma nabajn ree zi'c rniabee xSprijt Dios.

⁵ B n naban ree zi'ctzi naj xixgab reeman, mazri yu'guijc reeman g  n reeman zi'ctzi r n reeman. Per ree b n naban zi'c rniabee xSprijt Dios, mazri yu'guijc reeman g  n reeman zi'c rniabee Sprijt guin.

⁶ Guial yu'guijc bejn g  nman zi'ctzi naj xixgabaman zeel z  d casti. Per b n yu'guijc g  n zi'c rniabee xSprijt Dios, zajpaman guialnaban con Dios yabe'cdxe t   Dios luxdooman.

⁷ B n yu'guijc ree guiban zi'ctzi naj xixgab reeman, rdx'ch Dios laa reeman din ad r nt reeman guzoob reeman xtiidxaman ad rile' t  t g  n reeman zi'c r nman.

⁸ Zeel b n naban ree zi'ctzi naj xixgab reeman, ad ruladxt Dios ni r jn reeman.

⁹ Per l jt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabann di xSprijt Dios. Din b n ad nabann t xSprijt Dios, ad najtaman xbejn Cristo.

¹⁰ Per bal ma nabann di Cristo, r n guieban guial ma g jtidi par dol, ma nabann di xSprijt Dios din ma n jn Dios l jt cwent sin dol.

¹¹ Abi' bal ma nabann di xSprijt Dios, b n basban Jesucrist loj ree beng t. Majsi gui tidi per zasban Dios l jt din tia'di zatijb guialnaban por xSprijt Dios b n nabann di.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree.

¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios b n nabann di ma basa'ndi dol tiblad dxel ma gapidi guialnaban tiblayaa con Dios.

¹⁴ Gra ree b n rti jb rniabee xSprijt Dios laa reeman, laa reeman naj xi'n Dios.

¹⁵ Din ad nabann t reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: " Dad!"

¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios.

¹⁷ Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

¹⁸ Ma benan xgab guial achet lasajc gualrzagdiaj ni cayd  d ree yan guial loj guialnaza'c ni yaca' ree xanyabaa.

¹⁹ Abi' xt gra ree ni badxe' Dios loj guidxliuj, ma r n nejzdoon reen guidxin dxej guiguien chu ree nin naj xi'n Dios.

²⁰ Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin

²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie.

²² Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman.

²³ Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni gunee Dios duloj ree. Abi' cayzaagdiaj ree la'tgaj caylëjz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb.

²⁴ Dunuj ree rayagbee guial gac zian, laan naj ni ralëjz ree guialraliduladx ree ma nayajc ree perdon. Lëjt ragbee bal ni ralëjz ree ma gojcan, ad zalëeztri reen din ad zajctri cwëz bejn ni ma gojc.

²⁵ Per bal gad ni caylëjz ree gac, ad rayalt yadxag ree yalëez ree gacan.

²⁶ Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rilet' yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguejn ree, dxel laaman rbejdx rniab Dios por dunuj ree.

²⁷ Abi' Dios, bën nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

Achet zajc güün dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman.

²⁹ Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bën nabee loj gra ree bën naj Xi'n Dios.

³⁰ Gra ree bën ragbee Dios guial chililadx reeman laaman, rbejdxaman laa reeman din gac reeman xbejnman, rüjnman laa reeman cwent sin dol abi' rudëeman xanyabaa loj reeman lod zojbaman.

³¹ Yan, guial ma rayagbee ree gra ree ni guie, achet güünan chutëez güün xcontr dunuj ree, dunuj ree rayagbee guial Dios gagnë dunuj ree.

³² Ad gurexuut Dios nudëe Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya?

³³ ¿Chu zajc cwe'c dux guialquia ree nayajc ree bën ma gulej Dios? Din Dios ma nüjn dunuj ree cwent sin dol.

³⁴ Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree.

³⁵ Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por gualzi, o por ni rüjn bejn dunuj ree, o por guialrliaan, o por guialryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman.

³⁶ Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rüjnnë reeman dunujn zi'c ree xiiil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bën rën dunuj ree.

³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac,

³⁹ o ni zëed xanyabaa, o lën liuj, ni'qui tijb ni been Dios, achetczi achut tëët zajc chiquied guialrën Dios dunuj ree por dux Dad ree Jesucrist.

9

Dios gulej bën Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt,

² guial guixie guixie dád yu'naya luxdoo, xt ni'quid radxejlt xhie günan.

³ Balzianclaa majsi ad zayaltan perdon, majsi güün Cristo naj tiblax, per bal zian chile' günan yudar bën ladx reen chitëë yajal reeman casti.

⁴ Laa reeman naj b n Israel, abi' laa reeman naj b n gule Dios din gac reeman xbejnman. Abi' guzujman con laa reeman zi'c form tijb zaj, baya'nn man laa reeman diidx conin g nman con t enin g n reeman, bad e t e xleyaman loj reeman. R baman loj reeman xhienaag gui n reeman laaman, been t eman promejs loj reeman.

⁵ Z ed reeman loj xdiaa ree b n been ree sirv loj Dios gual, loj gajc ree b n z ed Cristo chi bi'taman loj guidxliuj, laaman naj b n nagle' zianczi rajp t eman guialrniabee loj gra ni yu'. Am n.

⁶ Ad canitan guial ad z jntri Dios xpromejsaman cumplid, ni canin naj guial ad grat ree b n Israel naj xbejn Dios.

⁷ Ad guial z edt reeman loj xdiaa Abraham din gac reeman xdiaaman, din r b Dios loj Abraham: "Diidx xi'nl Isaac suloj xdiaal."

⁸ Laan ruli  dunuj ree guial ad por guial najt bejn b n Israel, ma najman xbejn Dios, xbejn Dios naj ree b n naj cwent loj xdiaa Abraham guial rliadx reeman xtiidx Dios zi'c Abraham.

⁹ Din Abraham bililadxaman Dios chi r b Dios lojman: "Zatib ijz tiamp guie gajc gualan abi' dxej zii ree ma ca' Sar tijb xindob z."

¹⁰ Abi' ad laatan. Grop ree xi'n Rebeca gojc xdad reex Isaac, b n goc dux b ngulal ree, ¹¹⁻¹³ per chi gad reex gal, chi ad way jn t et reex ni zagdx ni'qui ni mal, r b Dios loj Rebeca: "Xin yaloy guin laax g n sirv loj xinguiag guin." Zi'c r b loj xtiidx Dios lod r b: "Guy nan Jacob, per bidxe'chan Esau." Zian rguien guial ma ragbee Dios chu rbeman ad por ni r jnt bejn, laaman ma ragbee chu rucaabeeman.

¹⁴ Yan,  por zian yaguie'ch ree ya, ad r jnt xguialguxtis Dios zi'c rayal?  Per ad ziantan!

¹⁵ Din Dios r b loj Moisejs: "Yayan b n r nan yayan abi' b n rayal ree casti, bal r nan ad zud dtan laa reeman casti."

¹⁶ Zeel ad zile't yaya Dios bejn por xixgabzaman o por ni r jnman, laaman mal ragbee chu r nman yayaman.

¹⁷ Loj xtiidx Dios r b guial r baman loj rey Egipto: "Naj ben l j rey din guiguien da guialrniabeen din g nbee gra b nguidxliuj naj."

¹⁸ Zeel rnin lojdi guial ma ragbee Dios chu yayaman chu t e g nman luxdoo gojl.

¹⁹ Per wed por zian nadi: "Bal zianan,  chexquiza zeel rdx'e'ch Dios guial nayajc ree zi'c nayajc ree awa ad zajc yadxoon ree zi'c naj xixgabaman?"

²⁰ Per,  chu naj b nguidxliuj din guinieeman Dios zian? Wen zajc gui b tijb guiajs loj b n been laan ya: " Chexc zeel beenl naj zian?"

²¹  Nid b n r jn guiajs guin r jnn  bajn guin zi'ctzi r nman ya? Laaman ruguiaa xhie g nn man bajn guin, bal g nman guiajs g n dxiin guixie guixie o g nman guiajs g n dxiin dxej zojblojzi ree.

²² Yan, ziangajc Dios ma ragbeeman chu rayal casti, abi' xt zajc laa nud ed gajcaman casti din guiguien xguialrniabeeman. Per gudaanman gojp t eman pacens b n ad ruzoobt ree diidx, b n rayal ree nit.

²³ Gudaanman laa reeman din guiguien guial laaman guinia xhienaag g nman, guial laaman naj b n ca' guialrniabee abi' bayaman b n ragbeeman diidx guia'xchej guial yayal reeman xanyabaa.

²⁴ Abi' laa reeman naj dunuj ree b n ma gurejdx Dios, loj ree b n Israel n  loj ree b n ad najt b n Israel.

²⁵ Zi'c ca loj libr ni bacaa Oseas b n bad e xtiidx Dios loj ree bejn, lod r b:

B n ad najt ree da bejnan,

gui n loj reeman guial naj reeman da bejnan,

abi' ree b n ad yu't b n r n laa reeman,

naj gui n laa reeman.

²⁶ Abi' lod r b Dios loj ree bejn: "Ad da bejntan l jt".

Yagaj gac reeman xbejnman, laaman guial najman b n naban.

²⁷ Gui ad Isa as b n bad e xtiidx Dios loj ree bejn, r baman por ree b n Israel: "Majsi zien da't naj ree b n Israel zi'c  x riga' ro' nijsdoo, per ta'nz naj ree b n laa loj casti,

²⁸ din Dios nayob g n cumplid xtiidxaman loj guidxliuj guie zi'c ma r baman."

²⁹ Abi' diidx gocli r b Isa as loj ree bejn:

Bal niti jb dux Dad ree Dios

b n rajp gra guialrniabee

ninijt gra ree dux b ngulal ree,

diidx gocli mal gunijt dux diaa ree

zi'c gunit ree b n Sodoma n  ree b n Gomorra.

B n ad najt ree b n Israel ma naj reeman perdon loj Dios

³⁰ Yan, ¿xhie yaguie'ch ree? Bèn ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist.

³¹ Abi' ree bèn Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojtan.

³² ¿Chexc zeel ad bile'tt niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb "guiaj ni rliadx guia' bejn"

³³ zi'c ca loj xtiidx Dios lod rëb:

Ma gulen tijb bejn luguiedx Sión, bèn gac zi'c tijb guiaj ni ladx guia' ree bejn abi' gusajban laa reeman.

Abi' bèn chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni rënan rniaab tëen loj Dios naj guial gac ree bèn Israel perdon.

² Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdx xhienaag rën Dios güün reeman.

³ Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon.

⁴ Din por Jesucrist bayaaloj zi'c rniabee ley güün bejn, yan bèn rliladx ree laaman, ma naya reeman loj Dios.

⁵ Bèn rën gac naya loj Dios guial zinalaman ley, rëb Moisejs guial bèn güün zi'c tal rëb ley, zappaman guialnaban la'tgaj cayüjnman zi'c rniabee ley guin.

⁶ Per guial rajc bejn naya loj Dios por guial rliladxaman Jesucrist, naj guial ad züjntaman xgab: "¿Chuczi zajc chë'p xanyabaa?" (Din rën guiëban guial ad rliladxtaman, abi' rënman guguaaman guiat Cristo loj guidxliuj.)

⁷ Ad guiëb tëeman: "¿Chu zajc che lod za' ree bengüt?" (Din rën guiëban guial ad rliladxtaman, abi' rënman guguaaman yaban Cristo loj ree bengüt.)

⁸ Per loj xtiidx Dios rëb: "Gajxh za' xtiidx Dios con lüj, ryaadxzi güünl xgab guiëb tëel bal chililadxil laan." Din guialrliladx ni ratie'ch ree naj ze.

⁹ Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon.

¹⁰ Din chi chililadx bejn Jesucrist con guidib luxdool, diidx loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios rëb: "Gra ree bèn chililadx laaman ad yu't dxej yaya'nxtu reeman."

¹² Laan rën guiëb guial loj Dios tiblojzi naj bejn, achet güünan chutëez najman, bal najman bèn Israel o ad najtaman bèn Israel. Din tijbzi Dios naj Dad par dugra ree, abi' dád benza'can con gra ree bèn rbejdx rniab laaman.

¹³ Din loj xtiidx Dios rëb: "Gra bèn yanab perdon loj Dios, gacaman perdon."

¹⁴ Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bèn guinee xtiidxaman loj reeman?

¹⁵ ¿Xhienaag chu' bèn guitie'ch xtiidxaman awa achut guixhiaal laa reeman? Loj xtiidx Dios rëb: "¡Ni za'cdxoon naj chi rdxin bèn zinë ruson zagdx!"

¹⁶ Per ad grat bejn ridxga' xtiidxza'c Dios. Zi'c rëb Isaías: "Dad, ¿chu ma rliladx ni ranen por lüj?"

¹⁷ Zeel guialrliladx zëed por ni rigueijn bejn, abi' ni rigueijn bejn naj xtiidxza'c Jesucrist.

¹⁸ ¿Wen nid wagueijn ree bejn laan ya? ¡Per naj rni guial ma bacaagdiajg reeman laan! Din loj xtiidx Dios rëb:

Guidib guidxliuj ma bire'ch xtiidx Dios

abi' xt luar bigra lod naguie'ch ma bigueijn reeman xtiidxaman.

¹⁹ Yan rünan xgab: ¿Wen id rignia' ree bèn Israel xtiidx Dios ya? Per diidx guia'xchej bacaa Moisejs ni rëb Dios por laa reeman chi rëbaman:

Naj gün din tédlojdi por ni günan

con ree bèn ad najt bèn Israel.

Në por ni günan con laa reeman,

majsi ad ragbeet reeman, abi' zadxe'chidi.

²⁰ Abi' sin guialrdxeb bacaa Isaías ni rëb Dios por ree bèn Israel, chi rëbaman:

Bèn naj ree bèn Israel, majsi ad baguillt reeman naj,

per badxejl reeman naj.

Abi' ma balülön loj reeman,

majsi ad gunabdiidxt reeman por naj.

²¹ Bacaa tëë Isaiás ni rëb Dios por ree bèn Israel, chi rëbaman: “Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj.”

11

Xixgab Dios

¹ Ad canitan lojdi guial ma gulëëladx Dios bèn Israel ree, din ad ziantan. Lëjt ragbee guial bèn Israel naj abi' loj xdiaa Abraham zialan, guial zialan loj xdiaa Benjamín.

² Diidz guial'xchej, gulej Dios bèn Israel ree din gac reeman xbejnman, zeel ad rbëëladxtaman laa reeman. ¿Nid rusaaladxidi tiblajt loj xtiidx Dios ya lod zëëd chi gulec'c Eliás bèn badëë xtiidx Dios loj ree bejn xguialquia ree bèn Israel loj Dios? Chi rëbaman:

³ “Dad, ma bagüjt reeman gra ree bèn badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman.”

⁴ Per badxi' Dios xtiidxaman rëbaman: “Ma gulëcan gajdx mil bejn par naj, bèn ad wazuxibtczi ree loj dios la Baal.”

⁵ Yan ziangajc yu' ta'n bèn Israel, por guial rayaman laa reeman gulejman laa reeman par laaman.

⁶ Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

⁷ Zian gojc, bèn Israel bèn gule Dios, badxejl reeman laaman guial riladx reeman laaman. Per ree bèn Israel ren gad reeman yadxejl laaman, din raguiil reeman laaman zi'c naladx reeman, ad raguuilt reeman laaman zi'c rënman zeel beenman luxdoo reeman gojl,

⁸ zi'c rëb loj xtiidx Dios lod rëb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per ruluü ad ruguiaat reeman, abi' majsi riguejnt reeman per ruluü ad riguejnt reeman.”

⁹ Rëb tëë Davi:

Xguialraw zagdx reeman con gra xguialnaza'c reeman

laan gusquiee laa reeman guial zëqui reeman zagdx.

Laan gusquiee laa reeman din tëd reeman casti ni royal reeman.

¹⁰ Yaya'n reeman zi'c tijb bèn ad ruguiaat,

abi' sac reeman zi'c tijb bèn ca bëw xijch.

Gac ree bèn ad najt bèn Israel perdon

¹¹ Ad canitan lojdi por guial ad rtiëjbt ree bèn Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bèn ad najt ree bèn Israel perdon, din chile' sëëbladx ree bèn Israel gap reeman perdon guin.

¹² Yan bal guial ad bazoob ree bèn Israel diidx, beenan sirv par din yayal los demazri ree bënguidxliuj xguialnaza'c Dios, bèn ad najt ree bèn Israel. Yan, ¿rünjdi xgab ya xhienaag güünle' Dios bejn ree chi tiëb ree bèn Israel güün reeman zi'c rën Dios?

¹³ Yu' ni rënan ganin lëjt bèn ad najt ree bèn Israel, lëjt ragbee guial Dios guxhaal naj din gün xtiidxaman lojdi abi' dád cayünan naguejnt günan zi'c royal.

¹⁴ Rënan guial ree bèn ladx reen bèn Israel ree sëëbladx zi'c rünjdi din güün reeman zian din chile' gac reeman perdon.

¹⁵ Walican guial chi ad bazoob ree bèn Israel xtiidx Dios, guyu mod gojc los demazri ree bejn perdon. ¿Per xi nix chi chililadx reeman xtiidx Dios! Laan naj zi'c chi yaban tijb bengüt zatijb.

¹⁶ Abi' zi'c chi beenle' Dios bèn Israel ree gulal laan naj tijb sen guial güünle'man los demazri ree bèn Israel, ziangajc bal güünle' Dios xliuj tijb yag guidib yag guin ma nagle'.

¹⁷ Bèn Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bèn Israel najl zi'c tijb xidx yag olivo ni yu' dajn ni rguiid lod biru' xidx yag olivo guin, zeel rajpil guialnaban por xliuj yag guin.

¹⁸ Zeel ad naladxil guial mazri zagdx najl guial loj yag oliv ni rnin naj ree bèn Israel. Per bal rünjl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.”

²⁰ Waliquil, per xidx yag olivo ni canin naj ree bèn Israel, gurug reen guial ad bililadxt reen abi' lüj guyul xluar reen guial riladxil. Zeel ad rünjl nabë, zagdxeli gojp cudad.

²¹ Din bal b n Israel ni canin naj ree xidx yag guin, ad bayat Dios laa reeman, ziangajc zajc saquil.

²² Gogbee guial benza'c naj Dios, per ziangajc diidxli r jn xguialguxtisaman. Ma been xguialguxtisaman con ree b n ad bazoobt xtiidxaman, abi' ma beenman ni zagdx con l j. Per rayal guibanl zi'c r nman, bal id z jnl zian z jn xguialguxtisaman con l j.

²³ Abi' bal yayejc ree b n Israel con Dios, abi' chilladx reeman perdon ni z ed por laaman, z jnman laa reeman cwent con los demazri ree b n Israel riladx. Din laaman rajp guialrniabee par yay jnman laa reeman tijbzi con los demazri ree b n Israel.

²⁴ Din l j guial ad najtil b n Israel, l j guial canin najl zi'c tijb yag olivo ni yu' dajn, zile' niajqul tijbzi con yag olivo zagdx ni rnin naj ree b n Israel, jdiixgui ree b n Israel ni ad ruzoobt ree xtiidx Dios, nid zayajc reeman tijbzi ya con los demazri ree b n Israel bal guzooob reeman xtiidx Dios!

Gac ree b n Israel perdon

²⁵ Compniar raliduladx ree Jesucrist, yu' ni ad ragbeetidi abi' r nan gagbeedan, chit e g undi nab . B n Israel r jn ree nad par guzooob reeman xtiidx Dios, cayajc zian xt chi ma bayaaloj bililadx ree b n ad najt ree b n Israel, b n ma naj ree par chilladx xtiidx Dios.

²⁶ Chi ma gojc zian, dxel graczi ree b n Israel ma g uncwent xtiidx Dios. Zian gac reeman perdon, zi'c r b loj xtiidx Dios lod r b:

Luguiedx Sion za b n gagn  ree b n z ed loj xdiaa Jacob.

Din yariica reeman loj nejz mal zinal reeman.

²⁷ Dxel gac cumplid da diidxan,

Zi'c ma r n loj reeman guial g nan perdon xtol reeman.

²⁸ Per yan guial d d nad ree b n Israel par chilladx reeman xtiidxza'c Jesucrist, zian yu' mod persi riladxidi guial ad najtidi b n Israel. Abi' majsi zian, r n gajc Dios laa reeman zi'c beenman promeys loj ree xb ngulal reeman.

²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rb eladx t etaman b n ma gulejman par laaman.

³⁰ Gocli ad binaltidi xnejz Dios, per yan por ree b n Israel ad ruzoobt xtiidx Dios, ma bal uman l jt guial rayaman l jt.

³¹ Abi' bal yan ad ruzoobt ree b n Israel xtiidx Dios, cayajc zian din yayaman l jt, per chi guidxin dxej ziangajc yayaman laa reeman.

³² Cw b Dios guial zi'c ree b n Israel n  ree b n ad najt b n Israel ad zuzoobt reeman xtiidxaman, din gac yayaman gra reeman tiblojzi.

³³ jD d zro' naj xguialrignia' Dios, n  xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cay jnman.

³⁴ Zi'c la loj xtiidxaman lod r b: "jChu zajc gagbeechaaw xhienaag naj xixgab dux Dad ree Dios? jChu mazri rajc din gui b lojman xhienaag g unman?"

³⁵ jO chu ma bad e xhienin lojman din cw zaman quixaman laaman?"

³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respelj zianczi. Am n.

12

Guialnaban c b

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n l jt loj Dios zi'c tijb gon ni ma nagle' ni yayuladx t eman, din guibandi zi'c r nman, abi' zian gui ndi laaman.

² Ad guibanridi zi'c naban los demazri ree b n yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag r n Dios guibandi. Zian gagbeedi conin naj zagdx, conin ruladxaman, con t enin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt g un nab  guial mazri lasajquidi loj ree bejn. Zagdxeli gol been xgab por l jt zi'c rayal, segun naj quiarguejn ni baneer Dios loj tijbgajdi.

⁴ Din zi'c xcuerp bejn zien la' najn, per ad tijbtzi ni r jnman.

⁵ Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiarguejn ni baca' ree, zi'c naj ni guy n Dios baneeman dunuj ree. Zeel bal ma baneeman quiarguejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree.

⁷ O bal baneeman quiarguejn par yaguieen ree sirv ben ren ree, rayal yaguieen reen zi'c rayal. B n cwa' quiarguejn par gul uman bejn ree xtiidx Dios, rayal gul uman bejn ree.

⁸ O bèn cwa' quiarguejn par gudëeman consejw loj ree bejn, rayal gudëeman consejw. Guiáad bèn cwa' quiarguejn par yazaladxaman xhienin loj ree bejn, rayal yazaladxaman con guidib luxdoooman. Abi' bèn cwa' quiarguejn par nabeeman, rayal gapaman cudad nabeeman zi'c rayal, o bèn cwa' quiarguejn par güünman yudar bèn cazagdiaj ree, rayal chu' luxdoooman zagdxe güünman laa reeman yudar.

Ni rayal güün ree bèn rliladx Jesús

⁹ Gol guyèn lasa'di con guidib luxdoodi, gol basa'n ree ni mal tiblax, gol binal ni zagdxe.

¹⁰ Gol guyèn gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bèn ploj par güündi ni rayal güündi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabëzidi tia'di, gol gudaan tää loj ni rzagdiajdi, ad gucwëez cwedx guiniabidi Dios.

¹³ Chi xhie ryaadx xcompniaridi, bèn rliladx ree Jesucrist, gol been reeman yudar. Gol gojc benza'c con ree bèn ri't lidixidi.

¹⁴ Gol gurejdx Dios por ree bèn rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bèn yu' luxdoo nix, per con ree bèn yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdxe con ree lasa'di, ad güündi nabë, gol gojc bèn naxanlax. Ad nalaxidi mazri rajquidi guial loj ree ben ren.

¹⁷ Ad güündi ni mal bèn rüjn lëjt ni mal, gol been naguiejn güündi ni zagdxe loj gra ree bejn.

¹⁸ Gol been naguiejn da't din cwenëdi bejn ree zagdxe.

¹⁹ Compniar ralidulax ree Jesucrist, ad rgu' gualxyajn luxdoodi con ree bèn rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: "Naj naj bèn rayal güün xguialguxtis, gudë tëen ni rayal bejn. Zian rëb dux Dad ree Dios."

²⁰ Rëb tääman: "Bal rliian bèn rdxe'ch lüj, badëed ni gawaman, o bal re'caman nijs, badëed ni guië'man, zian guguaal yatuman."

²¹ Ad bal tiëbil güün ni mal lüj gan, been ni zagdxe din güün ni mal guin gan.

13

Royal yaya'p ree guxtis respejt

¹ Gra bejn rayal gucaagdiaj xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed guialrniabee ni rajp reeman.

² Zeel bèn ad ruzoobt xtiidx ree bèn rniabee guin, rën guiëban guial ad rënt reeman güün reeman zi'c rniabee Dios. Abi' ree bèn rüjn zian laagajc reeman rguuil xcasti,

³ Din bèn rajp ree guialrniabee ad za't reeman par guchejb reeman bèn rüjn ree ni zagdxe, za' reeman par guchejb reeman bèn rüjn ree ni mal. Yan bal rën'l guibanl guial ad zadxebtil bèn ca' ree guialrniabee, gubajn zagdxe din yaya'nl zagdxe loj reeman.

⁴ Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bèn ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëed reeman casti bèn rüjn ree ni mal.

⁵ Zeel rayal guzoobidi xtiidx ree bèn ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi.

⁶ Gol gudijx tää impuest, din gusnuu nabee ree bèn ca' ree guialrniabee, din laan naj mandad bayal reeman par güün reeman sirv loj Dios.

⁷ Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bèn rayal guzoobidi xtiidx, gol gojp respejt bèn rayal respejt.

⁸ Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bèn rën bejn ree, ma cayüjnman cumplid gra ni rniabee xley Dios.

⁹ Xmandamient Dios rëban: "Ad sunël bèn ren bèn ad najt lacheelil, ad gugüjtil bejn, ad cwanl, ad sëëbladxil ni rajp ben ren", per mandamient guie ree, con ree xmandamient ren Dios rajc cumplid con tijb mandamient rëb: "Guyèn ben ren ree zi'c rën lüj gajc."

¹⁰ Din bèn rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaloj rüjnman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxex gui't Jesucrist guial loj chi guzuloj qui baliduladxri ree xtiidza'caman.

¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinè dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe.

¹³ Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunè bejn ben ren bèn ad najt lacheelaman, o guial gapaman graloj vijs, o guialrdil o guialrdèdloj.

¹⁴ Gol basa'n lèjt gajc loj dux Dad ree Jesucrist, ad rayalt guibandi zi'ctzi rëndi.

14

Ad gusa'nxtudi bèn qui rliladxri xtiidx Dios

¹ Zagdxe gol guneenè bèn qui rliladxri Jesucrist ad gusa'nxtudi laaman guial mazri rajquidi guial lojman.

² Din yu' ree bèn rliladx Jesucrist naladx reeman zajc gaw reeman xhietëéz nin, per yu' ree bèn qui rliladxri naladx reeman guial zagdxeli naj ad zajwt reeman bëël.

³ Bèn rüjn xgab guial zajc gawaman xhietëéz nin, ad rayalt güünman tiblax bèn naladx yu' ni ad zajct gaw bejn. Guiáad bèn rüjn xgab guial yu' ni ad zajct gaw bejn, ad rayalt guze'man bèn naladx zajc gaw bejn xhietëéz nin. Din niz loj Dios tiblojzi ma naj reeman xbejnman.

⁴ Zeel, ¿chu naj bejn din guze' xcompniaraman bèn rliladx Jesucrist por niguinzi ree? Diosqui ragbee bal cayünman ni zagdxe o cayünman ni mal. Abi' bal ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

⁵ Ziangajc yu' ree dux compniar ree bèn raliduladxnè' ree Jesucrist naladx reeman guial yu' dxej zojbloj, yu'za ree bèn naladx guial tiblojzi naj gra dxej, per achet güünan, tijbgaj bejn con ni naladxaman naj zagdxe par laaman.

⁶ Din bèn rüjn xgab guial yu' dxej zojbloj, rüjnman zian persi rënman Dios. Guiáad bèn naladx guial tiblojzi naj gra dxej, rüjnman zian persi rënman Dios. Abi' bèn raw graloj, rawaman guial yu'guijcaman guial por Dios zëëdan abi' rudëëman quixtëë lojman. Guiáad bèn naladx guial yu' ni ad zajct gaw bejn, rüjnman zian guial naladxaman zian cayajpaman Dios respejt abi' rudëëman quixtëë lojman.

⁷ Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree.

⁸ Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree.

⁹ Din par zian güjtaman abi' babanman, din gacaman Dad loj ree bèn naban nè loj ree bèn ma güjt.

¹⁰ ¿Chexquiza din guze' lasa'l bèn rliladx Jesucrist o güün lasa'l tiblax ya? Awa dugra ree rayal yadxu' loj Dios din yadëéd ree cwent lojman.

¹¹ Zi'c ca loj xtiidxaman lod rëb:

Naj naj Dios naban,

abi' diidxli rmin lojdi guial gra ree bejn guzuxib lon.

Abi' gra ree bejn guiëb guial naj naj Dios.

¹² Abi' tijbgaj dunuj ree rayal yadëéd ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguidx du lasa' ree bèn rliladx ree Jesucrist, zagdxeli yaguieen ree naguiejn yaya'p ree cudad chitëë por dunuj ree güün reeman dol.

¹⁴ Naj najn xbejn Jesús, ragbeen guial ad dojt naj gaw bejn xhietëéznin. Per par bèn naladx guial ad zajct gawaman xhietëéznin, par laaman dolan cayünman bal gawaman xhietëéznin.

¹⁵ Yan bal por ni rawil naladx tijb xcompniaril bèn rliladx Jesucrist guial dolan cayünl, abi' bal id ridxga'l laaman rën guiëban guial ad rëntil laaman. Gojp cudad chitëë por ni rawzil güün xcompniaril dol, din nëgajc por laaman güjt Jesucrist loj crüzj.

¹⁶ Ad güünl tijb ni guinieeguidx ree xcompniaril lüj, majsi lüj ragbee guial ad ni malt naj ni cayünl.

¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëë luxdooan nix por xSprijt Dios.

¹⁸ Abi' bèn naban zian guial zinalaman Jesucrist, cayünman zi'c rën Dios, zi'c ruladx tëë bejn.

¹⁹ Zeel rayal yaguieen ree naguiejn yabajnnè' du lasa' ree zagdxe yabedxe tëë du luxdoo ree, din yasnuu yayagbee ree xhienaag yunaal ree xnejz Dios.

²⁰ Gol gojp cudad chitëë por ni rawzidi gunijtdi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayünl.

²¹ Zeel zagdxeli naj guial ad zajwtil bëël ad zë' tëtëil vin o xhie stijb nin bal por laan güün xcompniaril dol.

²² Majsì lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, jxiqulbaa bèn ad yu'nawëëgt luxdoo rawaman xhietëëznin!

²³ Per bèn yu'nawëëg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

15

Royal yaguieen ree ni naladx bejn naj zagdxë

¹ Yan, dunuj ree guial ma nadxu'dxi'ch ree loj ni raliduladx ree Jesucrist, royal yaguieen ree yudar bèn ad wazudxi'cht loj guialrliladx Jesucrist luar yaguieen ree ni rayentzi ree,

² dugra ree royal yaguieen ree naguiejn din chu' luxdoo dux compniar ree zagdxë con dunuj ree. Abi' royal yaguieen ree ni naladx reeman naj zagdxë, din chile' gusnuu güünbee reeman xnejz Dios.

³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl."

⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëëd pacens në guialragnë chitëë yalenyä' ree yalëjz ree ni ralëjz ree yaca' ree.

⁵ Dios, bèn razaladx pacens në guialragnë chitëë yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist.

⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bèn ad najt bèn Israel.

⁷ Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxë, bèn rliladx ree laaman par guiliesidi xvalor Dios.

⁸ Gol basaaladx guial bi't Cristo loj guidxliuj par gulüüman bèn Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbëngulal reeman, abi' zian biguien guial rüjnqui Dios cumplid xtiidxaman.

⁹ Bi't tëë Cristo loj guidxliuj din por laaman, bèn ad najt ree bèn Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bèn ad najt bèn Israel guzatan lüj guial najl benza'c.

Gol tëen cant ree par lüj.

¹⁰ Ziangajc rëb zatibljajt loj xtiidx Dios:

Lëjt bèn ad najt ree bèn Israel,

gol babaa zi'c rabaa ree bèn Israel.

¹¹ Zatibljajt loj xtiidx Dios rëb:

Gra ree bèn ad najt bèn Israel.

Në los demazri ree bejn, gol gules xvalor Dios.

¹² Rëb tëë Isaías:

Loj xdiaa Isaí, grii tijb bèn nabee bënguidxliuj ree, xt ree bèn ad najt bèn Israel, chililadx laaman.

¹³ Dios bèn ragnë dunuj ree ralëjz ree ni caylëjz ree, laaman yagu' luxdoodi zagdxë yabe'cdxë tëmëan luxdoodi guial rliladxidi laaman, din cwëz da'tidi ni guneeman por xSprijt Dios.

¹⁴ Compniar raliduladx ree Jesucrist, naj ragbeechaaw guial zagdxë nabandi con ree xcompniaridi, ma ragbee tëëdi zagdxë xhienaag chinalidi xnejz Dios, xt rajc rudëëdidi consejw rulüü tëë xcompniaridi.

¹⁵ Per majsì zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma banee Dios naj,

¹⁶ din günan sirv loj Jesucrist. Din da dxiinan naj gulün bèn ad najt ree bèn Israel xtiidxza'c Dios din guiban reeman zi'c rën Dios, din gac reeman naya niz lojman por xSprijt Dios.

¹⁷ Ra'pan xhie günnë'n nabë, guial ragnë Jesucrist naj por ree dxiin cayünan por Dios.

¹⁸ Per achetctzi zajc guiën bal id zën guial por Cristo cayünan laan, din laaman cayagnë naj persi cayünan yudar bèn ad najt ree bèn Israel din gac chililadx reeman guzoob tëë reeman xtiidx Dios. Yan ma rliladx reeman laaman por ni rën loj reeman në por guial ruguiaa reeman xhienaag nabanen,

¹⁹ në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibctzi, diizd Jerusalén xt guidib niz Ilirico.

²⁰ Din zian naj da xgaban gūnan, gatie'chan xtiidzxa'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo,

²¹ zi'c ca loj xtiidx Dios lod rēb:

Bén ad waguiejnt ree xcwentaman,
gūnbee reeman laaman.

Guiáad ree bèn ad wayagbeet xcwentaman,
gagbee reeman laan.

Rūjn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidganan lējt, majsi zianczi guyēnan nidganan lējt.

²³ Per yan guial ma gulox gutiechan xtiidx Dios guidib niz guie, abi' guial ma gojc zien ijt ni rēnan guidganan lējt,

²⁴ zeel rūnan xgab guidganan lējt chi gan España. Abi' chi gadēēdan guguian lējt, chi ma gojc tio'p choon dxej yu' luxdoon zagdxe guial za'n con lējt, dxel ma gūndi naj yudar din gan España.

²⁵ Per yan yaloy gan Jerusalén chigsa'nan tijb yudar par ree dux compniar ree bèn rliadx ree Jesucrist.

²⁶ Din bèn Macedonia ree con ree bèn Acaya bèn rliadx gajc ree Jesucrist, been reeman xgab guto'p reeman yudar guin par ree bènprob zojb ree Jerusalén, bèn rliadx ree Jesucrist.

²⁷ Abi' por xixgab reeman guixhiaal reeman yudar guin, per zagdxe naj ni cayūjn reeman din mal nuzēēb reeman loj reeman. Din por ree bèn Israel bidxin xtiidx Dios loj reeman, dxel yan laa reeman guial ad najt reeman bèn Israel, zagdxen guial gūn reeman yudar bèn Israel ree zi'ctzi gac reeman.

²⁸ Zeel chi ma balooxan dxiin guie, chi ma bayūn yudar guin, dxel gan España, abi' chi gadēēdan ladxidi dxel guidganan lējt.

²⁹ Naj ragbee guial chi guidganan lējt, zien da't ni guneē Dad Jesucrist par ganin lējt.

³⁰ Yan por dux Dad ree Jesucrist nē guial rēn xSprijt Dios dunuj ree, rniaaban lojdi din gūndi naj yudar yarejdx yanaab ree Dios por naj.

³¹ Gol gurejdx gunab Dios din gagnēman naj loj ree bèn Judea, bèn ad rliadx ree Jesucrist, gol gurejdx tēē Dios por dux compniar ree bèn rliadx ree Jesucrist, bèn zojb ree Jerusalén din tiēb reeman tia' reeman yudar ni chigsa'nan par laa reeman.

³² Dxel bal gagnē Dios ma chu' luxdon zagdxe guidganan lējt dxel ma zajc yaziiladxan la'tgaj za'n con lējt.

³³ Dux Dad ree Dios bèn rabe'cdxe du luxdoo ree, laaman gagnē gradi. Amén.

16

Rugajpdioz Pab bejn ree

¹ Yan ni gui't Febe ladxidi, bēngunaa ni naj dux compniar ree guial raliduladx ree Jesucrist, bèn cayūjn tēē sirv lēn yadoo ni zojb guiedx Cencrea.

² Gol baca'man zagdxe por Dad Jesucrist, zi'c rayal yaguieennē' ree dux compniar ree bèn rliadx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nēgajc naj ma beenman yudar.

³ Gol bagajpdioz Aquila con xbēngunaaman Priscila, bèn cayūjn ree naj yudar cayguieenan sirv loj Jesucrist.

⁴ Abi' laa reeman xt guzuj reeman loj guialgūjt por naj, zeel rudēn quixtēē loj reeman. Abi' ad najtzi rudē quixtēē loj reeman nē ree dux compniar ree bèn rliadx ree Jesucrist bèn ad najt ree bèn Israel rudēē quixtēē loj reeman.

⁵ Gol bagajpdioz ree bèn rliadx Jesucrist, bèn rado'p ree lidx Priscila con Aquila. Gol bagajpdioz da miwan Epeneto, bèn goc bèn yaloy bililadx xtiidx Jesucrist niz Acaya.

⁶ Gol bagajpdioz Li, bèn ma been da't lējt yudar.

⁷ Gol bagajpdioz ree bèn ladxan Adrónico con Junias, bèn guyu'nē' reen ladxguiib. Abi' ree xi apóstoles Jesús dád rēn reeman laa reeman, abi' yaloy laa reeman bililadx Jesucrist guial lon.

⁸ Gol bagajpdioz Amplias, da miwan bèn rēn da'tan guial nayajcan xbejn Jesucrist.

⁹ Gol bagajpdioz Urbano, bèn cayūjn naj yudar cayguieenan sirv loj Jesucrist. Gol bagajpdioz tēē da miwan Estaquis.

¹⁰ Gol bagajpdioz Apeles, bèn ma balüü guial diidxiczi rliadxaman Jesucrist, gol bagajpdioz tēē xfamil Aristóbulo.

¹¹ Gol bagajpdioz tēē Herodión ben ladxan, nē ree xfamil Narciso, bèn ma rliadx Jesucrist.

¹² Gol bagajpdioz Trifena nè Trifosa, bèn cayüjn ree sirv loj Jesucrist. Gol bagajpdioz tëë Pérsida, bèn naguieenbee ree guial dád cayüjnman sirv loj Jesucrist.

¹³ Gol bagajpdioz Rufo, bèn diidxliczi zinal xnejz Dios, gol bagajpdioz tëë xniaaman, bèn rënan zi'c da nan.

¹⁴ Gol bagajpdioz Asíncrito, Flegonte, Hermas, Patrobas, Hermes nè gra ree bèn za' con laa reeman, bèn ma rlıladx ree Jesucrist.

¹⁵ Gol bagajpdioz Filólogo, Julia, nè Nereo con bizanman, nè Olimpás con gra ree bèn rlıladx Jesucrist bèn za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bèn ralıduladx ree Jesucrist bèn za' ree guie, rugajpdioz reeman lëjt.

¹⁷ Compniar ralıduladx ree Jesucrist, rniaaban lojdi din gapidi cudad con ree bèn rlıa' lasa' ree bejn, bèn rusquiee ree bejn guial ruluü reeman ni ren ree guial loj ni ma basiididi. Ad guidxga'di laa reeman,

¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bèn ad ragbeetcti ree o bèn ad ragbeeza'ct ree xtiidx Dios.

¹⁹ Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdx ad par güüntidi ni mal.

²⁰ Dios, bèn rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

²¹ Rugajpdioz Timoteo lëjt, bèn cayüjn naj yudar con xchiin Dios ni cayünan, nè ree bèn ladxan bèn la ree Lucio, Jasón, nè Sosípater, rugajpdioz reeman lëjt.

²² Nè Tercio, bèn cayüjn gui'ch guie rugajpdioz lëjt por dux Dad ree Jesucrist.

²³ Nètëë Gayo rugajpdioz lëjt, lıdxaman za'n, runee tëë lıdxaman rado'p ree dux compniar ree bèn rlıladx ree Jesucrist. Nè Erasto, bèn naj tesorer luguiedx guie nè bèn la Cuarto ben rlıladx Jesucrist, rugajpdioz reeman lëjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radëen quixtëë loj Dios din laaman zile' gagnë lëjt din gusnuu gagbeedi sudxi'ch tëëdi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diidz chi gad guidxliuj gacchaaw, xgab ni ad gogbeet ree bejn diidz guia'xchej.

²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bèn badëë xtiidx Dios loj ree bejn zi'c gunabee Dios laa reeman, bèn naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

²⁷ ¡Tıjbi Dios, bèn rajc gradooczi, rayal yaya'p reeman respejt zianczi por Dad Jesucrist! Amén.

Gui'ch yaløj ni guxhaal San Pabl loj ree bèn Corinto rliladx Jesucrist

Rxhiaal Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn rliladx Jesucrist.

² Caxhalan gui'ch guie par lèjt najdi bèn rliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèeman gra ree bèn gra lad bèn rliladx ree Jesucrist, bèn naj Dad par dunuj ree nē par laa reeman.

³ Dux Dad ree Dios nē Dad Jesucrist güünle' lèjt, yabe'cdxe tèe reeman luxdoodi.

Rudëäd Pab quixtëe loj Dios

⁴ Gra dxejczj rudëdan quixtëe loj Dios por lèjt zic ma gognëman lèjt guial rliladxidi Jesucrist.

⁵ Nē guial najdi tijbzi con Jesucrist dád ma gognë Dios lèjt, baneeman lèjt quiarguejn din guineedi chignia' tèedi xtiidxaman.

⁶ Zian rguien guial diidxli naj ni ma biguejndi por Cristo diidz chi guzuloj bililadxidi laaman.

⁷ Abi' zianczi rajpidi xyudar Dios la'tgaj rbëzidi dxej ni gui't Jesucrist zatijb.

⁸ Abi' Dios gagnë lèjt din sudxi'chidi guidiblagaa loj ni rliladxidi laaman, chitëe xhie xtoldi chu' dxej ni gui't dux Dad ree Jesucrist zatijb.

⁹ Din Dios diidxli rünj xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been.

¹¹ Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj.

¹² Guial garent garen rëb ree bejn, yu' reeman rëb: "Naj naj xbejn Pab", yu' tèe reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tèe reeman rëb: "Naj naj xbejn Cristo."

¹³ Per naj rni lojdi guial Cristo tijbzi najman, din ad najt güt loj crüzjz por lèjt, ad gurobnijs tëetidi par gaquidi da bejnan.

¹⁴ Quixtëe Dios chi wan ladxidi achut mazri barobnijsan, Crispozi nē Gayo.

¹⁵ Chitëe guiëbidi guial gurobnijsidi par gaquidi da bejnan.

¹⁶ Barobnijs tëen xfamil Estéfanas, per ad rusaaladxtran chu mazri barobnijsan.

¹⁷ Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tëetan con diidz ni yadxaløj ree bejn naj luar cu'guijc reeman par xhie güjt Cristo loj crüzjz.

Xguialrniabee Dios nē xquiarguejnman

¹⁸ Gra ni raguie'ch ree guial por xhie güjt Cristo loj crüzjz, achet lasajcan par ree bèn zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios.

¹⁹ Abi' loj xtiidx Dios rëb:

Gunijtan xquiarguejn ree bèn ni rëb guial rajc da't reeman,

abi' guscajyan xquiarguejn ree bèn ni rëb guial rignia' da't reeman.

²⁰ Yan, ¿con ree bèn rëb guial rajc da't reeman? ¿con ree mextr rajc ley? ¿con ree bèn rëb guial rajc da't reeman xcwent ree ni yu' loj guidxliuj? Par Dios achet lasajc xquiarguejn bénguidxliuj.

²¹ Abi' por xquiarguejn Dios ragbeechaawaman guial ad zayünbeet bénguidxliuj laaman por xquiarguejn reeman, zeel beenman xgab yabëeman bejn loj casti por xtiidxaman ni caylün bejn ree. Abi' ree bèn yarii loj casti guin laa reeman naj bèn rliladx laaman, majsi par ree ben ren achet lasajc ni canin por Cristo.

²² Din bèn Israel ree rën reeman guguaa reeman milagr din chililadx reeman, abi' ree bèn ad najt bèn Israel rën reeman guien reeman ni mazri nawëeg din chililadx reeman.

²³ Per dunuj ni caylün bejn ree naj par xhie güjt Cristo loj crüzjz, abi' ree bèn Israel rdxe'ch reeman, guiaäd par ree bèn ad najt bèn Israel achet sirv rünj ni caylün.

²⁴ Per par ree bèn ma bacaabee Dios, zi'c ree bèn Israel zi'c ree bèn ad najt bèn Israel, por Cristo rguien xgualrniabee Dios nè xquiarguejnman.

²⁵ Dìn ni ruluü achet lasajc guial ni rüjn Dios, laan naj ni mazri lasajc loj xgualrajc bénguidxliuj. Abi' xt ni bigra xgualrniabee Dios laan naj ni mazri lasajc loj xgualrniabee bénguidxliuj.

²⁶ Gol gogbee compniar raliduladx ree Jesucrist guial ta'nzi ree bèn rliladx laaman naj bèn rignia' zi'c naladx ree bénguidxliuj, ta'nzi ree bèn rliladx laaman rajp gualrniabee loj guidxliuj guie, abi' ta'nzi ree bèn rliladx laaman naj ree bèn za loj ree famil ni naj bèn zøjbloj.

²⁷ Abi' Dios gulej ree bèn ni naladx ree bejn ad rajcza'ct dìn yaya'nxtu ree bèn rajc da't, gulej tēēman bèn ad ca't ree gualrniabee dìn yaya'nxtu ree bèn ca' gualrniabee.

²⁸ Dios gule ree bèn ni naladx ree bejn guial achet sirv laa reeman, bèn ni naladx ree bejn guial achet lasajc reeman, bèn ni achut naj loj guidxliuj guie dìn chiquiedaman xgualdaxl ree bèn naj ree chunin loj guidxliuj guie.

²⁹ Zianan zeel achut zajc güün benro' delant loj Dios.

³⁰ Yan por Dios ma najdi tijbzi con Jesucrist, dxel por laaman rtia'di xgualrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios.

³¹ Zianan dìn gac zi'c rēb loj xtiidx Dios lod rēb: “Bal yu' bèn rēn guilies xvalor gajc, luar güündi zian gol gules xvalor dux Dad ree Jesucrist.”

2

Xtiidx Jesucrist bèn cwa loj crüjz

¹ Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di.

² La'tgaj guzun con lējt ad gunetan diidx ren ree lojdi, tijbzi xcwent Jesucrist bèn cwa loj crüjz.

³ Abi' chi wan ladxidi zi'c tijb bèn ni ad yu't gojl, rnijczan guial rdxeban bialan lojdi.

⁴ Nē chi gunenē'n lējt, chi gunen xtiidx Dios lojdi, ad gunenē'tan lējt con ree diidx ni gūnan lējt gan por da diidxan, benan gan rliladxidi Jesucrist por xyudar xSprijt Dios nè xgualrniabeeman.

⁵ Dìn guiguien guial ni rliladxidi Jesucrist zēēdan por xgualrniabee Dios ad por xgualrajct bénguidxliuj.

Por xSprijt Dios nūnbee bejn laaman

⁶ Majsı chi raluün bèn ni ma rajc ree mazri xtiidx Dios, raluün laa reeman por gualrajc. Per ad por gualrajct ni yu' loj guidxliuj guie, lasa' gualrajc ni rajp ree bèn rniabee, gualrajc ni yu' dxej nit.

⁷ Raluün laa reeman por gualrajc ni zēēd por Dios, dìn yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj guial chililadx reeman Jesucrist, diidx chi gad guidxliuj gacchaaw been Dios xgab guin dìn gac yayal ree xanyabaa.

⁸ Laan naj tijb ni ad gogbeet ree bèn rniabee loj guidxliuj guie, dìn bal niagbee reeman dxel ad nucaat reeman dux Dad ree Jesucrist loj crüjz, bèn ca' gualrniabee.

⁹ Per loj xtiidx Dios rēb:

Achut waguiaa, achu tēēt waguiejn
abi' ni'quid wayüjnt bénguidxliuj xgab
por ni nagu'chaaw Dios par ree bèn rēn laaman.

¹⁰ Per dunuj ree ma balüü Diosan duloj ree por xSprijtaman bèn naban con dunuj ree, dìn xSprijt Dios gran ragbeeman, xt ni mazri naguie'ch ni zēēd por Dios.

¹¹ Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaag naj xixgab Dios.

¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajn ree con Sprijt zēēd loj Dios, dìn por xSprijt Dios yayagbee ree gra ni ma bazaladx Dios duloj ree guial najman benza'c.

¹³ Abi' laa reen naj ni caylüün bejn ree, per ad por dux quiarguejntan, xSprijt Dios culüü dunujn xhienaag yanen. Zian raluün xcwent Dios bèn ma nabannē xSprijtaman.

¹⁴ Per bèn ad nabannēt xSprijt Dios ad rliladxtaman ni zēēd ree por Dios ni ruluü xSprijt Dios dunuj ree, dìn par laaman najn tijb ni ad rüjnt sirv. Zeel ad zajct chignia'man xcwent Dios dìn con xSprijtzi Dios zajc chignia' bejn ni rēn güēban.

¹⁵ Per bèn ma nabannē xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannēt xSprijt Dios ad rignia't chexc zeel rignia'man ni guin ree.

¹⁶ Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

3

Compniar rüjn ree sirv loj Dios

¹ Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzuløjri rliiladx Jesucrist.

² Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios.

³ Din sta nabandi zi'c naban gra ree bénguidxliuj. Nadëdloj lasa'di rdil tëëdi, zian rguien guial sta nabandi zi'c gra ree bénguidxliuj bèn ad zinalt ree xnejz Dios.

⁴ Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

⁵ Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn.

⁶ Yaguie'ch ree guial naj naj zi'c bèn rxübin abi' Apolos naj bèn rguuil, per por Dios cayagbeedi mazri xtiidxaman zi'c rusni'saman tijb cwaandoo.

⁷ Abi' zi'c bèn rxübin zi'c bèn caguuil mandadzi cayüjn reeman, Diosan naj bèn ni rusni's ni rxübin reeman.

⁸ Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn.

⁹ Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios.

¹⁰ Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin,

¹¹ din achut zajc guhaa cimiant ni ma benan, abi' cimiant guin naj guial rliiladx Jesucrist.

¹² Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj gualrliiladx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'.

¹³ Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn.

¹⁴ Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman.

¹⁵ Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

¹⁶ Zeel gol gogbee guial lëjt naj zi'c tijb xyadoo Dios guial nabandi con xSprijt Dios.

¹⁷ Abi' bal chu bèn gutie'chdojn bèn rliiladx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't.

¹⁹ Din delant loj Dios achet lasajc gualrajc bénguidxliuj, tib lajt loj xtiidxaman rëb: “Ad rudëët Dios mod grii zagdxe ni naj xixgab ree bèn naladx guial dád nasin reeman par güün reeman tijb ni ad najt xnejz.”

²⁰ Rëb tëë loj xtiidxaman: “Dios ragbeechaaw guial xixgab ree bèn rajc da't achet lasajcan.”

²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra.

²² Ma nulendi dunujn, naj Pab, Apolos në Bëd. Xieendi naj guidxliuj, gualnaban, gualgüjt, ni yu', në ni qui chu'ri, xieendi naj gra.

²³ Abi' lëjt ma najdi xbejn Cristo abi' Cristo naj Xi'n Dios.

4

Dxiin ni been ree bèn naj ree xi apóstoles Jesús

¹ Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni'quiza naj ad zajct xmojs xhienaag naj.

² Per l jt ragbee guial tijb mojs naj par g nman gra ni rayal g nman din gap reeman laaman confianz.

³ Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn.

⁴ Din majsi bal naladxan guial achet ni mal way nan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cay nan.

⁵ Zeel ad rayalt yadxa lojdi chu cay jn zagdxo o chu ad cay jnt zagdxo, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin l jt wen par l jtan. Abi' Apolos con naj nayajcan tijb ejempl par l jt, din por dunujn gusiididi ad t dlaj guiliesidi xvalor bejn chit   por zian gusa'ndi trajs stijb bejn.

⁷ Din ni'qui tijb bejn ad lasajct mazri loj stijb bejn.  o xhie rajpidi ni ad baneet Dios lojdi? Abi' bal por laaman rajpidi ni rajpidi,  chexc zeel rlies xvalorgajquidi zi'c rul   ad por Diost rajpidi laan?

⁸ L jt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey.  Per xinix niajquidi rey din nanabeen con l jt!

⁹ Yu' dxej naladxan guial dunujn nayajcan xi ap stoles Jes s, Dios basial dunujn yayajcan zi'c ree b n ad lasajct, zi'c ree benmal ni rayal gualg jt, abi' radxaloj ree anjl n  ree b nguidxliuj dunujn.

¹⁰ Abi' la'tgaj nayajcan zi'c ree b n ad yu't xquiargueijn par b nguidxliuj guial ratie'chan xtiidxza'c Cristo, l jt rlies xvaloridi guial rignia' da'tidi guial rliadxidi laaman. Dunujn nayajc zi'c b n ad yu't gojl g iaad l jt naladxidi yu' da'tidi gojl abi' rajp ree bejn l jt respejt g iaad dunujn ad r nt reeman dunujn.

¹¹ Xt yandxej sta cayzaagdiajn por gualrliian, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan.

¹² Abi' d d radxagan ragueenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni r jnn tzi reeman dunujn.

¹³ Abi' chi rnieeguidx reeman dunujn, raneeza'cn n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman.

¹⁴ Ad cucatan gui'ch guie par gusa'nxtn l jt, cucan laan din gunen l jt consejw zi'cgajc da xi'n reen guial r nan l jt.

¹⁵ Din majsi gapidi zi'c chii mil ree b n gusiid l jt, per najzi naj zi'c tijb Dad par l jt. Din por naj guzuloj rliadxidi Jesucrist chi basidan l jt xtiidxza'caman.

¹⁶ Zeel rniaaban lojdi din guibandi zi'c naban.

¹⁷ Din par zian rxhialan Timoteo guitixlojman l jt, b n r nan zi'c da xi'n laaman diidxli rliadxaman Jesucrist. Laaman gusaaladx l jt xhienaag naban guial rliadxan Jesucrist, din zi'c naban naj ni cusidan b n rliadx ree Jesucrist gra lod ran.

¹⁸ Yu' ree xcompniaridi naladx guial ad zitixlotran l jt abi' rlies xvalor reeman guial naban reeman zagdxo.

¹⁹ Per Dios guneee permis din diob guitixlon l jt dxel gagbeen wali reeman ya naban reeman zi'c rniee reeman o rnieez reeman.

²⁰ Din guial guiban zi'c rniaabee Dios ad najtan diidxzi, rayal g n bejn zi'c rniaabee Dios con xgualrniaabeeman.

²¹ Yan,  conin r ndi g nan chi guitixlon l jt, gadil n l jt ya o gui nan l jt ganen n l jt diidxza'c?

5

Xhienaag gac con b n r jn tijb dol

¹ Ma bacagdiagan guial tijb l jt b n rliadx ree Jesucrist nabann  xnarojpidi zi'c lacheel-idi, ni'quiza ree b n ad n nbeet Dios ad r jnt lasa' dol guin.

² Abi' l jt r jndi benro', luar r jndi benro' gol guyunaya gol bab   t   b n guin lojdi.

³ Majsi ad za'tan con l jt, per r nan xgab por l jt zi'cgajc rul   za'n con l jt, abi' ma benchaawan xgab xhie rayal b n r jn dol guin.

⁴ Zi'c gualrniaabee ni baneee Jesucrist naj, naj rni l jt: "Gol bachajg lasa'di." Dxel gol gunaladx guial za'n con l jt abi' por xgualrniaabee Dad Jesucrist,

⁵ gol been b n guin tiblax, gol basa'nman loj xindxab din gagnaaman o sagdiajman por ni cay jntan din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guiadxtil ziangajc con tijb bèn güün dol ma zë gajcan zian con gra ree lasa'di.

⁷ Zeel gol been naguiejn din gaquidi naya zi'c cob harin ni ad yu't levadur guiic. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios.

⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaløj.

⁹ Abi' zi'c ma rnin lojdi loj stijb gui'ch ni ma guxhalan lojdi, ad guchajquidi bèn naban ree nadxuudx.

¹⁰ Ad canenë'tan lëjt zian por ree bèn ad rliładxt Dios, bèn naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie.

¹¹ Bèn ni canin lëjt naj ree bèn ni rëb naj ree xcompniaridi, bèn rliładx ree Jesucrist abi' naban reeman nadxuudx, o rzëëbladx reeman ni ruguiaatzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengui', o bëngubaan. Xcompniaridi bèn naban ree zian ni'quid rayalt gawnëdi laa reeman.

¹²⁻¹³ Ad da cwenttan naj ganen por ree bèn ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bèn güün guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliładx ree Jesucrist. Zeel gol babëë bèn cayüjn dol entr lojdi.

6

Chi yu' wadijl entr ree bèn rliładx Jesucrist

¹ Zi'c chi xhie rzajcnë tijb xcompniaridi bèn rliładx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliładx ree Jesucrist?

² ¿Id rliładxidi ya guial yu' dxej bèn rliładx ree Jesucrist laa reeman naj bèn güün xguialguxtis loj ree bënguidxliuj? Abi' bal yu' dxej güün xguialguxtis reeman loj bënguidxliuj, ¿chexcquiza zeel ni ad nawëëgt ni rzajc ree xcompniaridi ad rajt rabëëxnejzidi?

³ ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie!

⁴ Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi?

⁵ Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya?

⁶ Per lëjt luar güündi zian aal rudëëd lasa'di loj ree bèn ni ad rliładxt Dios.

⁷ Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi.

⁸ Per luar güündi zian, lëjtli cayüjn ree ni mal guin con ree xcompniaridi bèn rliładx ree Jesucrist. Rti'a'di xieen reeman abi' rüjnnëdi laa reeman ni ad rayalt güünnëdi laa reeman.

⁹ ¿Id ragbeedi ya guial bèn naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn rën ree ni ad najt ree Dios, në ree bèn za'në bèn ad najt lacheel reeman, në ree xinguaaw rüjn zi'c bëngunaa në ree xin rën lasa' xinguaaw zi'c bëngunaa.

¹⁰ Në ree bëngubaan, në ree bèn rzëëbladx ni ruguiaatzi reeman, në ree bengui' con ree bèn rnieeguijdx bejn, në ree bèn raguuil xhienaag chiquied reeman xieen bejn, ad zut reeman loj xguialrniabee Dios.

¹¹ Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist në por xSprijt Dios bèn ma nabannëdi.

Dux cuerp ree naj par Dios

¹² Walican zajc yaguieen ree zi'ctzi rayën ree, per ad gratan naj zagdx par güün bejn. Zajc günan zi'ctzi rënan, per ad zatiëëbtan xhie nabee naj.

¹³ Yu' ree bejn rëb: "Guialraw naj par lën bejn, abi' lën bejn naj par guialraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree.

¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yuné' ree tijb béngunaa dXuudx? ¡Ad rayalt gac zian!

¹⁶ ¿Nid ragbeedi ya guial chi runé bejn tijb bèn ni ad najt lacheelaman, dxel ma najman tijbzi con bendxuudx guin? Lèjt ragbee guial loj xtiidx Dios rëb: "Grop reeman ma naj tijbzi."

¹⁷ Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güündi ni dXuudx ree con bèn ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rüjnman ni dXuudx con bèn ad najt lacheelaman.

¹⁹ Din gol gogbee guial lèjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lèjt gajc.

²⁰ Din par zian gudijx Jesucrist por dunuj ree chi güttaman loj crüzj. Zeel gol beenné xcuerpidi dxiin par güündi Dios bèn zøjbloj, din laaman naj bèn rniabee lèjt.

7

Consejw xcwent guialruxhliaa

¹ Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxé naj guial ad zuxhliaat bejn.

² Per chitëé güün bejn dol con stijb bejn, zagdxen guial tijb gaj xinguaaw chu' lacheel o tijb gaj béngunaa chu' lacheel,

³ din gudëé xinguaaw guin gust lacheelix abi' béngunaa guin gudëézaman gust lacheelaman.

⁴ Din chi ma baxhliaa tijb béngunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, béngunaa guin ma rniabee laan.

⁵ Zeel xinguaaw në béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxéj din cwedx guiniabidi Dios, zagdxen. Per chi ma gudéd ree dxéj guin, gol bachajg lasa'di stijb chitëé güün xindxab lèjt gan con ree xixgabidi.

⁶ Ad canitan lojdi guial najczi guxhliaa bejn, per ad ni maltan guial guxhliadi.

⁷ Da xgaben naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaag guibanman, bal guxhliamaan o bal id zuxhliamaan.

⁸ Par ree bèn xtijb në par ree béngunaa bizëjb, naj rni guial zagdxeli yaya'n reeman zi'c naj.

⁹ Per bal id zadaan reeman guial ad zuxhliaat reeman, dxel zagdxeli guxhliaa reeman luar gudëéd xcuerp reeman casti guial taan reeman.

¹⁰ Guiáad ree bèn ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman.

¹¹ Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

¹² Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex.

¹³ Ziangajc bal rliladx béngunaa guin abi' lacheelaman ad rliladxt, abi' bal par xinguaaw guin achet güünan, dxel ziangajc ad rayalt yala' reeman.

¹⁴ Din xinguaaw ni ad rliladxt Jesucrist, züjnle' Dios laax guial rliladx lacheelix. Guiáad béngunaa ni ad rliladxt Jesucrist züjnle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol.

¹⁵ Per bal xinguaaw o béngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bèn rliladx ad zajct güünman naguiejn guibanné lacheelaman laaman din ad gurejdx Dios dunuj ree par yabajn ree con wadijl.

¹⁶ Din béngunaa guin ad ragbeetaman bal güünman gan chililadx lacheelaman, o bal xinguaaw guin ma rliladx dxel ni'qui laax ad ragbeet bal güünx gan chililadx lacheelix.

¹⁷ Naj rni guial tijbgaj ree bèn ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuløj rliladx reeman Jesucrist. Zianan naj ni cayën loj ree dux compniar ree bèn rliladx ree Jesucrist güün reeman.

¹⁸ Bal tijb bejn chi guzuløj rliiladxaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuløj bililadxaman Jesucrist, ad najt chu'man sen guin.

¹⁹ Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios.

²⁰ Zeel gol baya'n zi'c najdi chi guzuløj bililadxidi Jesucrist.

²¹ Bal najl zi'c bèn nado' chi guzuløj bililadxil laaman, ad najtan ni chu'l xgab xhienaag güünl. Per bal zile' ad zajc tril zi'c bèn nado', mazri zagdxé barii loj ni najl zi'c bèn nado' guin.

²² Bén ni naj zi'c bèn nado' chi guzuløj bililadxaman Cristo ma najman zi'cgajc bèn ni ad najt zi'c bèn nado' par güünman sirv loj Cristo. Abi' bèn ni ad najt zi'c bèn nado' chi guzuløj bililadxaman Cristo, dxel Cristo ma rniabee laaman.

²³ Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee.

²⁴ Zeel rnin lojdi compniar raliduladx ree Jesucrist, gol baya'n zi'c najdi chi guzuløj bililadxidi Jesucrist.

²⁵ Yan lëjt bèn ad waxhliat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan.

²⁶ Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliatidi.

²⁷ Bén ni ma baxhliaa ad najt gusa'n lacheelaman. Gui'ad bèn ni ad waxhliat ad rayalt güünman nagueijn guxhliaman.

²⁸ Per bal rüjn l xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bèn ruxhliaa, abi' laan ad rëntan saquidi.

²⁹ Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneetzan lëjt zi'cgajc ree bèn ni ad waxhliat.

³⁰ Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios.

³¹ Bén ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

³² Ni rënan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx nagueijn güünx zi'c ruladx Dios.

³³ Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn nagueijn yabaanë lacheelix laax.

³⁴ Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman nagueijn yabaanë lacheelaman laaman.

³⁵ Gra ni canin lojdi, canin laan par günan lëjt yudar ad par gudxontan guxhliadi, caninan din guibandí zi'c rayal xnejz dxel gol been gol gubajn tée zi'c rën dux Dad ree Jesucrist sin guial gudxoon xhienin lëjt.

³⁶ Chutééz xinguaaaw rüjn xgab guxhliaanë biin rnieenëx abi' bal ma yu' biingunaa guin iij par guxhliam, güünri reex ni naladx reex naj zagdxé par laa reex. Bal guxhliaa reex, guxhliari reex. Ad doltan guial guxhliaa bejn.

³⁷ Ziangajc chutééz bèn ni ad rüjnt xgab guxhliaa, ad rayalt güünman xgab guial rüjn nagueijn guxhliaman bal ma beenman xgab zagdxé guial ad zuxhliataman. Din zagdxé gajcan bal id zuxhliaa bejn.

³⁸ Zeel rnin lojdi zagdxen guial chu guxhliaa, per mazri zagdxé bal id zuxhliaa bejn.

³⁹ Tijb béngunaa chi ma baxhliaman, ad rayalt sunëman xinguaaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliiladx Jesucrist.

⁴⁰ Per naladxan guial mazri zagdxé guibanman bal id zuxhliaman stijb. Zian rünan xgab guial nabannë'n xSprijt Dios zi'cgajc lëjt.

8

Guiaraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per

yu' dxej por gualrignia' rlies bejn xvalor gajcaman. Per gualrèn lasa' bejn lasajc mazri din por gual rèn lasa' bejn zile' yaguiéen yudar du lasa' ree din yasnuu yayignia' ree xhienaag rayal yabajn ree.

² Bal yu' bèn naladx guial ma bayaaløj rignia'man gra, cusquiee laagajcaman din ryaadx da'tri chignia'man.

³ Per bèn ni rèn Dios, Dios nünbee laaman.

⁴ Yan por guial raw bejn gualraw ni ma gule'c reeman loj ree ni naladx reeman naj Dios, dunuj ree rayagbee guial achet gualrniabee rajp ree dios guin loj guidxliuj guie, din tijbzi Dios yu'.

⁵ Majsi yu' ree bejn naladx guial yu' zien ree dios bèn rniabee xanyabaa në loj guidxliuj,

⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree gualnaban.

⁷ Per ad grat ree bejn rüjn xgab zian. Din yu' ree bèn ni guyèn graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn gualraw ni ma gurej loj ree dios guin.

⁸ Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree gualraw guin.

⁹ Per majsi lējt ragbee guial zajc gawidi xhietēēznin, rayal gapidi cudad ad gūūndi guial ree bèn qui rililadxri Jesucrist gūūn reeman dol.

¹⁰ Din bal lūj guial achet naladxil rawil xhietēēznin, zojbil cayawil gualraw ni ma gurej loj ree ni ad najt dios. Dxel guguaiaa tijb ree bèn qui rililadxri Jesucrist lūj abi' nēgajcaman sēēbladx gaw gualraw guin majsi lēn luxdooman naladxaman guial ad zagdxet naj ni cayūjnman.

¹¹ Dxel por xgualrajquil cayūjnl guial gūūnman dol guial ad nixt yu' luxdooman cayawaman ni guin ree, per badxe'guijc guial në por laaman gūjt Jesucrist loj crūjz.

¹² Zeel bal rüjnl tijb ni naj ni mal par ree bèn qui rililadxri ree Jesucrist abi' rüjn reeman dol por lūj, dolan cayūjnl delant loj Cristo.

¹³ Bal por tijb ni rawan rüjn ree da compniaran dol, mejorli ad zawtran laan chitēē gūūnman dol por naj.

9

Ni zajc gūūn tijb apóstol

¹ Lējt ragbee guial zajc gūūn ni rēnan por gualrniabee ni ra'pan guial najn apóstol. Ma baguaian dux Dad ree Jesucrist abi' lējt naj ree bèn ni ma benan gan par laaman guial ma bililadxidi laaman.

² Bal yu' ree bèn ni ad nünbeet naj zi'c apóstol, per lējt ragbee guial apóstol najn. Din zi'c ma rililadxidi Jesucrist dxel ma rguien guial diidxli najn apóstol.

³ Abi' par ree bèn ad rililadxt guial najn apóstol, ze naj ni rèn loj reeman:

⁴ Ra'pan derejch gunee reeman ni gawan në ni gui'ē'n.

⁵ Abi' zajc tēē guxhlian con tijb bēngunaa naj dulasa' raliduladx ree Jesucrist din chin'ē'n laaman bantēēz guin gan, zi'c rüjn los demazri ree apóstoles con ree bijch Dad Jesucrist në Béd.

⁶ ¿O najzi con Bernabé bayal yaguiēenan xmandad Dios dux cwentan ya?

⁷ Per ni'qui tijb suldad ad rejt loj wadijl xcwentaman, yu'czi bèn rguijx xgaxtaman. Ziangajc bèn rxūbin uv, ¿wen id zajc gawaman laan ya? Laadx bèn ni rajp vag ree, ¿wen id zajc guiē'man xlejch reeb ya?

⁸ Abi' ad xixgabtzi bēnguidxliuj canin lojdi, në loj ley ni badēē Dios loj Moisejs rēb zian.

⁹ Din loj ley guin rēb: "Ad gudxe'di guijxh ro' ree be gui'xh la'tgaj cayūjn reeb dxiin." Ad rēbt Dios zian gualzi yu'man laa reeb xgab,

¹⁰ rēbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman.

¹¹ Yan ma balūn lējt xhienaag chinalidi xnejz Dios, ¿wen zro' da't yanaaban lojdi ya bal gūūndi dunujn yudar dīn gusnuu dux gualnaban?

¹² Bal stijb ree bèn ni rusiid lējt rila' rtia' reeman ni rayal gudēēdidi loj reeman, dxel ziangajc dunujn raya'pan mazri derejch gūūndi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitēē xhie cwib guijc guial ad zucaagdiagtri ree bejn xtiidzxa'c Jesucrist.

¹³ Lējt ragbee guial gra ree bixhioz ni rüjn sirv lēn xyadoo Dios, rtia' reeman tibda'n ni rinē ree bèn Israel loj Dios persi rila' rbajn reeman. Ziangajc gra ree bixhioz ni rüjn ree sirv

lule' yadoo guin lod rinë ree bejn be ree par Dios, nē reeman rtia' ta'n ni rinë ree bejn persi rile' rbajn reeman.

¹⁴ Yan laagajcan rēb dux Dad ree Jesucrist por ree bèn ni rulüü xtiidxxa'caman, guial por ree bèn ni rulüü reeman rayal guiban reeman.

¹⁵ Per naj achet caca'n, ad caxhal tētētan gui'ch guie lojdi din guneedi xhienin. Din par naj zagdxeli naj guiētān luar chu' bèn chiquied guialrabaa guin luxdon guial cusidan bejn ree xtiidxxa'c Jesucrist.

¹⁶ Ad rayalt gales da valor gajcan guial cusidan bejn ree xtiidxxa'c Jesucrist, din mandad guin naj ni bayalan. ꝑProb naj bal idan gusid bejn ree diidxxa'c guin!

¹⁷ Zeel bal cayūnan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan.

¹⁸ Abi' ni rūnan gan naj guialrabaa ni yu' luxdon majsi ad naxtan, majsi ad caca'tan ni rayal tia' bèn ni rulüü xtiidxxa'c Jesucrist, per cusnuu culūn diidxxa'c guin ree bejn ree.

¹⁹ Abi' majsi ad yu't bèn rniabee naj por mandad guin, per laa naj guie par gra ree bejn din gac gūnan sirv xbejn Cristo.

²⁰ Abi' chi za'n con ree bèn Israel, rūnan naguiejn persi yu'guijc reeman guial nayajcan bèn Israel din gūnan gan gac reeman xbejn Cristo. Chi za'n con ree bèn Israel bèn rūjn ree naguiejn chinal xley Moisejs dxel rūnan zi'c bèn zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj.

²¹ Abi' chi za'n con ree bèn ad najt bèn Israel, bèn ad zinalt ree ley guin dxel majsi ragbeen guial Dios naj bèn rniabee naj guial nabanān zi'c rniabee Cristo, per rūnan naguiejn din guguaa reeman naj zi'cgajc tijb lasa' reeman din gac gūnan gan gac reeman xbejn Cristo.

²² Chi za'n con ree bèn yu'nawēeg par gūn reeman o gaw reeman xhienin, dxel rūnan naguiejn din su reeman zagdxē con naj din gūnan laa reeman yudar gac reeman xbejn Cristo. Bantēez lod ran rūnan naguiejn din guguaa reeman naj zi'cgajc tijb lasa' reeman, din gūnczan gan majsi ta'nzi reeman gūnan gan gap reeman perdon por Cristo.

²³ Gra ree ni guie cayūnan guial rēnan xtiidxxa'c Jesucrist, din tiblojzi gūnle' Dios naj con gra ree bèn rliidax diidxxa'c guin ree.

²⁴ Lējt ragbee guial chi yu' tijb carrer zien bejn ruxūn, per tijbzaman naj bēn rtia' prem. Ziangajc lējt gol been naguiejn tia'di ni guneē Dios.

²⁵ Bēn ni ruxūn ree rajp laagajc reeman cudad chitēē xhie gudxoon guxūn reeman. Rūjn reeman zian din gūn reeman gan, abi' ni rūjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit.

²⁶ Abi' ragbeechaawan xhienin cayūnan, ad cayūntan zi'c tijb bēn ni ruxūn sin guial gagbeen chexc, ad rūntan zi'c tijb bēn ni rga'p sin guial gagbeeman ban ca'paman.

²⁷ Zeel cusagdiaj naj gajc din gac ganabee naj gajc gūnan zi'c rayal gūnan, chitēē guial culūn bejn ree xtiidxxa'c Jesucrist achet yayalan delant loj Dios.

10

Guial rēn ni ad najt ree Dios

¹ Compniar raliduladx ree Jesucrist, gol basaaladx guial dux bengol gulal ree bèn binal ree Moisejs, gra reeman guza xan zaj ni guxhaal Dios abi' gra reeman gudēd loj nijsdoo ni la nijsdoo xnia.

² Zian biguien guial xbejn Moisejs naj reeman din gra reeman guzanē laaman xan zaj guin, abi' gudēd reeman con laaman loj nijsdoo guin. Zian gurobnijs reeman loj zaj guin nē loj nijsdoo guin.

³ Gra tēē reeman gudaw guialraw ni bi't diidz xanyabaa.

⁴ Gra tēē reeman gu' nijs ni bazaladx Dios loj reeman, nijs brii lad tijb guiaj. Rēn guiēban guial diidz nadxel mal naban Cristo con laa reeman lod zētzi reeman.

⁵ Per zien reeman ad beent zi'c ruladx Dios, abi' gūjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laat yaguieen ree lasa' ree ni mal ni been reeman.

⁷ Ad rayalt yayēn ree ni rēb ree bejn naj ree Dios zi'c been zien ree dux bengol gulal ree, din rēb loj xtiidz Dios xcwent reeman: "Gurej reeman, gudaw reeman dxel bisu reeman been reeman ni dxuudx ree."

⁸ Ad rayal tētēt gūn bejn ni dxuudx con bēn ad najt lacheelaman, zi'c been zien ree dux bengol gulal ree abi' tijb dxej gūjt gajlbichoon mil reeman.

⁹ Ad zaneeguijdx tētēt ree Dios zi'c been zien ree bēn guin, abi' gudaw bēēl laa reeman persi gūjt reeman.

¹⁰ Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gual ree abi' guxhaal Dios tijb anjl bagüjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëëd ree bejn cwent loj Dios.

¹² Zeel bèn ni naladx za'dxi'ch loj xnejz Dios, mejorli gapaman cudad chitëë güün dol laaman gan.

¹³ Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios.

¹⁵ Naj ragbee guial najdi ganax bèn rignia', zeel lëjt gajc gol been xgab bal zagdxe naj ni canin lojdi.

¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman.

¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaag rüjn ree bèn Israel chi rinë reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios.

¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin.

²⁰ Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin.

²¹ Ad zajct güündi zian par guiguien guial ma najdi tijbzi con ree xindxab guin, abi' gaw tëëdi guiadxtil con vin din guiguien guial ma najdi tijbzi con Cristo.

²² ¿O rëndi ya yache'ch ree Dios? ¿Wen mazri raya'p ree gualrniabee guial lojman ya?

Xhie zajc güün ree xbejn Dios

²³ Graczi zajc güün bejn, per ad gratan naj zagdxe guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios.

²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëël luguia', ad guiniabdiidxidi bal ma gurejn loj xdios reeman, chitëë xhie guinialadxidi chi gawidi laan.

²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bèn ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni guneë reeman lojdi ad xhie guiniabdiidxidi chitëë xhie naladxidi.

²⁸ Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin.

²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: "Per, ¿chexc zeel ad züntan gra ni ragbeen ad najt ni mal por xixgabzi stijb bejn?"

³⁰ Wed rëb tëëdi: Naj ragbee guial rudën quixtëë loj Dios por gra ni rawan, ¿chexquiza zeel güün reeman xgab mal por naj?"

³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di në gra ree ni rüjndi rayal güündi laan par güündi Dios bèn zøjbloj.

³² Gol gojpc cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn riladx ree Jesucrist ad züjnt reeman xgab mal por lëjt.

³³ Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

¹ Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaanë'n lëjt guial rusaaladxidi naj, guial yu'guijquidi rüjn tëëdi zi'c balün lëjt.

³ Ŕen t́een gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee b́engunaa.

⁴ Tíjb xinguaaw chi rgu' xhienin guíjquix par cwedx guiniabix Dios o gulúüx xtiidx Dios, natu naj ni cayüjnx.

⁵ Ziangajc chut́eéz b́engunaa cabejdx canab Dios o culüüman bejn ree xtiidx Dios, abi' achet xoob guíjcaman, natu gajc naj ni rüjnman. Güünman cwent guial najman zi'c tíjb b́engunaa ni biaj guíjc xt garej.

⁶ Zeel bal tíjb b́engunaa ad ŕentaman guíxhioob xhienin guíjcaman, gugajli guíjcaman. Per bal ragbeeman, guial natun guíyaj guíjcaman xt garej, mejorli guíxhioob xhienin guíjcaman.

⁷ Per xinguaaw achet zajc chu' guíjquix din Dios beenman laax zi'cgajczi laaman, zian rulüüx respejt ni rajpíx Dios. Abi' b́engunaa guial rxhioob xhienin guíjcaman, zian rulüüman respejt ni rajpaman xinguaaw.

⁸ Din ad gojct xinguaaw con guxtil lad b́engunaa, b́engunaa guin gojc con guxtil lad xinguaaw.

⁹ Ad gojct xinguaaw par b́engunaa, b́engunaa guin gojc par xinguaaw.

¹⁰ Zeel b́engunaa rayal guíxhioob xhienin guíjcaman din guíguen guial xinguaaw rniabee laaman zi'c rulüü ree anjl chu rniabee laa reeman.

¹¹ Majsi delant loj Dios tiblojzi naj bejn, din bal id b́engunaa niu achut xinguaaw niu, abi' bal id chu xinguaaw niu achut b́engunaa niu.

¹² Walican, guial con guxtil lad xinguaaw gojc b́engunaa, per yan por b́engunaa ri't xinguaaw loj guidxliuj, zeel zi'c xinguaaw con b́engunaa por Dios yu' reeman loj guidxliuj.

¹³ Naj rni ĺejt, ĺejt gajc gol been xgab bal zagdxen cwedx guiniab tíjb b́engunaa Dios abi' achet naxhoob guíjcaman.

¹⁴ Bejn gajc ragbee guial natun bal id zugaj guíjc xinguaaw.

¹⁵ Per par b́engunaa mazri zagdxe rguíenman bal guyoöl guidxguíjcaman, din rajpaman laan par gusiaawan guíjcaman.

¹⁶ Bal chu ad za't conform por ni canin lojdi, per naj rugojn ĺejt guial achet stíjb costumbr raya'p ree, zian naj dux costumbr ree con los demazri ree b́en rliiladx xtiidx Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin ĺejt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi.

¹⁸ Yaløj rnin lojdi biguiejnan guial chi radxaag lasa'di par cwedx guiniabidi Dios ad raya'ntidi diidx, abi' tiblاد rliiladxanan.

¹⁹ Din nawëëg najn guial ad zajct zian, abi' zian rguíen chu diidxli zinal xnejz Dios.

²⁰ Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist.

²¹ Din tíjb gajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliiaan, yu'di raw da't abi' xt rzüdxidi guial rë'di zi'ctzi rëndi.

²² ¿Id yu' lidxidi ya lod gawidi guié' t́eëdi zi'ctzi rëndi?, ¿o ad ŕentidi xcompniaridi b́en rliiladx ree xtiidx Dios ya, zeel rusa'nxtudi b́enprob ree b́en achet rajp? Yan, ¿rëndi ya chu' luxdon zagdxe con ĺejt por zian? ¡Per zian zi'c cayüjndi, ad zajct ganin lojdi guial zagdxe naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün ĺejt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tíjb guiadxtil.

²⁴ Abi' chi gulox badëëman quixtëë loj Dios dxel gula'man guiadxtil guin, rëb gajman: "Guiadxtil guie naj da cuerpan ni ma bayün par guiëtan por ĺejt. Abi' chi güündi zian, gol beenan guial gusaaladxidi naj."

²⁵ Ziangajc beennëman cojp ni yu' vin chi gulox gudaw reeman xche, dxel rëbaman: "Vin guie naj da rejnman ni gaxhie'n chi guiëtan par gaxhalan tíjb nejz cüb guial xhienaag gac ree bejn perdon loj Dios. Abi' chi güündi zian, gol been zian guial rusaaladxidi naj."

²⁶ Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' t́eëdi vin, zian rulüüdi guial güjtaman por ĺejt, gol been zian xt chi gü'taman loj guidxliuj guie zatíjb.

Xhienaag rayal gac xche

²⁷ Yan bal yu' b́en raw guiadxtil rë' t́eëman vin xche guin, abi' ad yu' guíjctaman ni ŕen guiëb ni cayüjnman, dolan cayüjnman guial ad yu'guíjctaman ni ŕen guiëb xcuerp në xrejñ dux Dad ree Jesucrist.

²⁸ Zeel rayal güün bejn xgab xhienaag nabanman delant loj Dios dxel ma zajc gawaman guidahtil guië' tēeman vin xche guin.

²⁹ Din bèn raw guidahtil guin con vin guin abi' ad yu'guijctaman ni rēn guiëb xcuerp Jesucrist. Laagajcaman caguuil xcasti.

³⁰ Din guial rüjn ree bejn zian zeel dád ziendi ragxuu, zien tēedi ad yu't gojl abi' zien reeman ma güjt.

³¹ Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree.

³² Per ziangajc bal yu' xcasti Dios ni yayal ree, laan naj par guzuxnejzaman dunuj ree chitēē yaguieen ree dol, chitēē yayal ree casti ni rayal ree bèn ad rlladxt xtiidxaman.

³³ Zeel compniar raliduladx ree Jesucrist, chi radxaag lasa'di par gawidi, gol gulējz ree xcompniaridi din gawidi tijbzi.

³⁴ Per bal yu'di ad zajc cwēz guial ma rliaandi, zagdxeli gaw lidxidi chitēē yayalidi xcasti Dios guial ad zūjntidi zi'c rayal. Gra ni rayal ganin lojdi, chi guialan guidganan lējt dxel yanee ree.

12

Quiarguejn ni runee xSprijt Dios

¹ Yan ganin lējt, quiarguejn ni runee Dios loj tijb gaj bejn por xyudar xSprijt Dios, din ad rēntan guibandi sin guial gagbeedi ni guin ree.

² Lējt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen.

³ Zeel gol gogbee, chutēēz bèn rnieeguijdx Jesucrist, rēn guiëban guial ad nabannētaman xSprijt Dios. Achu tēēt bejn zajc guiëb: "Jesucrist naj bèn rniabee naj!", bal id nabanman con xSprijt Dios.

⁴ Quiarguejn rent quiarguejn ren runee Dios dunuj ree, per Sprijt guin gajc naj bèn ragnē dugra ree.

⁵ Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv.

⁶ Abi' majsi garent garen cayüjn tijbgaj bejn, Dios gajc naj bèn ni cayüjn yudar tiblojzi.

⁷ Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree.

⁸ Din con xyudar xSprijt Dios yu' ree bèn ma ca' quiarguejn par guiniee reeman, yu' tēē ree bèn ma ca' quiarguejn par chignia' reeman diidxli xcwent Dios.

⁹ Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tēē ree bèn ma cwa' guialrniabee par yayüjn reeman bēnragxuu ree.

¹⁰ Yu' tēē ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguejn par gudēēd reeman xtiidx Dios loj ree bejn. Yu' tēē ree bèn ma cwa' ree quiarguejn par gagbee reeman bal wali o ad walit ni canee bèn rēb guial caneeaman xtiidx Dios. Yu' tēē reeman ma ca' quiarguejn par guiniee reeman gadxagayaa ree diidx, abi' yu' reeman ma ca' quiarguejn par yadēēd reeman tijb diidx par stijb diidx.

¹¹ Per por xyudar gajc xSprijt Dios rüjn bejn ni guin ree, laaman ma ragbee conin rudēēman güün tijb gaj bejn ni naladxaman naj zagdx.

Tijbzi cuerp nayajc dugra ree

¹² Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman.

¹³ Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴ Lējt ragbee guial ad tibia'tzi naj xcuerp bejn, zien la' naj xcuerp bejn.

¹⁵ Yan bal guiëb guia' bejn: "Ad najtan tibia' xcuerp bejn din ad najtan yaa bejn." Per ad por ziant ad najt guia' bejn tibia'man.

¹⁶ Ziangajc majsi guiëb guidaig bejn: "Ad najtan tibia' xcuerp bejn din ad najtan guiaaloman", ad por ziant ad najtri guidaigaman tibia' xcuerpaman.

¹⁷ Din bal guidib xcuerp bejn niajc guiaaloman, ¿xhieza naag niguiejnman?, o bal guidib xcuerp bejn niajc guidaigaman, ¿xhieza naag niuxi'man?

¹⁸ Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rēnman.

¹⁹ Din bal niajc xcuerp bejn tiblojzi, dxel ad najtran cuerp.

²⁰ Per zi'c ma rnin lējt majsi zien la' naj xcuerp tijb bejn per tijbzi naj guidiban.

²¹ Ad zajct guiëb guiaaløj bejn loj yaaman: "Ad ryaadxtan lüj." Ad zajct tëët guiëb guijc bejn loj guia'man: "Ad ryaadxtan lëjt."

²² Din luar lod rulüü ad rüjnza'ct sirv, laa reen naj ni mazri rüjn sirv.

²³ Abi' ree luar lod ad rguient zagdxë, raguieen ree naguiejn din guiguieen reen zagdxë. Guiáad ree luar naguie'ch, mazri raya'p ree cudad luar guin ree rata'cw reen din guiguieen reen zagdxë.

²⁴ Ad zro't radxu' ree xgab por ree luar ni rguieen, mazri raya'p ree cudad luar naguie'ch ree zeel radojt ree xhienin din guiguieen zagdxë dux cuerp ree. Zianan been Dios xcuerp bejn

²⁵ din chitëë yaguieen ree xgab guial'yu' lod ad rüjnt sirv, guidib dux cuerp ree rüjn yudar lasa'.

²⁶ Chi rdoob tiblajt xcuerp bejn guidib xcuerp bejn rdoob, abi' bal nix'yu' tiblajt xcuerp bejn guidib xcuerp bejn'yu' nix.

²⁷ Yan ziangajc guial'nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tiblia' cuerp guin.

²⁸ Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëed ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree gualrniabee par yayüjn reeman bënragxuu ree. Bacaabee tëëman bèn güün ree gadxagayaa milagr. Bacaabee tëëman bèn ni güün ree yudar bejn ree. Bacaabee tëëman bèn ni nabee ree loj ree bèn rliladx xtiidxaman abi' bacaabeeman bèn ni rníee ree zien ree diidx.

²⁹ Ad grat ree bejn naj apóstoles ad gra tëët ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr,

³⁰ ad gra tëët ree bejn zajc yayüjn ree bënragxuu, abi' ad grat bejn zajc guinee zienloj diidx ad gra tëët ree bejn zajc yayüjn tijb diidx zatijb diidx.

³¹ Per gol been naguiejn din gunee Dios lëjt quiarguiejn zagdxë ree, abi' naj ganin lëjt conin naj nejz mazri zagdxë chinalidi.

13

Xcwent guial'rën bejn ree

¹ Din bal rajc rnien zienloj diidx ni rníee bénguidxliuj në xtiidx ree anjl'yu' xanyabaa, per bal id rënan bejn najzan zi'c tijb guiib rzijdx o zi'c tijb plati ni'yu' cha'.

² O bal nayalan nudëdan xtiidx Dios loj ree bejn, o nia'pan quiarguiejn par niagbeen gra ni zëed por Dios ni gad gagbee bejn, o nia'pan zienloj gualrignia' o nia'pan tijb gualrliladx Dios ni xt zile' guchan xliajt ree guia', per bal id rënan bejn ree achet lasajcan.

³ Ziangajc majsi gagui'san gra ni ra'pan loj ree bèn ni ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

⁴ Guial'rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man.

⁵ Guial'rën lasa' naj gap respejt lasa' bejn, ad gac bejn naxhien, ad yaleny'a'man, ad chu'xyajjn tëë lasa' bejn,

⁶ ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz.

⁷ Guial'rën lasa' naj güün bejn perdon lasa'man ni güünnëtzí reeman laaman, abi' chililadx lasa'man, ad zadxag tëëtaman cwëzaman ni cabëzaman, taan tëëman ni rüjnnëtzí reeman laaman.

⁸ Guial'rën lasa' ad yu't dxej loxan, per gualrajc yu' dxej loxan, ad zu tëëtri bèn ni rudëed ree xtiidx Dios loj ree bejn ni'qui ree bèn rníee zienloj diidx.

⁹ Din yan bal rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman.

¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial'xindoo tblad.

¹² Ziangajc yan ad rayignia't ree gra zi'cgajc chi ad rguient zagdxë loj tijb guiaawajjn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel güñbeen gra zi'c nünbeeman naj.

¹³ Choon naj ree ni ad yu't dxej lox, gualrliladx Dios, gualrbëz ni gunee Dios, në guial'rën Dios dunuj ree. Per loj guiyon ree ni guin mazri lasajc guial'rën Dios dunuj ree.

14

Guialrniee stijb diidx

¹ Gol been naguiejn gol guýèñ ree bejn, gol gurejdx gunab tëë Dios din guneeman xquarguejndi ðin güündi xmandadaman, per mazri rüjn naguiejn gapidi quiarguejñ par gudëedi xtiidx Dios loj ree bejn.

² Bén rniee tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman.

³ Per tijb bèn ruluü xtiidx Dios bejn ree cayünman yudar xhienaag chinal bejn xtiidx Dios, cudëëdaman consejw loj ree bejn ragu' tëëman luxdoo reeman.

⁴ Abi' bèn rniee tijb diidx ni ad rignia't gra ree bejn, par tijbzi laaman naj ni caneeman, per bèn rniee xtiidx Dios cayünman yudar gra ree xbejn Dios din gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rën guiëb ni rnieeman ðin güün sirv ni rnieeman gra ree bejn.

⁶ Ðin zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, çxhieza sirv güünan lëjt bal id canin lojdi zagdxo ni balüü Dios naj o ni ragbeo o bal id canen xtiidx Dios lojdi zagdxo o xhietëëz zatijb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxo ad zignia't ree bejn xhienin cucwejdxaman.

⁸ Ziangajc bal id zucwejdx reeman zagdxo trompejt loj wadijl, çxhieza naag chignia' reeman guial ma rayal suchaaw reeman par til reeman con ree bèn rayal tilnë reeman?

⁹ Yan ziangajc bal guinieenëdi bejn ree con tijb diidx ni ad rignia't reeman, çxhieza naag chignia' reeman ni rëbidi! Xli'a'zi caneedi achut rignia' ni rnieedi.

¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan.

¹¹ Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman.

¹² Zeel zi'c rëndi gapidi quiarguejñ por xyudar xSprijt Dios par güündi xhietëëz ni naj xhiin Dios, gol gunab loj Dios ðin yazaladxaman quiarguejñ lojdi ðin gac güündi ni rüjn sirv par gra ree xbejn Cristo.

¹³ Zeel bèn ni rniee tijb diidx ni ad rignia't gra ree bejn, rayal guiniabaman loj Dios ðin gagnëman laaman ðin gac gusignia'man bejn ree ni rëbaman.

¹⁴ Ðin zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen.

¹⁵ Zeel ni rayal güünan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc çhi rolan cant ree par Dios rayal gagbeen chignia' tëëñ xhie rën guiëb ni cayolan.

¹⁶ Ðin bal rnieel diidx zagdxo ree loj Dios con diidx ni ad rignia't ni'qui lüj. Dxel bèn za' con lüj, ad zajct guiëbaman "Amén" çhi ma gulox badëëdil quixtëë loj Dios guial ad rignia'taman ni rnieel.

¹⁷ Majsi nix da't badëëdil quixtëë loj Dios, per achetçzi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil.

¹⁸ Quixtëë Dios naj mazri rajc zien loj diidx guial loj gradi.

¹⁹ Per majsi zian çhi za'n lod rado'p ree dux compniar ree bèn rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv ðin gulüü reeman ben ren ree luar ganenë'n laa reeman con çhiimil diidx ni ad rignia't reeman.

²⁰ Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol.

²¹ Loj xtiidx Dios rëb: "Gaxhalan bèn rniee ree diidx ren, bèn ad najt ree bèn niz guie ðin guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios."

²² Zeel guial rniee zienloj diidx, najn tijb sen par ree bèn ad rliladx xtiidx Dios ðin çhililadx reeman. Per guial ruluü bejn ree ni rën Dios gagbee reeman, laan naj ni güün sirv par ree bèn ma rliladx ad par bèn ad rliladx.

²³ Per ni'qui zian çhi radxaag lasa'di par gucaagdiajguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' çhu' ree bèn qui bililadxri xtiidx Dios o bèn ad waliladx ree xtiidxaman, çwen id zanaladx reeman ya guial guijquidi rajc?

²⁴ Per bal çhu' bèn qui bililadxri o bèn ad waliladx abi' caneedi xtiidx Dios, dxel çhi guiguiejnman ni caneedi, gagbeeman xhie dol cayün reeman, laagajcaman gagbee çhu najman.

²⁵ Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guinee diidx ren ni ad rignia't gra bejn nē bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni riladx reeman xtiidx Dios.

²⁷ Bal yu' bèn rniee tijb diidx ni ad rniyet gra bejn, tio'pzaman o choonzaman guinee diidx ni rajcaman, abi' tijb gaj tijb gaj reeman guinee, chu' tēë bèn ni guiëb loj ree bejn xhie rën guiëb ni rëb reeman.

²⁸ Per bal id yu' bèn zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman.

²⁹ Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guinee. Abi' los demazri reeman gucaagdiajg bal zagdxequi naj ni canee reeman.

³⁰ Per bal tijb bèn zøjb gucaagdiajg loj hor guin gulüü Dios laaman xhienin, rayal yacwëëz bèn canee din gac gugojn bèn guin bejn ree xhie nin balüü Dios lojman loj hor guin.

³¹ Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree bèn gucaagdiajg gusiid reeman chu' tēë luxdoo reeman.

³² Gol badxe'guijc guial ree bèn rudëë xtiidx Dios loj ree bejn laagajc reeman rniabee laa reeman din guinee reeman chi rayal guinee reeman.

³³ Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo,

³⁴ loj hor ni ma gucaagdiajg reeman xtiidx Dios ad yu't permis guinee ree bëngunaa rayal guzoob reeman xtiidx xixinguaaw reeman zi'c rëb Dios güün reeman diizd gulal.

³⁵ Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guinee tijb bëngunaa loj hor ni gucaagdiajg reeman xtiidx Dios.

³⁶ Gol basaaladx guial ad lëjt it naj bèn yaløj cwa' xtiidx Dios ad tijb tēëzi lëjt ragbee xtiidx Dios din güündi zi'c naj xixgabidi.

³⁷ Bal chu bèn naladx guial ma cwa'man quiarguejn par gudëëman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucas loj gui'ch guie najn zi'c rniabee dux Dad ree Dios.

³⁸ Per bal id riladxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudëedi xtiidxaman loj ree bejn, ad bal gudxoondi guinee tijb ree xcompniaridi bèn rniee tijb diidx ni ad rignia'tidi.

⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tēën gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi.

² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yaløjxgaj balün lëjt ni basidan yaløj. Rnin lojdi guial Cristo güt por dux tol ree zi'c rëb loj xtiidx Dios.

⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios.

⁵ Chi ma babanman, dxel balüülojman loj Bëd dxel loj los demazri ree apóstoles.

⁶ Zianz balüülojman nē loj ree tijb cwa ree bèn riladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban.

⁷ Balüü loj tēëman loj Santiaaw dxelri loj ree apóstoles.

⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix.

⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn riladx ree Jesucrist.

¹⁰ Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtiibt naj cayünan ni cayünan, nè con xyudar Dios cayünan laan.

¹¹ Zeel achet güünan bal por chunin biguejndi xtiidx Dios bal por naj o por stibj ree xbejn Jesús, ni mazri lasajc naj guial ma biguejndan abi' ma bililadxidan.

Yaban ree bengüt

¹² Yan zi'c ma balüün læjt xtiidx Dios guial baban Cristo, ¿chexquiza zeel yu'di rëb ad zabant ree bengüt?

¹³ Bal id zaban ree bengüt, rën guiëban guial ad babant Cristo.

¹⁴ Abi' bal id baban Cristo dxel achet sirv ni caylüün læjt, ache tëët sirv ni rililadxidi laaman.

¹⁵ Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist.

¹⁶ Din bal id zaban ree bengüt, dxel ni'qui Jesucrist ad babantri.

¹⁷ Abi' bal id babanman, achet sirv guial rililadxidi laaman ache tëët perdon yu' por xtolidi.

¹⁸ Bal naj zian, xt ree bèn ma güjt achet xperdon reeman majsi bililadx reeman Jesucrist.

¹⁹ Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutëëz bënan.

²⁰ Per diidxliczi Jesucrist naj bën bënan, abi' laaman naj quijb bën yaløj baban.

²¹ Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt.

²² Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stibj guialnaban par ree bën rililadx laaman.

²³ Per gra gac zi'c rayal: Yaløj Jesucrist naj bën baban, dxel chi gui'taman stibj dxel ma yaban ree bengüt bën bililadx ree laaman.

²⁴ Abi' chi ma beenman gan gunabeeman gra ree bën rdxe'ch laaman, zi'c ree bën rajp guialguxtis nè ree bën rajp graløj guial rniabee, dxel ma yayü xguialrniabeeman loj dux Dad ree Dios.

²⁵ Din rayal nabee Cristo xt chi ma beeman gan canabeeman gra ree bën rdxe'ch laaman.

²⁶ Abi' ni chigra gumidlojman naj guialgüjt.

²⁷ Loj xtiidx Dios rëb guial Dios badëë guialrniabee loj Jesucrist din nabeeman gra, per ad rënt guiëban guial nè Dios rniabeeman din Dios badëëd guialrniabee lojman.

²⁸ Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

²⁹ Yan bal id zaban ree bengüt, ¿chexquiza zeel yu' ree bën rirobnijs xcwent ree bën ma güjt, abi'za bal id zaban ree bengüt?

³⁰ Achet sirv guial nadxu'n loj ni nadxeb gra hor.

³¹ Din rugojnan læjt, gra dxej za'n loj guialgüjt, laan naj ni diidxli ni rnin læjt zi'cgajc walin guial dad nix yu' luxdon con læjt guial najdi xbejn Cristo.

³² Yan bal naabzi loj guidxliuj guie güün sirv ni cayünan dxel achet sirv ni basajc ree bën Éfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rëb ree bën rëb: "Yadaaw ree yadü' tëë ree din guixie ma bayëjt ree."

³³ Per naj rni læjt ad tiëbidi gusquiee reeman læjt. Din guial ridxga' xtiidx ree bën ni ad zët xnejz, najzan par guxhiinan zi'c nabandi.

³⁴ Zeel gol been xgab zi'c rayal ad bal rüjn tëëridi dol din yu'di ni'quid nünbeetidi Dios, zeel canin lojdi zian din yaya'nxtudi.

Xhienaag yaban ree bengüt

³⁵ Per wed yu'di rüjn xgab: "¿Xhieza naag yaban ree bengüt? ¿Xhienaag naj cuerp ni gap reeman?"

³⁶ Per xgab guin xgab tontzan. Din læjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman.

³⁷ Ad cwaan ni rliejn quint rxübin bejn, xhajnan rxübinman, zi'c rüjn bejn con trigo o xhietëëz stibj xhaj nin.

³⁸ Per chi rliejnan ma najn cwaandoo zi'c rniabee Dios gacan, xhietëëz xhaj nin ni rxübin bejn ma yu' cwaando ni guilienan.

³⁹ Zi'c nadxaa xcuerp bejn con xcuerp ree be, nadxaa tëë bëjl con xcuerp ree biguijn.

⁴⁰ Nadxaa tëë ree ni yu' xanyabaa con ree ni yu' guidxliuj, nadxaa naj gualza'cdxoon ree ni yu' xanyabaa con ree ni yu' loj guidxliuj.

⁴¹ Nadxaa xbacha' gubijdx guial loj bëëw nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

⁴² Yan ziangajc gac con guial yaban ree bengüt. Cuerp ni rguie'ch rodxañ, per cuerp ni gap bejn stijb ad yu't dxej godxañ.

⁴³ Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl.

⁴⁴ Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵ Loj xtiidx Dios rëb guial yaløj Adán gojp gualnaban loj guidxliuj guie. Dxel bi't Jesucrist, bèn razaladx gualnaban loj ree bejn.

⁴⁶ Ad yaløj rajp bejn gualnaban ni gapaman xanyabaa, yaløjxgaj rajpaman gualnaban loj guidxliuj guie dxel gualnaban xanyabaa.

⁴⁷ Adán gojcaman con yuj zeel najman bénguidxliuj, per Jesucrist xanyabaa zëédaman.

⁴⁸ Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa.

⁴⁹ Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

⁵⁰ Abi' rugoñnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodxañ ad zajct chu'n lod yu' ni ad rodxt.

⁵¹ Per rënan gagbeedi tijb ni achutczí wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren.

⁵² Laan gac chi yaguejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guialaløj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan.

⁵³ Din rüjn naguiejn guidxaa cuerp ni rodxañ por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët.

⁵⁴ Abi' chi ma bidxaa cuerp ni rodxañ por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaløj gojc gan loj gualgüjt."

⁵⁵ Nadxel tëë ma gojc cumplid zi'c rëb loj xtiidx Dios lod rëb: "Gualgüjt, ¿conza guial rüjnñ lan? ¿Conza guial rusagzil bejn?"

⁵⁶ Gualrusagzi gualgüjt naj por dol, abi' por ley ragbee bejn guial dol guin naj ni rniabee laaman.

⁵⁷ Per quixtëe dux Dad ree Dios, bèn rüjn dunuj ree yudar par yagueen ree gan por xgualgüjt Dad Jesucrist.

⁵⁸ Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güündi mazri xmandad Dios, din lëjt ragbee guial ad ni xlia'tzi gra ni cayüjñdi par Dad Jesucrist.

16

Milia ni rdo'p par ree xbejn Dios

¹ Yan por milia ni naj guto'pιδi par güündi yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn rililadx ree Jesucrist niz Galacia.

² Gazob dumingw tijb gajdi gol gule'c cintabl zi'ctzi beendi gan lën toxman, din chi gualan ad rüjntri naguiejn guido'pιδi milia guin.

³ Abi' chi gualan, bèn ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman.

⁴ Abi' bal guguian guial rüjn naguiejn gan dxel chinë'n laa reeman.

Xhienaag naj xixgab Pab

⁵ Yaløj gadëedan niz Macedonia dxel gualan Corinto guidganan lëjt.

⁶ Wed xchej gazun con lëjt. Wed guidib tiamp nayaag gazun con lëjt, dxel güündi naj yudar din gan lod naj gan.

⁷ Ad rëntan gadëedzi nejzan gaguixlon lëjt, rënan gaglaan con lëjt bal gunee Dios permis.

⁸ Per yan naj yaya'nan Éfeso xt lanij pentecostés,

⁹ din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdxe con lëjt, din lasa'gajc xmandad Dios ni cayüñan cayüñman.

¹¹ Zeel achu lèjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabèèzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnèman laa reeman nitixloj reeman lèjt, per ad guyèntaman ni'taman yan, per zi'taman guitixlojman lèjt chi guneen laaman tiamp.

Düdx bigra ni bacaa Pab loj gui'ch guie

¹³ Gol guzujxin gol guzujdxi'ch tèè loj ni rliladxidi Jesucrist. Gol gudaan ni gui'tzi gol guzujdxi'ch tèè.

¹⁴ Gra ni güüнди gol beenan guial rëndi bejn ree.

¹⁵ Compniar raliduladx ree Jesucrist, lèjt ragbee guial Estéfanas con xfamilaman laa reeman naj bèn yaløj bililadx Jesucrist niz Acaya, ragbee tèèdi xhienaag cayüjn reeman yudar dux compniar ree bèn rliladx ree Jesucrist. Zeel rnin lojdi:

¹⁶ Lasa' ree bèn guin gol bazoob xtiidx reeman con gra ree bèn cayüjn xmandad Dios nè ree bèn cayüjn yudar cayajc mandad guin.

¹⁷ Dád nix guyu luxdon chi baguiaad Estéfanas guie, nè Fortunato nè Acaico. Din por laa reeman guza'can zi'cgajc chi za'n con gradi.

¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bèn guin gol gojp reeman respejt.

¹⁹ Gra ree compniar rliladx Jesucrist niz Asia guie rugajpdioz reeman lèjt. Abi' Aquila con lacheelaman Priscila con gra ree xbejn Cristo bèn rado'p ree lidx reeman, rugajpdioz reeman lèjt, nayajc ree xbejn Cristo.

²⁰ Gra ree dux compniar ree bèn rliladx ree Cristo rugajpdioz reeman lèjt, gol bagajpdioz tèè lasa'di zi'c rayal.

²¹ Naj Pab, quijb naj cuca lèjtr guie ree par gugajpdiozan lèjt.

²² Bal yu' bèn ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

²³ Abi' dux Dad ree Jesucrist güünle' gradi.

²⁴ Zi'c nayajc ree xbejn Cristo tiblojzi rënan gradi. Amén.

Gui'ch barojp ni guxhaal San Pabl loj ree b n Corinto rliladx Jesucrist

Rugajpdioz Pab b n Corinto rliladx ree Jesucrist

¹ Naj Pab, Dios bacaabee naj gacan xi ap stol Jesucrist, n  dux compniar ree Timoteo za' con naj. Naj cuca gui'ch guie par l jt guial ma rliladxidi xtiidx Dios luguiedx Corinto n  los demazri ree b n riga' niz Acaya.

² Dux Dad ree Dios con Dad Jesucrist g unle' l jt yabe'cdxe t e reeman luxdoodi.

Tarbajw ni gud d Pab

³ Quixt e Dios xDad Dad Jesucrist, b n naj Dad b n raya dunuj ree naj t eman Dios b n ragu' du luxdoo ree.

⁴ Laaman ragu' du luxdoo ree loj xhiet ez guialrzagdiaj ni rad ud ree din gac yalu' ree luxdoo ree b n cad d xhiet ez guialzi, yalu' ree luxdoo reeman zi'c ragu' Dios du luxdoo ree.

⁵ Din majsi cayzaagdiaj da't ree guial nayajc ree xbejn Cristo, ziangajc d d ragu'man du luxdoo ree.

⁶ Abi' bal cayzaagdiajn, cayzaagdiajn din yaguieenan l jt yudar din chu' luxdoodi din laa t edi loj dol. Abi' bal cu'man du luxdoo, rgu'man du luxdoo din chu' luxdoodi din gac taandi lasa' ree guialzi ni cayd udan.

⁷ Ad yu' naw egt du luxdoo con l jt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoo.

⁸ Compniar raliduladx ree Jesucrist, ray nan gagbeedi guial d d zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejz guial yabajnran mazri,

⁹ baguieenan xgab guial ma bay jtan. Per baza'can zian din yadxeguijcan guial achet zajc yaguieen dunujzan sin xyudar Dios, b n rasban ree beng t.

¹⁰ Laaman bab e dunujn loj guialg jt guin abi' gagn man dunujn loj lasa' ree ni nadxeb guin. Dunuj ree rayagbee guial gusnuu g unman dunujn yudar,

¹¹ mazri bal g undi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gud ed quixt e lojman zi'c cayagn man dunujn.

Chexc ad wejt Pab Corinto

¹² Abi' ni rabaan rnin lojdi guial achetzi naduladxan guial rayagbeen nabajnan naya delant lojdi n  delant loj ree b nguidxliuj, abi' diidxli cayguieenan ni rayal yaguieenan. Per ad cayguieentan zian por dux quiaraguejnzan, cayguieenan zian por xyudar Dios.

¹³ Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi.

¹⁴ Zi'cgajc ta'ngaj cayagbeedi guial chi gui't Dad Jesucrist zatijb l jt yabaadi con dunujn guiaad dunujn yabaan con l jt.

¹⁵ Laan naj ni yu'guican, zeel yaloj benan xgab nidganan l jt din nabaadi guial ma barojp volt bidganan l jt.

¹⁶ Benan xgab nidganan l jt chi nialan niz Macedonia, abi' chi nazaan Macedonia nialan nidganan l jt stijb, dxel nagu'nejzidi naj par Judea.

¹⁷ Ad g undi xgab guial chi rnin guidganan l jt rnizan zian. Ad g undi xgab guial r nan zi'c r jn gra ree b nguidxliuj, ganin guialan abi' ragbeen guial ad zialtan.

¹⁸ Dios ragbee guial ad raguie'chtan yaguieenan ni rayagbeen ad zaguieentan.

¹⁹ Din Jesucrist Xi'n Dios, b n ni ma baguien xtiidx lojdi, naj con Silvano con Timoteo, ad najt Jesucrist b n na g unman ni ragbeeman ad z jntaman, laaman ganax diidxli rnieeman.

²⁰ Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios.

²¹ Abi' Dios laaman cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman.

²² Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad r ntan gadil n l jt, abi' Dios gud ed naj casti bal id wali ni canin.

²⁴ Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliladxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

2

¹ Zeel benan xgab ad zidganatan l jt yan, chit e chu'naya luxdoodi.

² Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon?

³ Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxo gradi yu' luxdoo zagdxo por zian.

⁴ Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

Yu' perdon par b n badxe' falt

⁵ Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin gracziidi guyunaya por zian.

⁶ Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin.

⁷ Yan gol beenman perdon gol bagu' t e luxdoooman chit e chu'naya luxdoooman xt ad zadxejlt xhie g unman.

⁸ Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej.

⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g undi gra ni ganin lojdi.

¹⁰ Yan chut ez b n g undi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt

¹¹ chit e g un xindxab dunuj ree gan, din dunuj ree rayagbee xhienaag naj xguial-rusquiee xindxab.

Ad nixt guyu luxdoo Pab guzujman Troas

¹² Chi bidxinan guiedx Troas par ganen xtiidxza'c Jesucrist, d d gogn  Dios naj par g nan mandad guin ni.

¹³ Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

Ragn  Jesucrist dunujn zianczy

¹⁴ Per quixt e Dios guial por Jesucrist guixie guixie cayagn man dunujn chit e xhie g un dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczy.

¹⁵ Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree b n rliladx Jesucrist n  loj ree b n ad rliladxt.

¹⁶ Par ree b n ad rliladxt laaman, dunujn nayajc zi'c tijb go'xh ni rug jt, per par ree b n rliladx laaman dunujn nayajc zi'c tijb go'xh ni runee guialnaban. Per,  chu zajc g un ree ni guin sin xyudar Dios?

¹⁷ Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

3

Nejz c b ni yu' par yadxin ree loj Dios

¹ Chi ranan zian, ad naladxidi guial dunuj gajcan cayles dux valoran. L jt ragbee guial ad r jnt naguiejn yal un tijb gui'ch lojdi par gagbeedi chu dunujn o yanaaban gui'ch lojdi ni g un dunujn yudar par gagbee ree bejn chu nayajcan zi'c r jn ree ben ree.

² Din l jt gajc naj tijb gui'ch par dunujn, gui'ch ni yu' du luxdooon ni rool ree bejn ni n nbee t e reeman.

³ Zi'c rul u yaguie'ch ree l jt naj tijb xtiidx Cristo ni bacaan, per ad bacaatanan con tint, bacaanan con xSprijt Dios b n naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist,

⁵ abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios.

⁶ Dios naj b n razaladx dunujn quiarguejn par yagojn bejn ree xcwent nejj c b ni ma yu' par yadxin ree loj Dios, nejj c b ni ad ryaadxt chinal bejn tijb ley ni z ed loj gui'ch, per r jn naguiejn chinalaman ni z ed por xSprijt Dios. Din ley castizi naj ni zidn n, per xSprijt Dios guialnaban naj ni rud eman loj ree bejn.

⁷ Abi' majsi castizi naj ni zidn  ley ni bad e Dios loj Moisejs loj tijb guiaj nata', per d d biidni bacha' loj Moisejs chi cwa'man ley guin, xt ad gojct nuguaa ree b n Israel lojman por bacha' guin, bacha' ni ta'ngaj ta'ngaj gunidlojn.

⁸ Bal chi bi't ley guin gojc zian, yan,  mazri ni za'cdxoon naj guial gucaagdiajg ree bejn xcwent nejj c b ni rul u xSprijt Dios ni ma rajp bejn con Dios!

⁹ Din chi bi't ley ni ridn  casti par ree bejn, con bacha' bi'tan, yan,  mazri ni za'cdxoon naj guial guien ree bejn xhienaag gac reeman naya delant loj Dios!

¹⁰ Abi' bal ni za'cdxoon gojc chi bi't xley Dios loj guidxliuj guie, yan achetctzi lasajc guialza'cdxoon guin par guialza'cdxoon ni naj por nejj c b ni ma rajp ree bejn con Dios.

¹¹ Abi' bal ni ad r jnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

¹² Abi' guial yu'guicj ree zian, zeel sin guialrdxeb cayl unan bejn ree.

¹³ Ad raguieentan zi'c been Moisejs, basiaaw lajd lojman chit e gagbee ree b n Israel guial ziquied guialrulaa bacha' lojman, bacha' ni laa gunit gajc.

¹⁴ Per ad lojtzi Moisejs biaaw, ne gajc xquiarguejn ree bejn b aaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan.

¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiarguejn reeman.

¹⁶ Per b n rliladx Jesucrist, laaman rxhial xquiarguejnman.

¹⁷ Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman.

¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawaj n lod rguien xbacha' Jesucrist abi' chaawladx cayajc ree zi'c r nman yayajc ree, abi' guixie guixie cusniman dunuj ree por xSprijtaman.

4

¹ Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin.

² Dunujn achet raquie'chan, achet ni ad r njt sirv cayguieenan, ad caysquieetan bejn ree ad caychaa t etan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnej delant loj Dios.

³ Per bal yu' b n ni ad rignia't xtiidxza'c Jesucrist ni cayneen, ad rignia'taman laan guial ad z taman loj xnej Dios.

⁴ Abi' xindxab rniabee loj guidxliuj guie ma bascajyix xquiarguejn reeman, guial ad r nt reeman chililadx reeman, chit e gusni xtiidxza'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajctzi Dios.

⁵ Ad caytie'chtan dux tiidx gajcan, ni caytie'chan naj xtiidxza'c Jesucrist, b n naj Dad par dunuj ree. Abi' ni ranazan lojdi guial cayguieenan sirv l jt por guial ray nan Jesucrist.

⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguejnman, guxhalaman dux quiarguejnman din yayignia'n xhienaag naj xguialrniabeeman, guialrniabee raguaa ree por Jesucrist.

Yabajn ree por guialrliladx

⁷ Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee z ed por Dios ad por dunujtan.

⁸ Majsi graloj guialzi cayd udan per ad ralenya'tan. Majsi rul u achetri zajc yaguieenan, per radxejl gajc xhienaag yaguieenan.

⁹ Majsi xhiet ez r jnn  bejn dunujn, per ad roo'nladxt Dios dunujn. Rguin reeman dunujn per ad runidlojt reeman dunujn.

¹⁰ Bant ez guin zio'n nadxu'n loj guialg jt zi'cgajc guzajc Jesucrist, per zian ral un guial raya'pan xguialnabanman.

¹¹ Dxel la'tgaj nabanman, guixie guixie nadxu'n loj guialg jt guial nayajcan xbejn Jesucrist, per zian ral un guial raya'pan xguialnabanman, majsi guidxin dxej nit dux cuerpan.

¹² Nadxu'n loj guialg jt guial caytie'chan xtiidx Jesucrist, per por zian ma rajpidi guialnaban delant loj Dios.

¹³ Loj xtiidx Dios r b: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan.

¹⁴ Din dunujn rayagbee guial Dios, b n basban dux Dad ree Jesucrist loj guialg jt, ziangajc yasbanman dunuj ree guial ma nayajcan tijbzi con Jesucrist dxel l jt con dunujn tijbzi chign man dunuj ree lod zojbaman.

¹⁵ Din gra ni cayguieenan n  gra ni cayza'can, cayza'can zian din yaguieenan l jt yudar din gusnuu gacxhieje ni rililadxidi Jesucrist. Zian ma gac ree bejn mazri zien gud  d reeman quixt   loj Dios, guza't t   reeman laaman zagdxo.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie cayc b Dios laan.

¹⁷ Achetczi lasajc ree guialzi ni cayd udan loj guidxliuj guie din najn ni rd d, per por guialzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan.

¹⁸ Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaat ree. Din ni raguiaa ree loj guidxliuj guie yu' dxej nit reen, per ni ad raguiaat ree yan ad yu't dxej nit reen.

5

¹ Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por b nguidxliuj zi'c rajc tijb yu, abi' cuerp guin yaya'p ree par tiblayaa.

² La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa.

³ Din ad ganaxtizi Sprijt yayajc ree xanyabaa, n gajc cuerp yaya'p ree.

⁴ La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial ray nan yay jtan, ni ray nan naj guial yaya'pan cuerp c b ni yaya'pan par tiblayaa din nit dux cuerpan ni rayal nit.

⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist.

⁷ Per dunuj ree zunaal reeman guial raliduladx ree laaman ad guial raguiaat ree xhienaag gac.

⁸ Zeel raya'p ree confians guin, abi' ma ray n ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist.

⁹ Zeel achet g un n bal loj guidxliuj guie o bal xanyabaa, per ni ray n ree naj guial yaguieen ree zi'c r n Cristo.

¹⁰ Din dugra ree rayal yadxin lojman lod g un nman guialguxtis din tijbgaj dunuj ree yaca' ni rayal ree, por ni zagdxo o por ni mal ni baguieen ree loj guidxliuj guie.

Xhienaag gap bejn nejz par guidxinman loj Dios

¹¹ Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa n  l jt g un bee dunujn guial dunujn cayguieenan xnejz.

¹² Ad caylest dux valoran, ni ray nan naj guial yabaadi guial gagbeedi ni naj diidxli por dunujn, din gac yadxi'di diidx loj ree b n r jn naguiejn yaya'n reeman zagdxo delant loj ree bejn luar g un  reeman xgab xhienaag naban reeman delant loj Dios.

¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par l jt nad dguieenan zeel cayguieenan mandad guie, cayguieenan laan par yaguieenan l jt yudar.

¹⁴ Guial r n Cristo dunujn zeel cayguieenan ni cayguieenan, din dunujn rayagbee guial Cristo g jt par gra bejn abi' gra ree bejn ma naj zi'c beng t par dol.

¹⁵ Abi' Jesucrist g jtaman por gra bejn din b n chililadx ree laaman ad zabajntri reeman zi'ctzi r n reeman, ma guiban reeman zi'c r nman, laaman guial g jtaman por laa reeman abi' babanman stijb.

¹⁶ Zeel bal guia'xcheje baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn,

¹⁷ din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xcheje.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman.

¹⁹ Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree.

²⁰ Zeel dunujn nayajc b n canee por Cristo, cayd edan xtiidx Dios din gagbee ree bejn xhie rniab Dios g un reeman. Abi' por Jesucrist ranaaban lojdi: Gol guzuj zagdxe con Dios.

²¹ Din Jesucrist achetzi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

6

¹ Zeel zi'c cayguieenan xmandad Dios, dunujn ranaab lojdi: Ad g unbee xlia'di guial r n Dios l jt.

² Din loj xtiidxaman r b:

Chi bidxin dxej guidxga'n l j,

bidxga'n l j

abi' chi bidxin dxej gapil perdon

dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g unman l jt perdon.

³ Dunujn ad cayguieentan tijb ni g un guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal un bejn ree.

⁴ Par gra cayl un bejn ree guial dunujn nayajc b n cay jn sirv Dios caydaan t en xhiet ez ni raza'can, zi'c guialzi, tarbajw, ni naya,

⁵ n  guial naa ni r jn ree bejn dunujn. N  guial rgu' reeman dunujn ladxguuib, rgu' t e reeman dunujn loj wadijl, ni radxagan guial tant zien ni raguieenan, ni ral en bacaal, ne guialrliaan ni rad udan.

⁶ Cayl  t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray nan ben ren ree,

⁷ guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios.

⁸ Yu' dxej rajp ree bejn dunujn respejt, yu' t e dxej rnieeguidx reeman dunujn. Yu' dxej rniee reeman diidxza'c ree por dunujn, yu' t e dxej rniee reeman dunujn diidxguidx. R jnn  reeman dunujn zi'c b n rusquiee majsi diidxli naj ni raneen.

⁹ Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul u ma yay tan per ad ray jtan, abi' majsi xhiet ez r jnn  reeman dunujn per ad rug jt reeman dunujn.

¹⁰ Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

¹¹ B n Corinto, dunujn ma ranan gra por dunujn, achet ni naguie'ch par dunujn guial diidxli ray nan l jt.

¹² Dunujn ad rlioxr ray nan l jt, l jt bal id r nridi dunujn.

¹³ Per naj rniene' l jt zi'c rniene' tijb dad gra xi'nman: Gol guy n dunujn zi'c ray nan l jt.

Nayajc ree zi'c xyadoo Dios naban

¹⁴ Gol gojp cudad xhie ree compromis g undi con ree b n ad rliadx Dios, din garen naj xixgab ree b n ma zinal ree xnejz Dios guial loj xixgab ree b n contzi naban. Garen naj xixgab ree b n ridxga' xtiidx Dios guial loj xixgab ree b n ad ridxga't laan.

¹⁵ L jt ragbee guial ad zajc gac Cristo tijbzi con xindxab, ziangajc garen naj b n rliadx Cristo guial loj b n ad rliadx laaman.

¹⁶ Garen naj ree b n rliadx dux Dad ree Dios guial loj ree b n rliadx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c r b tiblajt loj xtiidxaman lod r b:

Naj gabajnn ' laa reeman gazu t en con laa reeman bant ez guin che reeman.

Naj gac xDios reeman

abi' laa reeman gac da bejnan.

¹⁷ R b t e loj xtiidx Dios:

Gol barii loj ree ben mal, gol been tiblax.

Ad g undi ni dxuudx din yaca'n l jt,

¹⁸ abi' naj gac tijb Dad par l jt

gui ad l jt gaquidi da xi'ngaanan n  daxi'ndxa'pan.

Zian r b dux Dad ree Dios b n ca' gra gualrniabee.

7

¹ Ni guin ree naj ree promejs ni ma been Dios con dunuj ree nayajc ree b n rililadx ree Jesucrist. Zeel rayal yaguieen ree naguiejn yabajn ree naya. Yasa'n ree tibladdol, xgab mal, n  gra ree ni dxuudx. Abi' guixie guixie yaguieen ree naguiejn yabajn ree zi'c r n Dios por respejt ni raya'p reeman.

Rabaa Pab gual bay jn ree b n Corinto xgab por xtol reeman

²  Gol gojc benza'c con dunujn! Dunujn achet waguieenan l jt, achet ni mal waguieenan l jt ad wasquiee t  tan l jt.

³ Ad naladxidi caneguidxan l jt, din zi'c ma rnin lojdi diizd guia'xchej gual dunujn ray nan l jt, abi' majsı yay jtan o majsı yabajnan per tijbzi nayajcan con l jt.

⁴ D d ra'pan l jt confianz abi' d d rabaan 'n l jt. Majsı xhiet ez gualzi cayd udan, per zi'c rgu'ldi du luxdoon nix zeel d d rabaan, majsı xhiet ez cayza'can

⁵ Din diizd chi badxinan niz Macedonia acheteci gual yaziiduladxan por gra ni cayza'can, zi'c ni r jnn  ree bejn dunujn n  gualnadxeb ni cayd udan.

⁶ Per Dios b n ragu' luxdoo ree b n yu'naya luxdoo, laaman bagu' du luxdoon chi bi't Tito guie.

⁷ Abi' ad gualzi bi'ttaman bayu du luxdoon nix, n  gual bagu'ldi luxdooman zeel bayu du luxdoon. Naman du lojn gual d d r ndi guguaadi naj, yu' t edi xgab yu'naya t edi por naj. Laan naj ni rabaan 'n gual yu'quidi xgab por naj.

⁸ Majsı naya guyu luxdoodi por gui'ch ni guxhalan lojdi, per achet naladxan. Majsı d d naya guyu luxdon chi guxhalanan gual ragbeen zunayadi tibladd ,

⁹ per yan nix yu' luxdon, ad gual guyu nayatidi, yu' luxdoon nix din por gualguyunaya guin ma bay jndi xgab z di loj xnejz Dios. Guyunayadi abi' gudaandi zi'c r n Dios, abi' achet ni mal baguieenan l jt.

¹⁰ Din chi runaya luxdoo bejn zi'c r n Dios, gualrunaya guin r jn yudar persi ray jn bejn xgab por xtolaman, zian rarii bejn loj casti, abi' ad yu't dxej yay jn bejn xgab gual gulaaman loj casti guin. Per gual runaya luxdoo bejn abi' ad r jntaman naguiejn chu'man loj xnejz Dios, dxel ad zajct gapaman gualnaban delant loj Dios.

¹¹ Per l jt gol baguiaa zi'c ma been yudar gual guyunayadi abi' gudaandi zi'c r n Dios. Por gual guyunayadi nayob beendi naguiejn bazuxnejzidi ni ma rnin cay jn tijb l jt, abi' balendi bidxeb t edi por ni cay jnx. Dxel ma r nejzdoodi gazun con l jt, bad e t edi laax casti zi'c rayal. Por gra ni beendi zian biguien gual achet dol rajpidi por zian.

¹² Gui'ch ni guxhalan lojdi, ad guxhaltanan gualzi r nan xgab por b n cay jn dol guin o gual r nan xgab por b n cazagdiaj por xtol b n guin. Guxhalan gui'ch guin lojdi din gul udi loj Dios gual yu'guijquidi dunujn.

¹³ Laan naj ni rabaan 'n gual beenquidi zian.

Abi' yan mazri rabaan gual raguaan Tito yu' luxdooman zagdxe baguiaadaman gual d d naza'c gojquidi con laaman.

¹⁴ Zeel ad basa'nxtutidi naj por gra zi'c bazatan l jt lojman. Din gra ni r n por l jt naj diidxli zi'c ragbeedi gual dunujn ganax diidxli raneen, abi' t e diidxli naj ni raguie'chan loj Tito por l jt.

¹⁵ Yan dad rusaaladxaman l jt gual rusaaladxaman xhienaag bazoobidi xtiidxaman n  gra respejt ni gopidi laaman chi guzuman con l jt.

¹⁶ D d nix yu' luxdon gual ra'pan l jt confianz par gra.

8

Gual rud ed gon con guidib luxdoo

¹ Yan compniar raliduladx ree Jesucrist, ray nan gagbeedi xhienaag cayagn  Dios b n rililadx ree Jesucrist niz Macedonia.

² Majsı xhiet ez cazajc reeman, per ad rucw ezt rguien gual d d rabaa reeman. Majsı d d b nprob reen, per dad rabaa reeman rud ed reeman cintabl par gagn  reeman bejn ree.

³ Naj ragbee gual diidxli been reeman yudar bejn ree xt lod baneetzan laa reeman. Laa reeman been yudar mazri gual loj ni baguieenan xgab, sin gual chu g un laa reeman naguiejn.

⁴ D d been reeman naguiejn du lojn din yati jban gual n  laa reeman g un yudar b n rililadx ree Jesucrist,

⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios.

⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt.

⁷ Dunujn rayagbee guial par gra zagdx zëdi: Diidxli riladixidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tēdi dunujn, yan gol been naguiejn din guiguien guial najdi benza'c par güündi yudar con ni ranan lojdi.

⁸ Ad rüntan lëjt naguiejn guial gudëedi ni rdo'p, per rugojnan lëjt zi'c raba ree ben ren guial rüjn reeman yudar, din bal rëndi gulüüdi guial diidxli rëndi xcompniaridi.

⁹ Din lëjt ragbee zi'c naza'c Dad Jesucrist, bën basa'n gra guialnaza'c xanyabaa, abi' bi'taman loj guidxliuj zi'c tijb bën ni achet rajp din por laaman yayal në lëjt xguialnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi.

¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gudëedi ni rdo'p zi'ctzi galguzujdi.

¹² Din chi diidxli rën bejn güünman yudar, xhietëez naag zajc güünman yudar. Ad rayalt gudëedaman xt ni ad rajptaman.

¹³ Ad canitan lojdi guial tēdidi tarbajw cwe'quidi xt ni ad rajptidi par güündi yudar bën ryaadx ree xhienin chitëe xhie guiyaa dx reeman, ni rayënan naj guial tibloj yaguieen dulasa' ree yudar.

¹⁴ Yan lëjt zajc güündi yudar bën ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar.

¹⁵ Loj xtiidx Dios rëb: "Bën bato'p zro' achet been sobr, abi' bën bato'p ta'nzi achet biaadxaman."

Tito con ree xcompniaraman

¹⁶ Quixtëe Dios badëeman loj Tito lasa'gajc xgab rünan por lëjt.

¹⁷ Yan chi raguie'chan lojman guidganajman lëjt, laa cwëb gajcaman guial ma rënman guguaaman lëjt, ad beent naguiejn chu niniabee ni'taman.

¹⁸ Abi' con laaman cayxhaalan stijb dux compniaran bën ma nünbee ree dux compniar ree bën riladx ree Jesucrist guidibczi, guial rulüüman bejn ree xtiidxza'c Dios zagdx.

¹⁹ Ma bacaabee tēe ree dux compniar raldulad dx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdx.

²⁰ Zeel cwabee bën guie din saman con dunujn chitëe xhie gucaaquia reeman dunujn por gra yudar ni cado'p ni naca'n par yugsa'nan.

²¹ Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

²² Yan cayxhaalan Tito con bën guin cayxhaalnë'n laa reeman stijb dux compniaran bën ma balu'been zien volt guial diidxli rënman güünman yudar, abi' mazri yan guial däd rajpaman lëjt confians.

²³ Bal chu guiniabdiidx por Tito, gol güjdx guial da compniaran najman, laaman cayüjn naj yudar par gūnan lëjt yudar chinalidi xnejz Dios. Guiáad za' tio'p dux compniaran bën zë ree con laaman, dux compniar ree bën riladx ree Jesucrist guxhaal laa reeman, abi' ruza't reeman Jesucrist zagdx.

²⁴ Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar riladx Jesucrist xcwentidi, din guguaiaa tēe reeman guial ni diidxli naj ni ma rën loj reeman xcwentidi.

9

Yudar par ree xbejn Jesucrist.

¹ Yan por yudar ni rayal yale'can par yaguieenan yudar dux compniar ree bën riladx ree Jesucrist, ad ryaadxt ganin mazri xcwentan,

² din naj ragbee guial ruladixidi güündi yudar. Abi' xt nix yu' luxdon rën loj ree bën Macedonia guial lëjt bën Acaya diidz gudibijz cayüjndi naguiejn cayüjndi yudar, abi' gra ree bën Macedonia been naguiejn güün yudar chi biguiejn reeman zian.

³ Zeel caxhalan Tito con za' tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi naguiejn güündi yudar zi'c ma rën por lëjt.

⁴ Din bal guidn 'n tio'p choon ree b n Macedonia ad yadxaaglojn l jt ad za'tidi porvinid, abi' natun par naj chit   ganin natun par l jt por confianz ni ra'pan l jt.

⁵ Zeel benan xgab r n loj Tito con za tio'p dux compniar ree guial mejorli ned gaj reeman guidganaj reeman l jt, din g  n t   reeman yudar guloox guto'p reeman yudar ni ma nadi din ma najn purvinid chi guialan. Zian guiguien guial diidxli r ndi yazaladxidi ad guialzi canabeetan l jt.

⁶ Naj rni lojdi b n rx bin ta'n, ta'n gajc raca'man, gui ad b n rx bin zro', zro' gajc raca'man.

⁷ Tijbgaj l jt gol bad   zi'c naj xixgabidi gud  di, ad mal gant ad naguiejn t  t, din Dios r nman b n razaladx guidib luxdoo.

⁸ Abi' Dios rajpaman gra guialrniabee par g  nman l jt yudar gapidi gra ni ryaadxidi chit   xhie guiyaadxidi din g  ndi yudar zi'c rayal.

⁹ Loj xtiidx Dios r b:

B n ni rgui's ni rajpaman abi'
rud  man laan loj ree b nprob,
ad yu't dxej yayanladx reeman
ni zagdxe ni r jnman.

¹⁰ Yan Dios b n razaladx bin rx bin bejn, b n razaladx guialraw par ree bejn, laaman gul   l jt xhie g  ndi din gapidi gra ni rayal gapidi, din gac g  ndi yudar mazri b n ryaadx ree xhienin.

¹¹ Zian mazri naj ni gunee Dios lojdi din gusnuu g  ndi yudar yazaladxidi. Abi' por yudar ni guixhiaaln di dunujn par ree compniar rliladx ree Jesucrist, laa reeman gud  d quixt   loj Dios.

¹² Abi' yudar guin ad z jntan sirv naabzi par loj ni ryaadx reeman laan, g  nan sirv n  par gud  d reeman mazri quixt   loj Dios.

¹³ Por yudar guin gagbee reeman guial cuzoobquidi xtiidxza'c Jesucrist zi'c rliladxidi laan abi' guza't reeman Dios zagdxe por zian, n  guial najdi benza'c rgui'sidi ni rajpidi par laa reeman n  par gra ree b n ryaadx laan.

¹⁴ Abi' z n reeman l jt, cwedx t   reeman Dios por l jt por xgab za'c ni banee Dios lojdi guial g  ndi yudar.

¹⁵  Quixt   Dios por ni ma bazaladxaman duloj ree por xi'nman, xt ni'quid radxejt xhie yaguie'ch ree por zian!

10

Guialrniabee ni rajp Pab guial najman xi ap stol Jesucrist

¹ Naj Pab, yu' ree b n na guial benza'c naj chi za'n con l jt, abi' chi za'n zijt sin guial rdxeb rdiil 'n l jt. Per zi'cgajc ninieen  Cristo l jt con respekt n  con diidxxa'c, rniabab lojdi guial

² xi nix chi guialan guidganan l jt ad r jnt naguiejn gadil 'n b n r b ree por da xgabzan cay nan ni cay nan, din ad rdxebtan ganen 'n laa reeman.

³ Walican nayajcan b nguidxliuj, per ad raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios.

⁴ Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhiet  z ni mal.

⁵ Por guialrniabee guin baguieenan gan loj ni rudxiib ree bejn duguijcan, abi' baguieen t  n gan loj guial nadxal reeman ni rudxoon g  nbee reeman Dios. Zianan rase'nan xhiet  z xgab din chile' gucaagdiaj reeman xtiidx Jesucrist.

⁶ Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdxe.

⁷ L jt mazri ridxga'di zi'c ruguiaadi bejn. Bal yu' b n r jn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman.

⁸ Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par g nan l jt yudar chignia'di mazri xcwent xnejzaman ad par gunijttan l jt.

⁹ Ad naladxidi guial r nzan gucheban l jt con ree da gui'chan.

¹⁰ Din yu' ree b n ni r b guial diidx naa abi' sin guialrdxeb rni n 'n l jt loj ree da gui'chan, abi' chi za'n con l jt ni'quid rul  t lasajcan par l jt, ni'quid radxat loj ree bejn ni rnien.

¹¹ Per naj rnin lojdi guial b n r b ree zian rayal gagbee reeman guial zi'cgajc raneen 'n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

¹² Din dunujn ad raguieentan zi'c rüjn ree bèn rlies xvalor gajc, per ni'czi ta'n ad raguieentan xgab yaguieenan zian. Din nitontzi rüjn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman.

¹³ Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cwëjbaman badxinan ladxidi.

¹⁴ Zeel ad güündi xgab guial cadëdtë caynabeen lëjt, din yaloj dunujn bio'p ladxidi par yasiidan lëjt xtiidxa'c Jesucrist.

¹⁵ Dunujn ad ralest dux valor gajcan por tijb ni been stijb bejn. Per ralëëzan guial ni's xguialriladxidi, din yasnuu yaguieenan lëjt yudar gusnuu güünbeedi ni rayal gagbeedi xhienaag rayal yaguieen ree.

¹⁶ Zian ma zile' yo'n mazri delant ladxidi par yatie'chan xtiidxa'c Jesucrist, per lod achut wazuloj chitëë yales dux valor gajcan con ni ma been ben ren.

¹⁷ Bal yu' bèn rën guilies xvalor gajc, mejorli guiliesaman xvalor dux Dad ree Dios.

¹⁸ Din ad bèn rliest xvalor gajc naj bèn raya'n zagdxe loj Dios, bèn raya'n zagdxe naj bèn rlies xvalor Dios.

11

Pab con ree apóstoles bèn rusquiee ree

¹ Yan, ¡Xi nix taandi naj con tio'p choon ree da xgab tontan! Per naj rni lojdi gol gudaan naj.

² Naj rënan lëjt zi'cgajc rën Dios lëjt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian rënan guidxinë'n lëjt loj Cristo naya sin dol.

³ Per rdxeban chu' bèn gusquiee lëjt zi'c basquiee bëël Eva, abi' ad züntridi xgab guidib luddoodi xcwent Jesucrist.

⁴ Din chi ri't ben ren rüman diidx lojdi xcwent Cristo, per garen guial zi'c ma balüün lëjt, o chi ri't bèn ren rüman diidx lojdi xcwent Sprijt, per ad lasa't xSprijt Dios bèn ma nabannëdi, o chi ri't ben ren lojdi naman xhienaag ñin gapidi perdon, per garen guial loj ni ma ranan lojdi, lëjt laa ridxga' gajquidi laa reeman.

⁵ Per naj ruluü achet ryaadxan delant loj ree bèn rëb laa reeman naj quijb xi apóstoles Jesús.

⁶ Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

⁷ Per, ¿chuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios?

⁸ Ben renli ree bèn naj ree xbejn Cristo cwa'n xmilia reeman persi beenan naj yudar la'tgaj guzun con lëjt persi basidan lëjt xtiidx Dios.

⁹ Abi' chi guzun con lëjt, chi biaadxan xhienin ad gunaabtan lojdi güündi naj yudar, bèn Macedonia ree bèn riladx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëët dxej ganin guial rüjn naguiejn güündi naj yudar.

¹⁰ Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luddoon zagdxe guial guiën ni benan con lëjt.

¹¹ Abi' ¿chexc zeel benan zian con lëjt? ¿Guial ad rëntan lëjt ya? Per Dios ragbee guial dád rënan lëjt.

¹² Abi' gusnuu günan zi'c cayünan xt yandxej guial ad zanaabtcan lojdi güündi naj yudar, din chitëë xhie guinee ree bèn ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman.

¹³ Din laa reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c ruluü naj reeman xi apóstoles Jesús.

¹⁴ Per xt ni'quid radxat loj bejn por zian, din xt xindxab zile' guluüloj loj bejn zi'c tijb xianjl Dios.

¹⁵ Dxel xt ni'quid radxat loj bejn guial bèn ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni rayal reeman por ni cayüjn reeman.

Tarbjaw ni gudëd Pab guial najman xi apóstol Jesucrist

¹⁶ Yan canin lëjt stijb: Ad naladxidi guial ad nadëdguientan, per bal rüjndi xgab zian gol basa'n za naj ganen zi'c tijb bèn ad nadëdguient din nëgajc naj gales da valoran majsi tibda'nzi.

¹⁷ Ad nat Dios guial gales da valoran zi'c cayünan, per gales da valoran zi'c tijb bèn ad nadëdguient.

¹⁸ Zi'c yu' zien ree bèn rlies xvalor gajc por ni rüjn reeman loj guidxliuj guie, yan ziangajc naj gales da valor gajcan.

¹⁹ Din guial najdi bèn rignia' ad nawëëgt naj taandi bèn ad nadëdguient ree.

²⁰ Rdaandi bèn rniabee ree lëjt rüjn reeman zi'ctzi rën reeman, rdaandi bèn rtia' ree ni rajpidi, bèn rusquiee ree lëjt, o rniee reeman lojdi ganax ree diidx nabë abi' xt rtiëjbiti rëëz reeman ro'di.

²¹ Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bèn ad nadëdguient, din ad xnejztan.

²² Per bal na reeman guial naj reeman bèn Hebreo, nëgajc naj naj bèn Hebreo. Bal na reeman guial naj reeman bèn Israel, ziangajc naj bèn Israel gajc naj. Bal na reeman guial loj xdiaa Abraham zëëd reeman, nëgajc naj zial loj xdiaa Abraham.

²³ Abi' bal na reeman guial xmandad Cristo cayünan reeman, naj mazri cayünan xmandadaman. Majsi zi'c rniee bèn ad nadëdguient rnen chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt.

²⁴ Gaay volt ma gudijn ree bèn Israel naj, abi' beegaj gudijn reeman naj zi'ctiubitap volt rugaz reeman duu ladan.

²⁵ Choon volt gudijn reeman naj con yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxej tibguiaal baya'nan loj nijsdoo.

²⁶ Guidibczi lod ma wan, gudëëdan loj ree ni nadxeb chi gudëëdan loj ree guiiw, loj ree bëngubaan, loj ree bèn ladxan bèn Israel ree në loj ree bèn ad najt bèn Israel. Ma gudëëd tëën loj ree ni nadxeb luguiedx ree, dajn ree, loj nijsdoo, në loj ree bèn rusquiee na reeman guial naj reeman xbejn Cristo.

²⁷ Dád ma guzaagdiajn. Dád zien volt ma gulën bacaal, ma gulaanan, ma we'can nijs, abi' ma guyu dxej ni achetctzi gudawan. Ma gognajlan, ma biaadx tëë da xaban.

²⁸ Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bèn zojb ree niz lod ma wan.

²⁹ Bal xhie cazajc tijb ree bèn rliadx Jesucrist, cayünan xgab por laaman. Abi' bal cusquiee reeman tijb ree bèn rliadx Jesucrist par güünman dol, dád ralenan yu' tëën laaman xgab.

³⁰ Bal rüjn naguiejn gales da valor gajcan, tijbzi ni ganin por naj, naj por guialrzagdiaj ni ma gudëëdan.

³¹ Abi' Dios xDad Dad Jesucrist, laaman bèn rayal respejt guidib tiamp, laaman ragbee guial diidxli naj ni canen.

³² Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj.

³³ Per guyu ree bèn ni badxe' naj lën tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

12

Ni balüüloj lon

¹ Achet rüjn bejn gan guial guilies xvalor gajcaman, per rayal ganin lojdi por ree ni balüüloj lon në ree ni balüü Dad Jesucrist naj.

² Naj nünbee tijb xinguaaw rliadx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binë xcuerpix o xsprijtzix wej, ad ragbeetan, tijbzi Dios ragbee.

³ Bal binë xcuerpix o xsprijtzix wej, ad ragbeetan, tijbzi Dios ragbee. Per naj ragbee

⁴ guial wejx lod zojb Dios, lod biguiejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan.

⁵ Bën zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudëëdan.

⁶ Abi' majsi gales da valoran, ad cayüntan zi'c tijb bèn ad nadëdguient din ganax ni diidxli naj ni ganin. Per ad rüntan zian chitëë yadxaløj bejn naj mazri guial loj ni rayal por ni ruguaa reeman rünan, o por ni rigueijn reeman rniën.

⁷ Në par chitëë gales da valoran zro' por gra ni ma balüü Dios naj, cadëëdan tijb guialzi ni naj zi'cgajc zi'c chi yu' tijb guieëch tiblajt bejn. Laan naj xchiin xindxab par güünmaax naj chitëë gales da valoran.

⁸ Choon volt ma canaaban loj Dios din chiquiedaman guialzi ni cadëëdan,

⁹ per laaman na lon: "Zi'c r nan l j achet gac, din mazri rguien da guialrniabeen chi cazagdiaj bejn." Zeel rabaan por ree guialrzagdiaj ni cad edan din guiguien guial nabanan con xguialrniabee Cristo.

¹⁰ Rabaan por xhiet ez guialrzagdiaj ni cad edan, o n  chi rnieeguijdx bejn naj, o chi ryaadxan xhienin, o chi xhie r jn bejn naj, n  gra ree tarbajw ni cad edan, guial cad edan laan guial r nan Cristo. Din chi cazaagdiajn dxel mazri ra'pan xyudar Cristo.

Yu' Pab xgab por ree b n rliladx Cristo luguiedx Corinto

¹¹ Gunen n l jt por naj gajc zi'c tijb b n ad nad dguient, per l jt rajp dol guial benan zian. Din l jt naj b n rayal guilies da valoran delant loj ree b n ni r b guial laa reeman naj quijb xi ap stoles Jesucrist. Din majsi tijbzi b n ad r jnt sirv naj, per achet ryaadxan delant loj reeman.

¹² Chi guzun con l jt ad balenya'tan guial g nan milagr ree n  gra los demazri ree ni badxalojdi ni benan n  graloj ree ni benan ni been sirv zi'c sen guial diidxli najn xi ap stol Jesucrist.

¹³ Gra zi'c ma benan con gra ree compniar rliladx Jesucrist lod ma wan, ma benan laan con l jt. Tijbzi ni ad bentan con l jt naj guial ad rnitlan lojdi guial g undi naj yudar con gra ni ryaadxan la'tgaj guzun con l jt, per bal guneguijdx l jt por zian !Gol been naj perdon!

¹⁴ Yan ma cay nan xgab guidganlan l jt stijb, laan naj ni yayon volt guidganlan l jt. Abi' ni'qui yan ad zanitan lojdi guial g undi naj yudar, ad ni rajptidi r nan, l jt naj b n r nan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman.

¹⁵ Abi' majsi gra ni ra'pan g nan gaxt, o majsi yadib da cuerpan par g nan l jt yudar, per achet g unan. Majsi rul   chi mazri r nan l jt, ta'nzi r ndi naj.

¹⁶ Walican guial ad gunaabtlan lojdi niagn di naj nuneedi xhienin, per yu' ree b n r b guial benan zian din nasinan par gusquien l jt.

¹⁷ !Wen basquieen l jt ya chi guxhalan b n bidganaj ree l jt?

¹⁸ N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n rliladx Jesucrist, !wen yu' ni basquiee Tito lojdi ya? !Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

¹⁹ Por gra ni ma ranlan lojdi, ad naladxidi guial caylaj dunuj gajcan, din achet waguieenan l jt. Dios ragbee guial zi'c nayajcan xbejn Cristo cayneen n l jt, abi' gra ni caynan lojdi najn par yaguieenan l jt yudar chinalidi xnejz Dios guial ray nan l jt.

²⁰ Din rdxeban guial chi guialan guidganlan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaadi naj. Rdxeban gadxaaglojn l jt con wadijl, guialnad dloj, guialrdxe'ch, guialrliies xvalor gajc, guialrniee guijdx lasa', guial ruza't bejn, guial r jn benro' n  guial ad nadxagtri lasa'di.

²¹ Rdxeb t en guial chi guidganlan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  zt rzn n reeman b n ad naj lacheel reeman, ad rucw  z t  t reeman vijs ni rajp reeman o stijb ree ni ad r jnt sirv ni r jn reeman.

13

Diidx bigra bacaa Pab loj gui'ch guie

¹ Yan ni yayon volt guidganlan l jt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi.

² Abi' zi'c r n loj ree b n ni cay jn dol chi bialan bidganlan l jt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganlan l jt stijb, achetzi ni t d zezi par ree b n ni cay jn dol.

³ Zian gagbeedi ni r ndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par g unman zi'c rayal g unman con l jt abi' con l jt cul   xguialrniabeeman ni rajpaman.

⁴ Walican g jt Jesucrist loj cr jz zi'c tijb b n ad rajpt guialrniabee, per yan nabanman por xguialrniabee Dios. Abi' zi'c g jtaman zi'c tijb b n ad rajpt guialrniabee ziangajc dunuj ree rul   ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con l jt.

⁵ L jt gajc gol been xgab bal walidi rliladxidi Jesucrist. L jt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman.

⁶ Balzianclaa gagbeedi guial dunuj diidxli raliduladxan laaman.

⁷ Abi' rarejdxan Dios por lëjt chitëë güündi ni mal, ad par yaya'ntan zagdxé delant loj ree bejn, cayguieenan zian par güündi ni naj zagdxé, majsi par ree bejn ad cayguieentan zi'c rayal.

⁸ Per ad zajt yaguieenan tibladi ni naj diidxli, dunujn caynazan ni naj diidxli.

⁹ Zeel yu' du luxdooon nix achet güünan ni cayza'ctzan din chile' sudxi'chidi loj ni rililadxidi. Abi' rarejdxan Dios din gagbeedi guidiblagaa xhienaag guibandi xnejz.

¹⁰ Abi' caxhalan gui'ch guie lojdi dxelri guidganan lëjt, din chi guialan guidganan lëjt ad ryaadxt gadilë'n lëjt por guialrniabee ni baneé Dad Jesucrist lon, guialrniabee ni baneeman lon par güünan lëjt yudar chignia'di mazri zagdxé xnejz Dios, ad par gunijttan lëjt.

¹¹ Yan compniar raliduladx ree Jesucrist par guloxan gui'ch guie, naj rni lëjt: Gol badxe' luxdoodi zagdxé, gol been naguiejn gol gubajn zi'c rayal, gol bagu' luxdoodi gol gubajn tëë zagdxé, gol babe'cdxe luxdoodi con ree xcompniaridi. Abi' Dios Bén rën dunuj ree rabe'cdxe tëëman du luxdoo ree laaman gagnë lëjt.

¹² Xhietëéz hor ni radxaag ree xcompniaridi, gol bagajpdioz lasa'di zi'c rayal.

¹³ Gra ree dux compniar ree Bén rililadx ree Jesucrist niz guie rugajpdioz reeman lëjt.

¹⁴ Dad Jesucrist güünle' gradi, guial rën Dios lëjt abi' xSprijtaman gagnë lëjt zianczi. Amén.

Gui'ch ni guxhaal San Pabl loj ree bèn Galacia rliadx Jesucrist

Rugajpdioz San Pabl bèn rliadx ree Jesucrist

¹ Naj Pab najn apóstol, per ad bénguidxliujt bacaabee naj ad laa tēet reeman guxhaal naj, najn apóstol por Jesucrist nē por dux Dad ree Dios bèn basban laaman loj guialgūjt.

² Gra ree dux compniar ree bèn za' ree guie con naj ragajpdiozan lējt najdi bèn rliadx Jesucrist niz Galacia.

³ Dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

⁴ Jesucrist güjt por dux tol ree persi babēēman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios.

⁵ Zeel rayalczi yaya'p reeman respejt zianczi. Amén

Achetri diidx ren ni zajc yabēē dunuj ree loj dol

⁶ Dád radxalon guial dád cari cabēēladxidi xtiidx Dios, abi' laaman guial rēn Jesucrist lējt zeel gurejdxaman lējt. Per lējt diidx ren ma ridxga'di

⁷ Abi' ni'quid xtiidx Diosan. Diidxliczi yu' ree bèn rēn gagdxadi abi' rēn reeman guchaa reeman zi'c naj xtiidx Cristo.

⁸ Per bal yu' bèn ruluū lējt diidx ren ree guial loj ree diidx ni ma balün lējt par gaquidi pardon, laaman ma rayal xcasti Dios, majsi chutēēznin majsi naj gajc o majsi tijb xi anj l Dios.

⁹ Zi'c ma rnin lējt abi' yan ma rninan zatijb: Bal chu ruluū lējt diidx ren ree guial loj xtiidx Cristo ni ma billadixidi, laaman ma rayal xcasti Dios.

¹⁰ Ad raguiltan mod guial yaya'n nan zagdxe loj ree bénguidxliuj, rünan naguiejn din yaya'n nan zagdxe loj Dios. Din bal günan naguiejn yaya'n nan zagdxe loj ree bénguidxliuj dxel ad cuzobtran xtiidx Cristo.

Xhienaag gojc zeel gojc Pab apóstol

¹¹ Compniar raliduladx ree Jesucrist, rēnan gagbeedi guial xtiidx Cristo ni ma balün lējt ad bénguidxliujt gulēēguijc laan.

¹² Abi' ad cwa'tanan ad basid tēētan laan por bénguidxliuj, Jesucrist gajc naj bèn balüü laan naj.

¹³ Lējt ma biguiejn guial chi guyu'n loj xreligion ree bèn Israel, guzunaalan bèn rliadx ree xtiidx Dios din günan laa reeman ni mal abi' benan naguiejn din gusa'n ni rliadx reeman.

¹⁴ Abi' naj mazri guzudxi'chan loj religion guial loj ree lasa' zidnē'n tijbzi guial benan naguiejn benan gra ree xcostumbr ree dux béngulalan.

¹⁵ Per guial rēn Dios naj, diidx chi gadan guial loj guidxliuj mal gulejman naj. Dxel chi beenman xgab.

¹⁶ Balüüloj xi'nman lon din gatiechan xtiidxza'caman loj ree bèn ad najt bèn Israel. Abi' chi goc zian achut loj bignabdiidxan,

¹⁷ ad watan Jerusalén nignan bèn ma naj ree xi apóstoles Jesús gocli diidx chi gadan gac xi apóstol Jesús, laa wa gajcan niz Arabia dxel baye'can niz Damasco stjib.

¹⁸ Chi goc choon ijz dxel wan Jerusalén persi benbeen Bēd abi' guzun con laaman chiin gubijdx.

¹⁹ Per achut apóstol ren baguiaan tijbzi Jacob bijch Dad Jesucrist.

²⁰ Gra ni canin lējt naj diidxli abi' Dios ragbeechaaw guial ad rusquieetan.

²¹ Dxelri wan niz Siria nē niz Sicilia.

²² Per ree bèn rliadx Cristo, bèn zojb ree niz Judea ad wayünbeet reeman naj nadxel.

²³ Rguiejnzi reeman rēb ree bejn: "Bèn guzunal dunuj ree yaloy par güünman dunuj ree ni mal yan ma catie'chaman xtiidx Jesucrist, majsi yaloy beenman naguiejn din yasa'n ree ni raliduladx ree Jesucrist."

²⁴ Abi' rudēē reeman quixtēē loj Dios guial nē naj ma rliadx Cristo.

2

Bachajg Pab bèn naj ree apóstoles

¹ Chi goc chidaj ijz, dxel wan Jerusalén zatijb. Binē'n Bernabé con Tito,

² din Dios na guial gan ni. Abi' Jerusalén guin badxaag dulasa'n tijb luar con ganax ree bèn rniabee loj ree xbejn Cristo persi benē'n laa reeman diidx por xtiidx Jesucrist ni culün bèn ad najt ree bèn Israel. Benan zian din ad rēntan guial ni ma benan o ni cayünan gacan dxiin xlia'.

³ Per ni'qui Tito bën guzu ni con naj, majsi najman bën grieg ad beent reeman laaman naguiejn chu'man sen ni ru ree bën Israel.

⁴ Din guyu tio'p choon ree bën Israel been reeman zi'c ruluü naj reeman dux compnarian persi gojc bachajg reeman dunujn par gula'ch reeman conin ad raguientran guial ma raliduladxan Jesucrist din gac nabee reeman dunujn yaguieenan zi'c rniabee ley.

⁵ Per ni'czi tibda'n ad batiëjbtan nünjn reeman dunujn gan, din ad rayëntan cwëëladxidi xtiidixi Jesucrist ni ma zinalidi.

⁶ Abi' ree bën rniabee loj ree xbejn Jesucrist achetri na reeman lon guial rayal günan, majsi chutëëz naj reeman din delant loj Dios tiblojzi naj bejn.

⁷ Luar ninia reeman xhie mazri nünan, laa gogbee gajc reeman guial Dios gulej naj din gatiechan xtiidzxa'c Jesucrist loj ree bën ad najt bën Israel, zi'cgajc gulejman Bëd din gütie'chaman diidzxa'c guin ree loj ree bën Israel.

⁸ Abi' Dios bën bacaabee gajc Bëd din gacaman apóstol loj ree bën Israel, laagajcaman bacaabee naj din gacan apóstol loj ree bën ad najt bën Israel.

⁹ Zeel Jacob, Bëd con Waj bën rniabee ree mazri loj ree bën rliidax Jesucrist, gogbee gajc reeman guial Dios naj bën banee naj guialrniabee guin. Abi' banee yaa reeman zi'c tijb sen guial ma nayajcan compnari guial ma za' tëë reeman conform guial naj con Bernabé yuglüün bën ad najt ree bën Israel, guiáad laa reeman gullüü reeman bën Israel ree.

¹⁰ Ni gunabzi reeman du lojn din yaguieenan yudar bënprob ree, abi' laan naj ni ruladxan günan.

Gudilë Pab Bëd

¹¹ Per chi we Bëd guiedx Antioquía, dxel gudilë'n laaman guial ad cayüjntaman zi'c rayal.

¹² Guial yaloj gudawnëman bën ad najt ree bën Israel. Per chi bidxin ree bën guxhaal Jacob guiedx Antioquía, dxel ad bachajgraman bën ad najt ree bën Israel guial bidxebaman xhie niëjb ree bën zinal ley.

¹³ Në los demazri ree bën Israel bën rliidax ree Jesucrist bën zojb ree ni në reeman been zi'c been Bëd abi' xt në Bernabé been zian.

¹⁴ Zeel chi baguian guial ad cayüjnt reeman zi'c rëb loj xtiidzxa'c Jesucrist, dxel rën loj Bëd delant loj gra reeman: "Lüj najl bën Israel abi' ad nabantil zi'c laa reeman, ¿chexc zeel rüjn! naguiejn guiban ree bën ad najt ree bën Israel zi'c naban ree bën Israel?"

Guialrliidax Jesús rabëë bejn loj dol

¹⁵ 'Dunuj ree nayajc ree bën Israel diidz chi bayajl ree abi' ad yu't dxej babajn ree sin xley Dios zi'c ree bën ad najt bën Israel.

¹⁶ Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliidaxman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

¹⁷ Yan bal cayguieen ree naguiejn yayajc ree naya delant loj Dios, laan ruluü dunuj ree guial nayajcqui ree bëndol, ¿wen mazri bëndol cayüjn Cristo dunuj ree ya? ¿Dunuj ree rayagbee guial ad ziantan!

¹⁸ Din bal ma basa'nan xley Moisejs, abi' yaye'can con ley guin zatijb dxel naj gajc cayün naj bëndol.

¹⁹ Zeel ma basa'nan ley guin din gabajnan par Dios.

²⁰ Abi' rünan cwent guial në naj güjt chi güt Cristo loj crüjz dxel ad nabantri da xtijban, ma nabannë'n Cristo. Abi' yan zi'c nabanen, ma nabanen zi'c rliidaxan Xi'n Dios, bën rën naj güjt tëëman por naj.

²¹ Abi' ad rüntan tiblad guial rën Dios dunuj ree, din bal nile' niajc bejn naya niz loj Dios guial rüjn bejn zi'c rniabee xley Moisejs dxel achetri lasajc guial güjt Cristo."

3

Guialrliidax Jesucrist rquied dol

¹ ¿Bën Galacia, chexc zeel ad radëdguientidi! ¿Chu bascajy xquiarguiejndi? Awa chi balün lëjt, delant loj gradi bagojnan lëjt par xhie güjt Cristo loj crüjz.

² Yan rënzán gagbeen: ¿Nabannëdi xSprijt Dios ya guial rüjndi zi'c rniabee xley Moisejs o por guial rliidaxidi xtiidx Jesucrist ni ma bacaagdiajguidi?

³ Xipxi nadidi zeel awa ma nabannëdi xSprijt Dios abi' yan naladxidi guial din yayaaloj gaquidi zi'c rën Dios rayal chinalidi ley.

⁴ ¿Wen achet lasajc gualrzagdiaj ni gudëdidi ya, o guzagdiaj xlia'zidi ya?

⁵ Chi runee Dios xSprijtaman lojdi abi' rüjnman milagr ree delant lojdi, ¿wen rüjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

⁶ Gol basaaladx guial Abraham por guial bililadxaman Dios, been Dios laaman cwent zi'c tijb bén ad wayüjnt dol.

⁷ Zeel gol gogbee guial gra ree bén rliadx Dios, laa reeman naj zi'c xi'n Abraham.

⁸ Diizd gocli mal ragbee Dios guial majsi loj ree bén ad najt bén Israel yu' ree bén güünman cwent zi'c bén ad wayüjnt dol guial rliadx reeman laaman. Din tiblajt loj xtiidxaman rëb guial rëbaman loj Abraham: "Günle'n gra ree bénguidxliuj por lüj."

⁹ Zeel rüjnle' Dios gra ree bén rliadx laaman zi'cgajc beenle'man Abraham guial bililadxaman laaman.

¹⁰ Gra ree bén zinal xley Moisejs yu' casti par laa reeman din loj gajc libr ley guin rëb: "Bén ad zinalt güün gra zi'cgajczi rëb loj ley guin, yayalaman casti."

¹¹ Zeel rayagbee ree ad zile't gac bejn naya loj Dios por guial rüjnman zi'c rniabee ley. Din loj xtiidx Dios rëb: "Bén rliadx Dios rajpaman guialnaban delant lojman guial ma nünman laaman cwent sin dol."

¹² Per ley guin ad rniabtan chililadx bejn laan, loj libr ley guin rëb: "Bén güün zi'c gajczi rniabee ley, zajpaman guialnaban."

¹³ Jesucrist badxi'ca dunuj ree loj xmalldicion ley din laaman bayal casti ni rayal ree por ley guin, din loj libr ley guin rëb: "Ma zë maldicion guijc bén rëjt loj crüzj."

¹⁴ Zian guzajc Jesucrist par chile' güünle' Dios bén ad najt ree bén Israel, zi'c beenle'man Abraham. Abi' guial rliadx reeman Jesucrist zeel ma naban reeman con xSprijet Dios zi'c tal rëb Dios diizd guia'xchej.

Xley Moisejs në xpromejs Dios

¹⁵ Yan compniar raliduladx ree Jesucrist ganin lëjt xhienaag rüjn ree bénguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin.

¹⁶ Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man "bén zëed ree" loj xdiaa Abraham. Ad rëbtan zien bejn, rëban tijbzi bejn, din laaman rëb günle'n "Bén zëed" loj xdiaaman. Abi' bén zëed loj xdiaaman laaman naj Cristo.

¹⁷ Abi' ni canin lëjt naj guial xley Moisejs bi'tan tajpgayuu gajlbichii ijz despuejs ni been Dios promejs con Abraham, zeel ad zajc guse'n ley guin promejs ni ma been Dios.

¹⁸ Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

¹⁹ Wed zanabdiidxidi lon, ¿par xhieza rüjn ley guin sirv? Badëe Dios ley guin din gagbee bejn guial najman bëndol, abi' been ley guin sirv xt dxej ni bi't Bén zëed loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badëe ley guin loj Moisejs, abi' Moisejs badëed laan loj ree bejn.

²⁰ Per chi been Dios promejs con Abraham achutci badëed xtiidxaman, quijb laaman guneeñ Abraham.

Xhie sirv rüjn ley

²¹ Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan

²² din loj xtiidx Dios rëb guial dol rniabee gra bejn din gra ree bén chililadx Jesucrist tia' reeman gra ni rëb Dios.

²³ Chi gad guialrliadx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliadx Jesucrist.

²⁴ Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bén ni ad wayüjnt dol guial raliduladx ree laaman.

²⁵ Per yan guial ma raliduladx ree Jesucrist ad rüjntri naguiejn gulüü ley guin dunuj ree.

²⁶ Din guial raliduladx ree Jesucrist ma nayajc ree xi'n Dios.

²⁷ Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman.

²⁸ Abi' zi'c Bén Israel zi'c Bén ad najt Bén Israel, zi'c Bén naj zi'c Bén nado' zi'c Bén ad najt zi'c Bén nado', zi'c xinguaaw zi'c béngunaa, par Cristo tiblojzi nayajc ree din ma nayajc ree tijbzi con laaman.

²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni rëb Dios loj Abraham diizd gulal.

4

¹ Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpjax, zi'cgajc tijb mojs, majsi xieenx naj gra ni rajp xdadix.

² Abi' yu' ree b n rajp laax yu' t e ree b n rniabee laax n  ree ni rajpjax, xt chi guidxin dxej ni r b xdadix tia'x ni rayalix.

³ Ziangajc dunuj ree, zi'c tijb xindoo bayajc ree yaloy guial bunaaldxi'ch ree gra ree xcostumbr ree b nguidxliuj.

⁴ Abi' chi bidxin dxej gojc zi'c r b Dios gac, guxhaal xi'nman Jesucrist loj guidxliuj guie, tijb b nguidxliuj gojc xniaaman. Abi' gubajnxman zi'c rniabee ley ni basa'n Moisejs duloj ree ⁵ persi bile' bab eman dunuj ree loj ley guin bile' t e nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnn e' reeman, abi' por Sprijt guin raguie'ch ree: "iDux Dad ree Dios!"

⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni guneed Dios por Cristo.

Yu' Pab xgab por ree b n rliadix Jesucrist

⁸ Yaloy chi gadidi g unbee quijb Dios, beendi sirv loj ree ni naladixidi naj Dios, per diidxli ad Diost reen.

⁹ Per yan guial ma n nbeedi Dios o guial ma n nbeeman l jt,  chexc zeel r ndi yabi'di g undi graloy ni ad r jnt sirv ni beendi yaloy?  Chexc zeel r ndi gaquidi zi'c b n nado' loj ree ni guin ree zatijb?

¹⁰ Abi' yan guial sta zin di cwent xhie dxej o xhie b ew o xhie tiamp o xhie ijj naj ni zobjloy par l jt par g undi xhienin zi'c goc xcostumbridi.

¹¹ D d rdxeban por l jt, doolgui basid xlia'zan l jt.

¹² Zeel rniaaban lojdi compniar raliduladx ree Jesucrist, gol gubajn zi'c nabanana, zi'c benana persi gogbeedi guial tiblojzi nayajc ree. Ad canitana lojdi guial xhie ni mal ma beendi naj

¹³ din l jt ragbee guial yaloy chi basidana l jt xtiidxza'c Jesucrist, ragxuun nadxel.

¹⁴ Per majsi ziana, gudaandi naj. Ad beentidi naj tiblada ad gul eladix t etidi naj, bidxga'di naj zi'c tijb xianjl Dios o zi'cgajc Jesucrist.

¹⁵ Naj ragbee guial bal zile'n xt guiaaloydi zajc cw edi par guneedana lon. Laadx yan,  conzan guial rabaan di naj?

¹⁶  o al rdxe'chidi naj ya guial rnin ni naj diidxli lojdi?

¹⁷ Rnin lojdi guial ree b n cay jn naguiejn guial guidxga'di xtiidx reemana, ad zagdxet r n reemana l jt, xixgab reemana naj din gusa'ndi ni basidana l jt abi' mazri guidxga'di xtiidx reemana.

¹⁸ Ad ni malt naj guial gui n bejn lasa' bejnxman, per par ni zagdxen n  zianczi, ad chi za'tzana con l jt.

¹⁹ Par naj l jt naj zi'c da xi'nana. Abi' cazaagdiajn por l jt zatijb, zi'c rzagdiaj tijb b ngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal.

²⁰ iBal zianclaa za'n con l jt din ganen n quijb l jt, per yan ad ragbeetan xhienaa g nn n l jt!

Agar con Sara

²¹ Per gol guna, l jt b n r n ree guibana zi'c rniabee ley.  Wen id wayignia'di ni r b loj ley ya?

²² Loj ley r b guial guyu tio'p xi'n Abraham: Guyu xi'nman con tijb b ngunaa brii laj Agar b n goc xmojsamana, guyu t e stjib xi'nman con quijb xb ngunaa b n brii laj Sara.

²³ Xi'n Abraham con b ngunaa goc xmojsamana, guyux guial baaal Abraham laamana. Per xi'nman xin guyu con quijb xb ngunaa guyux ad por guial baaaltzi Abraham xb ngunaa, n  par gac cumplid promejs ni been Dios lojman.

²⁴ Yan, Sara n  Agar laa reemana naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni bad ed Dios loj Moisejs ruguia' Sinai, abi' b n zinal ree ley guin naj reemana zi'c b n nado' loj ley guin zi'c goc Agar loj Abraham.

²⁵ L jt ragbee guial niz Arabia naj guia' Sinai, abi' ree b n niz ni rniee reemana guia' guin Agar. Per yan Jerusal n naj zi'c guia' guin, din gra ree b n z ed niz Jerusal n, b n zinal ree ley, laa reemana naj zi'c b n nado' loj ley.

²⁶ Per dunuj ree du ladx ree naj Jerusal n ni yu' xanyabaa abi' Jerusal n guin ad najtana zi'c ni nado' loj ley guin zi'c ad gojct Sara loj Abraham.

²⁷ Loj xtiidx Dios r b:

Babaa b ngunaa ni ad zajct chu' xi'n.

Babaa da't guial ad n nbeetil guialrzagdiaj ni rd d b ngunaa ni rajl xi'n.

Din b n ad rut xi'n, mazri zien xi'nman chu'

guial loj b n ru xi'n.

²⁸ Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman.

²⁹ Abi' l n ree dxejzii, xi'n Agar baze'x xi'n quijb xb ngunaa Abraham, ziangajc yan b n zinal ree ley ruze' reeman dunuj ree nabajnn ' ree xSprijt Dios, guial ma nayajc ree xi'n Dios,

³⁰ Per,  xhie r b loj xtiidx Dios? R ban: "Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xb ngunaa."

³¹ Zeel compniar raliduladx ree Jesucrist, dunuj ree ad nayajct ree zi'c xi'n b n naj zi'c b n nado' guin, nayajc ree zi'c xi'n quijb xb ngunaa Abraham guial ad rniabeet ley dunuj ree.

5

Gol guzujdxi'ch loj ni rliadxidi xtiidx Dios

¹ Cristo naj b n bab   dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c b n nado' guial g undi zi'c rniabee ley.

² Naj Pab rnnin l jt. Bal rudi sen zi'c rniabee ley, achet lasajc guial rliadxidi Jesucrist.

³ Abi' rnnin l jt zatijb: Chut  z b n ru sen guin rayal g unman zi'c tal rniabee ley.

⁴ L jt guial r jndi xgab guial g undi zi'c rniabee ley ma najdi naya delant loj Dios, laan r n gui b guial ad najtridi xbejn Cristo ad yu'guijc t  tridi guial r n Dios l jt.

⁵ Per dunuj ree por xSprijt Dios n  guial raliduladx ree Jesucrist nadxu'guijc ree guial yadxin ree naya delant loj Dios.

⁶ Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliadx guin zajc yabajn ree zagdxo yay n dulasa' ree.

⁷ L jt ma z di zagdxo.  Chu na lojdi guial ad zidxga'tidi ni naj diidxli?

⁸ Din xgab guin ad z  dtan por Dios, b n gule l jt.

⁹ Zeel gol gojp cudad "din con ta'nniyt zajc gusquiee reeman gradi."

¹⁰ Per naj ra'pan Cristo confians guial ad zusa'ntidi ni basidan l jt. Abi' Dios gud  d casti b n cusquiee ree l jt, majsi chut  znin.

¹¹ Bal r n guial r jn naguiejn chu' ree bejn sen, ad zazunaltri ree b n Israel naj. Ziangajc bal gui n guial rayal chu' ree bejn sen, r n gui ban guial achet lasajc guial g jt Cristo loj cr jz.

¹² Balzianclaa gra ree b n ruslen l jt guial rayal chu'di sen,  mejorli gut  g laagajc reeman tiblayaa!

¹³ Din l jt ma gulaadi loj ley, per ad guial ad rniabeetri ley l jt din g undi ni r ntzidi, rayal gui ndi g un t   yudar lasa'di.

¹⁴ Din con tijbzi mandamient ma been bejn gra zi'c rniabee xley Dios. Mandamient guin r b: "Guy n ben ren zi'c r n l j gajc."

¹⁵ Per bal rdxe'ch lasa'di abi' rdilidi, gol gojp cudad chit   zianzi la' lasa'di.

Guialnaban ni rune xSprijt Dios

¹⁶ Zeel rnnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi.

¹⁷ Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi r nman.

¹⁸ Per bal xSprijt Dios naj b n rniabee l jt dxel ad rniabeetri ley l jt.

¹⁹ Yan laa rguien gajc con ree nin z  d con xixgabzi ree bejn: Guialrzun  xinguaaw ren o b ngunaa ren, guialr jn bejn nidxuudx, guialrajp bejn gadxagayaa vijs,

²⁰ guial r n bejn graloj ni naladxaman naj Dios, guial r jn bejn gualbidxaa, gualrdxe'ch lasa', gualrdil, gualrz  bladx ni rajp bejn, gualralenya', gualrlies xvalor gajc, gualrlia' lasa' bejn, guial ru loj tibcwaa bejn o stib cwaaman,

²¹ gualrd dloj, gualrjug jt bejn, gualrz dx, gualnalna n  xhiet  z ni mal lasa' ree ni guin. Rugojnan l jt zi'cgajc ma rnnin lojdi yaloj, b n cay jn ree lasa' ree ni guin ad zayalt reeman lod rniabee Dios.

²² Per ni z  d por xSprijt Dios naj, gualr n lasa' bejn, gualrabaa, gualrga'dxe luxdoo, guial yu' pacens, gualnaxanladx, guial rajc naza'c, guial r jn cumplid xtiidx,

²³ guial rüjn naya, guialrniabee bejn xixgab mal gajcaman. Abi' ad yu't ley ni rudxoon guial güün bejn ni guin ree.

²⁴ Abi' ree bën ma naj xbejn Cristo ma basa'n reeman gra dol, në gra ree ni mal ni rën reeman güün reeman din ma güjt Cristo por gra dol.

²⁵ Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

²⁶ Ad yales dux valor gajc ree, ad yache'ch du lasa' ree, ad yadëdloj du lasa' ree.

6

Yaguieen du lasa' ree yudar

¹ Compniar raliduladx ree Jesucrist, rnin lëjt, bal chu xcompniaridi rüjn dol gan, lëjt guial ma rajquidi mazri xtiidx Dios gol guneenëman con ganax ree diidxza'c, din rayal cu'guijquidi guial nëgajc lëjt zajc güün dol lëjt gan.

² Gol gognë lasa'di loj xhietëez guialzi ni rdëdidi, zian ma cayüjndi ni rniabee Cristo güündi.

³ Bal yu' bën ni naladx guial rajcaman gra abi' achetzci rajcaman, dxel laagajcaman cusquiee laaman.

⁴ Tijbgaj bejn rayal güün xgab bal nabancaman xnejz. Abi' bal nabanman xnejz, tijbzi laaman rayal yabaa luar güünman xgab guial nabanman zagdxe loj gra ree bejn.

⁵ Din tijbgaj dunuj ree rayal yaya'p ree xhienaag yabajn ree.

⁶ Chutëez bën cusiid xtiidx Dios, rayal güünman yudar bën culüü laaman con ni ryaadxa-man.

⁷ Ad gusquiee lëjt gajc, din achut zajc guze' Dios. Ni rxübin bejn laagajcan yato'paman.

⁸ Bal nabanman zi'ctzi naj xixgabaman zadxin dxej yayalaman casti. Per bën naban zi'c rniabee xSprijt Dios, por Sprijt guin yayalaman guialnaban tiblyaa delant loj Dios.

⁹ Ad rayalt yadxag ree guial yaguieen ree ni zagdxe, din bal id zadxag ree chi guidxin dxej yaca' ree ni yayal ree.

¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree bën rliladx ree Jesucrist.

Xconsejw Pab

¹¹ Gol baguiaa xi narooob ree lejtr ni cucan par lëjt con quijb yan.

¹² Bën cayüjn ree naguiejn chu'di sen, rüjn reeman zian par yaya'n reeman zagdxe loj ree bejn luar sagdiaj reeman guial rliladx reeman Jesucrist.

¹³ Per ni'qui ree bën yu' sen guin ad rüjnt reeman gra zi'c rëb ley guin. Rënzi reeman chu'di sen guin din güün reeman nabë guial ma been reeman gan yu'di sen guin.

¹⁴ Per naj achet por ni günan nabë, tijbzi por guialgüjt Dad Jesucrist. Abi' guial güjtaman loj crüjz ma basa'nan gra ree ni mal yu' loj guidxliuj guie abi' ma güjtan par ree ni mal guin.

¹⁵ Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman.

¹⁶ Abi' ree bën ma zinal xnejz Cristo, Dios yaya laa reeman yabe'cdxe tëëman luxdoo reeman në gra ree bën diidxli naj xbejn Dios.

¹⁷ Diizd yan ad rëntran chu guche'ch naj. Din dib ni ca ree ladan laa reen rulüü guial najn xiapóstol Jesucrist.

¹⁸ Compniar raliduladx ree Jesucrist, dux Dad ree Jesucrist güünle' gradi. Amén.

Gui'ch guxhaal San Pabl loj ree b n  feso rliladx Jesucrist

Rugajpdioz San Pabl b n  feso ree

¹ Naj Pab, najn tijb xi ap stol Jesucrist por xgualrniabee Dios. Cuccan gui'ch guie par l jt guial diidxli zinalidi xtiidx Jesucrist, l jt guial ma najdi xbejn Dios luguiedx  feso.

² Dux Dad ree Dios n  Dad Jesucrist g  nle' l jt yabe'cdxe t e reeman luxdoodi.

R jnle' Dios b n rliladx ree Jesucrist

³ Quixt e Dios, xdad Dad Jesucrist, d d benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloj guialnaza'c din gac yunaal ree xtiidxaman.

⁴ Laaman bacaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman.

⁵ Abi' guial r nman dunuj ree, diidz guia'xchej beenman guial yayajc ree xi'nman por Jesucrist zi'c beenman xgab gac.

⁶ Zeel ad racw ezt raza't ree Dios zagdx guial d d benza'c najman, ma beenle'man dunuj ree por Xi'nman Jesucrist, b n r nman,

⁷ b n ma gudijx por dunuj ree chi guxie' xrejnman, abi' ma gojc perdon dux tol ree guial d d r n Dios dunuj ree.

⁸ Zeel d d zro' guialrajc n  guialrignia' ma bazaladxaman duloj ree,

⁹ abi' ma bal  man duloj ree xhienaag naj xixgabaman diidz gocli, zi'cgajczi ma beenman xgab gac.

¹⁰ Gui ad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa n  loj guidxliuj.

¹¹ N t e guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diidz guia'xchej, din laaman r jn gra zi'c r nman gac.

¹² Abi' laaman ma been zian, din dunuj ree nayajc ree b n yaloj bililadx Jesucrist, yayajc ree b n guza't laaman zagdx por xgualrniabeeman.

¹³ N gajc l jt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c r b Dios guial guneeaman xSprijtaman, dxel yan guial ma nabann di laaman, laaman naj zi'c tijb sen ni rul   guial ma najdi par Dios.

¹⁴ Guial ma nabann  xSprijt Dios dunuj ree, yaca' ree ni r b Dios guneeaman chi ma bara xbejnman za' xanyabaa, din chit e yacw ez yaza't reeman zagdx por xgualrniabeeman.

Rniab Pab quiarguejn loj Dios

¹⁵ Abi' guial ragbeen rliladxidi Dad Jes s r n t edi los demazri ree b n naj xbejn Dios,

¹⁶ zeel ad rucw ezt rud n quixt e loj Dios por l jt, beegaj rbedx rniaaban laaman.

¹⁷ Laaman naj Dios rniabee diidz xanyabaa, xDad Dad Jesucrist. Rniaaban lojman yazaladxaman quiarguejn lojdi din chignia'di ni gul  man lojdi gusnuu t e g  nbeedi laaman mazri.

¹⁸ Rniaaban lojman din guixhialaman xquiarguejndi din chignia'di xhie r n gui b ni rb zidi diidz chi bacaabeeman l jt, chignia' t edi guial ni za'cdxoon narooob t e naj ni nagu'chaaw Dios par ree b n naj xbejnman.

¹⁹ Rniaab t en lojman guial gagbeedi guial d d narooob naj xgualrniabeeman ni cayagn  dunuj ree raliduladx reeman. Laagajc guialrniabee narooob guin bal   Dios

²⁰ chi basbanman Jesucrist abi' gule'caman laaman xladbeeman xanyabaa

²¹ lod bad eman guialrniabee lojman ni mazri lasajc guial loj gra ree guialrniabee, n  loj gra guialguxtis n  loj gra gobiarn. Abi' mazri lasajc guialrniabee guin guial loj gra ree guialrniabee yu', n  ni qui chu'ri ree loj guidxliuj guie.

²² Dxel basa'n Dios gr n loj Jesucrist, bacaabeeman laaman din nabeeman gra ree b n rliladx laaman.

²³ Gui ad ree b n rliladx laaman, guidiblagaa nabann man laa reeman abi' bant ez guin za'man din laaman guidiblagaa rniabee.

2

Nayajc ree perdon guial r n Dios dunuj ree

¹ Gocli gojquidi zi'c beng t loj Dios por ree ni mal n  por ree dol

² ni beendi guial binalidi nejz mal been tëëdi zi'ctzi rën xindxab güündi, sprijtnal ni nabannë gajc ree bèn ad ruzoobt xtiidx Dios.

³ Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'cgajc rayal ree bèn ad ruzoobt xtiidx Dios casti, ziangajc nayal ree casti.

⁴ Per guial raya da't Dios dunuj ree rën tëëman dunuj ree,

⁵ zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon.

⁶ Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa.

⁷ Dios been zian din dxej zëëd ree guiguieen guial dád rënman dunuj ree, abi' benza'c tëë najman con dunuj ree por Jesucrist.

⁸ Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëëd xperdon Dios.

⁹ Ni'quid por ni zagdxe ni ma baguieent ree zëëd perdon guin chitëë chu guilies xvalor gajc.

¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yaguieen ree ni zagdxe zi'c beenman xgab yaguieen ree diizd gocli.

Tijbzi nayajc ree por Jesucrist

¹¹ Zeel lëjt bèn ad najt ree bèn Israel, gol basaaladx xhienaag guzajquidi yaloj. Bèn Israel ree gulëëlaj lëjt bèn ad yu't ree sen guial yu' reeman sen zi'c rniabee ley.

¹² Tiamp zii ad beenbeetidi Jesucrist, ad gojctidi cwent loj ree bèn Israel ad gojc tëëtidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios.

¹³ Per yan guial ma rliladxidi Jesucrist, lëjt guial guzujdi zijt loj Dios, por xrejn Jesucrist ma bibiguidi lojman.

¹⁴ Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bèn Israel tijbzi con ree bèn ad najt bèn Israel.

¹⁵ Abi' por xguialgüjt Jesucrist gulox gra ree costumbr rniabee xley ree bèn Israel güün ree bejn, laaman been persi gojc ree bèn Israel con ree bèn ad najt bèn Israel zi'c tijbzi guiedx cüb guial ma nayajc ree tijbzi con laaman. Zian babe'cdxeman luxdoo ree bejn.

¹⁶ Din por xguialgüjt Jesucrist loj crüzj ma gulox guialrdxe'ch lasa' ree bèn Israel con ree bèn ad najt bèn Israel, abi' ma nadxu'në' ree Dios zagdxe guial ma nayajc ree tijbzi por Jesucrist.

¹⁷ Abi' laaman bidgagojn dugra ree, zi'c ree bèn Israel zi'c ree bèn ad najt bèn Israel xhienaag yadxu'në' ree Dios zagdxe.

¹⁸ Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree.

¹⁹ Zeel ad najtridi zi'c bèn zëëd lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman.

²⁰ Lëjt naj zi'c xze' tijb yu ni cayajc, guiáad ree xi apóstoles Jesús con ree bèn badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zojbloj ni cayajcnë yu guin.

²¹ Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist.

²² Në yan guial ma najdi tijbzi con Jesucrist ma naj tëëdi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxa'c Jesucrist

¹ Por zianan yu'n ladxguuib, naj Pab guial cayünan sirv loj Jesucrist din günan yudar lëjt bèn ad najt ree bèn Israel.

² Lëjt ragbee guial naj Dios benza'c zeel baneeman dxiin guin lon din günan lëjt yudar chignia'di xtiidxaman.

³ Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej.

⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist.

⁵ Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bèn badëë xtiidx Dios loj ree bejn.

⁶ Abi' ni goc zi'c tijb ni naguie'ch par ree bejn naj guial por xtiidxza'c Jesucrist, nē ree bèn ad najt bèn Israel ma rayal ni gudēē Dios loj ree bèn Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

⁷ Naj cugojn xtiidxza'c Jesucrist loj ree bejn, ad guial rayalt gūnan dxiin guin. Guial naj Dios benza'c, zeel bazaladxaman gualrniabee lon par gūnan laaman sirv.

⁸ Naj naj bèn bigra bèn lasajc ta'nz loj gra ree xbejn Dios, per guial naj Dios benza'c, bacaabeeman naj din gūn diidx loj ree bèn ad najt bèn Israel xcwent xguialnaza'c narooob Jesucrist,

⁹ nē par gugojnan zagdxe gra reeman xhienaag naj xixgab Dios bèn been gra, xgab ni ad balūū gajtaman loj ree bejn.

¹⁰ Din yan zi'c naj ree bèn rliiladx Jesucrist, gagbee gra ree bèn rajp gualrniabee xanyabaa guial gra lojczy gualrajc rajp Dios.

¹¹ Abi' diidz chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist.

¹² Nē guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman.

¹³ Zeel rnin lojdi ad runayadi por ree gualzi ni cadēēdan por lējt, din zagdxen par lējt.

Dád rēn Jesucrist dunuj ree

¹⁴ Zeel ruzuxiban loj dux Dad ree Dios;

¹⁵ laaman naj Dad loj gra ni yu' loj guidxliuj nē xanyabaa.

¹⁶ Abi' rniaaban lojman por xguialrniabee narooobaman yazaladxaman lējt gojl nē gualrniabee por xSprijtaman din yayu luxdoodi,

¹⁷ guibannē tēēdi Jesucrist guial rliiladxidi laaman. Din zian zi'c diidxli zinalidi zi'c rēn Jesucrist dunuj ree,

¹⁸ dxel ma zajc gagbeedi con los demazri ree compniar raliduladx ree laaman guial gudēdlaj abi' xt banczi naaloj zro' rēnman dunuj ree.

¹⁹ Zeel rniaaban loj Dios gagbeedi placr rēnman dunuj ree, guial mazri zro' najn guial loj ni raguieen ree xgab, abi' zian guidiblagaa guibannēdi Dios.

²⁰ Laaman, guial rajpaman gualrniabee par gūnman mazri guial loj ni raguieen ree xgab o mazri guial loj ni ranaab ree lojman por xSprijtaman bèn nabajnnē' ree,

²¹ abi' rayal yaza't reeman zagdxe gra dxej nē gra tiamp por Jesucrist, dunuj ree guial raliduladx ree Jesucrist. Amēn.

4

Nayajc ree tijbzi por xSprijt Dios

¹ Naj, yu'n ladxguuib guial cayūnan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bèn ma naj ree xbejnman.

² Gol gojc benza'c nē bèn naxanladx, gol gojp pacens gol gudaan tēē lasa'di guial rēn lasa'di.

³ Gol been naguiejn gusnuu gaquidi tijbzi con xyudar xSprijt Dios bèn rabe'cdxe du luxdoo ree par yayajc ree tijbzi.

⁴ Dunuj ree nayajc zi'c tijbzi cuerp, abi' dugra ree nabajnnē' xSprijt Dios, abi' zi'c ma nayajc ree xbejn Dios, ziangajc ralējz ree ni guneeman.

⁵ Tijbzi Dad, tijbzi gualrliladx nē tijbzi gualrriobnijs raya'p ree.

⁶ Din tijbzi Dios yu', bèn naj Dad par dugra ree, rniabeeman dugra ree, nabannēman dugra ree rūjn tēēman ujs dugra ree.

⁷ Per tijb gaj dunuj ree ma naj ni raguieen ree, zi'ctzi ni banee Jesucrist yaguieen ree.

⁸ Zianan zeel rēb loj xtiidx Dios:

Chi bayē'paman xanyabaa,

beenman gan loj gra gualrniabee,

abi' badēēdaman loj ree bejn ni rayal gūn reeman.

⁹ Abi', ¿xhie rēn guiēb lod rēb "bayē'paman"? Rēn guiēban bi'taman loj guidxliuj.

¹⁰ Guiáad Jesucrist bèn bi't loj guidxliuj, laagajcaman naj bèn bayē'p xanyabaa persi canabeeman guidib guidxliuj nē xanyabaa.

¹¹ Abi' ma badēēman loj ree bejn ni rayal gūn reeman, yu' reeman bayal gac apóstoles, yu'za reeman bayal gac bèn rudēē xtiidx Dios loj ree bejn, yu' reeman bayal guitie'ch xtiidxaman, yu' tēē reeman bayal gudēē consejw gulūū tēē reeman bèn rliiladx ree laaman.

¹² Zian bacaabee Jesucrist bejn ree din gusiid los demazri ree bèn rliiladx laaman, gac tēē gūn reeman laaman sirv, gusnuu tēē gūnbee reeman laaman,

¹³ xt yayaaloj yaliduladx ree yaguieenbee tēē ree Xi'n Dios guidiblagaa, din yayaaloj yayignia' ree xhienaag rayal yunaal ree Jesucrist.

¹⁴ Dxel ad zayajctri ree zi'c ree xindoo riladx xhiet eznin, ad zayajctri ree zi'c tijb ni r n  bi niz ni niz guie por graloj ni r  ree b n raguuil mod gusquiee ree bejn,

¹⁵ rayal yay n du lasa' ree, yad  ree diidx yunaal t e ree ni diidxli din gusnuu yayignia' ree yaguieen t e ree zi'c r n Jesucrist b n rniabee dunuj ree.

¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yay n dulasa' ree por Jesucrist.

Guialnaban c b con Jesucrist

¹⁷ Yan por Jesucrist rnin l jt: Ad bal guibanridi zi'c naban ree ben ad n nbeet Dios, din laa reeman naban zi'ctzi naj xixgab reeman,

¹⁸ nacay xquiarguiejn reeman, ad rajpt reeman guialnaban r n Dios gap reeman, guial ad rignia't reeman ache t et naladx reeman.

¹⁹ Ma been luxdoo reeman gojl, ma gul eladx laagajc reeman abi' cusnuu cay jn reeman graloj nidxuudx.

²⁰ Per l jt ad beenbeetidi Jesucrist din guibandi zian,

²¹ bal walidi ma biguiejndi xcwentaman bal wali t edi ma basiididi diidxli z ed por laaman.

²² Gol basa'n zi'c gubandi yaloj, din ruxhiinzi zi'c gubandi yaloj con xgabmal ni basquiee l jt guial beendi zi'ctzi guy ndi.

²³ Gol been naguiejn guidxaa xixgabidi guidiblagaa

²⁴ din gaquidi zi'c tijb benc b been Dios zi'c r nman, con tijb guialnaban naya n  zi'c rayal por xdiidxliman ni ma biguiejndi.

²⁵ Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist.

²⁶ Bal rdxe'chidi, ad g undi dol. Ad gudxe' guialrdxe'ch guin luxdoodi d chej,

²⁷ chit e ti bidi g un xindxab l jt gan.

²⁸ B n rban, rayal gucw ez cwanman abi' g unman dxiin, din con dxiin zagdxe g unman dxeal ma rajpaman con xhie g unman yudar b n ryaadx ree xhienin.

²⁹ Ad rniee t edi diidxguijdx, gol gunee ganax diidxzagdxe ni g un yudar chignia' ree ben ren b n gucaagdajg ree laan din g unan laa reeman sirv.

³⁰ Ad rgu'nayadi xSprijt Dios, b n ma nabannedi zi'c tijb sen guial ma najdi xbejnman par dxej ni guidxindi lojman.

³¹ Gol basa'n tiblad gra guialralenya', guialrdxe'ch, guialralen lasa', guialrguidxa'n  lasa', guialrniee diidxguijdx loj lasa' n  graloj ni mal.

³² Gol gojc benza'c, gol baya lasa'di gol been t e lasa'di perdon zi'c been Dios l jt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios b n r nman, gol been naguiejn g undi zi'c laaman.

² Gol gubajn zagdxe, gol guy n lasa'di zi'c guy n Jesucrist dunuj ree abi' bay  laagajcama g jtaman por dunuj ree, gojcaman zi'c tijb gon ni rliaa nejxh par Dios.

³ Yan l jt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad r jnt sirv ad rz ebladx t edi gra par l jt.

⁴ Ad rnieedi diidxguijdx ree, diidxtont ree, diidx ni ad rayalt guinieedi din ad ni zagdxt reen. Mazri zagdxe gol bad e quixt e loj Dios.

⁵ Din l jt ma ragbee guial ree b n naban nadxuudx n  ree b n r jn ni ad r jnt sirv, n  ree b n rz ebladx gap gra (mazri yu'guijx reeman ni guin ree luar gui n reeman Dios), dxeal ad zile't chu' reeman lod rniabee Jesucrist con Dios.

⁶ Gol gojp cudad achu gusquiee l jt con ree diidx ad r jnt wen, din por ree ni guin z ed xcasti Dios par ree b n ad ruzoobt diidx.

⁷ Zeel ad g undi zi'c r jn reeman.

⁸ Gocli gubajndi zi'c tijb b n nayaaw xquiarguiejn, per yan guial ma najdi tijbzi con Jesucrist, laaman naj biani par l jt. Zeel gol gubajn zi'c ree b n ma zinal biani guin,

⁹ din guial chinal bejn biani guin ma zile' g unman ni zagdxe zi'c rayal, n  ni naj diidxli.

¹⁰ Gol been naguiejn gol been zi'c ruladx Dios.

¹¹ Ad n  l jt g un ni ad r jnt ree sirv ni r jn ree b n nayaaw xquiarguiejn, gol gunee  reeman din gagbee reeman ni r jn reeman.

¹² Din xt ratu bejn g uman ni r jn reeman ralan.

¹³ Per por xtiidx Jesucrist laa gagbee gajc reeman xhienin r jn reeman.

¹⁴ Din zianan zeel r b loj xtiidx Dios:

Batie'ch xbacaalil, lüj guial zinalil nejz mal.

Bariica loj dol din gusni Jesucrist xquiargueijn.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bèn yu' xquiargueijn.

¹⁶ Gol been nagueijn guibandi zi'c rayal naga yu' tiamp, din lèn ree dxej guie ad xnejztri naban bejn.

¹⁷ Zeel ad gontzi nabandi zi'c naj xixgabidi, gol beenli nagueijn chignia'di xhienaag rën Dios guibandi.

¹⁸ Ad südxidi, din gualrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa.

¹⁹ Chi rünë lasa'di diidx, gol baza't ni ca loj ree salmos, loj ree himno, nè gra loj ree cant ni naj par Dios. Abi' guidib luxdoodi gol biil gol baza't tëë Dios zagdxe.

²⁰ Abi' guixie guixie gol badëëd quixtëë loj dux Dad ree Dios por Dad Jesucrist por gra ni rüjnman par dunuj ree.

Zi'c rayal guibannë lasa' ree bèn rliladx Jesucrist

²¹ Gol bazoob xtiidx lasa'di por respejt ni rajpidi Jesucrist.

²² Nè lëjt béngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist.

²³ Din xinguaaw ree rniabee lacheel zi'c rniabee Jesucrist bèn rliladx ree laaman, bèn babëë laa reeman loj dol abi' naj reeman xbejnman.

²⁴ Abi' zi'c ruzoob ree bèn rliladx Jesucrist xtiidxaman, ziangajc ree béngunaa rayal guzoob xtiidx lacheel reeman.

²⁵ Négajc lëjt xinguaaw nuxhliaa ree, gol guyën lacheelidi zi'c rën Jesucrist bèn rliladx ree laaman, abi' xt güjtaman por laa reeman

²⁶ persi bisüdaman xtol reeman, basiaman laa reeman por xtiidxaman nè por gualrirob-nijs,

²⁷ din guidxin reeman lojman nix da't nè ni'qui tijb ni mal, sin falt o dol ren ree, guidxin reeman lojman nayadxuj sin dol.

²⁸ Yan ziangajc ree xinguaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rënx.

²⁹ Din ni'qui tijb bejn ad rdxe'cht laagajcaman, ruyaanli laagajcaman rniajchi' tëë laagajcaman zi'c rüjnnë Jesucrist dunuj ree nayajc ree bèn rliladx laaman

³⁰ guial nayajc ree tijbzi con laaman.

³¹ Zeel zi'c rëb loj xtiidx Dios: "Xinguaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn."

³² Dád nawëëg naj par chignia' bejn diidx guie ree, per caninan din zian naj Jesucrist con ree xbejnman.

³³ Yan, xinguaaw ree, gol guyën lacheelidi zi'c rën lëjt gajc. Guiáad lëjt béngunaa, gol gojp respejt lacheelidi.

6

¹ Nè lëjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi.

² Abi' mandamient yaløj ni rëb guial yu' ni yaca' ree bal yagueien ree ni rëb: "Gojp respejt xdad xniaal,

³ din guibanl zagdxe guiban tëël xchej loj guidxliuj guie."

⁴ Négajc lëjt dad na ad gusagdiaj xi'ndi chitëë guidxe'ch reex por zian. Mejrli gol basni's reex zagdxe, gol güneenë reex gol balüü tëë reex zi'c rën Dios.

⁵ Nè lëjt bèn rüjn ree xchiin bejn, gol bazoob xtiidx bèn naj xpatrondi loj guidxliuj guie. Con guidib luxdoodi gol gojp respejt gol bazoob tëë xtiidx reeman, gol gunaladx xchiin Jesucristan cayüjndi.

⁶ Gol been reeman sirv ad chi ruguaatzi reeman lëjt par yaya'ndi zagdxe loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi.

⁷ Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj.

⁸ Din lëjt ma ragbee guial tijbgaj bejn majsı bèn rüjn xchiin bejn o bèn ad rüjnt xchiin bejn, per gudëë Jesucrist ni rayalaman zi'ctzi naj ni zagdxe beenman.

⁹ Négajc lëjt bèn naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bèn rniabee laa reeman nè lëjt yu'man xanyabaa, abi' ad rbetaman loj bejn.

Gol guzudxi'ch loj ni rliladxidi

¹⁰ Rni tëën lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xgualrniabee narooobaman.

¹¹ Gol gojp lèjt gajc con xguialrniabee Dios din sudxi'chidi chitèè güün xindxab lèjt gan con ree ni rusquiee.

¹² Din ad cayguieent ree naguiejn yaguieen ree gan loj tijb ni naj bëèl nè dxijt, caydijl ree con gra loj sprijtmal zi'c ree ni rajp guialrniabee, guialguxtis nè gra loj xsprijt xindxab ni yu' ni canabee tèè loj guidxliuj guie.

¹³ Zeel gol gojp lèjt gajc con xguialrniabee Dios din chile' taandi xhietèéz loj guialzi gui't sudxi'ch tèèdi loj xhietèéz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tèè zi'c rayal guibandì.

¹⁵ Gol guzusin par guinieedi xtiidxza'c Jesucrist din por laan yadxu' ree zagdxè con Dios.

¹⁶ Gol badxe'guijc tèè guial guialrliladx ni rajpidi naj ni ragnè lèjt loj gra ni zèèd por xindxab.

¹⁷ Nè ni been Dios perdon xtolidi, laan naj ni rutèè lèjt, guiáad xtiidxaman naj zi'c tijb espad ni runee xSprijt Dios lojdi.

¹⁸ Ad gucwèéz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tèèman por gra ree xbejnman.

¹⁹ Gol gurejdx gunab tèèman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnè perdon.

²⁰ Dios bacaabee naj par ganen xtiidxza'caman, abi' por zian yu'n ladxguuib. Per gol gurejdx gunab Dios chitèè gadxeban güün xtiidxaman zi'c rayal günan.

Diidx bigra ca ree loj gui'ch guie

²¹ Tíquico, tijb du lasa' ree bèn rayèn da't ree, abi' diidxli cayüjnman dunuj ree yudar cayguieen ree sirv Jesucrist, laaman gugojn lèjt gra xhienaag za'n xhie tèè cayünan,

²² din par zianczi caxhalan laaman din gugojnman lèjt xhienaag nadxu'n niz guie yagu' tèèman luxdoodi.

²³ Rniaaban loj Dios guial gra ree bèn rliladx Jesucrist, cwe'cdxeman luxdoo reeman guièn tèè lasa' reeman, chililadx tèè reeman laaman nè Dad Jesucrist,

²⁴ güünle' tèèman gra ree bèn wali rèn Dad Jesucrist.

Gui'ch guxhaal San Pabl loj ree bén Filipos rlliladx Jesucrist

Rugajpdioz Pab bén rlliladx ree Jesucrist

¹ Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bén rlliladx Jesucrist luguiedx Filipos, në par ree bén rniabee lojdi rulüü tëë reeman xtiidx Dios në ree bén rüjn yudar bén rlliladx ree Jesucrist.

² Dux Dad ree Dios në Dad Jesucrist güünle' lëjt, yabe'cdxe tëë reeman lëjt.

Rbejdx rniab Pab Dios por ree bén rlliladx Jesucrist

³ Zianczi chi raaaladxan lëjt, rudën quixtëë loj da Dadan Dios.

⁴ Abi' zianczi chi rbedx rniababan laaman dád nix ru luxdon, rbedx rniababan laaman por gradi.

⁵ Din diizd dxej ni guzuloj rlliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan.

⁶ Ragbeechaawan guial diizd chi guzuloj rlliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb.

⁷ Najczi guial günan xgab zian por gradi, din rusaaladxan lëjt, zi'c chi yu'n ladxguuib ziangajc chi culün conin naj diidxli xcwent Dios din tibloj cayüjnle'man dunuj ree.

⁸ Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt.

⁹ Rniaab tëën lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güündi,

¹⁰ din chile' cwedi ni naj mazri zagdxe. Abi' zian guibandi naya sin dol niz loj Dios, chitëë xhie naman contr lëjt dxej ni gui't Dad Jesucrist stijb.

¹¹ Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tëë reeman xvaloraman.

Yabajn ree par Cristo

¹² Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist.

¹³ Abi' yan, gra ree bén yu' lën palas në gra ree bén zojb niz guie ragbee reeman guial yu'n ladxguuib por guial najn xbejn Jesucrist.

¹⁴ Abi' chi baguiaa ree compniar raliladxnë' ree Jesucrist guial yu'n ladxguuib, mazri guzudxi'ch reeman abi' zien da't reeman guyu luxdoo gutie'ch reeman xtiidx Jesucrist sin guialrdxeb.

¹⁵ Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bén zojbloj. Per yu' reeman rtie'ch xtiidxaman guial naj xixgab reeman zagdxe.

¹⁶ Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguuib guial za'dxi'chnë'n xtiidxaman guial najcan diidxli.

¹⁷ Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguuib guie.

¹⁸ Per achet güünan majsi zagdxe naj xixgab reeman o ad zagdxtet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan.

¹⁹ Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj.

²⁰ Naj ragbee guial ad yu't dxej guslaa Dios naj yaya'nxtun, sin guialrdxeb gulün bejn ree xhienaag ra'pan respejt Jesucrist majsi nabanen o majsi guiëtan.

²¹ Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman.

²² Per bal gabajnrnan loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxe par naj.

²³ Din loj grop ree ni guin dád nawëëgan par gaben conin günan, tijb rënan yaca' Dios naj din gazun con Cristo, laan naj mazri zagdxe par naj,

²⁴ per por lëjt rüjn nagueijn gabajnrnan.

²⁵ Abi' naj ragbeen guial gabajnrnan din günan lëjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist.

²⁶ Abi' chi guidganan lëjt stijb, chu' ni yabaanëdi gudëë tëëdi quixtëë loj Jesucrist por ni beenman por naj.

²⁷ Per ganin l jt, gol been naguiejn gol gubajn zi'c rayal, zi'c r b loj xtiidx Jesucrist. Din bal guidganan l jt o bal id zialan, per r nan guiguiejnman guial za'dxi'chidi nadxag t   lasa'di abi' tiblojz cay jndi naguiejn catie'chidi xtiidx Jesucrist.

²⁸ Ad guidxebidi b n rdxe'ch l jt. Zian guiguiejnman guial ma canijt reeman loj Dios, per l jt zian guiguiejnman ma rajpidi perdon z  d loj Dios.

²⁹ Din ad cwabeetidi par chililadxzidi Jesucrist, cwabeedi n  par sagdiajdi por laaman.

³⁰ L jt con naj tiblojz cayd ud ree tarbajw par yatie'ch ree xtiidx Jesucrist, ma baguiaadi xhienaag rd  dan tarbajw por xtiidxaman abi' yan caguiejnndi guial cusnuu cay nan mazran.

2

Nadxag yadxu' ree por Jesucrist

¹ Yan, zi'c ma yu' luxdoodi zagdxo por Cristo, zi'c ma yu' luxdoodi nix guial rusnuu r n lasa'di, n  zi'c ma nabann di xSprijt Dios n  zi'c yu' luxdoodi nix con lasa'di, n  zi'c raya lasa'di.

² Gol basnuu gol gubajn zian din yagu'di luxdoon nix. Gol gubajn, gol guy n t   lasa'di tibloj, gol gojc tijbzi, gol been t   tijbzi xgab.

³ Ad s  bladxidi g undidi gan loj ree lasa'di o guilies xvalor l jt gajc, mazri zagdxo gol been naya, gol been t   xgab guial stijb lasa'di mazri lasajc guial lojdi.

⁴ Ad bal chu'di xgab por l jtzi, gol guyu xgab por stijb lasa'di.

⁵ Gol been xgab zi'c been Jesucrist xgab.

⁶ Din majsi laaman naj Dios, per ad guzudxi'chtaman guial ni jbaman laaman naj Dios.

⁷ Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb b nguidxliuj.

⁸ Abi' chi gocaman zi'c tijb b nguidxliuj beenman naya abi' bazoob xtiidx xDadaman, xt g jtaman loj cr jz, majsi ni natu naj guial r jt loj cr jz.

⁹ Zeel d d guialrniabee narooob bad   Dios lojman, bad   t  eman lojman laj bejn ni mazri lasajc loj gra laj bejn.

¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, n  gra ree ni yu' loj guidxliuj, n t   ree ni yu' l n liuj.

¹¹ Abi' gra bejn gui b guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

¹² Zeel compniar raliduladx ree Jesucrist, zi'c r nan l jt abi' rnin l jt guial zi'c bazoobidi da diidxan chi guzun con l jt, ziangajc gol bazoob da diidxan mazri yan guial za'n zijt. Con guialrdxeb n  con respejt gol been zi'c rayal g un ree b n ma naj perdon.

¹³ Din por Dios z  d xgabza'c ni r jndi, abi' laaman ragn  l jt din g undidi zi'c r nman.

¹⁴ Gol been gra ni rayal g undidi, achet guial ad zayuladxtidi achet t  t guial tildiidxidi,

¹⁵ chit   xhie guiniee bejn l jt o chit   xhie xfaltidi yadx jl reeman. L jt najdi xi'n Dios gol gubajn naya niz loj ree b n ad zinalt xnejz Dios, b n r jn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay,

¹⁶ guial za'dxi'chn di xtiidx Dios ni zidn  guialnaban. Abi' zian yabaan por l jt dxej ni gui't Jesucrist stijb guial gagbeen ad bentan dxiin xlia' ad bizaa t  tan xlia'.

¹⁷ Din guial rliladxidi Dios laan naj zi'c tijb gon par laaman, abi' nix yu' luxdon majsi gui tan din yayaaloj gon guin guial rabaan'n gradi.

¹⁸ Yan ziangajc gol babaa, gol babaa zi'c rabaan.

Timoteo n  Epafrodito

¹⁹ Dad Jesucrist gagn  naj din diob gaxhalan Timoteo lod zojbidi din xhienladxan chi gagbeen xhienaag riga'di.

²⁰ Din tijbzi Timoteo yu' l jt xgab zi'c yu'n l jt xgab. Achut b n ru l jt xgab zi'c laaman.

²¹ Graczi reeman ru xgab per por laagajc reeman, ad rut reeman xgab por ni r n Jesucrist g un reeman.

²² Per ma ragbeedi xhienaag naj Timoteo, ma ragbeedi xhienaag cay jnman naj yudar persi catiechan xtiidx Jesucrist. Cay jnman naj yudar zi'c r jn bejn xDadaman yudar.

²³ Zeel r nan gaxhalan laaman din guitixlojman l jt, gagbeezan xhienaag gariican loj cwent guie

²⁴ Dad Jesucrist gagn  naj din diob guidgana quijb naj l jt.

²⁵ Abi' rul u r jn naguiejn gaxhalan da miwan Epafrodito ladxidi. L jt guxhaal laaman din g unman naj yudar loj ree ni ryaadxan. Abi' zian cay jnman naj yudar, tiblojzi cayzaagdianj.

²⁶ D d r nman guidganajman l jt abi' d d yu'man xgab guial gogbeedi gogxuuman.

²⁷ Abi' walican gogxuuman zamer niëjtaman. Per baya Dios laaman, abi' ad laatzaman, nêgajc naj bayaman, chitëë chu'naya luxdon mazri zi'c ma guyu nayan.

²⁸ Zeel diob gaxhal gajcan laaman din yabaadi chi guguaadi laaman stijb chitëë chu'naya tëën mazri.

²⁹ Gol babaa, gol baca'man guial najman tijb du lasa' ree bèn riladx Jesucrist. Zian gol guyën gra ree bèn naj zi'c laaman.

³⁰ Din zamer niëjtaman guial rüjnman sirv loj Jesucrist, guzujman loj guialgüjt guial beenman naj yudar loj ni ad bile't nüjn quijb lëjt naj yudar.

3

Ni mazri lasajc

¹ Yan, compniar raliduladx ree Jesucrist, gol badxe' luxdoodi zagdxë por Dad Jesucrist. Par naj achetan guial ganin lëjt diidx ni ma rni gajcan tijb, din par lëjt lasajc ree diidx guin chitëë chu' ni gusquieë lëjt.

² Gol gojp cudad con ree bentont, bèn ad nadëdguient, benmal, bèn rüjn ree naguiejn din chu' ree bejn xsen bèn Israel.

³ Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman bèn nabajnnë' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr.

⁴ Majsj zajc gales da valoran guial zinaalan gra ree costumbr, per bal yu' bèn rlies xvalor gajc, nêgajc naj zajc gün zian.

⁵ Din chi goc toxman goolan, badxe' reeman naj sen ni ru ree bèn Israel. Abi' bèn Israel naj, loj xdiaa Benjamín zialan, rniën diidx Hebreo din xi'n ree bèn rnieë diidx Hebreo naj. Benan gra ni rniabee ley din bënfarisew gojcan.

⁶ Benan zi'cgajczi rüjn ree bënfarisew, zeel xt guzunaalan bèn riladx ree Jesucrist din gūnan laa reeman ni mal, benan gra zi'c tal rniabee ley abi' achut zajc niëjb guial ad cayūntan zi'c rayal.

⁷ Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc.

⁸ Abi' achet ni mazri lasajc guial loj ni nūnbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa,

⁹ abi' gacan tijbzi con laaman. Ad naladxtan por guial rūnan zi'c rniabee ley achet dol ra'pan niz loj Dios, naladxtan por guial riladxtan Jesucrist, din por guialriladxtan guin ma naya bejn loj Dios.

¹⁰ Zeel rēnan gūnbeechaawan Cristo, gūnbee tēën guialrniabee ni basban laaman, rēn tēën gadaanan xhietëëz loj guialrzagdiaj ni gadëëdan zi'c gudaanman, ma guidxin dxej gacan zi'c rayal gacan por xguialgūjtaman.

¹¹ Din yu'guican guial yabanan zi'c baban Jesucrist.

Ni gūnee Dios xanyabaa

¹² Ad canitan lojdi guial ma bayaaloj benan gra o guial najn benza'c, per cayūnan naguiejn din gacan zi'c rēn Cristo gacan diidz chi guzuloj rniabeeman naj.

¹³ Compniar raliduladx ree Jesucrist, naj rni lëjt guial ad wayaalojt gūnan zi'c rayal, per cayūnan naguiejn din yayanladxtan gra ni benan gocli din gac gusnuun par delant,

¹⁴ din yayaaloj gūnan zi'c rayal din chile' gaca'n ni gūnee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree guial ma rayagbee ree zagdxë ni rēn guiëb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gulüü lëjt conin naj diidxli.

¹⁶ Per rüjn naguiejn yabajn ree zi'c ma rayignia' ree.

¹⁷ Compniar raliduladx ree Jesucrist, gol gubajn zi'c naban, gol baguiaa tēë xhiënaag naban ree bèn naban zi'c naban.

¹⁸ Din zien volt ma rniën lojdi abi' yan caydxi'nan zatijb, xt ronan canin lëjt guial zien ree bejn naban zi'c ree bèn ad riladxt guial güjt Cristo loj crüjz por dux xtol ree.

¹⁹ Abi' ree bèn guin castizi naj ni rbëz laa reeman din mazri ruladx reeman gūn reeman ni dxuudx. Abi' luar yatu reeman por ni rüjn reeman aal mazri rlies xvalor reeman guial mazri rüjn reeman xgab por ree ni yu' loj guidxliuj guie.

²⁰ Per dunuj ree ma nayab ree xanyabaa abi' caylëjz ree guial diidz xanyabaa gui't Dad Jesucrist bèn gudix por dux tol ree.

²¹ Laaman naj bèn guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' gūnman zian con guialrniabee ni rajpaman par nabeeman gra.

4

Gol badxe' luxdoodi zagdxe por Dad Jesucrist

¹ Zeel compniar raliduladx ree Jesucrist, r nan l jt r n t en guidganan l jt, l jt rgu' luxdon zagdxe, abi' najdi zi'c tijb prem par naj, gol guzujdxi'ch loj ni riladixidi Dad Jesucrist.

² Yan, rniaaban loj Evodia n  loj Sintique din guidxag cwe reeman guial naj reeman compniar loj ni riladix reeman Dad Jesucrist.

³ Abi' ziangajc l j compniar ni cayguieen dxiin tijbzi, rniaaban lojl din g  n'l yudar b ngunaa guin ree din laa reeman been naj yudar bire'ch xtiidx Jesucrist n  Clemente con ree ben ren, gra reeman ma yu' laj loj libr ni yu' laj ree b n guiban tiblyaa con Dios.

⁴ Zianczi gol badxe' luxdoodi zagdxe por Dad Jesucrist. Naj rni l jt  Gol badxe' luxdoodi zagdxe!

⁵ Gol been nagueijn g  n'bee gra bejn l jt guial najdi benza'c. Gol badxe'guijc guial zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad e t e quixt e lojman.

⁷ Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagn  l jt din yayaalyuj luxdoodi yayaalyuj t e xquiarguejndi guial ma najdi tijbzi con Jesucrist.

Gol badxe'guijc ganax ni zagdxe

⁸ Naga gad lox g nan gui'ch guie, compniar raliduladx ree Jesucrist, rnin l jt gol badxe'guijc ganax ni diidxli, ni rayal respejt n  ni naj xnejz. Gol badxe'guijc ganax ni r jn sirv, ni naj zagdxe n  ni rayal g  n b n z  xnejz. Gol badxe'guijc gra ni naj zagdxe n  ni guilies bejn xvalor.

⁹ Gol been zi'c basidan l jt, zi'c ma bal n l jt, gol been zi'c rnin l jt zi'c ma baguiaadi benan, zian gagn  Dios l jt b n rabe'cdxe luxdoo ree bejn.

Ni bad e ree b n filipos loj Pab

¹⁰ D d rabaan por Dad Jesucrist guial ma basaaladixidi naj. Ad canitan bayanladixidi naj, canin zian guial ad gojctri n jndi naj yudar.

¹¹ Ad canitan zian guial cayaadxan xhienin din ma basidan gad edan con ni ra'ptzan.

¹² Ragbeen xhienaagan chi naban bejn loj guialprob ragbee t en xhienaagan chi achet ryaadx bejn, din ma basidan rdaanan ni z edtzi, bal rawan o bal id rawan, bal r jnan naj sobr o bal ryaadxan.

¹³ Rajc rdaanan ni z edtzi con xyudar Jesucrist.

¹⁴ Per zagdxe naj ni beendi guial beendi naj yudar loj ni cazaagdiajn.

¹⁵ Ragbee t edi guial chi briin niz Macedonia din suloj gatie'chan xtiidxza'c Jesucrist, l jtzi bazaladx xhienin lon guial loj gra ree guiedx lod ma riladix reeman xtiidx Jesucrist, zi'c benan l jt yudar ziangajc beendi naj yudar.

¹⁶ Ziangajc chi guzun luguiedx Tesal nica chi biaadxan xhienin, b lczi volt beendi naj yudar.

¹⁷ Ad cayguiltan mod din g  ndi naj yudar mazri, ni r nan naj guial mazri yaya'ndi zagdxe loj Dios.

¹⁸ Ma baca'n gra ni guxhaalidi con Epafrodito, yan xt sobr r jnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios.

¹⁹ Zeel Dios gunee l jt gra ni ryaadxidi por ree ni za'c ni rajpaman xanyabaa con Dad Jesucrist.

²⁰  Abi' por guialrniabee ni rajp dux Dad ree Dios, rayalczi yaya'p reeman respejt goct e! Am n.

Rugajpdioz ree b n riladix Jesucrist b n Tesal nica ree

²¹ Gol bagajpdioz gra ree b n ma naj xbejn Jesucrist, gui ad gra ree b n riladix Jesucrist b n za'n ' reen guie, rugajpdioz reeman l jt.

²² Gra ree b n zojb ree guie, b n ma naj ree xbejn Jesucrist, n  gra ree b n r jn sirv loj rey, n  reeman rugajpdioz l jt.

²³ Dux Dad ree Jesucrist g  nle' gradi. Am n.

Gui'ch guxhaal San Pabl loj ree bèn Colosas rliadx Jesucrist

Rxhiaal Pab xtiidx Dios

¹ Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist,

² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tēēman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radēēdan quixtēē lojman por lëjt.

⁴ Din ma baguiejnan xhienaag rliadxidi Jesucrist xhie tēē naag rëndi gra ree bèn naj ree xbejnman.

⁵ Guial cabēzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli.

⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rēnman lëjt.

⁷ Lëjt gogbee diidxli guin ree chi balüü Epafra laa reen lëjt. Laaman cayüjn dunujn yudar abi' dád rayēnan laaman, din laaman diidxli cayüjn sirv loj Jesucrist delant lojdi.

⁸ Abi' tēē laaman be diidx du lojn xhienaag rën lasa'di guial yu' xSprijt Dios luxdoodi.

⁹ Zeel diidx chi baguiejnan xhienaag nabandi, ad racwēēzt rarejdxan Dios por lëjt din chignia'di zagdxe xhienaag rēnman güündi gunee tēēman lëjt gra loj guialrajc guixhial tēēman xquiarguiejndi por xSprijtaman.

¹⁰ Abi' zian guiband zi'c rayal guiban ree bèn rliadx Jesucrist, din güündi zi'c tal ruladxaman abi' gusunu güündi ganax ree ni zagdxe gusunu tēē güünbeedi Dios mazri.

¹¹ Abi' ranaaban lojman din con xguialrniabee za'cdxoonman gagnēman lëjt din sudxi'chidi, taan tēēdi xhietēēz loj guialzi tēdidi sin guial yaleny'a'di.

¹² Abi' xt nix chu' luxdoodi gudēēdi quixtēē loj dux Dad ree Dios guial basiaman lëjt din yayalidi ni rayal ree xbejnman, bèn zinal ree xnejzaman.

¹³ Laaman babēē dunuj ree loj xguialrniabee xindxab abi' bagu'man dunuj ree loj xguialrniabee xi'nman Jesucrist bèn rēnman,

¹⁴ abi' gudijxaman por dux tol ree, yan ma raya'p ree perdon loj Dios.

Por xguialgüjt Jesucrist ma nadxu'nē' ree Dios zagdxe

¹⁵ Achut zajc guguiaa Dios, per Jesucrist naj zi'c gajczi naj Dios. Abi' laaman mal rniabeenēman Dios diidx chi gad guidxliuj gacchaaw.

¹⁶ Por Jesucrist gojc gra ni yu' xanyabaa nē loj guidxliuj, zi'c ni ruguiaa bejn zi'c ni ad ruguiaataman. Abi' por laaman yu' graloj guialrniabee nē graloj guialguxtis ni rajp ree ni ad rajct ruguiaa ree bejn. Gran gojc por laaman nē par laaman.

¹⁷ Mal yu' Jesucrist diidx guia'xchej chi gad guidxliuj gacchaaw, laaman dxiibguijc gra abi' rniabeeman gra.

¹⁸ Abi' laa tēēman rniabee gra ree bèn rliadx laaman, bèn ma naj ree xbejnman. Laaman naj bèn yaloj abi' yaloj laaman baban loj ree bengüt din guiguien guial tijbzi laaman rajp guialrniabee loj gra.

¹⁹ Din bayuladx Dios gac Jesucrist zi'c gajczi naj Dios.

²⁰ Abi' por Jesucrist gra bēnguidxliuj ma za' zagdxe con Dios, zi'c ni yu' loj guidxliuj zi'c ni yu' xanyabaa. Za' bejn zagdxe con Dios por xguialgüjt Jesucrist loj crüzj.

²¹ Gocli ad gojctidi tijbzi con Dios, gojquidi zi'c bèn bidxe'ch laaman guial beendi ganax ni mal.

²² Per yan ma za'di zagdxe con Dios por ree guialzi ni gudēd Jesucrist chi gütaman loj crüzj din gac guidxindi lojman naya sin dol chitēē xhie naman lojdi.

²³ Per par zian rayal sudxi'chidi loj guialrliadx ni rajpidi, ad gucwēēz chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bèn catie'ch diidxza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por guialzi ni cadēēdan guial rünan lëjt yudar abi' lasa'gajc guialzi ni gudēd Jesucrist cadēēdan din chile' güünan yudar bèn rliadx ree laaman bèn ma naj ree xbejnman.

²⁵ Din Dios bacaabee naj par g'unan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn.

²⁶ Diizd tiamp gual ad bignia't ree bejn zagdxe ni rën guiëb xtiidx Dios. Per yan ma balüüman ni rën guiëban loj ree xbejnman.

²⁷ Din gugojn reeman bèn ad najt ree bèn Israel xhienaag naj xguialnaza'c za'cdxoonman. Abi' ni ad balüüt Dios loj ree bejn tiamp gual naj guial nabannë Jesucrist lëjt abi' por laaman ragbeedi zagdxe guial yu' dxej yayalidi xanyabaa.

²⁸ Abi' dunujn batie'ch xtiidx Jesucrist, baneenë'n bejn ree, balüü tēen laa reeman con gra quiarguejn ni runee Dios din chi guidxin reeman lojman por Jesucrist ma naj reeman zi'c rënman gac reeman.

²⁹ Abi' naj dád cayünan naguiejn cayünan dxiin guie con gualrniabee ni baneeman naj.

2

¹ Rënan gagbeedi guial cayün da'tan naguiejn cayünan lëjt yudar, në ree bèn zojb guiedx Laodicea në gra ree bèn ad wayünbeet naj.

² Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tēë xquiarguejn reeman din chile' güünbee reeman ni ad balüüt Dios bejn ree gual abi' laaman naj Jesucrist,

³ por laaman zëed gra gualrajc në gualrignia'.

⁴ Canin diidx guie ree lojdi chitëë chu gusquiee lëjt con ree xtiidx zagdxe reeman.

⁵ Majs ad za'tan con lëjt, per yu'guican lëjt abi' rabaan guial cayüjndi zi'c rayal, za'dxi'ch tēëdi loj gualrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman.

⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwëez tēë gudëëdi quixtëë loj Dios.

Guialnaban ni rudëed Jesucrist

⁸ Gol gojp cudad, ad tiëbidi güün ree bèn rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree gualrniabee yu' loj guidxliuj, din ad zëedt reen por Jesucrist.

⁹ Din zi'cgajczi naj Dios, ziangajczi naj Jesucrist.

¹⁰ Abi' nabannëdi Dios guidiblagaa guial najdi tijbzi con Jesucrist, din laaman rniabee loj gra gualrniabee në loj gualguxtis.

¹¹ Abi' tēë guial ma najdi tijbzi con Jesucrist ma yu'di xsenman, per ad lasa't sen ru ree bèn Israel, sen yu'di por laaman najn guial ma basa'ndi dol tibläd.

¹² Chi gurobnijsidi, laan rën guiëb guial güjtidi con Jesucrist abi' labandi con laaman stijb guial rliladxidi Dios rajp gualrniabee persi basbanman Jesucrist loj gualgüjt.

¹³ Gocli gojquidi zi'c bengüt delant loj Dios por xtolidi në por guial ad guyutidi sen ni ru ree bèn Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist.

¹⁴ Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bèn gudijx laan por dunuj ree.

¹⁵ Abi' zian beenman gan gra loj ree gualguxtis në loj gra gualrniabee zëed loj xindxab. Basa'nxtuman laa reeman loj ree bejn, beenman laa reeman gan guial güjtaman loj crüjz.

Gol been xgab ni yu' ree xanyabaa

¹⁶ Zeel achut rayal guala'ch lëjt por ni rawidi në ni rë'di o por guial ad rüjntidi cwent dxej lanij o dxej ni yu' bëew cüb o dxej raziiladx ree bejn.

¹⁷ Din gra ree ni guin naj zi'c tijb xbala Jesucrist abi' yan laaman naj bèn ma bi't.

¹⁸ Ad tiëbidi gutiaalguiiw bèn rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman bèn naxanladx, per ad najt reeman laan rëb tēë reeman guial yu' ni rulüüloj loj reeman. Dxel laagajc reeman rlies xvalor por xixgab gajc reeman.

¹⁹ Per laa reeman ad nabannët reeman Jesucrist, bèn rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajc du lasa' ree yayajc ree tijbzi con Jesucrist zi'c naj xixgab Dios.

²⁰ Yan bal walidi ma güjtidi con Jesucrist par ree ni rbëëgujic ree bënguidxliuj, çhexquiza zeel ruzoobidi xtiidx ree bèn rëb:

²¹ "Ad rayalt gugaalil ni guin, ad gawil ni guin, ad guiniaazil ni guin?"

²² Gra ree mandamient guin yu' dxej nit reen, din bënguidxliuj gulëëgujic laa reen.

²³ Diidxliczi rulüü lasajc da't ree mandamient guin guial tant rüjn ree bejn naguiejn güün reeman laa reen cumplid abi' rüjn reeman bèn naxanladx dxel rusagzi laagajc reeman, per achetczy lasajc ree mandamient guin par gucwëez reen ni mal rzëëbladx reeman güün reeman.

3

¹ Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios.

² Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa.

³ Gol gunaladx ma güjrtidi par ree ni yu' loj guidxliuj abi' ma rajpidi guialnaban delant loj Dios por Jesucrist.

⁴ Abi' chi gui't Jesucrist stijb, bèn runee dunuj ree guialnaban, nè læjt yayal guibannë laaman loj xguialrniabee za'cdxoonman.

Zi'c rayal guiban ree bèn rliladx Jesucrist

⁵ Yan, gol basa'n gra ree ni mal riga' loj guidxliuj guie. Ad sunëdi bèn ren bèn ad najt lacheelidi. Gol basa'n ni ad rüjnt ree sirv, nè ree xgabmal nè ree ni mal yu'di gan güündi. Ad sëëbladx tëëdi gapidi gra loj ni yu' loj guidxliuj din bèn rüjn zian laan rënman mazri luar Dios.

⁶ Abi' por ree ni guin zëëd xcasti Dios par ree bèn ad ruzoob xtiidxaman.

⁷ Lasa' ree ni mal guin beendi chi gadidi güünbee Jesucrist.

⁸ Per yan gol basa'n gra ree ni mal guin zi'c gualrdxe'ch, gualralen lasa', gualrünün ni mal lasa', gualrnieeguijdx nè guial rniee diidxguijdx.

⁹ Ad rusquiee loj lasa'di, din ad nabantridi zi'c gubandi gocli chi beendi ni mal ree,

¹⁰ din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rën Dios gaquidi din güünbeedi Dios mazri zagdxe, bèn runee læjt guialnaban.

¹¹ Abi' chi ma rliladx bejn Jesucrist, achet güünan chutëëz najman, bal najman bën grieg o bèn Israel, bal yu'man sen ru ree bèn Israel o ad yu'taman laan ya, bal najman benzit o najman bën zobj dajn, bal najman zi'c bën nado' o ad najtaman zi'c bën nado' Per ni mazri lasajc naj gualrliladxaman Jesucrist, bèn rniabee za' tëëman con dugra ree.

¹² Abi' Dios rën læjt, zeel gulejman læjt din gaquidi xbejnman. Zeel gol baya bejn ree, gol gojc benza'c, gol gojc bèn naxanladx, ad gaquidi bendxal, gol gojp pasens lasa'di.

¹³ Ad yalenyane' lasa'di. Gol been tëë perdon lasa'di bal xhie rüjnnë reeman læjt. Zi'c been Dad Jesucrist læjt perdon ziangajc gol been perdon bejn ree.

¹⁴ Gol badxe'guijc gualrën lasa' naj ni mazri lasajc. Abi' gualrën lasa' guin rüjn yudar din guidxaaq guiban bejn.

¹⁵ Gol cwëjb nabee Jesucrist læjt din yabedxe luxdoodi, din par zian gulej Dios læjt par gaquidi tijbzi por Jesucrist gol badëë tëë quixtëë lojman por zian.

¹⁶ Gol badxe'guijc da't xtiidx Jesucrist, gol balüü gol guneenë tëë lasa'di zi'c rayal. Gol badëë quixtëë loj Dios con ree cant nè ree salmos nè los demazri ree cant ni naj par Dios.

¹⁷ Xhietëëz ni güündi ni guiniee tëëdi, yaloj xgaj gol basaaladx Dad Jesús abi' por laaman gol badëë quixtëë loj dux Dad ree Dios.

Zi'c rayal guiban tijb famil

¹⁸ Læjt bëngunaa yu' ree lacheel, gol bazoob xtiidx lacheelidi, din zian rayal güün bèn rliladx Jesucrist.

¹⁹ Abi' ziangajc læjt xinguaaw yu' ree lacheel, gol güyën lacheelidi ad gusagzi tëëdi laa reeman.

²⁰ Nè læjt xin naj ree xi'n, gol bazoob gra xtiidx ree xDadidi, din zian ruladx Dios.

²¹ Abi' ziangajc læjt dad na, ad gusagdiaj xi'ndi chitëë guidxe'ch reex abi' yalenyane' reex.

²² Læjt bèn rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman læjt par yaya'ndi zagdxe loj reeman, guidib luxdoodi gol been xchiin reeman por respejt ni rajpidi Dad Jesucrist.

²³ Xhietëëz nin güündi, gol beenan con gan. Gol gunaladx loj Jesucrist cayüjndi sirv, ad lojt bënguidxliuj.

²⁴ Din læjt ma ragbee guial zian yu' ni tia'di loj Dad Jesucrist guial cayüjndi laaman sirv.

²⁵ Per par ree bèn rüjn ni mal, laa reeman yayal casti por ni mal been reeman, din Dios ad rbetaman loj bejn.

4

¹ Nëgajc læjt bèn naj ree patron, gol been zi'c rayal con ree bèn rüjn xchiindi, gol gojc tëë benza'c con laa reeman, din læjt ragbee guial xanyabaa yu' bèn rniabee læjt.

² Gol guzusin, gol gurejdx Dios ad bal gucheeladxidi, gol badëë quixtëë lojman.

³ Gol gurejdx tëë Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib.

⁴ Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxe.

⁵ Gol gubajn zagdxe delant loj ree bèn ad waliladxt Jesucrist gol guneë tëë xtiidxaman loj reeman beegaj chi chu' mod.

⁶ Chi rüdi diidx, gol be diidx xnejz din yayuladx bejn ni rnieedi gagbee tëëdi xhienaag yadxi'di ni rniabdiidx reeman lojdi.

Rxhiaal ree xbejn Jesucrist xtiidx Dios

⁷ Tíquico, tijb du lasa' ree, bèn rayèn ree, bèn diidxli cayüjn naj yudar cayünan sirv loj Jesucrist, laaman gugojn lëjt gra xhienaag za'n niz guie.

⁸ Par zian caxhalan laaman din gugojnman lëjt xhienaag nadxu'n niz guie din yagu' tëëman luxdoodi.

⁹ Abi' con laagajcaman caxhalan Onésimo, tijb du lasa' ree bèn rayèn gajc ree, bèn naban zi'c rayal, bèn naj bèn ladxidi. Laa reeman gugojn lëjt gra ni cayajc niz guie.

¹⁰ Aristarco, bèn yu'në'n ladxguuib, laaman rxhiaal xtiidx Dios lojdi. Nëgajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdxe.

¹¹ Abi' nëgajc Jesús, bèn la gajc Justo, rxhiaal xtiidx Dios lojdi. Loj gra ree bèn Israel rliladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bèn cagu' luxdon.

¹² Në Epafras, bèn ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün tëëdi gra zi'c rënman.

¹³ Naj ragbee zagdxe guial dád ruman xgab por lëjt, në por ree bèn Laodicea, në por ree bèn Hierápolis.

¹⁴ Lujc, doctor rayèn da't ree, në Demas, në reeman rxhiaal xtiidx Dios lojdi.

¹⁵ Gol bagajpdioz ree dux compniar ree bèn rliladx ree Jesucrist, bèn zojb ree luguiedx Laodicea. Gol bagajpdioz tëë Ninfas con los demazri ree xbejn Jesucrist bèn rado'p ree lidxaman.

¹⁶ Chi ma gulox biilidi gui'ch guie, dxel gol guxhaalan loj ree bèn rliladx Jesucrist, bèn zojb ree luguiedx Laodicea, din në reeman gool laan. Në gui'ch ni guxhalan loj reeman rayal yaxhaal reeman lojdi din nëgajc lëjt gool laan.

¹⁷ Abi' gol güjdx loj Arquipo din güünman cumplid ni ma bacaabee Dad Jesucrist güünman.

¹⁸ Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguuib. Dios güünle' lejt. Amén.

Gui'ch yaloj guxhaal San Pabl loj ree b́en Tesalónica rliladx Jesucrist

¹ Naj, Pab con Silvan nē Timoteo, cayxhaalan gui'ch guie par lējt najdi b́en rliladx Jesucrist luguiedx Tesalónica, dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

Rudēē Pab quixtēē loj Dios

² Guixie guixie radēēn quixtēē loj dux Dad ree Dios por gradi, rasaaladx tēēn lējt chi rarejdx ranaaban laaman.

³ Nē zianczi chi rarejdx ranaaban laaman, nadxe'duguijcan ni ma beendi guial rliladxidi laaman, nē guial rēn lasa'di, nadxe'duguijč tēēn guial cadaandi cabēzidi gui't Dad Jesucrist stijb.

⁴ Compniar raliduladx ree Jesucrist, dunujn rayagbee guial Dios rēn lējt, gulej tēēman lējt. ⁵ Din chi baneen xtiidxza'caman lojdi, ad diidxtizi balüün lējt, balüün lējt con xguialr-niabee xSprijt Dios abi' rayagbeen guial diidxli naj ni caynan lojdi. Lējt ragbee xhienaag babajnan chi badxu'nē'n lējt, babajnan zian din yagüieenan lējt yudar xhienaag guibandi.

⁶ Abi' lējt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi.

⁷ Zian najdi tijb ejempl par gra ree b́en rliladx Jesucrist niz Macedonia nē niz Acaya.

⁸ Por lējt bire'ch xtiidxaman ad tijbtizi luarzii ree, gra ladczi ruza't reeman xhienaag rliladxidi Dios, xt ni'qui chetri ryaadx yagüie'chan.

⁹ Din laagajc reeman rü diidx xhienaag baca'di dunujn chi budganaj lējt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv.

¹⁰ Rü tēē reeman diidx xhienaag cabēzidi gui't Jesucrist Xi'n Dios diidz xanyabaa, b́en hasbanman loj ree bengüt, Jesús b́en rabēē dunuj ree loj casti ni zēēd.

2

Ni been Pab luguiedx Tesalónica

¹ Lējt ragbee, compniar raliduladx ree Jesucrist, guial ad budganaj xlia'tzan lējt,

² majsi lējt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios banee dunujn valor persi badün xtiidxza'caman lojdi, majsi xhietēēz raza'can por ree b́en rdxc'ch dunujn.

³ Din ad baneenē'tan lējt diidx rusquiee, o par yagüieennē'n lējt zi'ctzi rayēnan ya, o par yasquieen lējt,

⁴ per zi'c bacaabee Dios dunujn din yaneen xtiidxza'caman guial baguiaaman zile' yagüieenan ni rayal yagüieenan, laanan naj ni radün ad par yaya'tnan zagdxe loj ree bejn, par yaya'nan zagdxe loj Dios, b́en ragbee gra ni yu' luxdoo bejn.

⁵ Lējt ragbee guial ad yu't dxej baneenē'n lējt zagdxe naabzi par güiēndi dunujn, ache tēēt guijc badxiiban din yaca'n xmiliadi. Dios ragbee guial laan naj diidxli.

⁶ Ad radiiltan guza't ree bejn dunujn zagdxe, ad radiil tēētan guza'tidi dunujn zagdxe, o guza't ree ben ren dunujn zagdxe,

⁷ majsi guial nayajcan xiapóstol Jesucrist, raya'pan derejch yanabeen lējt güündi xhienin par dunujn, per ad raguieentan zian. Lējt ragbee guial benza'c bayajcan chi badxu'nē'n lējt, zi'cgajczi tijb na rusni's rniaj tēē xi'n.

⁸ Abi' guial tant rayēnan lējt, ad tijbtzi xtiidx Dios baneen lojdi, nē dux guialnabanan bayēnan naneen por lējt, guial tant rayēnan lējt.

⁹ Abi' lējt ragbee compniar, guial dád bagüieenan dxiin. Dxej guiaal bagüieenan dxiin, chitēē yalu'n xchiindi guial güündi dunujn yudar yabajnan la'tgaj balüün lējt xtiidxza'c Dios.

¹⁰ Lējt nē Dios ragbeechaaw guial chi badxu'nē'n lējt, babajnan xnejz zi'c rayal, abi' achet chile' gudxiibidi du guijcan, lējt b́en rliladx ree Jesucrist.

¹¹ Lējt ragbee xhienaag baneen lējt consejw, xhie tēē naag balu'n luxdoodi zi'c rüjn tijb dad con ree xi'nman.

¹² Ma banan lojdi din guibandi zi'c rayal guiban b́en ma naj ree xbejn Dios, b́en rbejdx lējt din yayalidi xanyabaa lod rniabeeman.

¹³ Zeel nē dunujn ad racwēēzt radēēn quixtēē loj Dios, guial chi bigüiejni xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguidxliuj. Abi' diidx guin ree naj ni rusni xquiargüiejndi, lējt guial rliladxidi Jesucrist.

¹⁴ Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rliadx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman.

¹⁵ Abi' tëë ree bën Israel bagüjt reeman Dad Jesús, zi'cgajc bagüjt reeman bën badëed ree xtiidx Dios loj ree bejn, balaagdxa tëë reeman dunujn, ad rüjnt reeman zi'c rën Dios, abi' contzi gra bejn rdxe'ch reeman.

¹⁶ Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

Guyën Pab nejman Tesalónica stijb

¹⁷ Compniar raliduladx ree Jesucrist, chi basa'nan lëjt tio'p choondxej, majsi ad raguiaatan lëjt, per rasaaduladxan lëjt, abi' rayën nejzdoon yaguiaan lëjt stijb.

¹⁸ Dád bayënan nudganajn lëjt. Naj Pab, zien volt da't guyënan nidganen lëjt, per badxoon xindxab niajz zian.

¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxe. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb.

²⁰ Lëjt naj bën rabaanë'n rlies tëëdi dux valoran.

3

¹ Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtjiban ni.

² Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliadxidi,

³ din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree.

⁴ Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc.

⁵ Zeel ad gudaantran, abi' guxhalan Timoteo din gagbeen xhienaag zinalidi ni rliadxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

⁶ Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdxe ni rliadxidi Jesucrist në zi'c rën lasa'di. Laaman na guial zianczi yu' luxdoodi zagdxe rasaaladxidi dunujn, abi' dád ma rëndi guguaadi dunujn, zi'cgajc rayënan yaguiaan lëjt.

⁷ Zeel, compniar raliduladx ree Jesucrist, majsi graloj tarbajw në guialzi caydüüdan, per dád nix yu' du luxdoon raguiejnan guial zagdxe zinalidi ni rliadxidi.

⁸ Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist.

⁹ Dxel xt ni'quid radxejltan xhienaag yadëen quixtëë loj Dios por lëjt, guial dád nix yu' du luxdoon lojman por lëjt.

¹⁰ Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliadxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt.

¹² Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt.

¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

4

Zi'c rën Dios guiban ree xbejnman

¹ Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güüdi zi'c rën Dios, gol been naguejgn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güüdi.

³ Ni rën Dios naj guial guibandi naya lojman, guial ad güüdi nidxuudx ree con ree bën ad najt lacheelidi.

⁴ Gol gogbee guial tijbgaj lëjt rayal guibannë lacheelidi zagdxe zi'c rën Dios con respejt,

⁵ ad chu' lacheelidi naabzi par grii xgustidi zi'c rüjn ree bën ad nünbeet Dios.

⁶ Ni'qui tijbidi ad rayalt güünnaladx lasa'di, gusquiee lasa'di güüdi xhie nidxuudx con lacheel reeman. Din dux Dad ree Dios zudëedaman casti gra ree bën rüjn zian, zi'c ma banan lojdi zi'c ma bagojnman lëjt.

⁷ Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya.

⁸ Zeel b́en ad ridxga't ni ma banan lojdi, ad b́enguidxliujtan ad ridxga'taman, Diosan ad ridxga'taman, b́en razaladx xSprijt duloj ree.

⁹ Yan, xcwent guial guiën lasa'di, ad ryaadxt yanan lějt xhienin xcwentan, din lějt gajc ma basiid por Dios xhienaag guiën lasa'di,

¹⁰ abi' laan naj ni cayũndi con gra dux compniar ree b́en rliladx ree Jesucrist niz Macedonia. Per raza'can lějt liaadx din gusnuu guiën lasa'di mazri.

¹¹ Gol been tēē nagueijn guibannē lasa'di zagdx, gol guyu xgab xchiindi, zi'c ma ranan lojdi gũndi dxiin,

¹² din guibandi zagdx loj ree b́en ad rliladxt Jesucrist nē chitēē xhie guiyaadxidi.

Ni gac chi gui't Dad Jesucrist

¹³ Yan, compniar raliduladx ree Jesucrist, ad rayēntan guibandi sin guial gagbeedi xcwent ree bengũt, chitēē chu'nayadi zi'c ree b́en ad rliladxt Jesucrist.

¹⁴ Din bal raliduladx ree guial gũjtaman abi' babanman stijb, ziangajc raliduladx ree guial ree b́en ma gũjt, b́en bililadx ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidxaman, dunujn rana lojdi guial gra ree xbejnman, b́en sta naban ree chi gui'taman stijb, ad zanedt reeman loj ree xbejnman b́en ma gũjt ree.

¹⁶ Din dxejzii guiguien cha' b́en rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaloj ree xbejnman b́en ma gũjt ree yaban stijb.

¹⁷ Guiaad dux compniar ree b́en sta naban ree dxejzii, yadxaag ree con ree b́en baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'nē' reeman tiblayaa.

¹⁸ Zeel gol bagu' luxdoo lasa'di con ree diidx guin.

5

¹ Yan, compniar raliduladx ree Jesucrist, xhie dxej gac zian o goc gac zian ya, ad rũjnt nagueijn ganinan lějt.

² Din lějt ragbeechaaw guial zi'cgajczi ri't tijb b́engubaan guxhin, chi achut rběz laaman, zian guidxin dxej gui't Dad Jesucrist stijb.

³ Chi guiēb ree bejn: "Zagdx zio' ree, achet gac", dxel dxejczzi gui't guialzi par laa reeman ni ad zariit reeman loj, zi'c chi rdxin hor ragnaa lēn b́engunaa chi ma gal xi'nman.

⁴ Per lějt compniar, ad zētridi loj nejzmal din guinaaz dxej ni gui't Dad Jesucrist lějt zi'c chi ri't tijb b́engubaan.

⁵ Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay.

⁶ Zeel ad najt guial yabajn ree zi'c tijb b́ennaayējs, zi'c rũjn los demazri ree bejn, rayal yatie'ch dux bacaal ree, yadxu' ree nadēdguiendxuj.

⁷ B́en zinal ree nejzmal zi'c tijb b́ennaayējs, zi'c tijb bengui', zian zinal reeman nejz guin.

⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadēdguien. Yadxu'dxi'ch ree loj guialrliladx ni ma raya'p ree nē loj ni rēn Dios dunuj ree, abi' yadxu'dxi'ch tēē ree nē loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutēē yaya'p tēē reen zi'c tijb ni gutēē dunuj ree loj ni mal

⁹ Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist,

¹⁰ b́en gũt por dunuj ree, din majsi nabajn ree o ma bayējt ree chi gui'taman stijb, per yo' ree yuchu'nē' reeman.

¹¹ Zeel gol bagu' luxdoo lasa'di gol been tēē yudar lasa'di din gagbeedi mazri xtiidx Dios zi'c ma cayũndi.

Ni rayal gũin ree b́en rliladx Jesucrist

¹² Compniar raliduladx ree Jesucrist, raza'can lějt liaadx, gol gojp respejt b́en rusiid ree lějt xtiidx Dios, b́en ruluũ ree lějt rnieenē tēē reeman lějt xhienaag chinalidi Jesucrist.

¹³ Gol gojc benza'c da't con laa reeman, gol guyēn da't reeman por dxiin cayũjn reeman. Gol gubajnnē lasa'di zagdx.

¹⁴ Ranaab tēēn lojdi compniar, gol guneenē ree b́en ad rēnt gũn dxiin, gol bagu' luxdoo ree b́en ralenya'nē xnejz Dios, gol been tēē yudar b́en ad za'dxi'cht ree loj xnejzaman, gol gojp pacens gra reeman.

¹⁵ Gol been nagueijn ad gũndi ni mal b́en rũjn ree lějt ni mal, zagdxeli gol gojc benza'c con lasa'di nē con gra ree bejn.

¹⁶ Gol badxe' luxdoodi zagdx zianczi.

¹⁷ Ad gucwēz cwedx guiniabidi Dios.

¹⁸ Gol badēē quixtēē lojman por gra, din zian rēnman gũndi, lějt najdi xbejn Jesucrist.

¹⁹ Ad rbexuudi nabee xSprijt Dios lëjt.

²⁰ Gol bidxga' ni rniee ree bén rudëéd xtiidxaman.

²¹ Yaløj xgaj gol gogbee zagdxë xhietëëznin, dxel gol been ni naj zagdxë.

²² Gol gubi'ca loj gra ree ni mal.

²³ Dios, bén rabe'cdxë luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaa din gaquidi nayadxuj lojman dxej gui't Dad Jesucrist.

²⁴ Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

Diidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunujn.

²⁶ Gol badëë xtiidx Dios da cwentan loj gra ree compniar rililadx Jesucrist.

²⁷ Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rililadx laaman.

²⁸ Dux Dad ree Jesucrist güünle' lëjt.

Gui'ch barojp guxhaal San Pabl loj ree b́en Tesalónica rliladx Jesucrist

¹ Naj, Pab con Silvan në Timoteo, cayxhaalan gui'ch guie par lějt rliladxidi Jesucrist luguiedx Tesalónica, lějt najdi xbejn dux Dad ree Dios në xbejn Dad Jesucrist.

² Dux Dad ree Dios në Dad Jesucrist güünle' lějt yabe'cdxe tēē reeman luxdoodi.

Rudēēd Pab quixtēē loj Dios

³ Guixie guixie radēēn quixtēē loj Dios por lějt compniar raliduladx ree Jesucrist, din zian rayal yaguieenan guial mazri cusnuu rliladxidi laaman, abi' tijb gajdi mazri ma rēn lasa'di.

⁴ Zeel dád nix yu' du luxdooon raza'tan lějt loj gra ree xbejn Dios, raguie'chan loj reeman pacens ni rajpidi në guialrliladx ni rajpidi, rdaan tēēdi gra ree ni rüjnnē ree bejn lějt në gra ree guialzi ni cadēdidi.

⁵ Zian rguien xnejz naj xguialguxtis Dios, guial gulejman lějt din yayalidi lod rniabee-man, din por laan cadēdidi guialzi.

⁶ Abi' guial gra ni rüjn Dios naj xnejz, zeel gudēēdaman casti gra ree b́en cudēēd lějt casti.

⁷ Guíáad lějt cadēdidi guialzi yan, guneeaman lějt guialraziladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri guialrniabee.

⁸ Dxel gudēēdaman casti b́en ad bayagbeet ree Dios, b́en ad guyēnt ree nuzoob xtiidzxa'c Dad Jesucrist.

⁹ Gudēēdaman laa reeman casti tiblayaa, su reeman zijt par Dios në par xguialrniabee za'cdxoonman.

¹⁰ Zian gac dxej ni gui't Dad Jesucrist, din guza't ree bejn laaman zagdxre por ree xbejnman, yadxa tēē loj gra reeman laaman, abi' në lějt, din ma bililadxidi xtiidxaman ni badün lojdi.

¹¹ Zeel ad racwēēzt rarejdx ranaaban Dios por lějt din gagnēman lějt guibandi zi'c rayal, zi'c guredxaman lějt guibandi. Ranaab tēēn lojman guial con xguialrniabeeman gac cumplid gra xixgabzagdxedi në gra ni rüjndi guial rliladxidi laaman.

¹² Abi' zian guiliesidi xvalor Dad Jesucrist, guíáad laaman guilies xvaloridi guial laaman con dux Dad ree Dios rēn reeman dunuj ree.

2

Gulüüloj b́en ca' xguialrniabee xindxab

¹ Yan, compniar raliduladx ree Dad Jesucrist, xcwent guial gui'taman stijb në guial yadxaag ree con laaman, raza'can lějt liaadx,

² ad bal tiēbidi tibratzi gusquiee ree bejn lějt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian.

³ Ad tiēbidi chu gusquiee lějt, dín chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb b́en güün ganax ni rēn xindxab, b́en ma naj par gabijl.

⁴ Laagajc laaman guilies xvalor, abi' yalenman gra ni nünbee bejn zi'c Dios në gra ni rnijchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

⁵ Gol basaaladx guial zian rnin lojdi chi guzunē'n lějt.

⁶ Abi' yan lějt ma ragbee chu cutēē chitēē gulüülojman, la'tgaj guidxin dxej rayal gulüülojman.

⁷ Ma cayajc ree xgabmal guin, per yu' b́en cutēē gac reen cumplid. Chi ma bisüd b́en cutēē guin,

⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnēman gunidlojman laaman.

⁹ Benmal guin por xindxab gui'taman, abi' dád gapaman guialrniabee. Güünman zien ree ni yadxaloj ree bejn, güün tēēman zien ree milagr par gusquieeman.

¹⁰ Con graloj ree ni mal gusquieeman b́en canijt ree loj Dios, guial ad guyēnt reeman ad cwējb tēēt reeman nililadx reeman ni diidxli zile' nuslaa laa reeman loj dol.

¹¹ Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli,

¹² din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

Sudxi'ch reeman loj ni riladax reeman

¹³ Compniar, rën Dad Jesucrist lëjt. Zianczi rayal yadëen quixtëe loj Dios por lëjt, din diidz guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxidi ni naj diidxli.

¹⁴ Par zian gurejdx Dios lëjt gaquidi xbejnman chi badün xtiidxza'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tëe ni balüün lëjt chi badxu'në'n lëjt, në ni ma banan lojdi loj gui'ch ren.

¹⁶ Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tëe ni ralëjz ree guial najman benza'c,

¹⁷ laaman yagu' luxdoodi gagnë tëeman lëjt din sudxi'chidi din gra ni guinieedi güün tëedi gac zagdxë.

3

Rën Pab cwedx guiniab reeman Dios

¹ Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxë zi'cgajc beendi.

² Gol gurejdx gunab tëeman din yabëeman dunujn loj ree benmal, loj ree bendxuudx ad nabant xnejz, din ad grat bejn riladax xtiidx Dad Jesucrist.

³ Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tëeman lëjt chitëe güüdi ni mal.

⁴ Dunujn rayagbeechaaw guial laaman cayagnë lëjt cayüjndi gusnuu tëe güüdi ni banan lojdi.

⁵ Gagnëman lëjt din guiëndi bejn ree zi'c rën Dios laa reeman gap tëedi pacens zi'c gojp Dad Jesucrist pacens.

Rüjn naguiejn güün bejn dxiin

⁶ Yan, compniar raliduladx ree Jesucrist, por laaman ranabeen lëjt: Gol bariica loj chutëez compniar gaz za' ad rënt güün dxiin, bën ad naban tëet zi'c balüün lëjt.

⁷ Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin.

⁸ achu tëet banee xlia' ni badaawan. Lëjt ragbee guial dád baguieenan naguiejn baguieenan dxiin, dxëj guiaal baguieenan dxiin chitëe yalu'n xchiindi guial güüdi dunujn yudar din gac yabajnan.

⁹ Majsi zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güüdi zi'c raguieenan.

¹⁰ Chi badxu'në'n lëjt, ranan lojdi: Bën ad rënt güün dxiin, ad zajw gajctaman.

¹¹ Per yan baguiejnan guial yu'di gaz za' ad rëntidi güüdi dxiin, abi' rudi loj ni ad rayaltidi.

¹² Par bën zii ree dunujn rana ranabee tëen laa reeman por Dad Jesucrist yabedxe reeman, güün reeman dxiin din guiban reeman.

¹³ Guiaad lëjt compniar, ad yalenya'di güüdi ni naj zagdxë.

¹⁴ Bal yu' tijbidi ad ruzoobt diidx guial güüdi ni ranan loj gui'ch guie, gol baguiaa chu benan, ad guchajg tëedi laaman din yatu lojman.

¹⁵ Per ad guguaadi laaman zi'c tijb bën rdxe'chidi, gol baguiaaman zi'c tijb bijchidi, gol guneenëman din guibanman zagdxë.

Diidx bigra ca ree loj gui'ch guie

¹⁶ Dad Jesucrist bën rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunë lëjt.

¹⁷ Naj, Pab, quijb naj cuca ree lejtr guie par gugajpdiozan lëjt. Zian rünan con gra ree da gui'chan, zian naj ree da lejtran.

¹⁸ Dad Jesucrist güünle' gradi.

Gui'ch yaløj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapóstol Jesucrist por xguialrniabee Dios bèn rüjn perdon dux tol ree nē por Jesucrist bèn rayagbee ree gui't stijb.

² Cuccan gui'ch guie par lüj Timoteo, din par naj lüj naj zi'cgajc da xi'nān guial tiblojzi raliduladx Jesucrist. Dux Dad ree Dios nē Dad Jesucrist güünle' lüj, yayaman lüj yabe'cdxe tēēman luxdool.

Rēb Pab loj Timoteo xcwent ree bēn rusquiee

³ Zi'c rnin loj chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitēē ruluū reeman bejn ree ni ad najt diidxli.

⁴ Ad chililadx reeman ni rbēēgujic ree bejn, ad guidxga' tēē reeman ban za reeman, o chu rajc reeman xbengol gual reeman, din ad ni guint ree gagnē laa reeman par gusnuu chililadx reeman xtiidx Dios.

⁵ Canabeen lüj din güün reeman zian din guiguien guial diidxli rēn lasa' reeman, achet naladx reeman din guiguien tēē guial guidib luxdoo reeman rliladx reeman xtiidx Dios.

⁶ Din yu' reeman ad rüjntri zian guial ganax ree ni ren ni ad rüjnt ree sirv rü reeman.

⁷ Rēn reeman gulüū reeman bejn ree xhienaag naj xley Dios, abi' ni'qui laa reeman ad ragbeet xhie rēn guiēb ni rniece reeman ni'quid rignia't reeman ni naladx reeman naj zagdxe culüū reeman bejn ree.

⁸ Dunuj ree rayagbee guial zagdxe naj ley guin par bēn rignia' xhie sirv rüjnān.

⁹ Abi' rayagbee ree guial ad baneet Dios ley guin par ree bēn naban xnejz niz lojman, baneeman ley guin par tēd ree bejn casti, bēn naban ree zi'ctzi naj xixgab reeman, bēn ad ruzoobt ree diidx, bēn ad yu'guijct ree Dios, bēn rüjn ree dol, bēn ad rajpt ree Dios respejt, bēn ad rüjnt ree naguejñ guiēn reeman Dios, bēn rugüjt xdad xnīaa, nē par gra ree bēn rugüjt bejn,

¹⁰ rüjn tēēn sirv par xcasti ree bēn za'nē xinguaaw o bēngunaa ren, par ree xin ruladx lasa' xinguaaw gajc o bēngunaa ruladx lasa' bēngunaa gajc, nē par ree bēn rban bejn ree par guto' reeman laa reeman zi'c mojs, nētēē par ree bēn rusquiee nē ree bēn ruza't Dios par sudxi'chnē xguialrusquiee reeman nē par gra ree bēn rüjn xcontr ni naj diidxli.

¹¹ Diidxli guie ree naj ni zēēd ree loj xtiidxza'cdxoon Jesucrist. Dux Dad ree Dios, bēn rayal respejt, laaman naj bēn basa'nnē naj diidx guin ree din gatiechan laa reen.

Xhienaag baya Dios Pab

¹² Quixtēē Dad Jesucrist laaman cayagnē naj, rajp tēēman naj confianz abi' bacaabeeman naj par gatiechan xtiidxaman,

¹³ majsi yaløj gunen laaman diidxguijdx abi' guzunaalan bēn rliladx ree laaman din günan laa reeman ni mal abi' dād naya bennē'n laa reeman. Per Dios bayaman naj guial ad bignia'tan ni cayūnan din gad naj chililadx Jesucrist.

¹⁴ Abi' dād benza'c gojcaman con naj, balüūman naj xhienaag chililadxan balüū tēēman xhienaag guiēnan Dad Jesucrist.

¹⁵ Diidxli ni ganin lējt, rayal chililadx bejn: guial Jesucrist bi't loj guidxliuj par günnman xtol bejn perdon, abi' loj gra ree bejn naj naj mazri bēndol.

¹⁶ Per majsi najn mazri bēndol, baya Dios naj abi' gojp Jesucrist naj pacens din gagbee ree bēn chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblayaa con Dios.

¹⁷ Zeel zianczi rayal yaya'p reeman respejt yaza't tēē reeman zagdxe guial najman rey bēn ad yu't dxej guiēt, abi' rajpaman guialrniabee par tiblayaa guial tijbzi laaman naj Dios abi' achut rajc ruguaaa laaman. Amēn.

¹⁸ Timoteo, par naj lüj naj zi'c da xi'nān zeel rnin lüj been zi'c gunee reeman xcwentil diidz yaløj, abi' zi'c tijb suldad ni rej loj wadijl ad guidxebil niz loj ree bēn za' ree contr xtiidx Dios.

¹⁹ Guzudxi'ch loj ni rliladxil Jesucrist, been tēē ganaxzi ree xgab zagdxe par güünl zi'c rayal. Din yu' ree bejn guial ad rüjnt reeman zian, yan ma banijt reeman ni rliladx reeman Dios.

²⁰ Zian ma guzajc ree Himeneo con Lejandr, zeel ma bayūn laa reeman loj satanás din gusiid reeman guial ad rayalt guiniee reeman Dios diidxguijdx.

2

Xhienaag cwedx guiniab bejn Dios

¹ Yaløjdoos ni rniin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudééd tēdi quixtēē lojman.

² Rayal yarejdx yanaab ree Dios por ree rey nē por gra ree guxtis loj guidxliuj din chile' yabajn ree zagdxē gusnuu tēē yabajn ree zi'c rēn Dios.

³ Din laan naj ni zagdxē ni rayuladx tēē dux Dad ree Dios, bēn rūjn perdon dux tol ree,

⁴ bēn rēn guial gra bejn gac perdon guidxin tēē dxēj gagbee bejn xhie rēn guiēb xtiidxliiman.

⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj.

⁶ Gūjtaman loj crūjz persi gudijxaman por xtol gra ree bénguidxliuj, zian naj ni balūū Dios bejn chi bidxin dxēj bacaabeeman gac zian.

⁷ Zeel bacaabeeman naj gacan xi apóstol Jesucrist din gatiechan xtiidxaman, nē par gusidan bēn ad najt ree bēn Israel conin naj diidxli, xhie tēē naag chililadx reeman Jesucrist, walin ad rusquieetan.

⁸ Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxē'ch nē sin wadij.

⁹ Rēn tēēn guial ree béngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxē o guial tēdlaj gūūnchaaw guidxguijc reeman.

¹⁰ Din mazri zagdxē gūūn reeman ni naj zagdxē, zi'c rayal gūūn ree béngunaa ni ma zinal xnejz Dios.

¹¹ Abi' rayal gucaagdiajgzi reeman ache guiniee reeman chi rulūū ree xinguaaw xtiidx Dios.

¹² Din ad zatiēēbtan guial gulūū tijb béngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee béngunaa xinguaaw, rayal gucaagdiajgzaman.

¹³ Din Dios, yaløj Adán beenchaawaman, dxelri Eva.

¹⁴ Din ad Adánt basquiee reeman, yaløj Eva basquiee reeman, abi' por guialrusquiee guin beenman dol.

¹⁵ Per zajc gac béngunaa perdon, bal gūūn xchiinman zagdxē guial najman na, bal gusnuu chililadxaman Dios, guiēnman bejn ree guiban tēēman xnejz.

3

Xhienaag guiban ree bēn rniabee

¹ Gol badxē'guijc da diidxan: Bal chu bēn rēn gap guialrniabee loj gra ree bēn rliladx Jesucrist par gulūūman laa reeman xnejz Dios, zagdxēqui naj ni rēnman gūūnman.

² Per bēn rajp guialrniabee guin rayal gūūnman zi'c rayal chitēē chu guinieeguijdx laaman. Rayal chu' tijbzi lacheelaman, guibanman zagdxē chu' tēē xquiargueijnman din gap ree bejn laaman respejt. Gacaman benza'c con ree bēn rdxin lidxaman, gac tēēman tijb bēn rignia' par gulūūman bejn ree.

³ Ad rayalt gacaman bengui', ni'qui bēn rguuil wadij ad rayal tēēt yaguilaman mod par tia'man xmilia ree bejn, rayal gacaman benza'c con chutēēz, gac tēēman bēn naxanladx ad zazēēbladx tēētaman millia.

⁴ Rayal nabee lidxaman zi'c rayal din gulūū ree xi'nman xhienaag gap reex respejt guzoob tēē reex diidx.

⁵ Din bal id rajc rniabee lidxaman, xhieza naag nabeeman bēn rliladx ree Jesucrist?

⁶ Zeel tijb bēn qui guzuløjri rliladx Jesucrist, ad rayalt nabeeman loj ree bēn ma rliladx chitēē guilies xvalor gajcaman abi' yayalaman lasa' casti ni bayal xinxab.

⁷ Bēn rajp guialrniabee guin xt ree bēn ad rliladx Jesucrist rayal gūūnbee laaman guial najcaman benza'c chitēē yaya'nxtuman abi' gūūn xinxab laaman gan.

Ni gūūn ree bēn rūjn yudar bēn rniabee ree

⁸ Yan ziangajc ree bēn ma cwabee par gūūn reeman yudar bēn rniabee ree, rayal gūūn reeman zi'c rayal din gap ree bejn laa reeman respejt, gūūn cumplid xtiidx reeman, ad guiē' tēē reeman, ad yaguuil tēē reeman mod par tia' reeman xmilia ree bejn.

⁹ Con xgabza'c chinal reeman ni ma balūū Dios dunuj ree.

¹⁰ Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din gūūn reeman yudar bēn rniabee ree.

¹¹ Ziangajc ree béngunaa ni ma cwabee par gūūn reeman yudar, rayal gūūn reeman zi'c rayal din gap bejn laa reeman respejt ad zaneeguidxt reeman bejn, rayal guiban reeman zagdxē abi' gūūn cumplid xtiidx reeman.

¹² Abi' ree xinguaaw cwabee guin par güün reex yudar bén rniabee loj ree xbejn Cristo, tijbzi lacheel reex rayal chu', nabee tëë lidx reex con xi'n reex zi'c rayal.

¹³ Din Bén rüjn ree sirv zi'c rayal ad respektzi rajp bejn laa reeman, sin guialrdxeb ma zile' guiëb reeman xhienaag rliladx reeman Jesucrist.

Naroob naj Bén raliduladx ree

¹⁴ Gagnë Dios chile' guialan guidganan lüj. Per cucan gui'ch guie,

¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, Bén ma naj ree xbejn Dios naban, abi' za'dxi'ch reeman ruluü tëë reeman xtiidxliinan.

¹⁶ Dunuj ree rayagbee guial dád Bén naroob najman, Bén raliduladx ree:

Bi'taman loj guidxliuj zi'c tijb bénguidxliuj,

rëb xSprijt Dios guial laaman naj Bén naya

abi' baguiaa ree anjl laaman bi'taman loj guidxliuj.

Bre'ch xtiidxaman loj ree Bén ad najt Bén Israel,

guidibczi bililadx bejn laaman abi'

baca' Dios laaman xanyabaa.

4

Bén rusa'n ree guialrliladx reeman Jesucrist

¹ Ma bagojnchaaw xSprijt Dios guial zëëd ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bénrusquiee në gra ree ni zëëd por xindxab.

² Mazri guidxga' reeman bénrusquiee ree, Bén wed rüjnz ree, Bén achetri ree rzajc guial rüjn reeman dol din ma naya' reeman zian.

³ Guiëb reeman guial ad najt guial guxhliaa ree bejn ad zajw tëët reeman graloj. Per Dios badxe' graloj guialraw par gaw ree Bén rliladx laaman, Bén ma ragbee ree conin naj diidxli abi' gudëëd reeman quixtëe lojman.

⁴ Din gra ni badxe' Dios naj zagdxë, achet ni rayal cwexuu bejn tia'man bal gudëëman quixtëë chi cayawaman laan.

⁵ Din chi rarejdx ranaab ree Dios con xtiidxaman rüjnle'man guijc ni yadaaw ree.

Bén rüjn sirv zagdxë loj Jesucrist

⁶ Zeel bal ruluü bil rliladx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin në ree diidxza'c ni zinalil.

⁷ Per ad guidxga' ni rbëëguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios.

⁸ Zagdxë naj par güün bejn graloj ejercijs par gacaman gojl, per loj gra xhietëëznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblayaa.

⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan.

¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, Bén naban par güünman yudar gra ree bejn, per mazri Bén rliladx ree laaman.

¹¹ Zian rayal gusiidil bejn ree güjdx tëë loj reeman din güün reeman zian.

¹² Gojp cudad chitëë guiëb ree bejn guial achet sirv lüj guial ad wayajctil bengol. Mejorli been naguejn din gaquil tijb ejempl par ree Bén rliladx Jesucrist, zi'c xhienaag rül diidx, zi'c nabanl, zi'c rënl ben ren ree, zi'c rliladxil Dios nëtëë por ree xixgabza'quil.

¹³ La'tgaj guialan, basnuu biil xtiidx Dios loj ree bejn, guneenë reeman balüü tëë reeman xhie rën guiëb xtiidx Dios.

¹⁴ Ad yayanladxil güünl zi'c rayal güünl por quiarguejn ni banee Dios lojl chi badxiib yaa ree bengol guijquil chi gogbee reeman guial lüj naj Bén gule Dios.

¹⁵ Badxe'guijc diidx guie ree din gagbee gra ree bejn guial cusnuu zël delant.

¹⁶ Gojp lüj con ni rusiidil bejn ree. Guzjdx'ch loj ni ma ragbeel, zian yabëë lüj gajc loj casti yabëë tëël Bén cucaagdiag ree xtiidxil.

5

Xhienaag güün Timoteo con ree Bén rliladx Jesucrist

¹ Ad tilnël tijb bengol, badëëman consejw zi'cgajc xdadil, abi' xin naj ree xinguiag, badëë reex consejw zi'cgajc bijchil.

² Ziangajc béngunaa bengol ree badëë reeman consejw zi'cgajc xniaal, abi' biinguiag ree, badëë reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp.

⁴ Per bal tijb béngunaa bizějb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdx, zian tēē ruladx Dios.

⁵ Béngunaa naj diidxli bēn bizějb, bēn ad rajptri chunin loj guidxliuj guie, tijbzi Dios naj bēn yu'guijcaman güün laaman yudar dxel ad rucwēēt rbejdx rniabaman laaman dxej guiaal.

⁶ Per tijb béngunaa bizějb ni rüjn ni rēntzi, laaman naj zi'c tijb bengüt guial ad yu'guijctaman Dios.

⁷ Bagojn gra ree diidx guie bēn ma rliladx ree Jesucrist chitēē chu guinieeguijdx laa reeman.

⁸ Din bēn ad rüjnt yudar xcompniar, abi' ni'qui xfamilaman bēn zojb ree lidxaman ad rüjntaman yudar, laaman ma basa'n ni rliladxaman abi' piorli najman guial loj ree bēn ad rliladxt Jesucrist.

⁹ Ad tia'l laj chutēēz béngunaa bizějb par gac reeman yudar, naabzi ree béngunaa bizějb bēn ma nadēē ree gayojn ijbz abi' ad guzunētaman ben ren la'tgaj naban lacheelaman.

¹⁰ Bal nünbee tēē ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badēē lidxaman baya'n ree bejn bal gojcaman benza'c con ree bēn rliladx Jesucrist bēn bidxn ree lidxaman, bal beenman yudar bēn rzagdiaj ree, bal been tēēman naguejbn beenman ganax ni zagdx.

¹¹ Per ad tia'l laj ree béngunaa bizějb benguiag ree, din despuejs rēn reeman guxhliaa reeman abi' ad rüjntri reeman ni rayal güün reeman por Cristo guial rēn reeman guxhliaa reeman stibj.

¹² Dxel rüjn reeman dol guial ad rüjntri reeman ni ma been reeman compromis con Cristo.

¹³ Abi' tēē ree benguiag guin zē reeman yu yu, zianz rajc reeman costumbr achetctzi rüjn reeman. Abi' ad laatzan, rzuloj ruza't reeman bejn, ru reeman loj xhietēēznin abi' rniee reeman ni ad rayalt guiniee reeman.

¹⁴ Zeel rēnan guial bēn naj ree béngunaa bizějb benguiag, mejorli guxhliaa reeman stibj, chu' xi'n reeman nabee tēē lidx reeman zi'c rayal, chitēē gudēēd reeman mod guinieeguijdx ree bēn ralen ree dunuj ree laa reeman.

¹⁵ Din yu' ree béngunaa bizějb ma guro'nladx reeman xnejz Dios abi' ma zinal reeman xnejz xindxab.

¹⁶ Abi' bal tijb bēn rliladx Jesucrist naj xfamilaman tijb bēn baya'n bizějb, dxel laaman rayal güün yudar béngunaa bizějb guin chitēē gacan mazri carg par ree dux compniar ree bēn rliladx ree Jesucrist. Zian güün reeman yudar béngunaa bizějb diidxli achutri rajp loj guidxliuj guie.

¹⁷ Bēn rliladx ree Jesucrist rayal gap reeman respejt bēn rniabee laa reeman nē ree bēn rniee ruluū tēē xtiidx Dios zi'c rayal, gudēē tēēdi loj reeman gra ni ryaadx reeman.

¹⁸ Din loj xtiidx Dios rēb: "Ad gudxe'di guijxh ro' ree begui'xh la'tgaj cayüjn reeb dxiin", rēb tēē loj xtiidx Dios: "Rayal gax bēn rüjn dxiin".

¹⁹ Ad guidxga'di ni rudxiib ree bejn guijc tijb ree bēn rniabee ree bēn rliladx Jesucrist, bal id yu' tio'p choon ree bejn rēb guial diidxli naj ni rniee reeman por laaman.

²⁰ Per bal tijb bēn ma ca' guialrniabee rusnuu rüjnman dol, rayal guinieenēl laaman delant loj gra reeman din guidxeb los demazri reeman.

²¹ Yan por Dios, por Jesucrist nē por ree anjl ni ma gulejman, naj rni badxe'guijc been tēē zi'c ma rnin ad cwel loj ree bejn, tiblojzi been con gra reeman.

²² Gojp cudad cwel tijb bēn ni nabee din ad ragbeetil bal yu' ni mal cayüjnman, dxel güün ree bejn xgab guial nēgajc lüj ruladx ni cayüjnman. Gojp cudad graloj ree dol.

²³ Nē guial guiēt' guiēt' ragxuu lēnl guial ad nadaant lēnl, ad rē'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayüjn reeman diidz chi gad reeman gudēēd cwent loj Dios, per yu' reeman ad rguient xhie dol cayüjn reeman xt chi yadēēd reeman cwent loj Dios.

²⁵ Ziangajc yu' ree bēn ni laa rguien gajc ni zagdx ni cayüjn reeman, abi' yu' reeman ni'quid rguient ni zagdx ni cayüjn reeman, per yu' dxej gagbee ree bejn laan.

6

¹ Gra ree mojs rayal gap reeman respejt xpatron reeman chitēē chu guiniee diidxguijdx contr Dios o contr xtiidxaman ni caylüün.

² Abi' bal rliladx patron guin Jesucrist dxel rayal gap reeman laaman mazri respejt guial nēman rliladx Jesucrist zi'cgajc laa reeman. Abi' tēē rayal güün xchiin reeman zi'c rayal

gual cayünj reeman sirv tijb xcompniar reeman bén rililadx Jesucrist compniar ni rën reeman. Zian balüü ree bejn güjdx tëë loj reeman din güün reeman zian.

Guialnaza'c ni naj diidxli

³ Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulüütaman bejn ree,

⁴ najzaman bendxal. Din ruladxaman tildiidxaman abi' ni'quid xnejzt rnieeman, dxel ni zëëd guialnadëdloj, guial rdxe'ch, guial rniee diidxgüjdx abi' ad rililadxtri lasa' reeman,

⁵ ad rucwëëzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman.

⁶ Dad ben rijcw naj bejn chi ma rililadxaman Jesucrist, per bén za' conform con ni rajptzaman.

⁷ Din achet budnë' ree loj guidxliuj ache tëët zajc yunë' ree chi yayëjt ree.

⁸ Bal raya'p ree ni yadaaw ree në lajd ni yadojt ree con laan rayal yaya'n ree conform.

⁹ Per ree bén rzëëbladx gac reeman rijcw loj guidxliuj guie ad rile't sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman.

¹⁰ Din guial rzëëbladx milia laan naj xliuj gra ni mal. Abi' yu' reeman por gualrzëëbladx guin ma basa'n reeman ni rililadx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc bén naxanladx, gojp pacens guyën tëë ree ben ren.

¹² Been da't naguiejn guzudxi'ch loj ni rililadxil xtiidx Jesucrist. Ad gusëëbil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rililadxil Jesucrist.

¹³ Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin gualrdxeb loj Poncio Pilato, naj rniabee lüj

¹⁴ din guzoobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb.

¹⁵ Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëëman gra gualrniabee, bén naj xrey ree rey naj tëëman xDad ree dad.

¹⁶ Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguaaa bejn laaman. ¡Par laaman naj respejt në gualrniabee par tiblayaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'gujic tëë reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejrli cu'gujic reeman Dios bén naban din laaman razaladx da't dunuj ree graloj din chu' du luxdoo ree nix.

¹⁸ Güjdx loj reeman din güün reeman ni zagdxe, güün reeman zien ree ni rüjn sirv, cu' tëë luxdoo reeman zagdxe güün reeman yudar bénprob ree.

¹⁹ Abi' zian guto'p reeman guialnaza'c ni güün laa reeman yudar loj ree dxej ni zëëd din yayal reeman guialnaban tiblayaa xanyabaa.

Xconsejw Pab

²⁰ Timoteo, badxe'gujic ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman.

²¹ Din yu' ree bén rüjn zian yan, abi' ma basa'n reeman gualrliladx reeman Dios.

Dios güünle' lüj Timoteo. Amén.

Gui'ch barojp guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xi apóstol Jesucrist, Dios gule naj din gatiechan diidx por promeys ni beenman guial gudëédaman guialnaban tiblayaa loj ree bën rliadlx Jesucrist.

² Naj caxhal gui'ch guie par lüj Timoteo bën rënan zi'c da xi'n'an. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrülüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gulalan been reeman laaman sirv.

⁴ Chi rusaaladxan ni biinl, ma rën nejzdoon guguian lüj din yayu luxdon zagdx.

⁵ Yu'guican guial lüj diidxli rliadxlil Jesucrist, yaloj xnaxüjsil Loida con xniaal Eunice bililadx laaman zian, zeel ragbeechaawan guial ziangajc rliadxlil laaman.

⁶ Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil.

⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdx.

⁸ Zeel ad yatul guinieel xtiidx Dad Jesucrist, ad yatu nëtëë naj yu'n ladxguuib por laaman, con xyudar Dios gudaan guialzi ni rayal tëdil guial gutie'chil xtiidxa'c Jesucrist.

⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidz chi gad guidxliuj gagchaaw beenman xgab guial por Jesucrist guluüman dunuj ree xhienaag rënman dunuj ree.

¹⁰ Yan bi't Jesucrist bën güt por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guialgütj abi' zian biguien guial yu' guialnaban, guialnaban tiblayaa par ree bën rliadlx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëën laan bën ad najt ree bën Israel,

¹² abi' por zian cadëëdan guialzi ni cadëëdan. Per ad ratutan por zian, din naj ragbee chu rliadlxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

¹³ Badxe'guijc binal tëë ree diidxa'c ni ma balün lüj, tant zi'c rliadxlil Dios në zi'c rën ree lasa'l guial ma nayajc ree tijbzi con Jesucrist.

¹⁴ Abi' con xyudar xSprijt Dios bën naban con dunuj ree, gojp ni banee Dios güünl.

¹⁵ Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes.

¹⁶ Dios gagnë ree xfamil Onesiforo, din laaman dád zien volt bagu'man luxdon. Abi' ad batunëetaman naj yu'n ladxguuib,

¹⁷ naabzi bi'taman Rom baguüilaman naj xt lodzi badxejlaman naj.

¹⁸ Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

2

Zi'c tijb xsuldad Jesucrist

¹ Guiáad lüj xi'ngaan, guzujdxi'ch loj yudar ni raya'p ree por Jesucrist.

² Abi' ni biguiejnl rën delant loj zien ree bejn, balüün loj ree bën diidxli rliadlx, bën ni zajc gulüü ree ben ren.

³ Zi'c tijb suldadza'c, zian gudaan ree guialzi, zi'c najl xbejn Jesucrist.

⁴ Ni'qui tijb bën naj suldad ad rut loj ni ad najt xcwent ree suldad par chile' yaya'nman zagdx loj bën rniabee laaman.

⁵ Ziangajc bën ni rguijt xhie tijb nin, rayal quitaman xnejz din chile' tia'man prem.

⁶ Abi' bën rüjn dxiin dajn, yaloj xgaj rüjn da'taman dxiin din gac yaca'man guialnaza'c.

⁷ Been xgab ni canin lojl, abi' Dad Jesucrist gagnë lüj din chignia'l gra.

⁸ Basaaladx Jesucrist, bën güt abi' babanman, bën zëed loj xdiaa rey Davi, zian naj xtiidxa'caman ni catiechan.

⁹ Abi' por zian cadëëdan guialzi, xt naxiin lën ladxguuib zi'c tijb benmal, per xtiidx Dios ad naxiitan.

¹⁰ Zianan zeel rdaanan gra par günan yudar bën ni ma naj ree par Dios, din gap reeman perdon por Jesucrist yaya' tëë reeman guialnaban za'cdxoon ni naj par tiblayaa.

¹¹ Waliqui ree diidx ni rëb:

Bal ma bayëjt ree con laaman,
ziangajc yabajn ree con laaman.

¹² Bal radaan ree xhietëez ni raza'c ree,
ziangajc yanabee ree con laaman.

Bal raguie'ch ree guial ad naguieenbeet reeman,
ziangajc guiëbaman guial ad nünbeetaman dunuj ree.

¹³ Bal id raguieen ree cumplid dux tiidx ree,
per laaman rüjn cumplid xtiidxaman
din ad zajct guidxaa zi'c najman.

Tijb bén raya'n zagdxe con xchiin

¹⁴ Gündx loj ree bejn din gusaaladx reeman ni guie ree, abi' por Dios güjdx loj reeman guial ad rüldiidx reeman por ree ni ad rüjnt yudar, ruxhiinzan bén ni rigueijn ree laan.

¹⁵ Been xt lod chile' güünl din yaya'nl zagdxe loj Dios, din chibiguil lojman zi'c tijb bén ni rüjn dxin abi' achet ni gustu laaman, guial cayüjnl xnejz con xtiidx Dios.

¹⁶ Ad gül diidx ni ad rüjnt sirv, ni ad rüjnt yudar bejn ree. Din bén rüjn ree zian zi'cri zinal reeman nejz mal,

¹⁷ abi' xtiidx reeman naj zi'c tijb guialguijdx ni rigaa. Lasa' ree bén guin naj Himeneo con Fileto,

¹⁸ din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn.

¹⁹ Per xtiidx Dios ad zajct guidxaa ni'c tijb guial ni zojbdxi'ch. Abi' loj xtiidx Dios rëb: "Dios nünbee bén naj ree xbejnman", rëb tëë loj xtiidxaman: "Graczi ree bén rëb guial nünbee reeman Dios rayal gusa'n reeman gra ni mal."

²⁰ Lën tijb yu narooob, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tëë reen ma naj dxej rüjn reen sirv.

²¹ Yan ziangajc bén ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxe.

²² Zeel basa'n xixgab xinguig, xgab ni ad rüjnt sirv, gubajn xnejz. Binal guialrliladx, guialrën lasa'n në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist.

²³ Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl.

²⁴ Abi' tijb bén ni rüjn sirv Dad Jesucrist ad rayalt gacaman bén ruladx wadijl, rayal gacaman benza'c con chutëez, rayal gacaman tijb bén ni gac guluü ree bejn, gacaman bén pacens

²⁵ guzuxnejz tëëman con ree diidxzagdxe bén ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli.

²⁶ Par laa reeman loj xtramp xindxab ni rniabee laa reeman güün reeman ni rënman.

3

Xhienaa gac ree bejn dxej ni bigra ree

¹ Rayal tëë gagbeel Timoteo guial dxej ni bigra ni zëed ree, dád nawëëg gacan par ree bejn guial guiban reeman.

² Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios,

³ ad zëntri reeman ad zaya tëëtri reeman bejn ree. Ganax diidx rusquiee guiniee reeman bejn ree, ad zucwëëzt güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdxe.

⁴ Yayü reeman laagajc ree bén ni rajp laa reeman confians, sin guialrdxeb guiniee reeman xhietëez ni gui't guijc reeman, dád guillies xvalor reeman, mazri ma güün reeman ni rëntzi reeman guial loj zi'c rën Dios.

⁵ Guluü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian.

⁶ Din loj reeman no'ch bén ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman

⁷ béngunaa guin ree zianczi rusiid reeman, per ad ragbeetczi reeman ni diidxli.

⁸ Gulal b́en ni brii ree laj Janes con Jambres been xcontr reeman Moisejs. Yan ziangajc naj ree b́en ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman.

⁹ Per ad xchejt gũin reeman zian, din gra ree bejn gagbee guial rusquiee reeman zi'c goc con Janes n̄ Jambres.

Rniabee Pab sudxi'ch Timoteo loj ni basiidaman

¹⁰ Per lűj Timoteo, ragbeel zagdxe xhie rulűn bejn ree, xhienaag nabanan, xhienaag naj da xgaban, xhienaag rlıladxan, xhienaag ra'pan pacens, xhienaag r̄enan bejn ree, xhienaag rdaanan,

¹¹ xhie ma been ree bejn naj, xhie t̄ee ree guialzi ma gud̄eđdan. Lűj ragbee xhienaag guza'can luguiedx Antioquía, Iconio con Listra. Dád ma guzaagdajjn por gra ni ma been ree bejn naj, per Dios hab̄eē naj loj gra ree gualrzagdiaj guin.

¹² Abi' dunuj ree rayagbee guial gra ree b́en ni r̄en guiban zi'c r̄en Dios guialrliladx reeman Jesucrist, naj sagdiaj reeman por ni gũin ree bejn laa reeman.

¹³ Per ree ben mal con ree b́en rusquiee, zi'cri zinal reeman nejz mal, rusquiee reeman bejn ree rusquiee t̄ee laagajc reeman.

¹⁴ Per lűj basnuu guzudxi'ch loj ni ma basiidil, n̄ loj ni ma rlıladxil, din lűj ragbee chu ree nin basiid lűj.

¹⁵ Abi' lűj diidz xindool nűnbeel xtiidx Dios, diidx ni zile' gũin lűj yudar gagbeel xhienaag naj perdon ni z̄eđ por guialrliladx Jesucrist.

¹⁶ Gra ni z̄eđ loj xtiidx Dios, por Dios z̄eđdan. Abi' rűjnan sirv par gusiid bejn bejn ree, par gud̄eē bejn consejw, par guzuxnejz bejn bejn ree, n̄ par gagbee bejn xhienaag rayal guibanman,

¹⁷ din gagbee xbejn Dios guidiblagaa din gũinman graloj ni naj ni zagdxe.

4

¹ Delant loj Dios n̄e delant loj Jesucrist, b́en gui't zi'c tijb rey par gũinman guialguxtis loj ree b́en naban n̄e loj ree b́en ma gűjt, naj rni lojl,

² gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudil̄e ree b́en ad ruzoobt diidx, bad̄eē t̄ee consejw loj ree bejn, balűű reeman sin guial yalenya'l.

³ Din zadxin dxej ad zatījbt ree bejn gucaagdiajg reeman ni naj diidxli, ma gũin reeman zi'ctzi r̄en reeman, zaguil̄ reeman zien ree b́en gulűű laa reeman ganax ni ruladx reeman gucaagdiajg reeman.

⁴ Ad zidxga'tri reeman ni naj diidxli, mazri ma guidxga' reeman ni rb̄eđguicj ree bejn.

⁵ Per lűj Timoteo, gubajn nad̄eđguien, gudaan xhiet̄ež guialrzagdiaj t̄edil, gutie'ch xtiidxza'c Jesucrist, been mandad ni banee Dios lojl gũinl.

⁶ Din naj zamer gugűjt reeman naj, ma zidbig guialgűjt par naj.

⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal gűnan abi' ad basa'ntan ni rlıladxan.

⁸ Yan prem ni rayalan ma cab̄ezan naj, prem ni gunee Dad Jesucrist lon chi guidxin dxej, b́en rűjn guialguxtis zi'c rayal. Abi' ad lotzan gunee man prem guin, n̄e loj gra ree b́en yu' lűdudo nix cab̄ez reeman laaman.

Ni rayal gũin Timoteo

⁹ Been naguiejn diob guidganajl naj,

¹⁰ din Demas ma guro'nladxaman naj guial mazri ruladxaman ni yu' ree loj guidxliuj, zeel z̄eman niz Tesalónica. Abi' Crescente ma z̄eman niz Galacia guiáad Tito z̄eman niz Dalmacia.

¹¹ Tijbzi Lujc za' con naj. Chi gui'til tan̄e Marcw din zile' gũinx yudar gutie'chix xtiidx Dios.

¹² Tiquico ma guxhalan laaman luguiedx Éfeso.

¹³ Chi gui'til tan̄e da cajpan ni basa'nan luguiedx Troas lidx Carpo, n̄e ree da libran tan̄e ad yayanladx t̄eđ guidn̄el da gui'ch reen.

¹⁴ Lejandr b́en naj herrer, dád zien ree ni mal ma beenman naj, per con Dios yaguixxaman gra ni beenman.

¹⁵ Gojp cudad con laaman, din laaman dád rűjn xcontraman ni ranee ree.

¹⁶ Yaloj chi guzun loj ree guxtis achutzzi been naj yudar, graczi reeman guro'nladx naj. Gagn̄e Dios ad zidxga'taman ni been reeman.

¹⁷ Per Dad Jesucrist been naj yudar banee t̄eđman naj gojl persi baloox gutiechan xtiidxaman, persi biguejn ree gra ree b́en ad najt b́en Israel laan. Zian baslaa Dios naj, zi'c rlıaa tijb bejn loj beedz.

¹⁸ Abi' Dad Jesucrist, laaman yabëe naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesíforo.

²⁰ Erasto baya'nman Corinto, guiáad Trófimo ragxuuman basa'nan laaman luguiedx Mileto.

²¹ Been naguejn guda chi gad tiamp nayaag gui't. Eubulo, Pudente, Lino, Claudia në los demasri ree bën riladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch guxhaal San Pabl loj Tito

Rxhiaal Pab xtiidx Dios

¹ Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaag chililadx reeman laaman din gagbee tëë reeman diidxli xhienaag guiban reeman delant loj Dios,

² din yu'guijc ree guial zian yaya'p ree guialnaban tiblyaa delant loj Dios. Diidz chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee.

³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon.

⁴ Cucas gui'ch guie par lüj, Tito, guial najl zi'c da xi'n nan guial tiblojzi raliduladx Jesucrist. Dux Dad ree Dios con Jesucrist bén günt por dux tol ree, yaya reeman lüj, güünle' reeman lüj yabe'cdxe tëë reeman luxdool.

Dxiin ni been Tito guiedx Creta

⁵ Naj basa'n lüj niz Creta din güünl ni ryaadx günan ni. Abi' tijbgaj luguedx gucaabeel bén ni nabee ree loj ree xbejn Cristo zi'c ma rnin.

⁶ Chi gucaabeel laa reeman rayal gucaabeel bén ni naban ree zi'c rayal chitëë chu guinieeguijdx laaman, bén ni yu' tijbzi lacheel, rililadx tëë ree xi'nman Jesucrist, bén ni nünbee ree bejn guial ad nabant ree xi'nman zi'ctzi rën reex ad najt tëët reex xin rusagloj.

⁷ Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bénnalenyä', ad rayalt gacaman bengü', ni'qui ben ruladx wadijl, ad zaguiil tëëtaman mod xhienaag tia'man xmilia ree bejn.

⁸ Rayal gacaman bén ni gudëë lidz yaya'n ree bejn chi rüjnan naguiejn, bén ruladx güün ganax ni zagdxe, gac tëë nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman.

⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tëëman bén ni rnieeguijdx ree xtiidxli Dios.

¹⁰ Din dád zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin.

¹¹ Lasa' ree bén guin ad rayaltri yatiëëb ree gulüü reeman bejn ree, din dád zien ree yu ma beendxa reeman gra tijb famül guial rulüü reeman laa reeman ni ad rayalt naabzi par güün reeman gan milia.

¹² Tijb gajc bén ladx reeman bén rëb reeman naj bén badëë xtiidx Dios loj ree bejn, laaman rëb guial ree bén Creta ganax diidx rusquiee rniee reeman, dád nadoxh reeman, dád bén nala naj reeman abi' achetctzi rën reeman güün reeman.

¹³ Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal,

¹⁴ ad guidxga'ri reeman ni rbëëguijc ree bén Israel, ad güün teë reeman ni rniabee ree bén ni ma guro'nladx ree ni naj diidxli.

¹⁵ Bén naya ree xquiargueijn, achet xgab mal rüjn reeman. Per ree bén rüjn ganax xgab-dxuudx, bén ad rililadxt, achetctzi xgab zagdxe rüjn reeman guial ad nayat xquiargueijn reeman, ganax ree xgab mal yu' guijc reeman.

¹⁶ Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tëë reeman, ni'qui tijb ni rüjn sirv ad rajct rüjn reeman.

2

Ni rayal gulüü Tito

¹ Per lüj Tito, balüü ree bejn gra zi'c tal naj xtiidxza'c Dios.

² Balüü ree bengol din guiban reeman zagdxe, gustëdguen reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tëë reeman xhietëëz ni sac reeman.

³ Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengü'. Rayal gulüü reeman bejn ree xhienaag naj ni zagdxe,

- ⁴ ryal gulüü reeman béngunaa guiaq ree din guiën lacheel reeman con xi'n reeman,
⁵ din guiban téë reeman naya delant loj Dios, nadédguien, guinia lidx reeman, gac reeman benza'c guzoob téë reeman xtiidx lacheel reeman chitéë chu guinieeguijdx xtiidx Dios.
⁶ Ziangajc lüj Tito, badëë consejw loj ree xinguaaaw guiaq din guiban reex nadédguien.
⁷ Been naguiejn din güünl gra xnejz din guguaa reex xhienaag güün reex ni naj zagdxe. Chi ruluül laa reex, balüü reex zagdxe zi'c ryal.
⁸ con ganax ree diidx zagdxe chitéë xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxejl gudxiib reeman duguij ree.
⁹ Badëë téë consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman.
¹⁰ Ad cwan reeman xhie xieen xpatron reeman, gac reeman bén confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.
¹¹ Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon.
¹² Guial rënman dunuj ree rayagbee ree guial ryal yasa'n ree ni mal con ree ni ad rüjnt sirv ni rayën ree yaguieen ree loj guidxliuj guie, din yabajn ree nadédguien, zi'c ryal, zi'c rën Dios yabajn ree loj guidxliuj guie
¹³ la'tgaj cayléz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xgualrniabeeman, bén been perdon dux tol ree.
¹⁴ Laaman gü't por dunuj ree din yabëëman dunuj ree loj gra dol abi' basiaman dunuj ree din yayajc ree xbejn zaman abi' yaguieen ree naguiejn yaguieen ree ganax ni zagdxe.
¹⁵ Gra ni ma rnin lojl balüün laa reeman sin gualrdxeb badëëd reeman consejw, bazuxnejz reeman con gualrniabee ni ca'l. Ad tiëbil gusagloj reeman lüj.

3

Ni ryal güün ree bén rliidx Jesucrist

- ¹ Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiyaj susin téë reeman par güün reeman ni naj zagdxe.
² Ad guinieeguijdx reeman bejn ree, ad quuil reeman wadijl, gac reeman benza'c në béchaawlax con chutéëz bénan.
³ Gocli négajc dunuj baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman.
⁴ Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën téëman bejn.
⁵ Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb.
⁶ Por Dad Jesucrist bén baguijx por dux tol ree, Dios bazaladx dunuj ree zro' da't xSprijtaman.
⁷ Dxel zi'cgajc laaman ma nulabaman dunuj ree sin dol guial najman benza'c, yalay ree guialnaban tiblyaa ni ralëz ree.
⁸ Laan naj diidxli. Zeel rënan gusnuu gugojnl diidx guie ree bén ni rliidx ree Dios din güün reeman naguiejn güün reeman ni naj zagdxe. Abi' nine ree naj ni zobjloj në ni güün sirv par gra ree bejn.
⁹ Per ad guidxga'l diidx ni ad rüjnt ree sirv ni rniece ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gual ree bejn. Ad guidxga' téël bén ni rdildiidx ree por xley Moisejs, din ad najtan ni zobjloj achet téët lasajc ni rniece reeman, achetci sirv rüjn ree ni guin.
¹⁰ Bal por tijb léjt rzuløj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi.
¹¹ Din lüj ragbee guial lasa' ree Bén guie ma guro'nladx reeman ni naj diidxli abi' laagajc reeman cunijt laa reeman por xtol reeman.
Ni ryal güün Tito
¹² Chi gaxhalan Artemas o Tíquico lod zobjbil, been da't naguiejn tagnaj naj luguiedx Nicópolis, din ni ma benan xgab gadëëdan tiamp nayaag.
¹³ Been téë yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitéë xhie guiyaadx reeman.

¹⁴ Nè ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitéë guiban xlia'zi reeman.

Diidx bigra ca ree loj gui'ch guie

¹⁵ Gra ree bén za' con naj rugajpdioz reeman lüj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

Gui'ch guxhaal San Pabl loj Filemón

¹ Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayèn da'tan lüj.

² Raxhaal tëën gui'ch guie par gra ree bèn riladix Jesucrist bèn rado'p ree lidxil, në par Apia nëtëë par Arquipo, bèn naj dux compniar ree caytie'ch ree xtiidx Jesucrist.

³ Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios por Filemón

⁴ Beegaj chi rbedx rniaaban Dios rudën quixtëë lojman por lüj,

⁵ din ma cwa'n ruson guial dád rënl riladix tëël Dad Jesús dád rën tëël gra ree bèn ma naj xbejn Dios.

⁶ Rniaab tëën lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxe ni raya'p ree guial ma nayajc ree tijbzi con Jesucrist.

⁷ Dád nix yu' luxdon rabaa tëën guial rënl dux compniar ree bèn riladix ree Jesucrist, din por lüj bijch ma bayu luxdoo reeman zagdxe.

Rniee Pab por Onésimo

⁸ Zeel majsi ra'pan guialrniabee par ganin conin rayal güünl guial najn tijb xi apóstol Jesucrist,

⁹ per guial rayèn du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist,

¹⁰ rniaaban lojl por Onésimo, bèn naj zi'c da xi'n'an guial ma bililadxaman xtiidx Jesucrist ni ben lojman lën ladxguuib guie.

¹¹ Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv.

¹² Yan caydxi'n laaman lidxil, gunajchi'man zi'c rniajchi'l naj.

¹³ Guyënan nizujman con naj din nüjnman naj yudar luar lüj, la'tgaj yu'n ladxguuib guial rtiechan xtiidx Jesucrist.

¹⁴ Per ad guyëntan nūnan xhienin sin xtiidxbeel din xhietëëz favor güünl por naj ad züjntilan naguiejn, güünlan guial guiënl.

¹⁵ Bal brii Onésimo lidxil tibladed, per gojc zian din chile' sunëman lüj tiblayaa,

¹⁶ per ad zi'ctri tijb mojs, mazri zagdxe guial loj tijb mojs, zi'c tijb bijchil bèn rën. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

¹⁷ Yan bal walil nayajc ree compniar por Jesucrist, baca' Onésimo gunaladx naj gajcan.

¹⁸ Bal yu' xhie beenman lüj, o bal yu' xhie ralaman lojl, naj yaguix laan.

¹⁹ Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl din gusaaladxil guial xt xguialnabanl ralil lon.

²⁰ Yan been naj favor guin guial rënl Jesucrist, zian bagu' luxdon guial nayajc xbejn Jesucrist.

²¹ Naj caxhal gui'ch guie lojl abi' ragbeechaawan guial guzoobil da diidxan, ragbee tëën guial mazri naj ni güünl guial loj ni canin lojl.

²² Been tëë porvinid lënu lidxil lod yaya'n'an, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafra, bèn yu'nè'n ladxguuib guial ratie'chan xtiidx Jesucrist, rugajpdiozaman lüj.

²⁴ Nëgajc Marcw, Aristarco, Demas në Lujc, bèn cayüjn gajc ree naj yudar caytie'chan xtiidx Jesucrist në reeman rugajpdioz lüj.

²⁵ Dad Jesucrist güünle' lëjt.

Gui'ch par ree b n Hebreos

Ma gunee Xi'n Dios xtiidx xDadaman

¹ Tiamp gulal, Dios guneen  ree dux b ngulal ree zien volt n  gadxagayaa mod por ree b n bad   xtiidx Dios loj ree bejn,

² per yan ma guneen man dunuj ree por Xi'nman. Dios been gra ni yu' xanyabaa n  loj guidxliuj por Xi'nman. Abi' gra basa'n loj Xi'nman.

³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por gualrniabee ni rajpaman.

Xi'n Dios naj mazri b n zobjloj guial loj ree anjl

⁴ Zianan zeel laaman naj mazri b n zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios b n rajp gra gualrniabee

⁵ Din ad yu't dxej r b Dios loj ree anjl:

L j naj da xi'nan,

abi' diizd yan gul n guial l j naj da xi'nan.

Achut t  t loj anjl r baman:

Naj gac Xdadil, abi' l j gac da xi'nan.

⁶ Per chi guxhaal Dios Xi'nman loj guidxliuj, Xi'nman b n rajp gualrniabee zi'cgajc laaman, dxel r baman:

Gra ree da anjlan,

gol guy n da Xi'nan, gol gojp t  man respejt.

⁷ Abi' chi gunee Dios por ree anjl, r baman:

Naj r n ree da anjlan zi'c bi, r n t  n laa reeman zi'c bajl.

⁸ Per por Xi'nman r baman:

Dad Dios, xgualrniabeel naj par tiblayaa,

abi' guidib tiamp nabeel zi'c rayal.

⁹ L j ruladxil ni naj zagdx

abi' rdxe'chil ni mal.

Zeel Dios b n naj xDiosil

baneeman l j mazri guial rabaa guial loj gra ree b n za'n l.

¹⁰ R b t  man:

Dad, diizd yaloj l j been guidxliuj n  xanyabaa

con gra ni yu' loj reen.

¹¹ Gra reen yu' dxej nit reen,

per l j ma nabanl tiblayaa.

Gra reen yayox zi'c tijb lajd,

¹² gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per l j ad yu't dxej guidxaa zi'c najl

abi' zianczi gapil gualnaban.

¹³ Ad yu't dxej r b Dios loj tijb ree xianjlaman:

Gurej da ladbeen xt g nan gan nabeel b n rdxe'ch ree l j.

¹⁴ Din gra ree anjl naj sprijt cay jn ree sirv loj Dios, abi' rxhiaalaman laa reeman din g  n reeman yudar b n ni gap ree gualnaban tiblayaa delant loj Dios.

2

Ad yasa'n ree diidx ni yab   dunuj ree loj dol

¹ Zeel r jn nagueijn yayidxga' ree xtiidx Dios ni ma bacaagdiajg ree chit   yasa'n ree xnejzaman ni ma zunaal ree.

² Din zi'c goc cumplid gra xtiidx Dios ni gunee ree anjl diizd gocli, b n ad bazoobt diidx, b n been ree dol, laa reeman bayal casti ni rayal reeman.

³  Xhieza naag laa ree loj casti bal n  dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree b n bigueijn laan, laa reeman bagojn dunuj ree.

⁴ Yan zi'c ma cwa' bejn gualrignia' rent gualrignia' ren por xSprijt Dios zi'c naj xixgabaman, abi' por ree sen n  ree milagr con los demazri ree ni radxaloj bejn, zian ma bal   Dios guial ni diidxli naj ree diidx guin.

Jesucrist rabëë bejn loj dol

⁵ Dios ad badëëtaman guialrniabee loj ree xianjlanan par nabee reeman lod yaya'p ree guialnaban cüb ni cayza't ree,

⁶ din yu' tiblajt loj xtiidx Dios lod rëb bejn:

Dios, çchu naj bénguidxliuj zeel rusaaladxil laaman?

çChu naj xi'n bénguidxliuj zeel rüjn xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs ma beenl laaman bèn zobjbloj,

badëël guialrniabee lojman din nabeeman gra ree ni beenchaawil,

⁸ abi' gra basa'n l lojman.

Chi badëë Dios guialrniabee lojman par nabeeman gra, achetdzi ni baya'n ni ad zanabeetaman majsi dunuj ree sta ad cayguiaat ree guial nabeeman gra.

⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respejt por gualzi ni gudëdaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por gualzi ni gudëd Jesúsrist bayaaloz bazoobaman xtiidx Dios, abi' tijbzi por laaman ma zajc yaya'p ree perdon.

¹¹ Bén ma naya ree delant loj Dios, por Jesucrist naya reeman. Abi' tant Jesucrist tant ree bèn ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan.

¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdx.

¹³ Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nman xin bazaladx Dios naj.

¹⁴ Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc gütaman, abi' por xgualgütaman beenman gan loj guialrniabee ni gop xindxab loj gualgüjt.

¹⁵ Zian beenman persi babëëman bejn ree loj guialnadxeb xieen gualgüjt, bèn ni guidib tiamp ni naban reeman rdxeb reeman gualgüjt zi'c rdxeb bejn xpatronman.

¹⁶ Din laaman ad bi'ttaman loj guidxliuj par gagnëman anjl ree, bi'taman par gagnëman bèn naj ree xdiaa Abraham.

¹⁷ Zeel gojcaman zi'cgajdzi bénguidxliuj, persi bidxin dxej gojcaman tijb bixhioz zobjbloj delant loj Dios, bixhioz ni raya bejn, bèn rüjn tëë cumplid xtiidx Dios persi gojc gudijxaman por xtol ree bejn.

¹⁸ Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bèn ni cayünj xindxab naguëjn güün reeman dol.

3*Jesús naj mazri bèn zobjbloj guial loj Moisejs*

¹ Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guijc Jesucrist guial laaman naj bixhioz zobjbloj, bèn raliduladx ree, bèn guxhaal Dios loj guidxliuj.

² Din Jesucrist bazoobaman xtiidx Dios bèn bacaabee laaman zi'c bazoob Moisejs xtiidx Dios delant loj ree bèn Israel.

³ Per mazri rayal Jesucrist respejt guial loj Moisejs guial mazri zobjblojman, zi'c tijb bèn ni rüjn yu' mazri ruza't reeman laaman zagdx guial loj yu' guin.

⁴ Gra yu' yu'czi tijb bèn rüjn laan, per Dios laaman been gra ni yu'.

⁵ Abi' Moisejs bazoobaman xtiidx Dios, beenman sirv lojman chi badëëdaman xtiidxaman loj ree bèn Israel persi bagojnman laa reeman ni rëb Dios.

⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yaleny'a ree abi' yalëëz ree xt dxej bigra.

Gol guzujdx'i'ch loj xnejz Dios

⁷ Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

⁸ ad cwexuudi zi'c been ree bèn ad bacaagdiajgt xtiidxaman

chi been reeman laaman prueb chi guzu reeman loj yujbidx.

⁹ Abi' yagaj naj lod ad bacaagdiajgt ree xbéngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

¹⁰ Zeel bidxe'ch Dios bèn guin ree, abi' rëbaman:

“Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman.”

¹¹ Zianan zeel bidxe'ch Dios abi' rëbaman

guial ad yu't dxej gap reeman xguialraziiladx Dios.

¹² Zeel gol gojpt cudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bèn naban.

¹³ Mejorli guixie guixie gol guneeñë gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan.

¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan,

ad bal gaquidi nad zi'c goc ree bèn ad bazoobt xtiidx Dios gocli.

¹⁶ Abi', ¿chuza ree nin ad bazoobt xtiidx Dios majsi biguiejn reeman ni guneeaman? ¿Nid bèn Israel ni babëë gajc ree Moisejs Egipton ya?

¹⁷ Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx?

¹⁸ Abi', ¿nid bèn guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman?

¹⁹ Zian rayagbee ree guial ad gojpt reeman guialraziiladx guin guial ad bililadxt reeman ni rëb Dios loj reeman.

4

¹ Zeel yan guial sta raya'p ree promejs ni been Dios guial yaya'p ree xguialraziiladxaman, rayal yaya'p ree cudad chitëë awa raya'p ree promejs guin yaya'n tijb dunuj ree guial ad zaya'pt ree guialraziiladx guin.

² Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan.

³ Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree bèn ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman,

⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

⁵ Per par ree bèn ad bazoobt xtiidxaman rëbaman:

Ad yu't dxej gap reeman da guialraziiladxan.

⁶ Bèn biguiejn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bèn ryaadx gap guialraziiladx guin.

⁷ Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal rigujndi xtiidx Dios yandxej,

gol bazoob xtiidxaman.

⁸ Din bal por Josuë ni ajp ree bèn Israel guialraziiladx, ad nuzatt Dios zatijb dxej.

⁹ Zeel xt yandxej yu' guialraziiladx guin par ree xbejn Dios.

¹⁰ Din bèn rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman.

¹¹ Zeel rayal yaguieen ree naguiejn yaya'p ree guialraziiladx guin, chitëë chu güün zi'c been ree bèn ad bazoobt xtiidx Dios.

¹² Din xtiidx Dios nabanen rajp tëen guialrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman.

¹³ Achetctzi ni been Dios zajc guiguie'ch lojman, din gradooczan ruguiaaman, abi' lojman naj yadëëd ree cwent.

Jes s naj bixhioz mazri zojbloj

¹⁴ Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, b n ma zojb xanyabaa, rayal yasnuu yadxu'dxi'ch ree loj ni raliladx ree laaman.

¹⁵ Din Jesucrist b n naj dux bixhioz zojbloj ree laaman zajc gagn  dunuj ree chit   gi n dol dunuj ree gan. Din n  laaman guzajc graloj zi'cgajc cayza'c ree, per laaman ad yu't dxej beenman dol.

¹⁶ Zeel con confianz ma zajc yabiig ree loj Dios yarejdx yanaab reeman, b n r n dunuj ree par yayaman dunuj ree. Abi' guial r nman dunuj ree, laaman gagn  dunuj ree loj hor ni yay n ree chu gi n dunuj ree yudar.

5

¹ Gra b n rajc bixhioz mazri zojbloj, Dios gulej laaman loj ree bejn persi rbejdx rniabaman Dios por ree bejn. Abi' lojman rud   bejn gon par Dios n  ree be ni gui t por ree xtol ree bejn.

² Abi' guial b nguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens b n ni ad ragbeet xhienin r jn, n  ree b n ad zinalt xnejz Dios.

³ Abi' guial yu' chi r jn bixhioz guin dol zeel n man rug jt tijb be zi'c gon par Dios por xtolaman, zi'cgajc r jnman por ree bejn.

⁴ Abi' achut zajc gui b guial gacaman bixhioz zojbloj, Dios naj b n rbe laaman zi'c guleman Aar n.

⁵ Ziangajc gojc con Jesucrist, ad laataman r b guial gacaman bixhioz zojbloj par dunuj ree, Dios bacaabee laaman, chi r baman:

L j naj da Xi'nan, abi' diidx yan

gul n guial l j naj da Xi'nan.

⁶ Ziangajc r b zatib lajt loj xtiidx Dios por Jesucrist:

L j naj bixhioz par tiblayaa zi'c goc Melquisedec bixhioz.

⁷ Chi guban Jesucrist loj guidxliuj guie d d biinman gurejdx gunabaman Dios b n zajc yab   laaman loj gualg jt ni gud daman. Dxel bidxga' Dios Jes s bad  man laaman valor guial bazoobaman gra xtiidxaman.

⁸ Majs Xi'n Dios najman, per basiidaman bazoobaman diidx majsi guzagdiajman.

⁹ Abi' guial guidiblagaa beenman gra ni r n Dios gi nman, zeel por laaman tiblayaa ma yu' perdon par gra ree b n guzoob xtiidxaman.

¹⁰ Abi' Dios naj b n gule laaman par gacaman bixhioz zojbloj zi'c goc Melquisedec bixhioz.

Raya yasnuu yaguieenbee ree xtiidx Dios

¹¹ D d zien ni yu' ganin l jt por ree ni guin, per naw  g najn par ganinan zi'c r nan guial d d nen rignia'di.

¹² Ma gojc xchej da't n nbeedi xtiidx Dios, yan bal zajcan, l jt ma rayal guli  ben ren ree, per l jt sta ryaadx chu' b n guli  l jt xtiidx Dios stijb ni basiididi guia'xchej. L jt naj zi'c tijb xindoo ni r ' ganax lejch luar gawix graloj.

¹³ Abi' gra ree b n naj zi'c xindoo ad wayajct gaw graloj, ad zile't gagbee reeman conin naj xnejz.

¹⁴ Per ree b n ni cusnuu cayignia' xtiidx Dios, laa reeman naj zi'c b n ma raw graloj guial ma rignia' reeman conin naj zagdx con t  nin naj ni mal.

6

¹ Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni bagueen ree yaloj, o xhienaag yaliduladx ree Dios,

² o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios beng t ree, o xhienaag gi n Dios xguialguxtisaman chi guidxin dxej yad  d ree cwent lojman,

³ zagdxeli naj guial yasnuu ree yasiid ree xtiidxaman. Abi' Dios gagn  dunuj ree din chile' yaguieen ree zian.

⁴ Din b n ma ragbee ree xcwent Dios, b n ma n nbee ree xcwent ree ni yu' xanyabaa, b n ma gubajn ree con xSprijt Dios,

⁵ abi' bayuladx reeman xtiidxza'c Dios, ma ragbee t   reeman xhienaag nabee Dios,

⁶ dxel rusa'n reeman guial chinal reeman xtiidxza'c Jesucrist, par laa reeman d d naw  g naj chu' reeman loj xnejz Dios, din zi'c ruli  cucaa reeman Jesucrist Xi'n Dios loj cr jz zatijb din guze' ree bejn laaman.

⁷ B́enguidxliuj ree naj reeman zi'c tibia' guidxliuj ni r'́e' guibidx guia ni ryajb, abi' bal rajc da't guiniaa guin par b́en r'́ujn dxiin lojn dxel r'́ujnle' Dios laan.

⁸ Per bal ganax gui'ejch n'́e ree gui'xh mal rliejn lojn, dxel ad r'́ujntan sirv, abi' mazri z'́e'ed gajxh casti par guidxliuj guin abi' casti guin naj guial che'can.

Ni nuzujdxi'ch dunuj ree loj xnejz Dios

⁹ Ad caynatan zian por l'́ejt, din dunujn rayagbee guial zagdxen cay'ujndi, guial zinalquidi ni rayal g'́u'ndi din laadi loj xcasti Dios.

¹⁰ Abi' laaman r'́ujn xguialguxtisaman zi'c rayal, abi' ad zayanladxtaman ni zagdxen beendi n'́e guial ma bal'́u'udi guial r'́endi laaman, abi' beendi yudar cusnuu t'́e' cay'ujndi yudar dux compniar ree b́en r'aliduladx ree Jesucrist.

¹¹ Per dunujn ray'́enan guial gusnuu g'́u'ndi zian xt dxej chigra, sin guial yalena' di din yayalidi ni cab'́ezidi tia' di.

¹² Ad gaquidi b́en ploj, gol been zi'c been ree b́en bililadx Dios sin guialralena' tia' reeman ni r'́eb Dios tia' reeman.

¹³ Chi been Dios promeys loj Abraham, baza't laagajcaman din achut b́en mazri lasajc guial lojman,

¹⁴ Abi' r'́ebaman loj Abraham: "Naj diidxli g'́unle' l'́uj abi' d'́ad zien ree xdiaal chu'."

¹⁵ Abi' Abraham guyuman pacens ad balena'taman persi cwa'man ni r'́eb Dios gud'́e'eman lojman.

¹⁶ Chi r'́ujn bejn jurar, r'́ujnman jurar por stijb b́en mazri lasajc guial lojman din guiguien guial diidxliqui g'́u'ndi ni r'́ebaman.

¹⁷ Ziangajc yan, guial r'́en Dios gul'́u'uman loj ree b́en ni tia' ni r'́ebaman guial ad yu't dxej guchaa xixgabaman por promeys ni beenman, zeel beenman jurar.

¹⁸ Tio'p ni ad zaze'nt been Dios, beenman promeys been t'́e'eman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din g'́u'ndi dunuj ree yudar guial ma raya'p ree confianz guial gac zi'c ma r'́ebaman.

¹⁹ Abi' guial rayagbee ree guial gac zi'c ma r'́eb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guib' tijb barcw. Abi' guial nadxu'dxi'ch ree diidz xanyabaa z'́e'edan,

²⁰ lod ma guyu Jes'́us par guixhialaman nejz par dunuj ree, b́en ma naj bixhioz zobjloj tiblayaa zi'c goc Melquisedec.

7

Jes'́us naj bixhioz zi'cgajc gojc Melquisedec

¹ Melquisedec gojc rey Salem gojc t'́e'eman xbi'xhioz Dios b́en yu' xanyabaa. Chi baza Abraham loj wadijl lod beenman gan rey gudiln'́e ree laaman, dxel bigchaagloj Melquisedec laaman, abi' beenle'man Abraham.

² Dxel loj gra ree ni been Abraham gan, beenman laan chii lala' abi' bad'́e'eman tijban loj Melquisedec. Melquisedec r'́en gui'eban "rey ni r'́ujn xguialguxtis zi'c rayal", Abi' guial gojcaman xrey Salem r'́en gui'eban "rey rabe'cdxe luxdoo ree bejn", din Salem r'́en gui'eb "ni rabe'cdxe luxdoo ree bejn".

³ Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc t'́e' g'́ujtaman. Laaman goc bixhioz zi'cgajc Jes'́us Xi'n Dios b́en ma naj bixhioz par tiblayaa.

⁴ Gol been xgab xi b́en lasajc gojc Melquisedec nadxel. Zeel xt dux b'́engulal ree Abraham bad'́e' tib part loj chii ni beenman gan loj ree rey ni gudiln'́eman.

⁵ Loj ley r'́eb guial ree bixhioz Israel ni z'́e'ed loj xdiaa Lev'́i rajp reeman derejch tia' reeman tib part loj chii ni rajp ree b́en Israel, majsi tijbzi loj xdiaa Abraham z'́e'ed gra reeman.

⁶ Melquisedec majsi ad z'́e'edtaman loj xdiaa Lev'́i, per cwa'man tib part loj chii ni been Abraham gan. Dxel beenle'man Abraham b́en cwa' xpromeys Dios.

⁷ Abi' dunuj ree rayagbee guial b́en r'́ujnle' stijb bejn, mazri lasajcaman guial loj b́en r'́ujnle'man.

⁸ Per gra ree bixhioz ni rtia' tib part loj chii la' ni rajp ree bejn, r'́ejt gajc reeman zi'cgajc dunuj ree. Sa'n Melquisedec b́en cwa' tib lia' ni been Abraham gan, loj xtiidx Dios ruza't laaman zi'c rul'́u' sta nabanman.

⁹ Yan zi'c rul'́u' yaguie'ch ree guial Lev'́i con ree bixhioz ni z'́e'ed loj xdiaaman b́en ni rtia' ree tib part loj chii ni rajp ree bejn n'́e reeman bad'́e' tib part guin loj Melquisedec loj hor ni bigchaagloj Melquisedec dux b'́engulal ree Abraham.

¹⁰ Din chi bigchaagloj Melquisedec dux b'́engulal ree Abraham, ad wayut Lev'́i, per loj xdiaa Abraham z'́e'ed Lev'́i.

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree bèn Israel, dxel ad rüjntri naguiejn ni't stibj bixhioz bèn naj zi'c Melquisedec ad zi'ct Aarón.

¹² Din chi bidxaa bixhioz nëgajc ley bidxaa,

¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz zëedaman, loj diaa ren zëedaman abi' ni'qui tijb ree xdiaaman ad gojct bixhioz.

¹⁴ Dunuj ree rayagbee guial loj xdiaa Judá zëed dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec,

¹⁶ guial ad lojt xdiaa Leví zëedaman zi'c rëb loj ley par gac bejn bixhioz, najman bixhioz guial rajpaman guialrniabee guibanman tiblyaaa.

¹⁷ Din ze rëb loj xtiidx Dios por laaman:

Lüj naj bixhioz par tiblyaaa,

lasa' bixhioz ni goc Melquisedec.

¹⁸ Zianan zeel gojc ley guin tiblad guial ad beentan sirv guial nüjn bejn zi'c rniabee ley guin.

¹⁹ Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios.

²⁰⁻²¹ Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rëb:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblyaaa, lasa' bixhioz ni goc Melquisedec.”

²² Zeel zian zagdxe naj nejz cüb ni guxhal Jesús par yadxin ree loj Dios.

²³ Gulal zien gojc ree bixhioz per guial rdxin dxej rëjt reeman ad bile't niajc reeman bixhioz par tiblyaaa.

²⁴ Per Jesús ad yu't dxej guiëtaman ad yu' tët dxej lox guial najman bixhioz.

²⁵ Zianan zeel rile' rabëëman bejn ree loj xcasti Dios, bèn rën ree gap nejz par guidxin reeman loj Dios por laaman, din laaman rajpaman guialnaban par tiblyaaa par cwedx guiniabaman Dios por laa reeman.

²⁶ Zeel laaman naj bixhioz zobjloj bèn rayaadx ree gagnë dunuj ree. Din laaman naj bèn naya nali, achet ni mal rüjnman, nayaman loj Dios, garen najman guial loj bëndol, abi' zobjaman xanyabaa cwë' Dios.

²⁷ Laaman ad ryadxt güinman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yalaj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stibj.

²⁸ Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

8

Jesús naj dux bixhioz zobjloj ree

¹ Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bèn ni ma zobj xanyabaa xladbee Dios bèn rniabee.

² Ni ma rüjnman sirv guialbixhioz, lën yadoo ni bazoob Dios, ad bénguidxliujt.

³ Gra ree bixhioz zobjloj loj guidxliuj guie xchiin reeman naj guial rinë reeman gon rugüjt tëë reeman be ree zi'c gon par Dios. Ziangajc Jesucrist bèn naj dux bixhioz zobjloj ree yu' ni badëëman loj Dios.

⁴ Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs.

⁵ Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxe din güünl zi'cgajczi balün lüj ruguia' Sinai.”

⁶ Per mazri zagdxe naj ni rüjn Jesucrist, bèn bayal naj dux bixhioz zobjloj ree, din mazri zagdxe naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxe naj ree xpromejs Dios par bejn.

⁷ Bal por ley nile' nibajn bejn zagdxe delant loj Dios, dxel ad rüjnt naguiejn niu nejz cüb.

⁸ Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej gaxhalan nejz cüb

par ree bèn Israel në ree bèn Judá.

⁹ Per nejz cüb guin ad najtan zi'c ley ni basa'nan loj xbëngulalidi chi babën laa reeman Egipto.

Abi' guial ad bazoobt reeman da diidxan
zeel gulêladxan laa reeman, zian rëb Dios.

¹⁰ Rëb tēeman:

Zian ma baya'n diidx gac con ree bejn chi guidxin dxej
guijc reeman yasa'nan da leyan
abi' lën luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad rüntri naguiejn gusiid ree bejn lasa' reeman.

Ni'qui bijch reeman par güünbee reeman naj,
din gra reeman güünbee naj,
diidz xindobëz xt bengol.

¹² Abi' naj gën perdon gra ree ni mal ni ma been reeman,
abi' ad yu't dxej gusaaladxan xtol reeman.

¹³ Chi rëb Dios guial guixal nejz cüb guin rën guiëban guial achetri sirv rün nejz gulal guin
ni gop ree bejn par guidxin reeman lojman, abi' ni ad rüntri sirv nayob nitan.

9

Yadoo ni yu' loj guidxliuj në yadoo ni yu' xanyabaa

¹ Dunuj ree rayagbee guial chi binal bejn ley ni cayguie'ch ree naj nejz gulal, loj ley guin
zëëd xhiënaag guiën bejn Dios, xhie tēë naag rayal güün reeman tijb yadoo loj guidxliuj
guie.

² Lën yadoo guin guzëëb tijb lajd persi gojcan tio'p lën. Tijb lënan ni naj niz ro' port, lod
brii laj lod nada abi' lën guin guzobj ni ru gandel në tijb mex ni gudxib ree guiadxtil ma
gogle'.

³ Dxel stijb lën guin xijch lajd guin brii laj lod mazczi nada.

⁴ Lën guin guyu tijb altar ni or lod rgu' reeman goxyl në tijb caj ni brii laj xcay xpromejs
ree Dios. Abi' caj guin nadüüban or zi'c lënan zi'c xijchan. Lën caj guin yu'chaaw guiaj ni ca
ree guidxii xmandamient Dios në xvar Aarón ni бага' con stijb re or ni guyuchaaw mana.

⁵ Dxel guijc caj guin guzobj tio'p xfigur ree anjl bën la ree querubines abi' con xhii
reeman rusiaaw reeman guijc lod ruuroob bixhioz zobjloj xrejn ree be por xtol ree bejn.
Per por yan ad rüntri naguiejn guzatan mazri ree ni guin lojdi.

⁶ Chi gulox been reeman gra zi'c rayal gac lën tijb yadoo loj guidxliuj guie, dxel guixie
guixie guyu ree bixhioz lën yadoo guin per naabzi lod brii laj lod nada, lod rguieen reeman
ni rayal güün reeman par Dios.

⁷ Per stijb lën guin lod la mazcsi nada, tijbzi bixhioz zobjloj ru ni tib volt lën tib ijz. Abi'
ad zajct chu'man bal id zinëman xrejn ree be din güün Dios perdon xtolaman në xtol ree
bejn.

⁸ Por ree ni guin rulüü xSprijt Dios dunuj ree guial la'tgaj rün sirv lod brii laj lod nada
ad yu't mod chu' bejn lod la mazcsi nada.

⁹ Gra ree ni guin najzi reen tijb ejempl par dunuj ree yan, din gon në ree be ni binë ree
bejn par Dios, ad beent reen sirv par nayaalaj ninaladx reeman guial ma naya reeman loj
Dios.

¹⁰ Gra ree costumbr ni gop reeman zi'c ree con ni gudaw reeman, në ree ni gu' reeman
në gra ree ni rayal güün reeman din naladx reeman guial ma naj reeman naya, laan naj ni
gunabee ley güün ree bejn xt dxej ni bachaa Dios gra.

¹¹ Din yan ma bi't Jesucrist, bën naj bixhioz zobjloj par dunuj ree, abi' por laaman ma
raya'p ree yaya'p tēë ree ni ma rëb Dios yaya'p ree. Abi' mazri zagdxe naj lën yadoo lod ma
guyuman mazri lasajc yadoo guin guial ad zobjtan loj guidxliuj guie ad gojc tēëtan por ree
bënguidxliuj guie.

¹² Jesucrist ma guyuman lën yadoo lod nada da't, per ad con xrejt ree go'n dobëz o xrejn
ree dxib, guyuman con quijb xrejnman. Laaman con tib volt guyuman, ad rüntri naguiejn
güünman zian stijb abi' por laaman raya'p ree perdon par tiblayaa.

¹³ Tiamp gulal xrejn ree dxib o xrejn ree go'n o cobdëj ni we'c ree vagdobëz ruuroob
bixhioz guijc ree bejn persi naladx reeman ma naya reeman. Yan bal zian naladx reeman
guial raya'n reeman naya,

¹⁴ diidxgui con xrejn Jesucrist nid zanaduladx ree ya guial ma naya ree niz loj Dios
xcwent dux tol ree, din chile' yaguieen ree ni rën Dios bën naban. Din por xguialrniabee
xSprijt Dios, Jesucrist bën ad beentczi dol, badëë laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt
Jesucrist ma yu' perdon par dux tol ree në xtol ree bën ni binal ley, gra ree bën naj xbejn
Dios zian yaca' ree ni rëb Dios yaya'p ree par tiblayaa.

¹⁶ Din zi'cgajc tijb bën rlies tijb gui'ch guial chu yaya'nnë ree ni rajpaman, ad züjnt gui'ch guin dxiin xt chi ma güjtaman.

¹⁷ La'tgaj naban bën guin achet sirv rüjn gui'ch guin, rüjnan sirv xt chi ma güjtaman.

¹⁸ Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëë reeb rejn.

¹⁹ Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaaman laan guiyc tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guiyc ree bejn

²⁰ rëbgajman: "Rejn guie naj tijb sen guial ma baneë Dios xleyaman lojdi par güündi laan cumplid."

²¹ Bacojp tëëman rejn guin lën yadoo në guiyc gra ree ni rüjnnë ree bixhioz dxiin lën yadoo.

²² Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennë ree bixhioz dxiin lën yadoo guin, gojc naguëjn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be.

²⁴ Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios.

²⁵ Jesucrist ad biaadxt niëjtaman zien volt por dol ree, ad beentaman zi'c been ree bixhioz zobjloj guial gazobijz binë reeman xrejn ree be lën yadoo lod brii laj lod nada da't.

²⁶ Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëë laagajcaman par guië'taman din chiquied dux tol ree.

²⁷ Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios.

²⁸ Ziangajc Jesucrist tib voltzi badëë laagajcaman par guië'taman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bën cabëz ree laaman.

10

Ad leyt riquied dol

¹ Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios.

² Din bal ninaladx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman.

³ Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios,

⁴ din xrejn ree go'n në xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,

zeel baneel naj cuerp ni ra'pan loj guidxliuj guie.

⁶ Ad rëntril guial ruze'c reeman be ree par lüj

ni'qui xrejn ree be ni ridnë reeman por xtol reeman.

⁷ Zianan zeel rën:

"Laa naj guie, Dad Dios,

zialan par günan zi'c rën,

zi'c ca loj libr por naj."

⁸ Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman.

⁹ Chi gulox rëb Jesús zian, dxel rëb tëëman: "Laa naj guie, Dad Dios, zialan par günan zi'c rën." Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios.

¹⁰ Yan ma nayajc ree naya delant loj Dios guial ma been Jesucrist zi'c rën Dios, badëed laagajcaman güjtaman por xtol ree bejn, con tib volt par tiblayaa, ad ryaadxt güünman zian stijb.

¹¹ Gra ree bixhioz Israel guixie guixie za' reeman cayünj reeman gra ni rniabee ley güün reeman, abi' guixie guixie rugüjt reeman be ree par Dios. Abi' majsi zien volt rünj reeman zian per ad rquiedt guialrugüjt be guin ree xtol ree bejn.

¹² Per Jesucrist con tib volt badëéd laagajcaman güjtaman por xtol ree bejn, ad ryaadxt güünman zian stijb. Dxel gurejman xladbee Dios,

¹³ lod cabëzaman guidxin dxej nabeeman loj gra ree bèn rdxe'ch laaman.

¹⁴ Din laaman con tib volt badëë laagajcaman güjtaman por xtol ree bejn dxel tiblayaa ma naya ree bèn rliadx laaman.

¹⁵ Abi' dunuj ree rayagbee ree guial walín din por xSprijt Dios zëéd ree diidx ni ca loj xtiidx Dios guial rëb Dios:

¹⁶ Zianan ma baya'n diidx gac

con ree bejn chi guidxin dxej:

Guijc reeman gusa'n da leyan

abi' lën luxdoo reeman gucanan

¹⁷ Abi' rëb tëëman:

Ad yu't dxej gusaaladxan xtol reeman

në graloj ree ni mal ni ma been reeman.

¹⁸ Abi' zi'c ma yu' perdon par dol, ad rünjtri naguiejn guiët ree be por dol.

Raya! yubiig ree loj Dios

¹⁹ Zeel compniar raliduladx ree Jesucrist sin guialrdxeb ma zajc yadxin ree lod zojb Dios por xrejn Jesucrist,

²⁰ din chi badëéd xcuerpaman persi güjtaman, guxhalaman tijb nejz cüb ni zidnë guialnaban par dunuj ree.

²¹ Yan zi'c ma rniabee Jesucrist dunuj ree, bèn naj bixhioz zojbloj xanyabaa,

²² con guidib du luxdoo ree ma zajc yubiig ree loj Dios con tijb guialrliladx ni wali ree raliduladx ree laaman, con tijb quiarguejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya.

²³ Zeel rayal yadxu'dxi'ch ree loj ni raliduladx ree Dios, din laaman zünj cumplid xtiidxaman zi'c ma rëbaman.

²⁴ Rayal yagueien ree xgab xhienaag yalu' ree luxdoo ree dux compniar ree yayën tëë du lasa' ree yagueien tëë ree ni naj zagdxe.

²⁵ Ad rayalt yagueien ree zi'c rünj ree bèn ad rejtri ree lod radxaag lasa' ree dux compniar ree par chignia' reeman mazri xtiidx Dios, rayal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

²⁶ Din bal ma rayagbee ree xtiidxli Jesucrist abi' bagueien ree xgab yagueien ree mazri dol, dxel ad yu'tri por chu zajc yayajc ree perdon.

²⁷ Ni cabësi dunuj ree naj xguialguxtis doxh Dios, tijb bajl lod yayal ree bèn ad ruzoobt xtiidxaman.

²⁸ Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw guial ad beent bèn guin zi'c rniabee ley guin, dxel ad yu'tri mod laaman loj guialgüjt ni rayalaman.

²⁹ Yan gol been xgab, ¡xixpi mazri castiro' yayal bèn rnieeguijdx xSprijt Dios bèn ragnë dunuj ree! Bën ni naladx guial achet lasajc Xi'n Dios, abi' rünjman desprejs xrejnman, rejn ni rulüü guial gac zi'c rëb Dios, rejn ni rusia xtol bejn.

³⁰ Dunuj ree rayagbee guial rëb Dios: "Naj rayal gün guialguxtis, naj gudë ni rayal bejn." Rëb tëëman: "Dios naj bën ni yaca' cwent por ni cayünj bejn."

³¹ ¡Abi' nadxeb yayal bejn xcasti Dios bën naban!

³² Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudëdidi.

³³ Yu'di zien loj da't guialzi badëéd ree bejn lëjt, abi' baze' reeman lëjt delant loj ree bejn, yu' tëedi ad gulëladxtidi bën guzac ree zian.

³⁴ Ad gulëladxtidi bën ni guyu ree ladxguuib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa.

³⁵ Zeel ad gusa'ndi guialrliladxidi Jesucrist, din por guialrliladx guin dád zagdxe naj ni tia'di.

³⁶ Rünj naguiejn gapidi pacens din chile' güündi zi'c rën Dios, zian tia'di ni ma rëbaman guneeman lojdi.

³⁷ Din loj xtiidx Dios rëb:

Nayob, dád nayob gui't bën naj gui't,

ad zagaataman.

³⁸ Abi' bèn naban zi'c rënan,
guidib tiamp ni nabanman rliladxaman naj.
Per bal gusa'nman ni rliladxaman naj,
ad zabaanë'tan laaman.

³⁹ Per dunuj ree ad nayajct ree zi'c ree bèn rusa'n ni rliladx reeman Jesucrist abi' rayal reeman casti, dunuj ree nayajc ree bèn rliladx Jesucrist diidxli par chitéë yayal ree casti.

11

Guialrliladx Dios

¹ Yan, ¿xhienin naj guialrliladx? Guialrliladx naj guial guidiblagaa validuladx ree gac zi'c caylëjz ree gac, nè guial waliqui ni raliduladx ree ni ad raguiaat ree.

² Dux béngulal ree baya'n reeman zagdxe delant loj Dios guial bililadx reeman laaman.

³ Zi'c raliduladx ree Dios, dunuj ree rayagbee guial con xtiidxaman beenman xanyabaa nè guidxliuj nè gra ni raguiaa ree, achetctzi ni beenman con ree ni raguiaa ree yan.

⁴ Guial bililadx Abel Dios, zeel zagdxe naj gon ni badëëman guial loj Caïn, abi' baya'nman zagdxe delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta rguiajct xhienaag bililadxaman Dios.

⁵ Guial bililadx Enoc Dios zeel ad güjtaman, guidib nabanman ziaman xanyabaa abi' ad badxejlt ree bejn laaman guial ma zignë Dios laaman. Per chi gadaman chignë laaman, loj xtiidx Dios rëb guial bayuladx Dios zi'c gubanman.

⁶ Abi' achut zajc güün zi'c rën Dios bal id rliladxaman laaman. Chutëëz bèn rën gap nejz par guidxinman loj Dios rayal chililadxaman guial yu' Dios chililadx tëëman guial laaman rudëë ni rëbaman gudëëman loj ree bèn raguuil laaman.

⁷ Guial bililadx Noé Dios dxel chi rëb Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni rëb Dios gac. Dxel por guialrliladx guin biguien guial gra bénguidxliuj rayal casti ni rëb Dios, abi' baya'n Noé zagdxe delant loj Dios guial bililadxaman xtiidxaman.

⁸ Ziangajc Abraham guial bililadxaman Dios, bazoobaman xtiidxaman chi rëbaman lojman din grii ladxaman cheman lod tia'man guidxliuj ni gudëëd Dios lojman. Abi' brii ladxaman ni'quid ragbeetaman banguin cheman.

⁹ Guial bililadxaman Dios, gubajnmman zi'c benzit loj guidxliuj ni rëb Dios gudëëdaman lojman. Gurejman lën ree carp ni naj nè guid, ziangajc Isaac nè Jacob nè laa reeman rayal guidxliuj guin.

¹⁰ Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹ Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman.

¹² Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

¹³ Gra ree bèn ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rliladx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëëd reeman loj guidxliuj guie ad tiblayaat.

¹⁴ Abi' ree bèn rníee zian, zian rguienchaaw guial sta rguuil reeman lod diidxli gac ladx reeman.

¹⁵ Din bal por guidxliuj lod guza reeman cayüjn reeman xgab, dxel zile' nayejc reeman ni stíjb.

¹⁶ Per laa reeman mazri rüjn reeman xgab por tijb luar lod naj mazri zagdxe, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷ Guial bililadx Abraham Dios, dxel chi been Dios laaman prueb din gugüjt xi'nman Isaac din gudëëdaman laaman zi'c gon par Dios, cwëjz Abraham majsi tijbzi Isaac guin naj xi'nman, majsi ragbee tëëman guial rëb Dios lojman:

¹⁸ "Por xi'n! Isaac gacxhieje da't xdiaal."

¹⁹ Per Abraham yu'guicaman guial rajp Dios guialrniabee xt par yashanman bengüt ree, abi' zi'c ruluü baban xi'nman stíjb chi gudëëdaman prueb guin.

²⁰ Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman.

²¹ Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guietaman. Dxel cwa' yagrliaadxaman abi' gurejdx gunabaman Dios.

²² Ziangajc Xi b guial bililadxaman Dios, chi ma guidxin hor gui taman, r baman guial grii ree b n Israel Egipto, abi' r baman loj reeman xhienaag g unn  reeman xdxijtaman.

²³ Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon b  w guial baguiaa reeman najx xindoza'cdxoon, abi' ad bidxebt reeman guial r b b n naj rey guial gui t gra ree xindob z.

²⁴ Abi' chi goc Moisejs guin bengol, guial bililadxaman Dios, gojc xixgabaman cwexu-uman niajcaman xi'n xi'ndxa'p rey Egipto.

²⁵ Par laaman zagdxeli naj sagdiajman con ree xb n Israelaman, luar n jnman dol niro'nladxaman laa reeman din niajpaman ni r nman, ni ad rdaant ree par tiblyaa.

²⁶ Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios.

²⁷ Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulu  ruguiaaman Dios b n ad zajct guguiaa ree bejn.

²⁸ N  guial bililadx Moisejs Dios, beenman lanij pascw, abi' gunabeeman baroob ree b n Israel rejn ro' xport lidx reeman, din chi t d xianjl guialg jt, ad zug jtaman xi'n yaloj ree b n Israel.

²⁹ Guial bililadx ree b n Israel Dios, gud d reeman zi'c loj yujbidx lod bixal loj nijsdoo la nijsdoo xnia. Per chi guy n ree b n Egipto nid d reeman, loj hor guin bayaaw nijs guin dxel gu' reeman nijs abi' g jt reeman.

³⁰ Guial bililadx ree b n Israel Dios, chi baza' gajdx dxej ni biaw reeman guiedx Jeric , dxel bazaj ze' ni nayaw guiedx guin.

³¹ Abi' Rahab b n goc b ngunaa dxuudx luguiedx Jeric , guial bililadxaman ad g jtaman chi g t ree los demazri ree b n ladxaman b n ad bazoobt ree diidx, guial baca'man b n Israel ni we ree bigla'ch luguiedx guin.

³² Yan, xhie mazri ganin lojdi? Ad zadaant tiamp guin ganin lojdi xcwent Gede n, Barac, Sans n, Jefe , Davi, Samuel n  xcwent ree b n bad   xtiidx Dios loj ree bejn.

³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni r b Dios loj reeman abi' basiaaw reeman ro' ree beedx.

³⁴ Guzuj reeman loj bajl ro' abi' achet goc reeman, gulaa reeman loj guialg jt con espad, guyu reeman gojl chi rulu czi ad yu't reeman gojl, guzudxi'ch reeman loj wadijl abi' balaagdxa reeman benzit ni gudil  reeman.

³⁵ N  ree b ngunaa ni g t ree xfamil, por guial bililadx reeman Dios baban ree xfamil reeman stijb.

Per yu' ree bejn majsi g jt reeman, per par laa reeman mazri zagdx guzagdiaj reeman loj ree b n bag jt laa reeman, luar nusa'n reeman guialrliladx reeman Dios par gap reeman stijb guialnaban c b ni mazri lasajc.

³⁶ Yu' t   reeman guzagdiaj baze' ree bejn laa reeman, gudiyn ree bejn laa reeman, xt guxhii ree bejn laa reeman con caden abi' guyu reeman ladxguuib.

³⁷ Yu' reeman bag jt ree bejn con guiaj, yu' t   reeman bag jt reeman gul  xh n reeman laa reeman con sierr, g jt t   reeman con espad. Yu' t   reeman biza gra lad najcw reeman guid xab xiil n  guid xab dxib, probza laa reeman naya biza reeman, graloj beenn  ree bejn laa reeman.

³⁸ Biza reeman niz loj yujbidx, niz ruguia' ree, n  graloj l n ree guiajbiliaa. B n guin ree ad rayal nibajn reeman loj guidxliuj guial d d benza'c gojc reeman.

³⁹ Abi' majsi biguien guial gra reeman diidxli bililadx reeman Dios, per ad cwa't reeman ni r baman loj reeman.

⁴⁰ Din laaman beenman xgab tijb ni mazri zagdx par dunuj ree, abi' ad gojc gajt ni r baman loj reeman din tijbzi yaca' ree ni r baman con laa reeman.

12

yunaal ree Jes s

¹ Zeel, zi'c ma bacaagdiaj ree por zien ree bejn xhienaag bililadx reeman Dios, rayal yasa'n ree tiblad gra dol n  gra ree ni rudxoon yaguieen ree zi'c rayal, ad zalenya' t  t ree yunaal ree nejz ni ma balu  Dios dunuj ree.

² Rayal yadxeguijc ree Jesucrist din por laaman z  d guialrliladx ni raya'p ree abi' por tijbzi laaman rayaaloj guialrliladx ni raya'p ree. Gudaanman guialzi ni gud daman loj cr jz, ad batutaman g jtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

³ Gol been xgab xhienaag guzagdiaj Jesucrist chi basagdiaj ree b ndol laaman, chit   yadxaguidi, ad yalenya'di por ni cazajquidi.

⁴ Din majsi cusagdiaj ree bejn lèjt guial cayüjndi naguiejn ad cayüjntidi dol, per ad wazujtidi loj guialgüjt por zian.

⁵ ¿Wen ma bayanladxidi ya xhienaag banee Dios lèjt consejw najdi xi'nman? Loj xtiidxaman rëb:

Xi'n, bidxga' zi'c runee dux Dad ree Dios lüj consejw, ad bal yalenyala' chi guzuxnejzaman lüj.

⁶ Din rüjnaaman bèn ni naj ree xi'nman, ruzuxnejzaman laa reeman guial rënman laa reeman.

⁷ Zeel gol gudaan guialzi, din zagdxe najn par lèjt. Rüjnnë Dios lèjt zi'c rüjnnë bejn xi'nman, ¿wen yu' dad ad ruzuxnejzt xi'n ya?

⁸ Yan bal id ruzuxnejz Dios lèjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi.

⁹ Lèjt ragbee guial chi bayajc ree xindoo, gudijn dux dad ree dunuj ree din yacaagdiaj ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bèn yu' xanyabaa, din yaya'p ree guialnaban con laaman?

¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxman naj zagdxe. Per Dios ruzuxnejzaman dunuj ree par tijb ni mazri zagdxe par dunuj ree, ruzuxnejzaman dunuj ree din yabajn ree naya zi'c laaman.

¹¹ Diidxliczi achet guialnaa naj nix loj hor ni cadëdilan, ragnaalil. Per ree bèn ni rusiid ruzoob diidx zian, laa reeman naban zagdxe, naalyuj delant loj Dios.

Ad cwëäladxidi xtiidx Dios

¹² Zeel gol bagu' luxdoodi, gol badëed valor lèjt gajc zi'c tijb bèn raca'ladx chi ma badxag da'taman.

¹³ Gol been naguiejn gol gubajn xnejz, din ree bèn ragdxa xhie güün reeman, ad gusa'n reeman xnejz Dios, chu' luxdoo reeman zagdxe chinal reeman laan.

¹⁴ Gol been naguiejn guibandi zagdxe con gra ree bejn, gol gubajn naya delant loj Dios din bèn ad nabant naya ad zile't guguaiaaman dux Dad ree Dios.

¹⁵ Gol gojp cudad chitëe chu' tijbidi gusa'n tiblal zi'c rën Dios gagnëman lèjt chitëe chu' tijbidi gac zi'c gui'xh nala ni rüjn guialqquia abi' guxhiinan gra xcompniaridi.

¹⁶ Ni'qui tijbidi ad rayalt sunëdi bèn ad najt lacheelidi, ad cwe'quidi tiblal ni zagdxe ni zëed ree por Dios chitëe saquidi zi'c guzac Esaú, por tijb guialraw bato'man guialrniabee ni rayalaman guial najman bèn yaløj loj bijchaman.

¹⁷ Abi' lèjt ragbee guial chi guyën Esaú nüjnle' xdadaman laaman ad beenle'taman laaman zi'c rayalaman. Majsi dád biinman gunabaman laan, per ad bile't nuchaaman ni beenman.

¹⁸ Lèjt gadidi chibig lod ad najt par gugaalidi zi'c gubig ree bèn Israel gual guijc guia' Sinaí lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidøjn.

¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman.

²⁰ Din ragbee reeman guial nawëëg naj ni gunabee Dios güün reeman chi rëbaman: “Chutëez bejn o be gui'xh ni gugaal guijc guia' guie rayal guiëtaman o guiëtib con guiaj o con lans.”

²¹ Nadxeb naj ni baguiaa reeman xt Moisejs rëb: “Rnijn guial tant rdxëban.”

²² Per lèjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalën ladx Dios bèn naban, lod nadxag lasa' ree zien da't ree anjl,

²³ dád nix yu' luxdoo reeman rën reeman laaman lod yadxaj lasa' ree xbejn Dios bèn ni ma ca ree laj loj libr xanyabaa. Ni zojb Dios, bèn yanab cwent loj gra bejn, ni tëe za' xSprijt ree bèn guban zi'c rayal laa reeman ma naya reeman por Dios.

²⁴ Ni gajc zojb Jesucrist, bèn guxhal nejz cüb ni raya'p ree par yadxin ree loj Dios. Chi güit Abel xrejnman gunab gac guialguxtis, per con Jesucrist ad gojct zian, güjtlanan, guxhie' tëe xrejnman par yayajc ree perdon.

²⁵ Zeel gol gojp cudad gol bidxga' Dios, laaman najman bèn rnieenë dunuj ree. Din bal bèn ni ad bidxga't ree xtiidx Moisejs bèn badëed xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bèn guza diidx xanyabaa din guinieenëman dunuj ree.

²⁶ Chi gunee Dios béngulal ree ruguia' Sinaí, binij guidxliuj. Per yan ma rëbaman: “Gunin guidxliuj zatijb, per ad guidxliujtzi, në xanyabaa.”

²⁷ Chi rëb Dios guial güünman zian zatijb, rën guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied.

²⁸ Zeel rayal yadëed ree quixtëe loj Dios guial ma rayal ree lod canabeeman, lod ad yu't dxej nit, abi' con respejt në gualrdxeb yaguieen ree ni ruladxaman.

²⁹ Din dux Dios ree naj zi'c tijb bajl ni ruze'c gra.

13

Xhienaag güün bejn ni yayuladx Dios

¹ Ad cwëz guiëndi xcompniaridi bèn rliladx ree Jesucrist.

² Ad yayanladxidi gudëe lidxidi yaya'n ree bèn ri't, din zian yu' ree bèn baca' ree xianjl Dios sin guial gagbee reeman chunin.

³ Gol basaaladx bèn yu' ree ladxguuib, gol gunaladx guial në lëjt yu' ladxguuib con laa reeman. Gol been tëë xgab por ree bèn ni cazagdiaj, gol gunaladx guial në lëjt cazagdiaj.

⁴ Gol goj p respejt gualruxhliaa, ad gusquiee lacheelidi. Din Dios zudëedaman casti bèn za'në xinguaaw o bëngunaa ren, në gra ree bèn ni rüjn ree ni dxuudx con ree bèn ad najt lacheel reeman.

⁵ Ad sëëbladxidi milia, gol baya'n conform con ni rajpidi din Dios ma rëb: "Gra dxej za'n con lüj, abi' ad yu't dxej gabëladxan lüj."

⁶ Abi' con confianz zajc yaguie'ch ree:

Da Dadan Dios naj bèn ragnë naj

ad rdxebtan majsi xhietëz güünnë ree bejn naj.

⁷ Gol basaaladx ree bèn ni gunabee ree lojdi, bèn ni balüü ree lëjt xtiidx Dios. Gol been xgab xhienaag gubajn reeman gol binal tëë zi'c bililadx reeman Jesucrist.

⁸ Abi' Jesucrist laagajcaman nieey, laagajcaman yan në zianczi.

⁹ Ad tiëbidi gusquiee graloj ni rülüü ree bejn lëjt, din ad najt reen zi'c rayal chinalidi Cristo. Mazri zagdxe gol goj p confianz xyudar Dios din guiband i xnejz luar chinalidi costumbr xcwent guial xhie zajc gawidi o xhie ad zajc gawidi, din costumbr guin ree achet yudar rüjn ree delant loj Dios.

¹⁰ Dunuj ree raya'p ree tijb bèn güit por dunuj ree, laaman naj zi'c tijb xgon bejn por xtolaman, gon ni ad zajc gaw ree bixhioz rüjn ree sirv lën yadoo guin.

¹¹ Bixhioz zobjloj guin, laaman rinë xrej n ree be ni rudëed ree bejn zi'c gon por xtol reeman, rinëman rej n guin lën yadoo lod rayal chinëman laan. Dxel ree begüt guin re'c reeb ro' guiedx lod achut zobj.

¹² Ziangajc goj c con Jesucrist, ro' guiedx Jerusalén güjtaman par gusiaman bejn xtol reeman por xrej nman.

¹³ Zeel yunaal ree Jesucrist majsi gulëe reeman laaman luguiedx Jerusalén, në majsi xhietëz gualxtu o gualrzagdiaj yadüüd ree zi'c laaman.

¹⁴ Din loj guidxliuj guie ad raya'p ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa.

¹⁵ Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman.

¹⁶ Ad yayanladxidi güündi ni zagdxe güün tëë lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree bèn rniabee lojdi, bèn rülüü ree lëjt xtiidx Dios. Gol goj p reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

¹⁸ Gol gurejdx gunab Dios por dunuj n. Dunuj n rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz.

¹⁹ Rniababan lojdi din cwedx guiniabidi Dios por naj, din guneeeman permis diob gualan din gazun con lëjt zatijb.

Diidx bigra ni bacan loj gui'ch guie

²⁰ Dios bèn rabe'cdxe luxdoo ree bejn, bèn basban Jesucrist, rajpaman dunuj ree zi'c rajp tijb bejn xiil, por xgualgütaman zianczi ma raya'p ree nejz par yadxin ree loj Dios,

²¹ Laaman gagnë lëjt par gra ni naj zagdxe din chile' güündi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²² Compniar raliduladx ree Jesucrist, ad naroojt gui'ch guie, per rniababan lojdi ad yaleny'a'di por ree diidx ni canin lëjt cunen lëjt consejw.

²³ Rugoj n tëën lëjt guial ma barii dux compniar ree Timoteo ladxguuib abi' bal nayob gui'taman niz guie, dxel du gropan yo'p yudganaj n lëjt.

²⁴ Gol bagajpdioz gra ree bèn rniabee lojdi bèn ni rülüü ree lëjt, në gra ree dux compniar ree bèn rliladx ree Jesucrist. Abi' ree bèn Italia rugajpdioz reeman lëjt.

Gui'ch par ree bèn Hebreos 13:25

291

Gui'ch par ree bèn Hebreos 13:25

²⁵Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

¹ Naj naj Santiaaw, cayünan xchiin Dios në xchiin Dad Jesucrist, rugajpdiiozan gra ree bën naj xdiaa Israel, nare'chidi guidib guidxliuj.

Quiarguejn zëed loj Dios

² Gradi compniar raliduladx ree Jesucrist, rnin lëjt, gol babaa majsi xhietëez loj gualrza-gdiaj tédidi.

³ Lëjt ragbee, chi rdëdidi gralojn gual rliadxidi Dad Jesucrist, zian rusiididi gapidi pasens.

⁴ Per gol been naguiejn güün pasens guin lëjt yudar din gaquidi zi'c rën Dios, gusnuudi loj xnejzaman, chitëe guiyaadxidi xhienin.

⁵ Bal chu lëjt riaadx chu' mazri xquiarguejn, gol gunab xquiarguejndi loj Dios. Laaman guneë gra ni riaadxidi, ad zabexuutaman guneeman laan.

⁶ Per rayal chililadxidi guial guneeman laan, ad rayalt chu' nawëëguidi, din bën ru nawëëg luxdoo naj zi'c xtüjp nijsdoo ni rinë bi ni guiezi.

⁷ Bën naj zian ad cwëzidi guneë Dios ni guiniabidi,

⁸ din bën ru nawëëg, ad rüjntaman tijbzi xgab, ad rinal tëtaman tijbzi nejz.

⁹ Lëjt guial najdi bënprob gol babaa, din loj Dios najdi bën zojbloj.

¹⁰ Guiaad lëjt benrijcw, gol babaa guial ma ragbeedi achet lasajc gualrijcw loj Dios, din gualrijcw guin najn ni téd zi'c rdëd guiaa rial dajn.

¹¹ Lëjt ragbee chi rbëë loj jubijdx gojl, dxel rucwiidxan gui'xh, rba'y ree xguiaan, dxel ad nixtri rguenan. Ziangajc benrijcw yu' dxej guiëtaman majsi galay gra ree ni rajpaman.

Bën rdaan ree rdëd loj gualrzagdiaj

¹² Chabaa bën rzudxi'ch loj xnejz Dios rdaan tëëman xhietëez rzajcaman guial rliadxaman Jesucrist. Chi ma gudaanman loj gualrzagdiaj, tia'man coron rayalaman, laan naj gualnaban tiblayaa ni cwëb Dios yazaladxaman loj ree bën rën laaman.

¹³ Bal chu rüjn xgab güün ni mal, ad najtan ni naladxaman guial Dios rudxe' xgab guin gujcaman. Din ad yu't dxej guiën Dios güünman ni mal, ni'quid rgu' tëtaman xgab guijc bejn güünman ni mal.

¹⁴ Xixgabmal gajc bejn rudëë laaman gan güünman ni mal.

¹⁵ Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

¹⁶ Gradi compniar raliduladx ree Jesucrist, diidxli rënan lëjt, ad gusquiee lëjt gajc.

¹⁷ Graczi xgab zagdxë në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaaman, zianczi rüjnman ni zagdxë.

¹⁸ Guial guyënman, zeel baneeman gualnaban tiblayaa duloj ree, guial ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman.

¹⁹ Zeel yan ma ragbeedi nine ree.

Rayal yasa'n ree gra ni mal riga' loj guidxliuj

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yooblaxidi guial guinieedi ni'qui guial yalendi,

²⁰ din bën ralen ad zajct güünman ni rën Dios.

²¹ Zeel gol gulëëladx gra ni ad najt zagdxë në gra ni mal riga' loj guidxliuj guie, gol gojc bënchaawlaxd, gol bazoob xtiidx Dios ni ma bacaagdiajguidi, din laan yabëë lëjt loj dol.

²² Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc.

²³ Din bën rucaagdiajgzi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn,

²⁴ per chi ma ziaman, rayanladxaman xhienaag naj lojman.

²⁵ Per bën ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaloj rabëë tëën dunuj ree loj dol. Rzudxi'chaman loj nejz guin, rüjn tëëman ni rën Dios. Bën güün zian chu' luxdooan zagdxë por ni cayünman.

²⁶ Bal chudi naladx zinalidi xnejz Dios zagdxë per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios.

²⁷ Din par dux Dad ree Dios bën zinal xnejzaman zagdxë naj bën rüjn yudar xindo bizëjb ree në ree béngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

2

Ad rayalt yalej ree loj ree bejn

¹ Gradi compniar raliduladx ree Jesucrist bèn rniabee, ad rayalt cwedi loj ree bejn.

² Yaguie'ch ree, chu' tèè tijb bènprob najcwaman lajd senci, naaman, chu' tèè tijb bènprob najcwaman lajd senci,

³ abi' mazri güüncwenti bèn najcw lajd zagdxe guin, guiëbidi lojman: “Gurej guie, laan naj luar zagdxe”, guiáad loj bènprob guin guiëbidi: “Yagaj guzuli o gurej luyuj zii ya.”

⁴ Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin?

⁵ Gradi compniar raliduladx ree Jesucrist, rënan lëjt, gol bacaagdiajg nine: Dios gule bèn naj ree bènprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree bèn rën laaman.

⁶ Guiáad lëjt rusa'n xtudi bènprob ree. Wen, ¿id benrijcw guin ree rusagzi lëjt ya rudxig tèè reeman lëjt loj guxtis?

⁷ ¿Id laagajc reeman rnieeguidx Jesucrist ya, bèn naj bënlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

⁸ Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi.

⁹ Per bal mazri rüjncwenti tijb bejn guial loj stjibaman, dxel ma cayüjndi dol, ma rajpidi dol guial ad rüjntidi cumplid xley Dios.

¹⁰ Din bal chutëez zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin.

¹¹ Dios gajc rëb: “Ad sunël xinguaaw ren o búngunaa ren”, rëb tèëman: “Ad gugüjtil bejn.” Per bal id za'nël xinguaaw o búngunaa ren ya per rugüjtil, dxel ma cusagloj xley Dios.

¹² Zeel gol gunee gol been tèè zi'c ree bèn yadëed cwent diidxli loj Dios por xtiidxaman ni rabëè dunuj ree loj dol.

¹³ Din bèn ad rayat ree lasa', ad zayat Dios laa reeman dxej güün xgualguxtisaman. Per bèn raya ree lasa' ad najtan ni guidxeb reeman dxej guin.

Royal yaguieen ree ni rën Dios

¹⁴ Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon?

¹⁵ Yaguie'ch ree, tijb dux compniar ree, bèn rliladx Jesucrist, najman xinguaaw o búngunaa ya, guiaaax xabaman con ni gawaman,

¹⁶ abi' guiëb tijb lëjt loj reeman: “Yaguiajdi zagdxe, gawidi zagdxe ad gagnajl tèëdi.” Per bal id rudëëdi ni riaadx reeman, ¿xhieci gan guiëbidi zian?

¹⁷ Ziangajc rzajc bèn rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

¹⁸ Xt zajc chu na lojl: “Lüj na rliladx Dios, guiáad naj rünan ni rënman.” Yan balüü naj guial rliladxil laaman guial ad rüjntil ni rënman, guiáad naj gulün guial rliladxan guial rünan zi'c rënman.

¹⁹ Zagdxe rüjnl bal rliladxil yu' tijbzi Dios, per në ree xindxab rliladx zian, abi' xt rnij reex guial rdxeb reex.

²⁰ Zeel ad bal natontil, bignia' achet lasajc guial chililadx bejn Dios bal id rüjntaman ni rënman.

²¹ Basaaladx, dux búngulal ree Abraham, bayagbee Dios laaman zi'c bèn ad beent dol, guial beenman ni guyën Dios, chi rëbaman lojman din nugüjt xi'nman Isaac nudëè tèëman laax zi'c gon lojman.

²² Ma qui ruguaal, guial bililadxaman, zeel beenman ni guyën Dios. Guial beenman zian, zeel biguien guial diidxli bililadxaman laaman.

²³ Zian gojc cumplid ni ca loj xtiidx Dios, lod rëb: “Bililadx Abraham Dios, zeel bayagbee-man laaman zi'c bèn ad beent dol”, bayagbee tèè ree bejn laaman zi'c tijb xmiw Dios.

²⁴ ¿Ma bignia'di yan ya? Rayagbee Dios bejn zi'c tijb bèn ad wayüjnt dol guial rüjntaman ni rënman, ad guialzi rëbtaman rliladxaman laaman.

²⁵ Ziangajc gojc con tijb bèn brii laj Rahab, bèn goc búngunaa dxuudx, bayagbee Dios laaman zi'c bèn ad beent dol guial beenman ni rën Dios, chi badëed lidxaman baquie'chloj tio'p ree bèn Israel we ladxaman biquiaa reeman xhienaag chu' ree xsuldad reeman, been tèëman laa reeman yudar persi zia reeman nejt ren.

²⁶ Din bèn achet xsprijt ad zajc guibanman. Ziangajc rzajc tijb bèn rliladx Dios: bal id rüjntaman zi'c rënman, achet lasajc guial rëbaman rliladxaman laaman.

3

Du lüdx ree naj zi'c tijb luar lod guidxa ni mal

¹ Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj gualguxtis ni güün Dios con dunujn bal id zaguieenan zi'c rayal.

² Du graczi ree rüjn xhietëéz dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tëët ro'di, najdi bën naya delant loj Dios, rajc tëë rniabee lëjt gajc.

³ Lëjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb.

⁴ Ziangajc ree barcw, majsi narooob reen, majsi por mazt rucadxa bidoxh laa reen, per con tijb guibdobëz ni la timón, con laan ma zajc chinë bejn laan lod rëntzaman.

⁵ Ziangajc naj du lüdx ree, najn ni dobëz, per narooob gualquia rüjnan. Najn zi'c tijb gui dobëz, per majsi najn ni dobëz, rüjnan gualquia narooob ruze'can dajn narooob.

⁶ Du lüdx ree naj zi'c tijb gui, zajc yanee në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zëéd loj xinxab du ro' ree.

⁷ Rayagbee ree gual graloy ree bedoxh zajc gagnadoo, xt në ree be rzuj në ree bëël nëtëë ree be yu' loj nijs, yan ma gognadoo reeb por ree bénguidxliuj.

⁸ Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt.

⁹ Con du lüdx ree ranee ree diidx zagdx par dux Dad ree Dios, abi' con laagajcan raneeguijdx ree bejn, bën been gajc Dios zi'c najman.

¹⁰ Gradi compniar raliduladx ree Jesucrist, du ro' ree ririi diidx zagdx në diidxguijdx, per ad rayalt gacan zian.

¹¹ Lëjt ragbee, lod rajch nijs zagdx ad zajct grii nijs naxij,

¹² ad zajc tëët tia aceitunas loj yag higo, ad za zajct tia higo loj yag uv, ad zajc tëët grii nijs zagdx lod ririi nijs naxij.

Ni rüjn bën ca' quiargueijn rudëë Dios

¹³ Bal chu lëjt naladx rajc rignia' tëë gra xtiidx Dios, rayal gacaman bënchaawladx guiban tëëman zi'c rayal, zian guiguieen guial yu' xquiargueijnman.

¹⁴ Per bal guidxa gualnadëdloj luxdoodi rën tëëdi gra par lëjt gajc din gaquidi mazri bën zojbloj, ad güüdi benro' gual rajquidi xtiidx Dios, cusquieezidi guial rüjndi zian.

¹⁵ Lasa' quiargueijn guial ad Diost rudëë laan, xquiargueijn gajc bën riga' loj guidxliuj guien, zëéd tëën loj xinxab.

¹⁶ Din lod yu' gualnadëdloj lod yu' tëë bën rën gra par laagajcaman, ni yu' wadijl në gra loj ni mal.

¹⁷ Per bën rajp quiargueijn runee Dios, yaloy rüjnan naguiejn guibanman zagdx lojman, gac tëëman bën ad rüjnt nabë, në benza'c, gap tëëman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tëëman cumplid ni guinieeman.

¹⁸ Bën rüjn ree naguiejn ribajn sin wadijl, raguuil reeman mod guinieenë reeman bejn zagdx, zian rbajn reeman zi'c rën Dios.

4

¹ ¿Ban zëéd guial ralen lasa'di në guial rdilidi? ¿Id zëédan por xgabmal ni rüjndi ya?

² Rzëëbladxidi gapidi ni ad rajptidi, zeel xt rugüjt lasa'di din tia'di ni rëndi, rdëdloj tëëdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rëndi, din ad rniabtidan loj Dios.

³ Abi' bal rniabidan, ad runeetaman laan, din ad rniabtidan par güüdi ni zagdx, rënzidan din guibandi zi'ctzi rëndi.

⁴ ¡Bën rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rën chinal ni mal guin, laagajcaman za' contr Dios.

⁵ Ad ca xlia'tzi loj xtiidxaman lod rëb: "Badxe' xSprijt Dios du luxdoo ree, rënman Sprijt guin, xt neeloyman laaman."

⁶ Dád zro' naj yudar rüjn Dios dunuj ree, zi'c ca loj xtiidxaman lod rëb: "Dád naza'c Dios con ree bën rüjn naya lojman, per ad rüjn cwenttaman bën rüjn ree benro'."

⁷ Zeel gol bazoob xtiidx Dios, ad gudëedi mod güün xinxab lëjt gan, zian chiquiedix loj xnejzidi.

⁸ Gol gubig loj dux Dad ree Dios din güün cwentaman lëjt, guiáad lëjt bëndol, gol bariica loj dol, guiáad ree bën yu' nawëég luxdoo guial chinalidi xnejz Dios, con guidib luxdoodi gol binalaman.

⁹ Gol guyu xgab, gol guyu naya gol biin tëë por xtolidi, luar guxijdxidi gol biin, luar chu' luxdoodi nix gol guyu naya,

¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bën rnieeguijdx o bën rula'ch lasa', ma caneeeguijdxaman cula'ch tëëman xley Dios. Bal rula'chidan, ad cayüntridi zi'c rniabeen, lëjti ma canabee laan.

¹² Per tijbzi Dios basa'n ley guin rünjn tëëman gualguxtis, laaman ca' gualrniabee gual yabëëman në gual gunijtaman. Per lüj, ¿chu najl zeel rula'chil bejn?

Dux gualnaban ree naj ni tibrajtzi

¹³ Yan gol bacaagdiajg nine lëjt bën rëb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.”

¹⁴ Ni'quid ragbeetidi xhie gac guixie, din dux gualnaban ree naj zi'c tijb bëj rguien tibrajt, stibrajt ma gunidlojn.

¹⁵ Zagdxeli naj guiëbidi: “Bal gunee Dios dunujn gualnaban, yaguieenan nine o ni ni ya.”

¹⁶ Per lëjt mazri zinalidi xtiidx dxalidi, abi' laa reen naj ni mal.

¹⁷ Zeel bën ragbee xhienaag güünman ni zagdxë abi' ad rünjtaman laan, ma cayünman dol.

5

Ni rünj ree benrijcw

¹ ¡Lëjt, najdi benrijcw! Gol bacaagdiajg nine, gol biin gol gurixdiajg tëë, din ma zëëd lod sagdiajdi.

² tant zien ni rajpidi xt rxin reen, guiáad xabidi xt raw be laa reen.

³ Gra or në plajt ni rajpidi xt rzobëj reen, laagajc reen ruluü ni mal rünjdi, laagajc reen gac zi'c tijb bajl gustib lëjt. Ma zidyob güün Dios xgualguxtisaman, guiáad lëjt gule'cchaaw ni lasajc ree loj guidxliuj guie.

⁴ Gol baguiaa, laa ree bën been xchiindi canab din quixidi laa reeman, xt Dios bën ca' gra gualrniabee ma bigueijn gual caygu' reeman gualquia.

⁵ Nabandi zi'c rëndi, per cusni'szidi ni ad zünjt lëjt sirv chi guidxin dxej güün xgualguxtis Dios.

⁶ Din xt baguulidi mod persi bagüjtidi bën ad beent ree xhienin, abi' achet gojc nünj reeman chitëë njëjt reeman.

Royal yarejdx ree Dios yaya'p tëë ree pasens

⁷ Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bën rünj dxiin dajn, rbëzaman guia yaloj xt guia bigra din yalesaman ni guxübinman.

⁸ Ziangajc lëjt gol gojp pasens, ad yalenya'di, din ma zidyob dxej gui't dux Dad ree Jesucrist.

⁹ Rni tëën lëjt, ad yalenya' në lasa'di, chitëë xhie casti yayalidi, din ma zidyob dxej güün xgualguxtis Dios.

¹⁰ Gol binal zi'c been ree bën badëë xtiidx Dios loj ree bejn, gojp reeman pasens gudaan tëë reeman graloj gualrzagdiajg gudëd reeman.

¹¹ Rayagbee ree gual xiquilbaa ree bën rdaan loj gualrzagdiajg. Ma bigueijn di xcwent bën brii laj Job, xhienaag gudaanman chi guzagdiajman, ragbee tëëdi xhienaag beennë Dios laaman, chi gulox gudëdaman loj gra gualrzagdiajg guin, din Dios dád naza'caman raya tëëman bejn ree.

¹² Gol gojp cudad chi rünjdi xhie compromisan loj bejn, ad guza'tidi Dios o xhie stijbnin ya, chitëë gudëd Dios lëjt casti, zagdxeli naj guinieedi diidxli güün tëë xtiidxidi cumplid.

¹³ Bal chu lëjt cazagdiajg, gol gurejdx Dios, o bal yu' luxdoodi zagdxë, gol biil par laaman.

¹⁴ Guiáad bal ragxuu tijb lëjt, royal guinieedi bën rniabee ree lëjt gual najdi bën riladix Jesucrist, din cwedx reeman Dios por laaman quiëëb tëë reeman laaman sejt por laj Jesucrist.

¹⁵ Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon.

¹⁶ Zeel gol baxhoobdol loj lasa'di gol gurejdx tëë Dios por lasa'di din yayajquidi, din tijb bën zinal xnejz Dios, chi rbejdxaman laaman, rünj cwentaman laaman.

¹⁷ Zi'c bën brii laj Elías bën badëë xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios gual ad zalt guia, dxel ad golt guia choon ijz garol.

¹⁸ Chi guredxaman Dios zatijb, zianz bazuloj gol guia, dxel bayu gualnaza'c loj guidxliuj.

¹⁹ Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yayejquidi,

²⁰ gol gogbee guial chutëez bén rasiejc tijb bëndol loj nejz zagdxe chitëë chinalaman ni mal, laaman rabëë bëndol guin loj casti, abi' majsi ma beenman zien dol, gran gac perdon.

Gui'ch yaløj bacaa San Pedr

Rxhiaal Bêd xtiidx Dios loj ree bejn

¹ Naj Bêd, najn tijb xi apóstol Jesucrist, laaman guxhaal naj, cucan gui'ch guie par lèjt najdi bèn bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor nè Bitinia.

² Ma gulej dux Dad ree Dios lèjt diidz gocli, zi'c goc xixgabaman. xSprijtaman gulëeca lèjt din guzoobidi diidx gac tõe luxdoodi naya delant lojman por xrejñ Jesucrist. Zro' güünle' Dios lèjt yabe'cdxe tõeeman luxdoodi.

Ni ralëjz ree gunee Dios

³ Quixtëe Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios.

⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tõeet dxej nitan.

⁵ Guial riladxidi Dios, laaman rniaj lèjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lèjt perdon.

⁶ Zeel rabaa da'tidi majsi tédidi graloj guialrzagdiaj tiblädëd,

⁷ din por guialrzagdiaj guin guiguien chu diidxli riladx Dios, zi'c rüjnmë reeman or, rudëed reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliladx laaman, bal chu taan xhietëez loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiaad ree bejn nè ree anjl guza't reeman laaman zagdxe gap tõe reeman laaman respejt guial rusnuu riladxidi laaman.

⁸ Ad waguiaatidi Jesucrist per rëndi laaman, abi' yan riladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guieëbidi,

⁹ din lèjt ragbee, guial riladxidi, ma nünj Dios lèjt cwent zi'c ree bèn achet xtol.

¹⁰ Diidz gocli, bèn badëe ree xtiidx Dios loj ree bejn basiid reeman been tõe reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lèjt guial najman benza'c.

¹¹ Por xSprijt Jesucrist gobbee reeman diidz gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tõe gac zian.

¹² Per balüü Dios laa reeman guial ni gunee reeman ad najtan par laagajc reeman, najn par lèjt, abi' yan lèjt ma rignia'di ni guin ree por ree bèn catie'ch xtiidxza'c Jesucrist por xguialrniabee Sprijt zëed xanyabaa. Nè ree anjl ma rën nejzdoo gagbee nine ree.

Ze ryal guiban ree xi'n Dios

¹³ Zeel gol guzusin gol bastëdguien tõe, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb.

¹⁴ Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman.

¹⁵ Laaman gule lèjt, zeel gol been naguiejn guibandi naya delant lojman, din laaman naj bèn naya nali.

¹⁶ Zi'c rëb loj xtiidxaman: "Gol gubajn naya delant lon, din naj naj bèn naya nali."

¹⁷ Yan bal rnieedi Dios "Dad", bèn rüjn xguialguxtis tibloj, bal conin rüjn tijb gaj bejn, ryal gapidi laaman respejt guidib tiamp guibandi loj guidxliuj guie.

¹⁸ Din lèjt ragbee guial babëeman lèjt loj costumbr ni basa'nnë ree xbëngulalidi lèjt, costumbr ni ad rüjnt ree sirv, abi' lèjt ragbee guial gojx din yariidi loj reen, per ad gojxt con ree ni rniyt, zi'c or o plajt ya,

¹⁹ gojx con xrejñ za'cdxoon Jesucrist ni guxhie'man loj crüzj chi gütaman zi'c tijb xiil zagdxe be ad naxint, be rugütj reeman par Dios por xtol ree bejn.

²⁰ Diidz chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lèjt.

²¹ Zeel por laaman riladxidi Dios bèn basban laaman badëe tõeeman guialrniabee lojman, yan con guidib luxdoodi ma riladxidi Dios rbëz tõeëdi ni guneeaman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c ryal, zeel gol guyën lasa'di con guidib luxdoodi.

²³ Din ma bidxaa mod nabandi, zi'c rulüü gojlidi stijb, abi' guialnaban zinalidi ad zëëdtan por tijb bèn nit, zëëdan por xtiidx Dios, diidx naban, diidx ni ad zanjitt,

²⁴ din loj xtiidxaman rëb:

Gra bénguidxliuj naj zi'c gui'xh dajn,
 guiáad ni rajp reeman naj zi'c xguiaa gui'xh guin.
 Rbidx gui'xh guin, abi' riajb xguiaan,
²⁵ per xtiidx Dios ad yu't dxej nitan.
 Abi' laan naj xtiidxza'c Jesucrist ni ma biguiejndi.

2

¹ Zeel gol basa'n gra ni mal, gra ni rusquiee, ad bal rüjnzidi, gol basa'n gualnadédloj në gual rnieeguijdx lasa'di.

² Zi'c re'c ree xindo quigojlnzejri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb,

³ bal walidi ma ragbeedi gual naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tiblاد, per par Dios najman bën lasajc, laaman gule laaman.

⁵ Ziangajc lëjt, gual ma rliladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëedi lojman zi'c gon por Jesucrist.

⁶ Rëb loj xtiidx Dios:

Gol baguiaa, guzoban tijb guiaj zagdxe luguiedx Jerusalén.

Laan naj guiaj nabee, guiaj zojbloj, nilasajc tëë.

Bal chu chililadx laan,

ad yu't dxej yaya'nxtuman.

⁷ Par lëjt, gual rliladxidi Jesucrist, laaman naj zi'c guiaj lasajc da't. Per par ree bën ad rliladxt rajc cumplid ni rëb loj xtiidx Dios, lod rëb:

Guiaj ni gulëëgo'n ree bën rüjn yu,

yan laan naj guiaj zojbloj.

⁸ Rajc tëë cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,

abi' rureeyujn laa reeman.

Rzajc reeman zian, gual ad ruzoobt reeman xtiidx Dios, zian rajc ni rëbaman xcwent reeman.

⁹ Per lëjt naj bën guleman, najdi bixhioz rüjn ree sirv lojman, gual najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxe rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman.

¹⁰ Gocli achutczí najdi, per yan ma najdi xbejn Dios. Gocli ad ragbeetidi gual raya Dios lëjt, per yan ma ragbeedi.

Zi'c rayal guiban ben rliladx Dios

¹¹ Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibratzí, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios.

¹² Gol gubajn zagdxe loj ree bën ad nünbeet laaman, zian majsi rnieeguijdx reeman lëjt yan, rëb reeman najdi benmal, per chi guguiaa reeman gual zagdxe naj ni cayüjndi, dxel guza't reeman laaman zagdxe, dxej ni yadëed reeman cwent lojman.

¹³ Gual rliladxidi Dad Jesucrist, gol bazoob xtiidx gra ree bën rniabee loj guidxliuj guie. Gol bazoob xtiidx pristent rniabee xnaciondi

¹⁴ në xtiidx gobernador bën rxhiaalaman din gudëédaman casti bën rüjn ree ni mal guilies tëëman xvalor ree bën rüjn ni zagdxe.

¹⁵ Din rën Dios güündi ni zagdxe ree din gucwëëzidi ro' ree bentont ad rignia't abi' rnieeguijdx reeman lëjt.

¹⁶ Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios.

¹⁷ Gol gojp respejt gra bejn zi'c rayal, gol guyën ree bën rliladx Jesucrist, gol bidxeb Dios, gol gojp tëë respejt pristent rniabee xnaciondi.

Gol gudaan loj gualrzagdiaj

¹⁸ Lëjt bën naj ree mojs, gol bazoob xtiidx ree xpatrondi, gol gojp tëë reeman respejt, ad bën najtzi ree benza'c raya tëë reeman lëjt, në ree bën naj bendxuudx.

¹⁹ Din zagdxe naj gual chu rdaan loj gualrzagdiaj, majsi ad rayaltaman laan, rdaanman laan gual rënman güünman ni ruladx Dios.

²⁰ Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxe rüjndi abi' rdaandi loj guialrzagdiaj guin, laan lasajc delant loj Dios,

²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman.

²² Ad yu'tczi dxej beenman dol abi' ni'qui tijb diidx rusquiee ad briit ro'man.

²³ Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bën rüjn xguialguxtis zi'c rayal.

²⁴ Guzagdiaj Jesucrist loj crüzj por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjman du luxdoo ree naya.

²⁵ Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tëëman lëjt zi'c tijb bën rajp xiil.

3

Zi'c rayal guiban ree bën ca' lasa'

¹ Në lëjt bëngunaa ma yu' ree lacheel, gol bazoob xtiidx lacheelidi, din bal chu lacheelidi ad rililadxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiebidi loj reex,

² chililadx reex guial guguaa reex nabandi zi'c rayal rajp tëëdi laa reex respejt.

³ Chi rzujchaawidi, ad bal rdëdlaj rüjnchaaw guidxguijquidi ni'qui guial güündi ujs ganax ni or o gacwidi ganax lajd lasajc.

⁴ Mazri zagdxe naj guial güündi naguiejn gac luxdoodi naya delant loj Dios, gol gojc benza'c në bën chaawladx, din laan ad yu't dxej nitan, abi' laan mazri lasajc delant lojman.

⁵ Din zian gubajn ree bëngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman.

⁶ Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxe sin guialrdxeb.

⁷ Ziangajc lëjt xinguaaw, gol gubajnnë lacheelidi zagdxe, gol gojp reeman respejt ad guialzi najt reeman bën nada, rayal güündi zian guial në reeman rayal guialnaban tiblayaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guiniabidi laaman.

Xhie rayal güündi chi xhie güün në reeman lëjt

⁸ Zeel rnin loj gradi: Gol gubajnnë lasa'di zagdxe, gol bachajj lasa'di, gol been xgab tijbzi, gol guyën lasa'di zi'c rayal, gol gojc benza'c në bën chaawladx.

⁹ Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt.

¹⁰ Din rëb loj xtiidxaman:

Bën rën guiban zagdxe chu' tëë luxdooan zagdxe, rayal gapaman cudad ad guinieeman diidxguijdx ad guinee tëëman diidx rusquiee.

¹¹ Cwëëladxaman ni mal, güünman ni zagdxe güün tëëman naguiejn guibannë ree lasa'man zagdxe, zian rayal guibanman zianczi.

¹² Din dux Dad ree Dios rniaj bën rüjn ree ni rënman rüjncwent tëëman xtiidx reeman chi rbejdx reeman laaman, per ralenman bën rüjn ree ni mal.

¹³ Achut güün lëjt ni mal, bal cayüjndi naguiejn güündi ni zagdxe.

¹⁴ Per xiquilbaadi bal cusagdiaj bejn lëjt guial cayüjndi ni zagdxe. Ad chu'di xgab ad guidxeb tëëdi por zian,

¹⁵ gol gojp respejt gol badxe'guijc tëë dux Dad ree Jesucrist. Gol guzuzsin din yadxi'di xtiidx ree bën guiniabdiidx lojdi xcwent ni rililadxi, per gol badxi' xtiidx reeman zagdxe con diidx zagdxe ree.

¹⁶ Gol gubajn zagdxe din guiguien guial achet ni mal yu'guijquidi din yaya'nxtu ree bën rnieeguijdx lëjt, guial rüjndi ni zagdxe rililadx tëëdi Jesucrist.

¹⁷ Mazri zagdxe naj sagdiaj bejn guial güünman ni zagdxe, bal zian rën Dios, luar sagdiajman guial güünman ni mal.

¹⁸ Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree bëndol, zian guxhalaman nejz din gac yadxin ree loj Dios, güjtaman zi'c bënguidxliuj per babanman por xSprijtaman.

¹⁹ Chi gadaman yaban, wej xSprijtaman bigneenëman xsprijt ree bengüt lod nayaaw reeman.

²⁰ Sprijt guin ree naj xsprijt ree bën ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii.

²¹ Nijs guin naj zi'c gualrirobnijs ni rulüü guial ma nayajc ree perdon. Gualrirobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiarguejn ree, guial ma raya'p ree guialnaban cüb guial baban Jesucrist loj ree bengüt,

²² Bén bayë'p xanyabaa abi' za'man xladbee Dios lod canabeeman anjl ree në ree sprijt ca' guialrniabee.

4

Gol beennë quiarguejn ni baneë Dios dxiin

¹ Zeel zi'c gudëd Jesucrist loj gualrzagdiaj, në lëjt rayal taan lojn. Din por gualrzagdiaj guin rüjn bejn dol tibläd,

² Din güünman zi'c rën Dios guidib xguialnabanman luar güünman zi'c naj xixgabaman.

³ Xchej da't gubajndi zi'c naban ree bén ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdä da'tidi, guyën tëëdi ni ad najt ree Dios, laan naj ni rbijxhlädx Dios.

⁴ Per yan guial ad zinaltridi zi'c naban ree bén naban zian, zeel radxa loj reeman, rnieeguidx tëë reeman lëjt.

⁵ Per rayal yadëëd reeman cwent loj Dios bén za' par güün xguialguxtisaman con ree bén naban në ree bén ma güjt.

⁶ Din në ree bén ma güjt biguejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

⁷ Ma zidyob dxëj nit guidxliuj, zeel gol bastëdguien gol guzujsin tëë din cwedx guiniabidi Dios con guidib luxdoodi.

⁸ Ad yayanlädxidi guial guiën lasa'di zi'c rayal, din bén rën lasa' rüjnman perdon majsi xhietëëz rüjnnë reeman laaman.

⁹ Bal yu' tijb xcompniaridi rniab luar lidxidi din yaya'nman, gol badëëdsii lidxidi con guidib luxdoodi ad yaleny'a'di.

¹⁰ Loj tijb gajdi ma baneë Dios quiarguejn din güündi ni rayal güündi. Zeel gol been lasa'di yudar con ni rajc rüjndi, din guiguien guial cayüjndi zi'c rayal con quiarguejn ni bazaladxaman lojdi.

¹¹ Bal chu lëjt ca' quiarguejn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bén ca' quiarguejn par güünman yudar dux compniar ree, rayal güünman laan con gojl razalädx Dios lojman. Gra ni cayüjndi, gol beenan din guza't ree bejn Dios zagdxë por Jesucrist, bén rayal respejt në gualrniabee zianczi. Amén.

Gol gudaan gra gualrzagdiaj

¹² Gradi compniar ralidulädx ree Jesucrist, rënan lëjt, zeel rnin lojdi, ad ru nawëëguidi guial zro' naj loj gualrzagdiaj cadëdidi, din laan naj zi'c prueb par lëjt. Ad rudi xgab chëcx zeel cazajquidi zian.

¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxëj gui'taman stijb.

¹⁴ Xiquilbaadi bal chu na diidxguidx lojdi guial zinalidi Jesucrist, din gra dxëjczzi za'në xSprijt Dios lëjt, bén ca' gualrniabee.

¹⁵ Achet lasajc bal cazagdiajdi guial bagüjtidi bejn, o por guialgubaan, o por guial rüjndi ni mal o guial rudi lod ad rayaltidi.

¹⁶ Per bal chu cazagdiaj guial zinalaman xnej Jesucrist, ad rayalt yatuman, rayal gudëëman quixtëë loj Dios guial ma najman xbejn Jesucrist.

¹⁷ Gol gogbee, guial rtiëjb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bén ad rënt guzoob xtiidzxa'caman.

¹⁸ Nacli ree bén zinal xnej Dios nawëëg naj guial yaguaiaj reeman xanyabaa, piorli ree béndol bén ad nünbeet ree Dios, xhieczi naag naj luar lod yaya' reeman.

¹⁹ Zeel bén cazagdiaj ree zi'c naj xixgab Dios, rayal gusnuu güün reeman ni zagdxë gusa'n tëë reeman gran loj Dios, laaman gagnë laa reeman. Laaman bazalädx guialnaban rüjn tëëman zi'c rayal.

5

Consejw par ree bén rliädx Jesucrist

¹ Yan rënan gudëdan consejw loj ree bén rniabee ree lojdi, naj guial ca'n gualrniabee zi'cgajc laa reeman, naj tëënn testiw xcwent ni guzagdiaj Jesucrist, zi'cgajc laa reeman guiguan xbianiman dxëj gui'taman stijb, zeel rënan guiën nine ree loj reeman.

² Rnin lojdi, gol gunaj ree xbejn Jesucrist, bèn rayal ree gulüüdi din gusnuu chinal reeman xnejz Dios. Ad güüdi dxiin guin gualzi ragbeedi rayal güüdi laan, gol beenan gual yu'di gan güüdi laan, con guidib luxdoodi gol beenan, ad bal güüdi laan gualzi rzëëbladixidi milia.

³ Ad gual ca'tidi gualrniabee din nabeedi zi'c tal rëndi, rayal guibandi zagdxë din guguaa ree bèn rliladx Jesucrist din guiban reeman zian,

⁴ din chi gui't bèn rniabee dunuj ree stijb, dxel guneeman tijb niza'cdxoon ni ad yu't dxej nit.

⁵ Ziangajc lëjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tëë xtiidx ree xcompniaridi, din:

Ralen da't Dios bèn rüjn ree benro',
per dád benza'can con ree bèn rüjn naya.

⁶ Zeel gol been naya loj Dios, bèn ca' gra gualrniabee, din guiliesaman xvaloridi chi guidxin dxej.

⁷ Gol basa'n gra xgab yu'di loj Dios, din laaman rniaj lëjt.

⁸ Gol guzujsin, gol gojp cudad, din xindxab xin ralen da't lëjt, za'x zi'c tijb beedx rliaan, rguuilix chu güünx gan.

⁹ Zeel ad tiëbidi güünx lëjt gan, gol guzujdx'i'ch loj ni rliladxidi, din ragbeedi gual zi'c cazagdiajdi, ziangajc cazagdiaj ree bèn rliladx Jesucrist guidib guidxliuj.

¹⁰ Per chi ma gudëdidi ta'n loj gualrzagdiaj, dxel gagnë Dios din gusnuu güüdi naguiejn guibandi zi'c rënman, su tëëdi rejs, sudxi'chidi, gap tëëdi segur gual zinalidi xnejzaman. Laagajcaman naj Dios cayün dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman gual nachajg ree Jesucrist.

¹¹ Laaman rayal respejt, din tijbzi laaman ca' gualrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bèn ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nëtëë par gugoynan lëjt gual diidxli rën Dios lëjt, zeel gol basnuu gol guyënman gol guyën tëë lasa'di.

¹³ Bèn rliladx ree Jesucrist, bèn ma gulej Dios zi'cgajc lëjt, bèn zojb ree Babilonia, rugajpdioz reeman lëjt. Në Marcw xin nūnan zi'c da xi'nān rugajpdioz lëjt.

¹⁴ Gual rën lasa'di, gol bagajpdioz lasa'di xhietëez horan radxaaglojdi. Yabe'cdxe Dios luxdoodi gual ma nuchajgüidi Jesucrist.

Gui'ch barojp bacaa San Pedr

Rxhiaal Béd xtiidx Dios loj ree bejn

¹ Naj, Simón Béd, najn tijb xi apóstol Jesucrist rün tēen sirv lojman, cucan gui'ch guie par lējt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bēn rabēē bejn ree loj dol.

² Gūñle' Dios lējt mazri, yabe'cdxe tēēman luxdoodi guial ma nūnbeedi laaman nē dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēē ree naya delant lojman, din ma naguieenbee ree Dios bēn gule dunuj ree guial ca'man guialrniabee naj tēēman benza'c.

⁴ Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblad gra ree ni ad rüjnt sirv nē ree ni mal riga' loj guidxliuj guie.

⁵ Zeel gol been naguiejn por guialrliladx ni rajpidi gol gubajn zagdxe, din guial guibandi zagdxe, dxel mazri ma gagbeedi xhienaag guibandi.

⁶ Abi' guial gagbeedi xhienaag guibandi, ma zajc gucwēēz xixgabmalidi, abi' guial gucwēēzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant lojman,

⁷ dxel guial guibandi naya delant lojman, ma zajc guiēn lasa'di, abi' guial guiēn lasa'di, ma zajc guiēndi gra ree bejn.

⁸ Bal yu'guijquidi nine ree cusnuu tēē cayūjndi naguiejn guibandi zian, dxel ad naban xlia'tzidi, ad beenbee xlia' tēētidi dux Dad ree Jesucrist.

⁹ Per bēn ad rüjnt naguiejn guiban zian, laaman naj zi'c tijb bēnlutia'p o zi'c tijb bēn ad ruguiaat zijt, ma bayanladxaman guial biquied Dios xtolaman ni beenman guia'xchej.

¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lējt ma gulej tēēman lējt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol.

¹¹ Zian gapidi nejz nali din chu'di lod rniabee dux Dad ree Jesucrist tiblayaa, bēn babēē dunuj ree loj dol.

¹² Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēēdi ni diidxli ni ma bacaagdiaguidi.

¹³ La'tgaj naban loj guidxliuj guie, naladxan rayal gunen consejw lojdi con ree diidx guin.

¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayūn da'tan naguiejn rnienē'n lējt, din gusaaladxidi da diidxan majsi ma güjtan.

Bēn baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tēē naag gui'taman stijb, ad balēēgüjctan ni banan lojdi. Din con quijb du lojn baguiaa xbianiman

¹⁷ Chi biguien cha' Dios diidx xanyabaa, gulesaman xvaloraman baza't tēēman laaman zagdxe, rēbaman: "Xin guie naj da xi'n'an, rēnan laax rabaanē' tēēn laax."

¹⁸ Abi' dunujn nayajc bēn biguien cha' Dios diidx xanyabaa chi nadxu'nē'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rēb ree bēn badēēd xtiidx Dios loj ree bejn, zeel zagdxe naj bal yu'guijquidi ni rēb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lējt chaawladx cusnuu cayagbeedi xcwent Dios xt chi gui't Jesucrist stijb, bēn naj bajl rusni par dunuj ree, dxel ma gagbeedi graczan zi'c tal najn.

²⁰ Per gol gogbee guial ni'qui tijb xtiidx Dios ad zajct chignia' bejn por xixgabzaman.

²¹ Din bēn badēēd ree xtiidx Dios loj ree bejn, ad guneet reeman xtiidxaman zi'c goczi xixgab reeman, guneet reeman ni basajb xSprijt Dios güjct reeman.

2

*Bēn rulüü ree diidx rusquiee
(Judas 4-13)*

¹ Zian zi'c guyu ree bèn rusquiee loj ree bèn Israel tiamp gulal rëb reeman rudëed reeman xtiidx Dios loj ree bejn, ziangajc chu' ree bèn rusquiee guliü lëjt ni rusquiee ree, yaguiil reeman mod din guliü reeman lëjt ni ad najt diidxli par gagdxadi. Ad zatiëjbt reeman nabee Jesucrist laa reeman, majsi baguijxaman xtol reeman, zeel ad zagliaat gunijt Dios laa reeman.

² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios.

³ Abi' guial rzëëbladx reeman milia, yaguiil reeman xhie ni rusquiee guliü reeman lëjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diidx gocli mal yu' casti ni yalay ree bèn rüjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xgualguxtisaman.

⁵ Ad been tëëtaman perdon benmal guyu ree tiamp gulal, banijtaman laa reeman con nijs. Tijbzi Noë bèn balüü xhienaag chinal ree bejn xnejz Dios, laazaman naj bèn gulaa con zagajdx ree bejn.

⁶ Ziangajc chi been xgualguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi' laan naj ejempl par ree bèn guiban nadxuudx zi'c ree bèn guiedx zii ree.

⁷ Per baslaa Dios bèn brii laj Lot, bèn guban zi'c rën Dios guyu tëëman xgab guial baguiaaman zi'c guban ree benmal guin.

⁸ Abi' guial gubajnman zagdx, zeel guixie guixie guyunaya da'taman por ree nidxuudx biguiejnman baguiaa tëëman been ree bèn guin.

⁹ Rajc rüjn Dios yudar bèn ruzoob ree xtiidxaman xhietëez loj prueb cadëd reeman, abi' ma naj xhie güünnëman benmal ree dxej güün xgualguxtisaman.

¹⁰ Laan naj ni yalay ree bèn naban zi'ctzi rën reeman, ad rënt reeman nabee Jesucrist laa reeman, dád nad reeman, ad ratut reeman, ad rdxeb tëët reeman rnieeguijdx reeman bèn naj ree xianjl Dios.

¹¹ Abi' ni'qui ree xianjl Dios, majsi rajp reeman mazri gojl në gualrniabee, per achet diidxguijdx rëb reeman lojman contr laa reeman.

¹² Lasa' ree bèn guin naban reeman zi'c ree be, ad yu't xquiarguejn reeman abi' rnieeguijdx reeman ni ad rignia't reeman, guidiblagaa rüjn reeman ni rëntzi reeman sin xgab. Zi'c ree be zëedzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rüjn reeman ma cusëëb laagajc reeman,

¹³ abi' yaguijx reeman gra ni rüjnnë reeman bejn ree.

Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbzi, abi' rabaa da't reeman guial rusquiee reeman lëjt.

¹⁴ Ad zajct guguaa reeman tijb bëgunaa sin guial ad züjnt reeman xgabdxuudx, ad rucwëëzt rüjn reeman dol rusquiee tëë reeman bèn ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzëëbladx reeman, laa reeman ma naj par yalay reeman xcasti Dios.

¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bèn badëed xtiidx Dios loj ree bejn, xi'n bèn brii laj Beor, chi guyënman nüjnman gan milia por ni mal nüjnman.

¹⁶ Per chi zëman ziguienman ni mal guin, bacwëëz Dios laaman, basneeman xburaman zi'c tijb bejn, zian bacwëëz Dios xixgabtontaman.

¹⁷ Yan bèn rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman.

¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bèn qui cusa'nri ree nejzmal.

¹⁹ Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëëz rüjn ree bejn, laan naj ni rniabee laa reeman.

²⁰ Chi ma beenbee ree bejn dux Dad ree Jesucrist guial laaman naj bèn babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtiëjb reeman rniabee laa reeman stjib, dxel piorli guiban reeman guial chi gad reeman güünbee laaman.

²¹ Zagdxeli naj ad nüjnbeet reeman xnejzaman, guial beenbee reeman laan abi' basa'n reeman xtiidxza'caman ni ma biguejn reeman.

²² Con laa reeman rajc cumplid diidx ni rëb: "Rayaw bë'cw ni bayëbib, guiáad cüch qui gojzri con nijs naya rayub loj nizbajn."

3

Ni gac chi gui't Jesucrist stijb

¹ Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal.

² Gol basaaladx ni rëb ree bën badëöd xtiidx Dios loj ree bejn tiamp gulal, gol basaaladx tää xtiidx dux Dad ree Jesucrist, bën babëë dunuj ree loj dol, xtiidxaman ni balüü ree apóstoles lëjt.

³ Gol badxe'guijc, chi ma zidyob nit guidxliuj, chu' ree bën guze' lëjt abi' guiban reeman zi'ctzi rën reeman.

⁴ Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj.”

⁵ Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs.

⁶ Gojc xchej, dxel con nijs gajc banijt Dios bën gocli ree.

⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bën ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanlaxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb béngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios.

¹² Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii.

¹³ Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tää lasa'di.

¹⁵ Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios lojman.

¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bën ad rajctczi ree në ree bën ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëed ree loj xtiidx Dios, zeel laagajc reeman cusëëb laa reeman.

¹⁷ Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bën rën ree gusquiee lëjt gan, chitëë gucwëëz sudxi'chidi loj xnejz Dios.

¹⁸ Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tää naguiejn gagbeedi mazri guial rën da'taman dunuj ree. Laaman rayal respejt gra tiampczi.

Gui'ch yaløj bacaa San Juan

Jesucrist runee guialnaban tiblyaa

¹ Gui'ch guie naj par gugojan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxë, ma baquì' tēen laaman con quijb du yaan. Laaman naj bën runee guialnaban,

² ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblyaa, najman bën guzuné Dios diizd gocli bi't tēeman loj guidxliuj.

³ Zeel ragojan lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist.

⁴ Ragojan lëjt nine ree loj gui'ch guie din chu' luxdoodi zagdxë, zi'c yu' du luxdoon zagdxë.

Royal yanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragojan lëjt guial naj Dios biani, achetcki dol nabannëman.

⁶ Bal yaguie'ch ree nadxu'në' reeman abi' zunaal gajc ree nejz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejn xi'nman Jesucrist chiquied gra dux tol ree.

⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli.

⁹ Per bal yaxhoobdol ree loj Dios, rayagbee ree zagdxë guial güünman ni naman, güünman perdon dux tol ree, chiquied tēeman gra ni mal yu' du luxdoo ree.

¹⁰ Per bal yaguie'ch ree ad waguieent ree dol, raguieen reeman zi'c bénrusquiee, ad raliduladx tēet ree xtiidxaman.

2

Bén rën Dios rayal guzoobaman xtiidxaman

¹ Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntcki dol.

² Por xguialgütaman naj dux tol ree perdon, abi' ad dux toltzi ree, nē gra xtol ree bēnguidxliuj.

³ Bal razoob ree xtiidx Dios, zian raya'p ree segur guial ma naguieenbee reeman zagdxë.

⁴ Per bal chu rëb: "Nünbeen Dios", abi' ad ruzoobtaman xtiidxaman, rusquieeman, dïn ad walit ni rëbaman.

⁵ Per bēnrzoob xtiidxaman, diidxli rënman laaman con guidib luxdooan, zian rayagbee ree guial ma nabajnnë' reeman.

⁶ Bén rëb nabannëman Dios, rayal guibanman zi'c guban Jesucrist.

Bén zinal ree xnejz Dios rën lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan.

⁸ Per canin laa reen zi'c rulüü diidx cüb reen, dïn por Jesucrist nē por lëjt ma rguien guial ma cusa'ndi ni mal abi' zinalidi ni zagdxë.

⁹ Bal chu rëb zinal xnejz Dios abi' ralen lasa'man, sta zinalaman nejz mal.

¹⁰ Bén rën lasa' zinalaman xnejz Dios, abi' ma naj nawëeg guial güün dol laaman gan.

¹¹ Per bën ralen lasa', nabanman loj nejz mal, ad ragbeetaman ban cheman, dïn nejz mal guin basa'n laaman zi'c tijb bēnluatia'p.

¹² Xi'n, rucan gui'ch guie par lëjt, dïn ma gojc xtolidi perdon por xguialrniabee Jesucrist.

¹³ Cucan nine ree par lëjt guial najdi bën ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bën ma rignia' ta'n chunin naj Jesucrist dïn ma beendi gan ad züjntidi ni zēed loj xindxab, cuca tēen nine ree par lëjt bën qui guzulojri ree cayignia' chunin naj Jesucrist dïn ma nünbeedi dux Dad ree Dios.

¹⁴ Bacan nine ree par lëjt guial ma rignia'di mazri chunin naj Jesucrist bën ma yu' gocli diizd chi gad guidxliuj gacchaaw, bacca tēen nine ree par lëjt guial ma rignia'di ta'n chunin naj Jesucrist, dïn za'dxi'chidi zinal tēedi diidxli xnejz Dios con guidib luxdoodi, ma been tēedi gan ad züjntidi ni zēed loj xindxab.

¹⁵ Ad sēēbladixidi ni ad najt zagdxë ni rüjn ree bejn loj guidxliuj, bal chu rën mazri ni riga' loj guidxliuj guie, ad rëntaman dux Dad ree Dios,

¹⁶ din acheteci ni mal yu' loj guidxliuj guie zëed loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzëëbladx reeman gap reeman gra ni ruguiaa reeman, rüjn tëë reeman benro' por gra ni rajp reeman.

¹⁷ Per guidxliuj guie yu' dxej nitan con guidib ni mal yu' lojn, per bën naban zi'c rën Dios rajpaman gualnaban tiblyaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguejndi gual rayal gui't tijb bën su contr Jesucrist guiëb tëëman laaman naj Jesucrist. Yan zien ree bën ralen laaman ma balüüloj, zeel rayagbee ree gual ma zidyob dxej nit guidxliuj.

¹⁹ Bën ralen ree Jesucrist, duloj gajc ree brii reeman nayajc ree bën riladax Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree gual raliladax ree Jesucrist, per gojc nine din guiguien gual ad grat reeman naj dux bejn ree.

²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli.

²¹ Cucan nine par lëjt, ad gual ad ragbeetidi conin naj ni diidxli, cucanan gual ma ragbeedan, abi' lëjt ragbee gual ni'qui tijb ni rusquiee ad zajct gui't loj ni diidxli guin.

²² Yan, zchu naj bën rusquiee? Bën rusquiee naj bën rëb gual ad Jesüst naj bën guxhaal Dios loj guidxliuj. Bën rëb zian naj zi'cgajc naj bën za' contr Jesucrist gual ad riladxtaman Dios ni'qui xi'nman Jesucrist.

²³ Din chutëez bën rëb gual ad najt Jesucrist Xi'n Dios, laaman ad nünbeet dux Dad ree Dios, per bën rëb Jesucrist naj Xi'n Dios në dux Dad ree Dios nünbeeman.

²⁴ Zeel gol binal diidx ma biguejndi diidz guida'xchej chi bililadxidi Jesucrist. Bal chinalidi diidz guin ree, dxel ziz nabannëquidi dux Dad ree Dios con xi'nman Jesucrist.

²⁵ Abi' ni ma rëb Jesucrist guneeman naj gualnaban tiblyaa.

²⁶ Cucan diidx guie ree par lëjt por ree bën rën gusquiee lëjt.

²⁷ Per nabannëdi xSprijt Dios, bën banee Jesucrist, ad riaadxtidi bën gulüü lëjt, din Sprijt guin gajc rulüü lëjt gra, abi' ganax diidxli ad ni rusquiee, zeel gol gubajzn zi'c rniabeeman din gusnuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitëë yadxeb ree chi gulüülojman, ad zaya'nxtu tëët ree lojman chi gui'taman.

²⁹ Lëjt ragbee gual rüjn Dios zi'c rayal, ragbee tëëdi gual graczi ree bën rüjn zi'c rayal, laa reeman naj xi'n Dios.

3

Bën naj ree xi'n Dios

¹ Gol been xgab, plact rën dux Dad ree Dios dunuj ree, zeel balëë dulaj ree xi'n Dios, abi' waliczan nayajc ree xi'nman. Per bën ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman.

² Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur gual yayajc ree zi'c najman, din xt nadxel yaguaiaa ree diidxliczi xhienaag najman.

³ Graczi ree bën riladax gual gac zian, rüjn reeman naguiejn guiban reeman naya delant loj Dios zi'c laaman, gual achet xtolaman.

⁴ Per graczi ree bën ad zinalt ni rniabee Dios, cayüjn reeman dol, din dol naj gual ad rüjnt reeman ni rniabeeman.

⁵ Lëjt ragbee gual bi't Jesucrist loj guidxliuj din chiquiedaman xtol ree bejn, abi' laaman ad guyutcti dxej ad yu' tëët dxej nünman dol.

⁶ Zeel bën naj ree tijbzi con laaman rüjn reeman naguiejn ad rüjnt reeman dol, per graczi bën rüjn dol zianczi ad wayignia't reeman chu najman, ad wayünbee tëët reeman laaman.

⁷ Xi'n, ganin lëjt, ad bal tiëbidi chu gusquiee lëjt, din bën cayüjn ni rën Dios, laaman naya delant lojman zi'c naya Jesucrist delant lojman.

⁸ Per bën yu' loj dol xbejn xindxaban, din xindxab rüjn dol diidz yaloy, abi' Jesús Xi'n Dios bi'taman loj guidxliuj par zianczi din güünman gan loj xgualrniabee xindxab.

⁹ Zeel ni'qui tijb ree bën ma zinal xnejz Dios ad rusnuutri rüjn dol, din ma nabannëman Dios, ad rayal tëëtri güünman dol din ma najman xi'nman.

¹⁰ Laa rguien gajc chu reenin naj xi'n Dios chutëë reenin naj xi'n xindxab, din chutëez ad rüjnt ni rën Dios ad rën tëët lasa'man, dxel ad najtaman xi'n Dios.

Rayal yayën du lasa' ree

¹¹ Abi' lëjt ma biguejndi xtiidx Dios diidz guida'xchej gual rayal yayën dulasa' ree.

¹² Ad rayalt yagueen ree zi'c been Caïn, cwëjbaman gunabee xindxab laaman, zeel bagüjt bijchaman. Caïn been zian, din beenman ganax ni mal, guiáad bijchaman been ni zagdxe.

¹³ Zeel gradi compniar raliduladx ree Jesucrist, ad gagdxadi bal yalen ree bénguidxliuj lëjt guial ma zinalidi xnejz Dios.

¹⁴ Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayèn du lasa' ree. Per Bén ad rënt lasa', sta najman zi'c bengüt par Dios.

¹⁵ Graczi Bén ralen lasa' najman zi'c Bén rugüjt bejn, abi' lëjt ragbee, tijb Bén rugüjt bejn ad rajptaman guialnaban tiblayaa delant loj Dios.

¹⁶ Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayèn dulasa' ree xt yayëjt ree por laa reeman.

¹⁷ Per bal chu tijb dunuj ree ad riaadxt xhienin loj guidxliuj guie abi' ruguiaaman tijb Bén cayaadx laan abi' ad rüjtaman laaman yudar, dxel, ¿xhienaag guiëbaman guial rënman Dios?

¹⁸ Xi'n, ganin lëjt, ad con diidxtizi yaguie'ch ree guial rayèn dulasa' ree, rayal guiguien guial rayèn dulasa' ree por ni raguieen ree.

Raya'p ree segur guial za' në Dios dunuj ree

¹⁹ Zian rayagbee ree cayzooB ree xtiidx Dios, abi' raya'p ree segur guial cayguieen ree ni rayal yaguieen ree delant lojman.

²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri henro' guial duloj ree, abi' laaman ragbee gra.

²¹ Zeel zi'c rënan lëjt rnin lojdi, bal ragbee du luxdoo ree guial cayguieen ree ni zagdx, dxel raya'p ree segur guial cayguieen ree ni zagdx delant loj Dios.

²² Laaman gunee graczi ni yanaab ree lojman guial razzoob ree xtiidxaman ni rniabeeman, abi' raguieen ree naguiejn raguieen ree ni ruladxaman.

²³ Ni ne naj ni rniabeeman yaguieen ree guial validuladx ree Jesucrist naj xi'nman yayèn tëë dulasa' ree zi'c gunabeeman dunuj ree.

²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tëë ree guial za'man con dunuj ree por xSprijtaman Bén baneeman duloj ree.

4

Bén ad rliadx Jesucrist ad yu't xSprijt Dios luxdoo man

¹ Gradi compniar raliduladx ree Jesucrist, rënan lëjt, rni tëen lojdi: ad rliadxidi chutëez Bén rëb rnieeman xtiidx Dios. Yaløj xgaj gol gogbee zagdx bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree Bén rusquiee, rëb reeman rniee reeman xtiidxaman.

² Yan din gagbeedi chu reenin rniee xtiidx Dios: Laa reeman naj Bén rliadx guial Jesucrist bi't zi'c bénguidxliuj. Bén rliadx ree zian yu' xSprijt Dios luxdoo reeman.

³ Per Bén ad rliadx ree zian ad yu't xSprijtaman luxdoo reeman, laa reeman naj Bén ralen Jesucrist. Ma biguiejndi guial rayal gui't tijb Bén su contr laaman. Abi' diidz yan ma za' sprijt guin guidxliuj, zeel zien ree Bén ralen Jesucrist ma yu' loj guidxliuj guie.

⁴ Per lëjt xi'n ma najdi xi'n Dios, guiáad ree Bén ralen Jesucrist ad zajct güün reeman lëjt gan, din mazri narooB guialrniabee ca' Bén nabannë lëjt guial loj Bén nabannë Bén zinal ree nejz mal loj guidxliuj guie.

⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree Bén ad rliadx Jesucrist rüjncwent reeman ni rëb reeman.

⁶ Per dunuj ree ma nayajc ree xbejn Dios, abi' Bén ma nünbee ree Dios rucaagdiajg reeman ni ranee ree, guiáad ree Bén ad nünbeet Dios ni'quid rüjncwentt reeman ni ranee ree, zian rayagbee ree chu nabannë xSprijt Dios Bén rulüü dunuj ree diidxli chutëënin nabannë sprijt ni rulüü ganax ni rusquiee.

Rën Dios dunuj ree

⁷ Rënan lëjt, rnin lojdi rayal yayèn dulasa' ree, din gualrën lasa' zëed loj Dios. Gra Bén rën lasa' naj xi'n Dios nünbee tëë reeman laaman.

⁸ Abi' Bén ad rënt lasa' ad wayünbeetaman Dios, din gualrën lasa' zëed loj Dios.

⁹ Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman.

¹⁰ Rën Dios dunuj ree. Ad dunujt ree bayèn laaman, yaløj laaman guyèn dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree.

¹¹ Rënan lëjt, zeel rnin lojdi, zi'c rën Dios dunuj ree, ziangajc rayal yayèn dulasa' ree.

¹² Majsi achut waguiaa laaman, per bal rayèn dulasa' ree, nabannë'qui ree Dios, abi' diidxli rayèn reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma baneë xSprijtaman duloj ree.

¹⁴ Abi' dunuj gajcan baguiaa ragojn tēen guial guxhaal Xi'n Dios loj guidxliuj guie persi gūjtaman por xtol gra ree bejn.

¹⁵ Chutēez rēb guial Jesucrist naj Xi'n Dios nabannēman Dios, abi' Dios nabannē laaman.

¹⁶ Dunuj ree rayagbee raliadx tēē ree guial rēn Dios dunuj ree. Por laaman zēēd guial rayēn dulasa' ree. Abi' bēn rēn lasa' nabannēman Dios, guiaad Dios nabannē laaman.

¹⁷ Bal wali rayēn ree Dios zi'c rēnman, ad najtan ni yadxeb ree dxej gūūn xguialguxti-saman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannē' reeman loj guidxliuj guie.

¹⁸ Bēn rēn Dios, ad rdxebtaman, din bēn rēn laaman diidxli, ad rdxebtraman, per bēn ad rēnt laaman rdxebaman, din rūjnman xgab casti ni yayalaman, zeel bal chu rdxeb, ad walitaman rēnman laaman.

¹⁹ Dunuj ree rayēn Dios, din yaløj laaman guyēn dunuj ree.

²⁰ Bal yu' bēn rēb: "Rēnan Dios", abi' ralen lasa'man, rusquieeman. Din bal id rēn lasa'man ben ruguiaaman, ŷhienaag guiēnman Dios bēn ad waguiaataman?

²¹ Laagajcaman na: Bēn rēn Dios rayal guiēn lasa'man.

5

Guial raliaduladx ree Jesucrist zeel raguieen ree gan loj ni mal

¹ Gra ree bēn rliadx guial Jesús naj bēn guxhaal Dios, laa reeman naj xi'nman. Bal chu rēn dux Dad ree Dios, nē gra ree xi'nman rēnman.

² Chi rayēn ree Dios raguieen tēē ree ni rniabeeman, dxel rayagbee ree guial rayēn ree gra ree xi'nman.

³ Guial guiēn bejn Dios naj guial gūūnman ni rniabeeman. Abi' ad nawēēgt naj guial gūūnman ni rniabeeman,

⁴ din gra bēn naj xi'nman ma rūjn gan loj ree ni mal yu' loj guidxliuj guie. Abi' guial raliaduladx ree, zeel ma raguieen ree gan loj ree ni mal guin.

⁵ Bēn rliadx guial Jesús naj Xi'n Dios, tijbzi laaman zajc gūūn gan loj ree ni mal yu' loj guidxliuj.

Ni ruliū Dios dunuj ree xcwent Jesucrist

⁶ Jesucrist bi't loj guidxliuj, gurobnijsaman guxhie' tēē xrejnman loj crūz. Ad gurobni-jstzaman, nē guxhie' xrejnman. XSprijt Dios naj testiw, laaman rū diidxli xcwent ree nine.

⁷ Choon testiw yu' xanyabaa: xDadaman Dios, Jesucrist nē xSprijt Dios, guiyon reeman naj tijbzi Dios.

⁸ Yu' tēē choon testiw loj guidxliuj: XSprijt Dios, nē guial gurobnijs Jesucrist con ni guxhie' xrejnman loj crūz, guiyon reen rū diidx tijbzi.

⁹ Bal raliaduladx ree ni na ree bejn, mazri rayal yaliaduladx ree ni na Dios xcwent xi'nman Jesucrist, din xtiidxaman mazri lasajcan.

¹⁰ Bēn rliadx Xi'n Dios, laaman rliadx ni rēb Dios xcwentaman. Per bēn ad rliadxt laaman, rūjnman Dios zi'c bēn rusquiee, din ad rliadxtaman ni rēbaman xcwent Xi'nman.

¹¹ Abi' ni rēbaman naj guial ma baneeman guialnaban tiblyayaa duloj ree, guialnaban guin zēēd por xi'nman.

¹² Bēn za'nē Xi'n Dios tijbzi, laaman naban tiblyayaa delant loj Dios, per bēn ad za'nēt laaman tijbzi, laaman ad ca't guialnaban guin.

Ni bigra ca loj gui'ch guie

¹³ Cuccan nine ree par lējt najdi bēn rliadx Jesucrist Xi'n Dios din gagbeedi guial ma ca'di guialnaban tiblyayaa delant loj Dios.

¹⁴ Rayagbee ree zagdxe: chi yanaab ree xhienin lojman, rūjncwentaman dunuj ree, bal yanaab ree zi'c rēnman.

¹⁵ Bal rayagbee ree rūjncwentaman dunuj ree chi ranaab ree xhienin, ziangajc rayagbee ree zagdxe guial guneeman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudēē Dios guialnaban tiblyayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bēn rūjn dol guin.

¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bēn ma naj ree xi'n Dios ad rusnuutri rūjn reeman dol, din Jesucrist Xi'n Dios naj bēn rniay laa reeman, abi' xindxab ad zajctri nabeex laa reeman.

¹⁹ Rayagbee ree guial nayajc ree xbejn Dios, per ree bēnguidxliuj, bēn ad najt ree xbejn Dios, xindxab rniabee laa reeman.

²⁰ Rayagbee tēē ree guial Jesucrist Xi'n Dios ma bi'taman loj guidxliuj guie, guxhalaman dux quiargueijn ree, persi baguieenbee ree bēn naj quijb Dios. Yan nadxu'nē' reeman tijbzi por Xi'nman Jesucrist. Tijbzi laaman naj Dios, por laa tēēman yu' guialnaban tiblyaaa.

²¹ Xi'n, gol gojp cudad chitēē chinalidi ni naladx ree bejn naj Dios.

Gui'ch barojp bacaa San Juan

Rxhial Waj xtiidx Dios loj ree bejn

¹ Naj, bèn rniabee loj ree bèn rlliladx Jesucrist, rxhialan gui'ch guie lojdi najdi bèn gulej Dios rlliladx tëëdi Jesucrist, diidxli rënan lëjt, abi' ad tijbtizi naj, nè gra ree bèn zinal xtiidx Dios.

² Rënan lëjt guial ma nabannë' ree xtiidx Dios abi' laan nabannë dunuj ree zianczi.

³ Dux Dad ree Dios con Xi'nman Jesucrist güünle' lëjt, yaya reeman lëjt, yabe'cdxe tëë reeman luxdoodi guial zinalidi xtiidxaman rën tëë lasa'di.

Rniabee Dios yayën du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tëë reeman zi'c rniabee dux Dad ree Dios.

⁵ Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübtan, diidx ni bacaagdiajg gajquidi diizd guia'xchejn.

⁶ Guial rën Dios naj guial guiban bejn zi'c rniabee Dios, abi' ni rniabeeman ni bacaagdi-ajguidi diizd guia'xchej naj guial rayal guiban bejn, guiën lasa'man.

Bén rusquiee ree bejn

⁷ Rnin zian, din gra ladczi guidxliuj ziza zien ree bèn rusquiee ree bejn, guial ad rlliladxt reeman bi't Jesucrist loj guidxliuj zi'c bejn, bèn rüjn zian rusquieeman abi' za'man contr Jesucrist.

⁸ Gol gojp cudad chitëë gusëëbidi ni rayalidi por ni cayüjndi, din tia'di gra ni rayalidi delant loj Dios.

⁹ Chutëëz bèn racaa gui'c balüü Jesucrist bejn ree ad nabannëtaman Dios, per bèn zinal xtiidx Jesucrist zi'c balüüman bejn ree, laaman nabannë Dios con Xi'nman.

¹⁰ Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tëëdi ni rnieeman.

¹¹ Din bèn rüjncwent xtiidxaman, rën guiëban guial ma za'man conform con ni rusquiee bèn guin.

Diidx bigra ca ree loj gui'ch guie

¹² Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganen lëjt din ganenë' quijb naj lëjt din chu' du luxdoo ree zagdxe tijbzi.

¹³ Bën naj ree bèn ma gulej Dios, dux compniar raliduladx ree Jesucrist bèn zojb ree niz guie, rugajpdioz reeman lëjt.

Gui'ch bayon bacaa San Juan

Rugajpdioz Waj Gayo

¹ Naj, bën rniabee loj ree bën rliladx Jesucrist, rxhialan gui'ch guie par lüj Gayo najl da miwan diidxli rënan lüj.

² Zi'c rënan lüj rniabaan loj Dios zi'c zël zagdxe loj xnejzaman ziangajc grii zagdxe gra ni cayüjnl gunee tēēman lüj guialnadaan.

³ Dád nix guyu luxdon chi guna garol dux compniar ree guial diidxli nabanl zi'c rëb loj xtiidx Dios.

⁴ Achet mazri ni rgu' luxdon zagdxe zi'c chi riguejnan guial diidxli naban ree da compniaran zi'c rëb loj xtiidx Dios.

⁵ Zi'c rënan lüj Gayo, rnin lojl guial zagdxe da't naj ni cayüjnl con dux compniar ree bën rliladx Jesucrist abi' mazczi zagdxe naj ni rüjnl con ree bën zēēd lood ren.

⁶ Din laa reeman na delant loj gra ree bën rliladx Jesucrist, bën rado'pnë' reen guie, guial gunajchi'l laa reeman, zeel zagdxe güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman.

⁷ Din brii reeman zigtie'ch reeman xtiidx Jesucrist abi' ad rtiëjbt reeman tia' reeman ni rudëē ree bën ad rliladxt laaman.

⁸ Zeel dunuj ree bën raliduladx ree Jesucrist, rayal yaguieen ree yudar bën catie'ch ree xtiidxaman, zian yaguieen ree yudar guire'ch ni naj diidxli.

Ad ruzoobt Diótrefes diidx

⁹ Ma guxhalan tijb gui'ch loj ree dux compniar ree bën rliladx ree Jesucrist, per Diótrefes guial ruladxaman nabeeman ad rüjncwenttaman dux tiidxan.

¹⁰ Zeel bal guidganan lëjt dxel ganenë'n laaman xcwent guial rnieeguijdxaman rniee tēēman diidx rusquiee contr dunujn abi' ad tijbtzi laan rüjnman nē ad rudëēt lidxaman yaya'n dux bejn ree bën zēēd ree lood ren, ad rtiëjbt tēētaman gudëēd lidx ree ben ren yaya'n reeman, abi' ree bën rudëēd lidx ad rtiëjbtaman chu' reeman lën yadoo.

¹¹ Zi'c rënan lüj Gayo rnin lojl ad chinalil nejz mal, been ni naj ni zagdxe din bën rüjn ni zagdxe laaman naj xbejn Dios per bën zinal ni mal ad nünbeetaman Dios.

¹² Graczi reeman ruza't Demetrio zagdxe guial binalaman zi'c rayal, laa nen gajc xhienaag nabanman xt dunujn raza't laaman zagdxe abi' lüj ragbee guial diidxli naj ni raguie'chan.

Diidx bigra ca ree loj gui'ch guie

¹³ Zien ni rënan ganin lojl per ad rëntan gucanan loj gui'ch,

¹⁴ din wed ad zaglaat guialan guidganan lüj, dxel ganenë' quijb naj lüj.

¹⁵ Yabe'cdxe Dios luxdool, dux miw ree bën riga' ree guie rugajpdioz lüj, bagajpdioz tēē dux miw ree.

Gui'ch bacaa San Judas

Rugajpdioz Judas b n naj ree b n gule Dios

¹ Naj, Judas b jch Santiaaw, cay nan sirv Jesucrist, cugan gui'ch guie par l jt najdi b n ma gulej dux Dad ree Dios guial r nman l jt, abi' dux Dad ree Jesucrist canaj l jt.

² Gusnuu yaya Dios l jt, yabe'cdxeman luxdoodi gui n t edi laaman.

B n ad rnieet ree diidxli

(2Pe. 2:1-17)

³ Gradi compniar raliduladx ree Jesucrist, r nan l jt, diidz gocli guy nan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej r jn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloy, guial nayajc ree xbejn Jesucrist.

⁴ Din yu' ree b n r jn b n rililadx naabzi par go'ch reeman lojdi. B n guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi r n reeman. Ad rti jbt reeman nabee Jesucrist laa reeman, laaman naj tijbzi dux Dad ree b n rniabee dunuy ree.

⁵ Majsi ma ragbeedi ni ganin l jt, per ganinan din gusaaladxidi guial majsi bab e Dios b n Israel ree Egipto, per despuets banijtaman b n ad bililadx ree laaman.

⁶ N  ree anjl ad bazoobt xtiidz Dios niniabee reeman lod bad eman loj reeman, basiaawaman laa reeman lod nacay da't x dxej g un xguialguxtisaman.

⁷ N t e ree b n Sodoma con ree b n Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guy n reeman, zeel basagzi Dios laa reeman, banijtaman baze'c t eman laa reeman, laan naj ni rayal yaguaiaa ree chit e yaguieen ree zian.

⁸ Per ni'ctzi zian, yan ziangajc r jn ree b n raguuil mod par go'chzi reeman lojdi, r jn reeman xgab guial zajc g un reeman zi'ctzi r n reeman, ruxhiin laagajc reeman, ad rti jbt t et reeman nabee Jesucrist laa reeman, rnieeguijdx t e reeman b n naj ree xianjl Dios.

⁹ Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin ni jbaman diidxguijdx loj xindxab guin, tijbzi ni r baman naj: "Ladxa Dios gusa'nan l j."

¹⁰ Abi' yan b n raguuil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx r jn reeman, ad r jnt reeman laan xgab, contzi r jn reeman laan zi'c ree be guial ad r jnt reeb xgab. Zian cus eb laagajc reeman delant loj Dios.

¹¹ jProb laa reeman!, guial zinal reeman ni mal zi'c been Cain, mazri zinal reeman milia zi'c been Balaam, gui t t e reeman zi'c g t Cor  chi guy nman niniabeeman luar Moisejs.

¹² Laagajc reeman ruxhiin lanij r jndi chi rado'pidi din gawidi tijbzi, guidiblagaa ad ratut reeman raw reeman ad r jn t et reeman xgab por ree bejn, r jnz reeman xgab par cha l n reeman. Naj reeman zi'c zaj ni ad n t guia ni rin  bi, zi'c ree yag rbidx abi' ria'xh reen guial ad rtiat reen.

¹³ Naj reeman zi'c xt jpp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu r jn reeman nidxuudx ree, naj t e reeman zi'c ree bajl xanyabaa ni bas eb xnejz, dxel tiblayaa ma rayal reeman lod nacay da't.

¹⁴ Abi' b n brii laj Enoc, laaman gojc gajdx loj ree xdiaa Ad n, guneeman xcwent ree b n guin chi r baman: "Naj baguiaa dux Dad Dios zidn  zien da't ree xianjlaman

¹⁵ zidgaguieen xguialguxtisaman con gra ree bejn, din gui baman xhie casti rayal ree benmal por gra ni mal been reeman n  por diidxguijdx ni gune reeman laaman guial naj reeman b ndol."

¹⁶ Lasa' ree b n guin achetctzi ruladx reeman, abi' graczi rnieeguijdx reeman. Zianctzi r jn reeman zi'ctzi r n reeman, abi' zianctzi ruza't laagajc reeman zagdx ree ruza't t e reeman bejn ree zagdx ree cwentzi g un ree b n guin ni r n reeman.

Mod rayal guiban ree xbejn Dios

¹⁷ Per l jt compniar raliduladx ree Jesucrist, r n da'tan l jt, gol basaaladx guial b n goc ree xi ap stoles Dad Jesucrist

¹⁸ r b reeman: "Chi ma zidyob nit guidxliuj, chu' ree b n guze' gra ni z ed loj Dios g un t e reeman zi'ctzi naj xixgabdxuudx reeman."

¹⁹ Lasa' ree b n guin naj b n rlia' lasa' ree b n ma zinal xnejz Dios, abi' naban reeman zi'ctzi r n reeman, ad yu't xSprijt Dios luxdoo reeman.

²⁰ Per l jt compniar raliduladx ree Jesucrist, gol guzudxi'ch loj ni rililadxidi, din guialrliladx guin z ed loj Dios. Gol gurejdx gunab Dios con xyudar xSprijtaman.

²¹ Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblayaa duloj ree guial rayaman dunuj ree.

²² Gol been yudar bën sta yu' nawëëg ree luxdoo.

²³ Gol been yudar bën zë ree loj nejmäl, zi'c rüjn tijb bën rüjn yudar bën cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëë yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxe sin dol chi guidxindi xanyabaa lod za'man.

²⁵ Laaman naj tijbzi Dios bën babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayüjn laaman sirv.

² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhaal San Juan gui'ch loj guigajdx ree yadoo

⁴ Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tēē reeman luxdoodi.

⁵ Jesucrist been gra ni naj güünman, laa tēēman goc bën yaloj baban loj ree bengüt abi' laaman rniabee gra ree bën rniabee loj guidxliuj. Laaman rēn dunuj ree abi' con xrejnman basiaman dux tol ree

⁶ abi' beenman dunuj ree zi'c bën rniabee, been tēēman dunuj ree bixhioz rünj sirv xDadaman Dios. Zeel Jesucrist rayalaman respejt në gualrniabee zianczi. Amén.

⁷ ¡Gol gogbee gual gui'taman loj zaj! Gra ree bejn guguaa laaman xt ree bën ni guliiz lans cwē'lēnman, abi' gra ree bēnguidxliuj goon da't chi guguaa reeman laaman. Laan naj diidxli. Zian gac.

⁸ Dux Dad ree Dios bën rajp gra gualrniabee. Laaman gui't, laaman naj Dios diidz guia'xchej, në yan, laaman rēb por laagajcaman: "Naj naj zi'c lejtr A con Z, lejtr ni rzuloj në ni rlioxnē alfabeto, naj ca' gra gualrniabee."

Baguiaa San Juan xgualrniabee Cristo

⁹ Naj Waj tijb ree lasa'di bën rliladx Jesucrist. Tijbzi nadxu' ree loj xgualrniabeeman, tijbzi cayzaagdiaj ree abi' caydaan ree por laaman. Naj guyu'n ladxguib loj yuj riga' loj nijsdoo lod la Patmos gual rtiēchan xtiidx Dios në gra ree ni ragbeen xcwent Jesucrist.

¹⁰ Chi yu'n ladxguib loj yuj riga' loj nijsdoo guin, guyu tijb dumingw chi guza'can zi'c bën rnie'xhchaal por xgualrniabee xSprijt Dios, abi' xichan biguejnan zi'c cha' trompejt abi' biguien rejs da't cha' tijb

¹¹ bën ni rēb:

—Naj naj zi'c lejtr A con Z, lejtr ni rzuloj në ni rlioxnē alfabeto, din tijbzi naj naj bën rniabee. Bacaa loj gui'ch gra ni cuguiaal dxel guixhiaalil gui'ch guin loj guigajdx cwaa ree da bejnman bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

¹² Dxel chi badxi' lon par guguan chunin rnieenē naj dxel baguian gajdx ree candeler or.

¹³ Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooan.

¹⁴ Naquichbēj guijcaman zi'c naj guidxlad xiil, zi'c naj guiajnayaag naquich naj guidxguijcaman abi' zi'c bajl re'criani guiaalojman.

¹⁵ Abi' guia'man rdiinan bacha' zi'c guib ni la bronze chi yu'n loj guij, abi' cha'man naj rejs zi'c rünj nijs naquie' chi rguiajtan.

¹⁶ Guiáad yaaman ladbee ca'man gajdx bajl xanyabaa. Abi' ro'man ririi tjib Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

¹⁷ Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bën rniabee diidz guia'xchej abi' par tiblyayaa.

¹⁸ Ma güjtān, per yan ma babanan, abi' ma nabanān tiblyayaa, abi' naj rniabee gualgüjt në gabijl.

¹⁹ Yan bacaā ni ma baguiaal në ni cuguiaal në ni qui gacri.

²⁰ Ni në rēn guiēb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rēn guiēban gajdx ree bën rniabee guigajdx cwaa ree da bejnman niz Asia, abi' guigajdx candeler or guin rēn guiēban guigajdx cwaa ree da bejnman.

2

Diidx par ree bën Éfeso

¹ 'Yan bacaa ni guixhiaalil loj bén rniabee ree da bejnan luguiedx Éfeso. Bacaa: "Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi:

² Naj ragbee xhie cayüjndi. Naj ragbee xhie tarbajw cadèdidi, ragbee tèèn guial ad ralenya'tidi. Naj ragbee guial ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi guial ganax diidx rusquiee rniee reeman.

³ Naj ragbee guial rajpidi pacens abi' ma guzagdiajdi guial rëndi naj sin guial yalenya'di.

⁴ Per yu' ni ad ruladxtan rüjndi: guial ad rëntridi naj zi'c guia'xchej.

⁵ Gol basaaldx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lèjt abi' ad zajctridi biani par los demazri ree bejn, bal id zayüjndi xgab.

⁶ Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman.

⁷ Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios."

Diidx par ree bén Esmirna

⁸ 'Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: "Bén rniabee diidx guia'xchej në par tiblayaa, bén ni güt abi' babanman stijb, laaman na lojdi:

⁹ Naj ragbee xhienaag cadèdidi tarbajw por ni rüjn bejn lèjt, ragbee tèèn loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieegujdx bejn lèjt, bén ni na ree naj reeman bén Israel xbejn Dios majsi laa reeman naj xbejn xindxab.

¹⁰ Ad rdxebtidi guialzi ni tédidi din xindxab güünx gan din cu' ree bejn tio'p choondi ladxguib par guiguen guial diidxli zinalidi xnejz Dios. Chii dxej tédidi guialzi guin ree, per gol guzujdx'i'ch xt dxej guiétidi, abi' naj yazaladx lèjt guialnaban tiblayaa.

¹¹ Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman."

Diidx par ree bén Pérgamo

¹² 'Yan bacaa ni guixhiaalil loj bén rniabee ree da bejnan luguiedx Pérgamo. Bacaa: "Bén ca' espad ni nadoxh grop lad ro', laaman na lojdi:

¹³ Naj ragbee guial luguiedx zojbidi xindxab rniabee ni. Per majsi zian lèjt za'dxi'chidi con naj ad rucwëëzt riladxidi naj ni'qui lën ree dxej ni bagüjt reeman Antipas, tijb ree xcompniaridi bén ad bacwëëzt bililadx naj, bén bagüjt reeman ladxidi lod rniabee xindxab.

¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graloy ree nidxuudx con ree bén ad najt lacheel reeman.

¹⁵ Stijb ni ad ruladxtan naj guial lojdi no'ch ree bén ad rucwëëzt rüjn zi'c rüjn ree bén nicolaítas.

¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririri ro'n.

¹⁷ Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tèèn tijb guiaj naquichdoo lod ca laj cübaman ni achutczri ragbee, tijbzi bén tia' guiaj guin gagbee."

Diidx par ree bén Tiatira

¹⁸ 'Yan bacaa ni guixhiaalil loj bén rniabee ree da bejnan luguiedx Tiatira. Bacaa: "Xi'n Dios, bén re'criani guiaaloy zi'c bajl, bén rdiin bacha' guia' zi'c guuib ni la bronze, laaman na lojdi:

¹⁹ Naj ragbee ni cayüjndi, ragbeen xhienaag rëndi naj, xhienaag riladxidi naj, xhie cayüjndi por naj abi' ad ralenya'tidi. Naj ragbee guial mazri zagdxe cayüjndi yan guial loj guia'xchej,

²⁰ Per yu' ni ad ruladxtan cayüjndi: Rdaandi Jezabel, béngunaa ni na rudëd xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj.

²¹ Ma badën tiamp din yayüjnman xgab, din gusa'n xguialdxuudxaman, per ad rëntaman.

²² Zeel yan gaxhalan gualguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj gualzi ni tëd reeman,

²³ gugüjtan gra ree bén ma been xgab guiban zi'c naban béngunaa guin. Zian gagbee ree da bejnan gual naj ragbee xhie yu' guijs bejn xhie tëë yu' luxdooman, xhie xgab rüjnman. Naj gune lëjt ni rayalidi bal gonin rüjndi.

²⁴ Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt gual na reeman ad ragbeetidi xt ni bigra xcwent xindxab gual ad ridxga'tidi laa reeman, achetri ni ganin lojdi,

²⁵ tijbzi ni rnin lojdi: Gol guzujdx'i'ch loj ni ma ragbeedi xt chi gualan stijb.

²⁶ Bén güün gan loj dol, abi' gusnuu güünman zi'c rënan guidib tiamp ni guibanman, naj gudë gualrniabee lojman din nabeeman loj ree nacion.

²⁷ Nabeeman loj ree nacion guin zi'c tijb bén ni ca' tijb var guiib, zi'czi rlia' bejn tijb guijs zian güünëman bén ni ad rënt ree guzooob diidx. Gudën gualrniabee guin lojman zi'c banees da Dadanan lon,

²⁸ gudë tëën lojman bajl xanyabaa ni rliejn rsildoo.

²⁹ Bén rën ree gucaagdiajg, gol bacaagdiajg ni rëb xSprijt Dios par ree da bejnan."

3

Diidx par ree bén Sardis

¹ Yan bacaa ni guixhiaalil loj bén rniabee ree da bejnan luguiedx Sardis. Bacaa: "Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tëën gual ma güjtidi, majsi par ree bejn nabandi.

² Zeel gol batie'ch xbaaalidi, gol been naguiejn chitëë nit ni sta cayüjndi, din naj ruguian gual ad cayüjntidi xnejz delant loj da Dadan Dios.

³ Gol basaaladx ni ma biguejndi në ni ma basiididi, abi' gol been zian, gol bayüjn xgab zi'c ni cayüjndi. Din bal id zang'ch xbaaalidi zi'c cayüjndi, dxel zi'c ri't tijb béngubaa ziangajc chi gagbeedi ma bi't casti par lëjt.

⁴ Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan.

⁵ Bén güün gan loj dol, chi guidxin hor, zian gacwaman lajd naquich abi' ad zuse'n tëëtan lajman loj xlibr gualnaban. Abi' delant loj Dios në loj ree anjl guien gual laaman naj da bejnan.

⁶ Bén rën ree gucaagdiajg, gol bacaadiajg ni rëb xSprijt Dios par ree da bejnan."

Diidx par ree bén Filadelfia

⁷ Yan bacaa ni guixhiaalil loj bén rniabee ree da bejnan luguiedx Filadelfia. Bacaa: "Bén naya nali, bén naj diidxli, bén rajp gualrniabee loj gra zi'c gojp rey Davi gualrniabee, tijbzi laaman rajp gualrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi:

⁸ Naj ragbee gra ni cayüjndi. Gol gogbee gual majsi ad rajptidi gualrniabee, per naj ma guxhal tijb nejz din gutie'chidi da diidxan sin gual chu gutëë lojdi, din zinalquidi da diidxan abi' ad goct rëbidi gual ad najtidi da bejnan.

⁹ Lëjt guguaa ni günan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tëë reeman xhienaag rënan lëjt.

¹⁰ Abi' zi'c ma bazooobidi diidx gapidi pacens gual chinalidi da diidxan, ziangajc ganan lëjt chi guidxin dxej gui't gualzi loj guidib guidxliuj, zi'c tijb prueb par gra ree bénguidxliuj.

¹¹ Nayob gualan loj guidxliuj stijb. Gol guzujdx'i'ch loj ni ma ragbeedi chitëë tia' ben ren ni rayalidi.

¹² Bén güün gan loj dol, naj gudë lojman tijb luar zojb loj lën yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbman.

¹³ Bén rën ree gucaagdiajg, gol bacaagdiajg ni rëb xSprijt Dios par ree da bejnan."

Diidx par ree bén Laodicea

¹⁴ Yan bacaa ni guixhiaalil loj bén rniabee ree da bejnan luguiedx Laodicea. Bacaa: "Bén ni rüjn cumplid xtüid, bén ni been gra ni rayal güünman, bén naj diidxli, bén rniabeenë Dios diidx gocli chi gad guidxliuj gacchaaw, laaman na lojdi:

¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Bazianclaa tiblayaa niajquidi zi'c nijs nayaag o zi'c nijs laa!

¹⁶ Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëë gajc ro' bejn nijs nayool guin, zian ma rënan gabëladxan lëjt.

¹⁷ Lëjt rëb guial najdi benriwcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëël, achet sirv lëjt, najdi bénlutia'p niz lon guial ad nabantidi xnejz.

¹⁸ Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guiaaloj bejn din guguiaaman zagdx, zian gol been naguiejn din gapidi da guial rignia'n din guguiaadi zagdx.

¹⁹ Rdilnë'n abi' ruzuxnejzan gra ree bén rënan. Zeel gol bagu' luxdoodi gol bayüjn tëë xgab xhienaag nabandi.

²⁰ Gol gogbee guial naj cabedx lëjt, zi'c chi rniee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannë'n laaman abi' laaman nabannëman naj.

²¹ Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman.

²² Bén rën ree gucaagdiajg, gol bacaagdiajg ni na xSprijt Dios par ree da bejnan."

4

Rlies reeman xvalor Dios xanyabaa

¹ Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenë gajc naj diidx guia'xchej bén naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

² Loj hor zii gajc por xguialrniabee xSprijt Dios, chi gogbeen ma za'n xanyabaa yagaj bagaian tijb yagxhil zagdx zi'c xi yagxhil tijb rey, lojn zojb tijb bejn.

³ Abi' bén zojb loj yagxhil guin rulaaman bacha' zi'c ree guiaj zagdx ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdx ni la esmeralda.

⁴ Abi' gadëd ro' yagxhil guin baguian zagajlbitap ree yagxhil zagdx abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman.

⁵ Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios.

⁶ Baguia tëën delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloj reeb.

⁷ Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj.

⁸ Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,

lüj guial ca'l gra gualrniabee,

lüj guial najl Dios diidx guia'xchej në yan abi' gui'til.

⁹ Beegaj chi rlies ree be guin xvalor bén ni zojb loj yagxhil guin, bén naban tiblayaa, beegaj ruza't reeb laaman zagdx rudëëd reeb quixtëë lojman,

¹⁰ guigajlbitap ree bengol zojb yagaj, bazuxib reeman lojman, bén ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

¹¹ Dux Dad ree Dios, lüj rayal guiya'p respetj,

diidxza'c në gualrniabee.

Din lüj beenchaaw gra ni yu'

abi' lüj rëb guial chu' gra ni yu',

abi' yu' reen.

5

Tijb gui'ch ni nadüüb con bén naj zi'c xi xiil Dios

¹ Dxel baguian guial bén zojb loj yagxhil zagdx ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëë chu guixhial laan.

² Loj hor guin baguian tijb anjl bén gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

³ Per ni'qui xanyabaa, ni'qui loj guidxliuj, ni'qui lën liuj ad bidxejl't Bén ni rayal guixhial gui'ch guin, ni'qui par guguaaman ni ca loj gui'ch guin.

⁴ Abi' naj dád binan chi baguian guial achut rdxejl' guixhial loj gui'ch guin në par guguaaman ni ca loj gui'ch guin.

⁵ Dxel na tiyb ree bengol guin lon:

—Ad roonl, baguiaa nial ma yu' tiyb Bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman Bén naj zi'c tiyb beedx loj xdiaa Judá por guialrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdx ni naj zi'c xyagxhil tiyb rey, lod za' guidap ree be guin galay ree bengol ni riga' yagaj, za' tiyb Bén naj zi'c xi xiil Dios rguien xsen lod bidxeelgujdxaman chi gütaman. Abi' yu' gajdx xcaxchaman con gajdx guiaaloman, guigajdx guiaaloman naj guigajdx xSprijt Dios Bén rxhiaalaman guidib guidxliuj.

⁷ Bibig Bén naj zi'c xiil guin cwa'man gui'ch guin ladxaa Bén zobj loj yagxhil guin.

⁸ Chi cwa'man gui'ch guin, guidap ree be za' gajxh cwè' yagxhil guin në gra guigajlbitap ree bengol guin bazuxib reeman lojman. Tiyb gaj ree bengol guin ca' reeman tiyb gaj arp ca' tēē reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios.

⁹ Bengol guin ree rool reeman tiyb cant cüb ni rēb:

Lüj rayal tia' gui'ch guin
abi' guixhialil se ni naguiidnēn.

Din lüj gütjl

abi' con xrejn ni guxhie'l gudijxil
por graloj bejn din gac reeman xbejn Dios,
achet güünan xhietēēz diidx rniee reeman,
o xhie loj diaa, o xhie guiedx o xhie nacion zēēd reeman.

¹⁰ Beenl laa reeman rey
been tēēl laa reeman bixhioz par dux Dad ree Dios,
abi' laa reeman nabee loj guidxliuj.

¹¹ Baguia tēēn biguejn tēēn cha' zien ree anjl gadēd ro' yagxhil zagdx guin con guidap ree be guin në ree bengol guin. Abi' bénguixiujczi naj reeman por mül naj reeman.

¹² Abi' dád rejs rniee reeman rēb reeman:

Bén naj zi'c xi xiil Dios, Bén güt,
laaman rayal tia' guialrniabee,
laaman rayal gap guialnaza'c,
quiarguejn, në gojl,
respejt, guza't reeman laaman zagdx,
guilies tēē reeman xvaloraman.

¹³ Dxel biguejn cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rēb reen:

Bén zobj loj xyagxhil guialrniabee në Bén naj zi'c xi xiilaman,
par laa reeman naj
respejt, diidxza'c, guialrniabee,
abi' guilies reeman xvalor reeman
zianczi në par tiblayaa.

¹⁴ Chi gulox rēb reen zian, dxel guidap ree be za' yagaj rēb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, Bén ni naban zianczi në par tiblayaa.

6

Guigajdx ree se

¹ Dxel baguian biquied Bén naj zi'c xi xiil Dios se yaloy guin, abi' zi'c chi rbidxa' guziaaw zian biguejn gunee tiyb ree be guin, rēbib:

—jGuda!

² Dxel baguian gulentie tiyb way naquich, abi' Bén dxiib laab ca'man tiyb xi arcw flejch. Abi' cwa'man tiyb coron guial ma beenman gan, dxel briiman persi zigüeenman gan mazri.

³ Chi biquied Bén naj zi'c xi xiil Dios se barojp guin biguejn rēb be barojp guin:

—jGuda!

⁴ Dxel gulentie tijb way xnia, abi' bén dxiib laab ca'man tijb espad narooob në gualrniabee par gustijlaman bejn ree loj guidxliuj din gugüjt lasa' reeman.

⁵ Chi biquied bén naj zi'c xi xiiil Dios se bayon, biguiejnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr.

⁶ Abi' galay guidap ree be guin biguiejnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

⁷ Chi biquied bén naj zi'c xi xiiil Dios se badajp guin, biguiejnan rëb be badajp guin:

—jGuda!

⁸ Dxel baguian gulentie tijb way nagüiëch, abi' bén dxiib laab laman gualgüjt, abi' zinal gabijl laaman. Cwa' reeman gualrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por gualrriaan, o por gualguijdx, o por ree be doxh yu' loj guidxliuj.

⁹ Chi biquied bén naj zi'c xi xiiil Dios se bagaay guin, baguian xan altar za' ree xsprijt ree bén bagüjt reeman gual bililadx reeman guzujdx'i'ch tëë reeman loj xtiidx Dios.

¹⁰ Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjn zi'c rayal, ¿za plact gaglaal par güün xgualguxtisil con ree bén ni bagüjt dunujn loj guidxliuj din yaguijx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayüjn gajc ree sirv Dios.

¹² Chi baguian biquied bén naj zi'c xi xiiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëëw gojcan naxnia zi'c rejn,

¹³ Abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh.

¹⁴ Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen.

¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj.

¹⁶ Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zobj loj xyagxhil gualrniabee në loj xcasti bén naj zi'c xi xiiil Dios,

¹⁷ din ma bidxin dxej doxh ni gudëed reeman casti, abi', ¿chu zajc taan casti guin?

7

Tibgayuu tiuubitap mil ree bén Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëëz reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag.

² Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree gualrniabee par güün reeman ni güün reeman con guidxliuj në con nijsdoo,

³ rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dxel biguiejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj.

⁵ Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad.

⁶ Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés,

⁷ con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar,

⁸ chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

bénguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra

lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tēē reeman zijn.

¹⁰ Abi' rēb reeman rejs da't:

Dunujn raya'pan perdon por dux Dadan Dios

bén zobj loj xyagxhil gualrniabee

nē por bén naj zi'c xi xiilaman.

¹¹ Abi' gadēd ro' yagxhil guin con guidap ree be ni za' yagaj con guigajlbitap ree bengol, gadēd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt,

¹² rēb reeman:

¡Amén! gualrniabee, gojl,

gualrajc, respejt, diidxa'c,

gualrlies xvaloraman në quixtēē,

naj reen par dux Dad ree Dios zianczi në par tiblyaaa. Amén.

¹³ Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tēē ree bénan?

¹⁴ Badxi'nān rēn:

—Ad ragbeetan Dad, lūj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejñ bén naj zi'c xi xiil Dios.

¹⁵ Zeel za' reeman delant xi yagxhil Dios, abi' dxej guiaal cayūjn reeman sirv lod zobjaman. Abi' bén zobj loj yagxhil guin ma za'man con laa reeman, abi' laaman gap laa reeman.

¹⁶ Ad yu'tri dxej guiliaan reeman, ad ze'c tēēt reeman nijs, ad zudxū tēēt gubijdx laa reeman, ad zagnalaa tēēt reeman.

¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinēman laa reeman lod rajch nijs ni runee gualnaban. Dxel Dios laaman gutiaa loj reeman gra ree nijs brii loj reeman chi biin reeman.

8

Guigajdx se

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor.

² Dxel baguian gajdx ree anjl za' reeman delant loj Dios, cwa' reeman gajdx trompejt.

³ Dxel bi't stijb anjl con tijb chaabacwi ni or, guzuliman delant lo altar guin abi' yu' bén badēēd zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chē'pnē goxyaal guin xtiidx gra ree xbejn Dios, diidx ni rniece reeman chi rbejdx rniab reeman laaman.

⁴ Dxel diidz ladxaa anjl guin brii goxyaal guin con ree xtiidx ree xbejn Dios, diidx ni rniece reeman chi cabejdx canab reeman laaman, abi' wē'p reen niz loj Dios.

⁵ Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dād rejs guridxa' guziaaw, gojc naquie', wē'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl në rejñ. Dxel cost gurol guidxliuj we'c con ree yag në ree gui'xh naga' yu' lojn.

⁸ Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejñ loj hor guin.

⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban.

¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dād zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëw në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

¹³ La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—¡Prob, per prob, per probza ree bén ni yu' loj guidxliuj por zachoon trompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizé ni ad yu't lod rliox.

² Chi guxhalan ro' bizé guin tijb go'xh yo'xhchab brii lën bizëé guin zi'c chi ririi go'xh lën tijb horn narooob, xt bascajy go'xh guin gubijdx në bi.

³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb gualrni-abee par gac reeb bedoxh zi'cgajc nixüb.

⁴ Per gunabee reeman laa reeb chitëé xhie güün reeb guixya' ree, ni'qui ree yag, ni'qui ree gu'xh naga'. Naabzi ree bén ni ad yu't ree xse Dios lucwaj.

⁵ Per ad par gugüjtt reeb bejn, naabzi par sagdiaj reeman gaay bëëw. Abi' lod rudidxa' reeb riyajnan zi'c ryajn lod rudidxa' nixüb.

⁶ Lën ree dxejzii quuil ree bejn gualgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn.

⁸ Abi' guidxguijc reeb naj zi'c guidxguijc béngunaa, guiáad dxidlay reeb naj zi'c dxidlay beedx.

⁹ Guidib luxdoo reeb nada'cwan zi'c guuib, abi' xhiil reeb rüjnan naquie' zi'c rajc naquie' chi ruxüünné ree way carrejt loj wadijl.

¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw.

¹¹ Anjl ni rniabee bizé ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb ree ben ruloox.

¹² Zian rliox gualzi yalaj, dxel gui't zatio'p gualzi.

¹³ Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios.

¹⁴ Cha' bén biguiejnan rëbaman loj anjl baxo'p bén ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj.

¹⁶ Abi' biguiejnan bël naj xsuldad reeman bén dxiib ree way. Naj reeman tio'pgayuu millon.

¹⁷ Ze baguian way guin ree con ree bén dxiib laa reeb: Bén dxiib ree way guin, guidib luxdoo reeman nada'cw guuib color xnia, ni sul në ni naguiëch. Abi' guijc ree way guin naj ree ni'c guijc ree beedx, abi' ro' reeb ririi bajl, go'xh në azufre.

¹⁸ Abi' garol ree bénguidxliuj güjt por bajl guin, go'xh guin në azufre guin ni ririi ro' reeb.

¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guijc bëël.

²⁰ Per los demasri ree bén ni ad güjtt por ree gualzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct rigueijn ad rajc tëët rza reeman.

²¹ Ad bacwëëz tëët rugüjt reeman bejn ree, ad basa'n tëët reeman gualbidxaa, ad basa'n tëët reeman ni dxuudx ni rüjn reeman con bén ad najt lacheel reeman, ad basa'n tëët reeman gualgubaan.

10

Tijb anjl ca' gui'ch

¹ Dxel baguian stijb anjl bén gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool.

² Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj.

³ Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw.

⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb bën na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa,

⁶ abi' badëë xtiidxaman por bën naban tiblayaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac.

⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bën badëë xtiidx Dios loj ree bejn bën ni rünj ree sirv lojman.

⁸ Dxel zatijb gaj gunee bën ni guneenë naj diizd xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

⁹ Dxel wan lod za' anjl guin, rën lojman din gunee man librdo guin lon, dxel naman lon:

—Cwa'n gudawan. Ro'l guiatan nejhx zi'c dxijn, per lënl nala yaban.

¹⁰ Dxel cwa'n librdo guin ladxaa anjl guin, abi' gudawan. Ro'n biguiajtan nejhx zi'c dxijn, per chi gulox gudawan nala biguiajtan lënan.

¹¹ Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëëz diidx rniee reeman.

11

Tio'p ree testiw

¹ Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bën cayajp ree Dios respejt lën yadoo guin.

² Per ad tia'beel lule' yadoo guin din lule' guin ma badëë Diosan loj ree bën ad najt ree bën Israel, laa reeman naj bën gusagdiaj ree bën Jerusalén loj choon ijz garol.

³ Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guiniee da diidxan choon ijz garol.

⁴ Grop ree bën guin naj grop ree yag olivo në grop ree candler ni za' loj dux Dad ree Dios bën rniabee loj guidxliuj.

⁵ Bal chu bën rën güünnë laa reeman xhienin, ro' reeman grii bajl din gugüjt reeman bën rdxc'ch ree laa reeman. Zian guiët ree bën rën güün laa reeman xhienin.

⁶ Grop ree bën guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guiniee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëëz volt rën reeman.

⁷ Per chi ma bayaaloj tiamp ni guiniee reeman da diidxan, dxel tijb monstuo, tijb be dohx grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman.

⁸ Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüjz, luguiedx ni naj yan zi'cgajc Sodoma në Egipto.

⁹ Dxel graloj ree bejn bën rniee ree gadxagayaa diidx, bën gralad ree, bën za graloj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin.

¹⁰ Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman.

¹¹ Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman.

¹² Dxel dád rejs biguian cha' tijb bën ni gunee xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxc'ch laa reeman.

¹³ Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiáad gra ree bën ad güjtt dád bidxeb reeman abi' gules reeman xvalor Dios bën yu' xanyabaa.

¹⁴ Zian rliox guialzi rarojp, dxel laa zëëd gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguian cha' ree bejn xanyabaa rëb reeman:

Ma bidxin dxej yaya'n gra xguialrniabee

guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

¹⁶ Guigajbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt,

¹⁷ rëb reeman:

Dux Dadan Dios, lüj rajp gra guialrniabee

abi' najl Dios yan në diïzd gocli abi' gui'til.

Quixtéë lüj guial ma culüü xguialrniabee naroo bil ni rajpil

abi' ma guzulojl canabeel.

¹⁸ Bénguidxliuj ree bidxe'ch reeman,

per ma bidxin dxej gulüü xguialrdxe'chil.

Ma bidxin dxej güün xguialguxtisil con ree bengüt

par gudëël ni rayal tia' ree xbejn!

bén badëéd ree xtiïdxil, në ree bén bililadx lüj.

Në ree bén rajp lüj respejt.

Ma bidxin dxej zi'c ree benzojb loj në ree bén ad zojb lojt tia' reeman ni rayal reeman,

dxel guididlojl Bén ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diïzd gocli. Dxel guzuloj rë'p nijs, rajc naquie', rëöz guziaaw, bi't xudo'xh abi' dád zro' bïajb guiajyabaa.

12

Tijb béngunaa në tijb dragon

¹ Dxel gojc tijb sen ro' xanyabaa. Balüü loj tijb béngunaa nadüübaman gubijdx, abi' nuzuj guia'man loj bëw abi' guijcaman yu' coron ni gocchaaw con chiptio'p bajl xanyabaa.

² Yu' xi'n béngunaa guin abi' rbixdiajman ragnaa lënman guial ma gal xi'nman.

³ Per gojc stïjb sen xanyabaa. Balüü loj tijb dragon ro', tijb bedoxh najb culor xnia. Yu' gajdx gujquib, chü xcajchib yu' tée tijb coron tijb gaj gujquib.

⁴ Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix.

⁵ Gojl xi'n béngunaa guin tijb xindo nigüiaaw, abi' laax nabee loj guidxliuj con tijb var guiib. Dxel biquied reeman laax loj xniaax, bidxinx lod zojb Dios lod canabeeman.

⁶ Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudëéd reeman ni gawaman choon izj garol.

⁷ Dxel guyu wadijl xanyabaa, anjl ni la Miguel con ree xi anjlaman gudijlnë reeman dragon guin con ree xi anjlib.

⁸ Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib.

⁹ Zïanan zeel bazaal reeman dragon guin loj guidxliuj con ree xi anjlib. Dragon guin naj bëël gulal ni la xindxab në satanás xin rusquiee gra ree bénguidxliuj.

¹⁰ Dxel biguien cha' tijb bejn rejs da't diïzd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenëman Jesucrist, din ma biquied bén rbe'c xguialquia ree dux compniar ree, bén rdxinnë ree guialquia guin loj dux Dad ree Dios dxej guiaal.

¹¹ Abi' dux compniar ree been reeman gan por rejn ni guxhie' bén naj zi'c xi xiil Dios në por ni rëb reeman xhïenaag rliladx reeman xtiïdx Dios, ad bidxebt reeman majsi niëjt reeman.

¹² Zeel gol badxe' luxdoodi nix gra ree bén zojb xanyabaa per, jproba lëjt bén zojb ree loj guidxliuj në ree be yu' loj nijsdoo! Din ma bigüajt xindxab lod zojbidi, dád rdxe'chix guial ragbeex sta'nz dxej raya'n par laax.

¹³ Chi baguiaa dragon guin guial ma bïajbib guidxliuj, dxel briinalib béngunaa naj xniaa xindo guin.

¹⁴ Dxel badëë reeman tio'p xiil béngunaa guin zi'c xiil bisiaro' din gac suman loj bëël guin xt lod naj ganax yujbidx, lod gudëéd reeman ni gawaman choon izj garol.

¹⁵ Abi' gulëë ro' dragon guin tijb guiiw nijs din chinën béngunaa guin.

¹⁶ Per bixal loj guidxliuj persi gu'n guibidx nijs gulëë ro' dragon guin. Zian been guidxliuj béngunaa guin yudar.

¹⁷ Dxel dád bidxe'ch dragon guin béngunaa guin, abi' zitilnëb sta'n ree bén ni za loj xdiaaman, bén ruzoob ree xtiïdx Dios zinal tëë reeman xtiïdx Jesucrist.

13

Tio'p ree bedoxh

¹ Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguidx Dios.

² Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstroo guin xluarib lod rniabeeb abi' gualrniabeero' ca'b par nabeeb.

³ Tijb guijc monstroo guin baguian tijb lod nadxeelguidx ni rulüü ad zusbajnt laab, per bayajc lod nadxeelguidx guin abi' gra ree bénguidxliuj badxaloj abi' binal reeman monstroo guin.

⁴ Dxel gojp da't reeman respejt dragon guin guial badëëdib gualrniabee loj monstroo guin gojp da't tëë reeman respejt monstroo guin, rëb reeman:

—¿Chu naj zi'c monstroo guin abi' chu zajc til con laab?

⁵ Monstroo guin gojccaaw ro'b par guilies xvalor gajquib, abi' guinieeguidxib Dios, gojpij gualrniabee par güünb zian loj choon ijz garol.

⁶ Abi' guneeguidxib Dios, guneeb diidxmal ree por laaman, por xyadooman në por gra ree bën zobj xanyabaa.

⁷ Gojp monstroo guin permis par sub contr ree xbejn Dios abi' güünb laa reeman gan. Abi' gojpij gualrniabee par nabeeb graloj ree bejn, bën ni rniee ree gadxagayaa diidx, bën gra lad ree, gra ree nacion.

⁸ Gra ree bën ad cat laj loj xlibr guialnaban diidx chi gad guidxliuj gacchaaw, loj xlibr bën naj zi'c xi xil Dios bën güt por ree bejn, gra reeman gap da't respejt monstroo guin.

⁹ Bën rën ree gucaagdiajg, gol bacaagdiajg.

¹⁰ Bën naj che ladxguib, cheman ladxguib. Bën naj guiët con espad, con espad guiëtaman. Zeel bën naj ree xbejn Dios ad yadxaguidi ad gucwëëz tëë chililadxidi Dios.

¹¹ Dxel baguian stijb monstroo ren briib loj guidxliuj, yu' tio'p xcajchib zi'c xcajch xil, per cha'b naj zi'c cha' dragon.

¹² Abi' lasa'gajc gualrniabee ca' monstroo ni brii loj nijsdoo lasa'gajcan ca'b abi' por laab gojp da't ree bejn respejt monstroo ni brii loj nijsdoo, monstroo ni bayajc lod nadxeelguidx ni rulüücü gugüjt laab.

¹³ Abi' monstroo ni brii loj guidxliuj në gajquib rünj milagr narooob ree, xt rajc rniabeeb rguiajt bajl diidx xanyabaa xt loj guidxliuj delant loj ree bejn.

¹⁴ Zian rusqueeb bénguidxliuj ree por ree milagr ni rünb delant loj monstroo ni brii loj nijsdoo, abi' rniabeeb rünj ree bénguidxliuj tijb xfigur monstroo ni brii loj nijsdoo, monstroo ni bidxeelguidx con espad abi' gubajnb.

¹⁵ Abi' monstroo ni brii loj guidxliuj xt gojpij gualrniabee par gudëëdib guialnaban loj xfigur monstroo ni brii loj nijsdoo, par guiniee figur guin në par gugüjtib gra ree bën ni ad rajpt respejt figur guin.

¹⁶ Gunabee tëë monstroo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bénpob, bën naj ree zi'c bën nado' në ree bën ad najt zi'c bën nado', ðin chu' sen yaa reeman ladbee o lucwaj reeman.

¹⁷ Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbrib.

¹⁸ Guie ryaadx guialrignia'. Bën rajp guialrignia' cwëë xcwentaman con xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

14

Cant ni biil tibgayuu tiuubitap mil ree bejn

¹ Baguia tëën guial za' bën naj zi'c xi xil Dios guijc dajn ni la Sión. Bën naj zi'c xi xil Dios za'man con tibgayuu tiuubitap mil ree bejn, graczi reeman ca lucwaj reeman laj bën naj zi'c xi xil Dios në laj xDadaman.

² Abi' biguejnan tijb naquie' xanyabaa zi'c naquie' rünj zil da't nijs, o zi'c rguien rbidxa' guziaaaw rejs da't, o zi'c chi rusijdx zien ree bejn arp.

³ Dxel rool reeman tijb cant cüb delant loj yagxhül lod zobj bën rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bën tibgayuu tiuubitap mil guin, laa reeman naj bën gulaa loj ree bénguidxliuj.

⁴ Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman bën naj zi'c xi xil Dios bantëëz guin rejman. Laa reeman naj ree bën gulaa loj ree bénguidxliuj abi' zi'c guialnaza'c yaloj ni rinë bejn loj Dios zian naj reeman delant loj Dios në delant loj bën naj zi'c xi xil Dios.

⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblyaa par gugoynman gra ree bén naban loj guidxliuj, xhietëëz diidx rniee reeman, o xhietëëz loj diaa zëëd reeman, o xhietëëz ciuda o nacion zëëd reeman.

⁷ Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëëd ree bejn cwent lojman. Gol goj da't respejt bén been xanyabaa, guidxliuj në nijsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda naroob guin gra ree bénguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstroo guin respejt con xfigurib abi' tiëbaman tia xsenb lucwajman o yaaman,

¹⁰ bén zii yayal xcasti naroob Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bén naj zi'c xi xiil Dios.

¹¹ Ad yu' tëët dxej yayü' bajl guin. Ni'qui radxe ni'qui guiaal achet guialraziiladx par ree bén rajp da't respejt monstroo guin con xfigurib, o bén ca ree xsenb.

¹² Zeel bén naj ree xbejn Dios bén ruzoob ree xtiidxaman abi' rliiladx reeman Jesucrist, ad rayalt yalenyá' reeman.

¹³ Biguiejn tëën cha' bén ni na lon diidx xanyabaa:

—Bacaa ni ganin lojl: “Diidx yan xiquilbaa ree bén rëjt con guialrliiladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

Guialnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'.

¹⁵ Dxel brier stijb anjl lën yadoo abi' rejs da't guneeaman bén ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bén zojb loj zaj guin badëëd xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brier stijb anjl lën yadoo ni naj xanyabaa, ca' gajcaman tijb hoz ni nadoxh ro'.

¹⁸ Dxel niz loj altar brier stijb anjl bén rajp guialrniabee par bajl, abi' dád rejs guneeënman bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëëd anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios.

²⁰ Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15*Bén naj ree xi anjl Dios con guigajdx ree guialzi*

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

² Baguia tëën zi'c nijsdoo, per najn zi'c tijb vidr xculor bajl. Dxel lojn za' ree bén been ree gan loj monstroo, loj figur con loj xnumbrib, ca' reeman arp ni badëëd Dios loj reeman.

³ Abi' cayool reeman xcant Moisejs xbejn Dios në xcant bén ni naj zi'c xi xiil Dios, rëb cant guin:

Naroob në ni diidxli radxaloj bejn

naj ree ni rüjnl, dux Dadan Dios Bén rajp gra guialrniabee.

Xnejz da't në zi'c rayal rüjnl,

lÿj guial rniabeel gra ree bénguidxliuj.

⁴ ¿Chu ad zadxebt lÿj?

¿Chu ad zuza'tt lÿj zagdx, dux Dadan Dios?

Tijbzi lÿj naj bén naya nali

abi' bénguidxliuj gui't gap da't reeman lÿj respejt

guial ma balüül bejn ree guial xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa.

⁶ Abi' lën yadoo guin brii gajdx ree anjl bén ca' ree gajdx ree guialzi, najcw reeman laj naquich ni rdün bacha', abi' naxii tijb cinch or luxdoo reeman.

⁷ Abi' tijb guidap ree be ni za' lod za' Dios, badëëb loj tijbgaj ree anjl guin tijb cojp or ni guidxa xcasti Dios bén naban guidib tiamp në par tiblyaa.

⁸ Abi' lën yadoo guin gudxan xgo'xh xbacha' Dios në xguialrniabeeman. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

16

Cojp ni guidxa ree xcasti Dios

¹ Dxel biguiejnan cha' bejn rejs da't guneeman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojpaman loj guidxliuj. Abi' gra ree bén ni yu' xsen montruo guin bén gop da't ree respejt xfigurib, brii guiadxoodx lad reeman, ni rdoob da't.

³ Abi' anjl barojp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojpaman loj ree guiiw në lod rajch ree nijs abi' nijs guin ree bayajc reen rejn.

⁵ Abi' biguiejnan rëb anjl ni rniabee ree nijs guin:

—Xnejz naj ni cayüjn në zi'c cayüjn xguialguxtilsil, Dad Dios, lüj naj bén naya nali, najl Dios yan në diizd gocli.

⁶ Dîn bénguidxliuj ree guxhie' reeman rejn bagüjt reeman xbejn reel në ree bén badëëd ree xtiidxil. Zeel ma badëëdil rejn guië' reeman, abi' zian rayal reeman.

⁷ Abi' niz loj altar biguiejnan cha' stijb bén rëb:

—Walican, Dad Dios bén rajp gra guialrniabee. Xnejz në zi'c rayal cayüjn xguialguxtilsil.

⁸ Abi' anjl badajp guin bala't ni yu' loj xcojpaman loj gubijdx dîn guze'can bejn ree zi'c bajl.

⁹ Gra reeman we'c por xguialnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdxë guneeguidxli reeman laaman, laaman guial najman bén rniabee ree guialzi guin.

¹⁰ Anjl bagaay guin bala'taman ni yu' loj xcojpaman lod rbej monstuo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman.

¹¹ Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guiadx ni gudxib lad reeman, guneeguidx reeman Dios bén zojb xanyabaa.

¹² Anjl baxo'p guin bala't ni yu' loj xcojpaman loj guiiwro' la Eufrates abi' gubidx nijs loj guiiw guin. Zian bixal nejz dîn téd ree rey bén zëëd ree lad lod rliejn gubijdx.

¹³ Dxel baguian ro' dragon guin, con ro' monstuo guin në ro' bén rusquiee rëb rudëë xtiidx Dios loj ree bejn brii choon ree sprijt mal ni naj zi'c bidx.

¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman dîn til reeman con Dios bén rajp gra guialrniabee, dxëj ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guijc guial dxëjczy guialan zi'c chi ri't tijb xingubaan tijbzi golp. Xiquilbaa ree bén rbëz naj, bén za'sin ree chi guialan dîn chitëë yaya'nxtu reeman zi'c chi rniaaz bén za' zibëël.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojpaman loj bi, abi' diizd lën yadoo ni yu' xanyabaa niz lod za' xyagxhül bén rniabee, biguieen rejs da't cha' bén rëb:

—Ma bayaaloy gojc ni rayal gac.

¹⁸ Abi' guzuloy rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloy yu' bejn loj guidxliuj, dîn xu guin naj ni mazczy ni doxh.

¹⁹ Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëë xcasti ro'man loj ciuda narooob guin.

²⁰ Abi' gunijt ree gra yuj riga' loj nijsdoo në ree guia'.

²¹ Biajb tée guaijyabaa guijc ree gra ree bénguidxliuj, dxel tijbgaj ree guaij yabaa guin na' reen cost tiuu quil. Abi' ree bejn guneeguidx reeman Dios, por ree gualzi guin, gual dád ni doxh gojc chi biajb ree guaijyabaa guin.

17

Guialguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro',

² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios biné anjl guin naj lod naj ganax yujbidx. Ni baguian tijb béngunaa dxiibaman tijb monstroo xnia, abi' guidib ladib ca diidxguijdx par Dios, yu' gajdx guijquib con chii xcajchib.

⁴ Abi' béngunaa guin najcwaman lajd murad në ni xnia, najcchaawnën ganax or në ree guaij zagdxë në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman.

⁵ Abi' lucwajman ca tijb letrer ni achutczi rignia' ni rën guiëban, rëb loj letrer guin: “Babilonia, ciuda narooob ni naj xniaa ree béngunaa dxuudx në xniaa ree ni dxuudx ni rajc loj guidxliuj,”

⁶ Dxel gogbeen gual rzüdx béngunaa guin con xrejn ree xbejn Dios, con xrejn ree bën ni güit gual gunee reeman xtiidx Jesús. Abi' dád badxalon chi baguian zian.

⁷ Dxel na anjl guin lon:

—¿Chexc zeel dád radxalolj? Naj gusignia' lüj ni rën guiëb béngunaa ni baguiaal në monstroo ni dxiibaman, be ni yu' gajdx guijc con chii xcajch.

⁸ Monstroo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rlixo dxelri nidlojb tiblyaaa. Abi' ree bën naban loj guidxliuj, bën ni ad cat ree laj loj xlibr guialnaban diidx gocli chi gad guidxliuj gacchaaw, laa reeman yadxaloj chi guguiaa reeman monstroo ni guban gocli, be ad nabant yan per gui'tib.

⁹ Guie ryaadx quiarguejn. Guigajdx guijc monstroo guin rën guiëban gajdx guia' lod zojb béngunaa guin

¹⁰ rën tée guiëban gajdx ree rey. Gaay ree rey guin ma gudëed xgualrniabee, abi' bën baxo'p guin naj bën canabee yan. Dxelri nabee bën bagajdx guin, per ad xchejt nabeeman.

¹¹ Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblyaaa.

¹² Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstroo guin.

¹³ Abi' guidxii ree rey guin yaya'n reeman diidx abi' yayü xgualguxtis reeman con xgualrniabee reeman loj monstroo guin,

¹⁴ abi' til reeman con bën naj zi'c xi xiil Dios. Per güün bën naj zi'c xiil guin laa reeman gan din laaman naj Dad loj gra ree dad, naj tēeman rey loj gra ree rey. Abi' bën za' ree con bën naj zi'c xi xiil Dios, laa reeman naj bën bazoob xtiidx Dios, bën ma naj ree par laaman abi' diidxli zinal reeman xnejz Dios.

¹⁵ Na tée anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree bën rniee graloj ree diidx, bën gra lad ree, bën zëed ree gra loj ree nacion.

¹⁶ Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëëlamán, gaw reeman xbëëlamán abi' guze'c reeman laaman.

¹⁷ Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xgualrniabee reeman loj monstroo guin, xt gac cumplid ni rëb Dios gac.

¹⁸ Abi' béngunaa ni baguiaal, laaman naj ciuda narooob ni rniabee ree rey yu' loj guidxliuj.

18

Biajb guidx Babilonia

¹ Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' gualrniabee, abi' xbacha'man basni guidib guidxliuj,

² abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn.

³ Din zi'c chi rusüdx bejn stıjb bejn, zian ma batiaalguiiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel biguejnan cha' stıjb bén gunee diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tédidi guialzi ni gac ree loj ciuda guin.

⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree.

⁶ Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree.

⁷ Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.”

⁸ Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din narooob xguialrniabee dux Dad ree Dios bén gudëëd casti ciuda guin.

⁹ Abi' ree rey ni yu' loj guidxliuj, bén babaa ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can.

¹⁰ Abi' zijt su reeman chi guguaa reeman casti ni cadëdan, dxel guiëb reeman:

—jProba lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

¹¹ Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman,

¹² zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronze, guiib con marmol në marfil.

¹³ Ad zajc tëëtri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrejt, ad zajc tëëtri ree guto' reeman bejn ree.

¹⁴ Abi' guiëb reeman loj ciuda guin:

—jAd rajp tril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

¹⁵ Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman.

¹⁶ Abi' guiëb reeman:

—jProba, probza ciuda narooob guin! Laan guial guzujchaawan con ree lajd zagdxe, lajd culor murad con ni xnia, laan guial guzujchaawan con or, con perl në con guiaj zagdxe

¹⁷ din, jtibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt

¹⁸ chi baguaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

¹⁹ Abi' barooob yuj guijc reeman, roon reeman abi' guyunaya luxdoo reeman rëb reeman:

—jProba!, probza ciuda narooob guin por xguialnaza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

²⁰ Dxel biguien cha' bén na:

—Per lëjt bén zobj ree xanyabaa, lëjt najdi xi apóstoles Jesucrist, lëjt bén rudëëd ree xtiidx Dios në los demazri ree bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

²¹ Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stıjb.

²² Ad zagüentri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zagüentri loj ciuda guin. Achutri bejn güün dxiin ni, ni'qui xnaquie' mulin ad zagüentri ni.

²³ Achetri guij che'c loj ciuda guin, achutri guxhliaa. Gra ree bén been negojs loj ciuda guin ganax bén zobjloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman bén badëed ree xtiidx Dios, në ree bén rliadx Dios, abi' por ciuda guin bagüjt reeman los demasri ree bén ma güjt loj guidxliuj.

19

¹ Chi gulox baguian biguiejn tëen zian, dxel dád rejs biguiejnan cha' zien da't ree bén canee xanyabaa rëb reeman:

¡Quixtëe Dios! Por dux Dad ree Dios

zëed perdon, respejt në gualrniabee,

² din laaman waliman abi' xnejz rüjn xgualguxtisaman,

ma badëedaman casti béngunaa dxuudx ni bazaalguiw

bénguidxliuj ree con ree xni malaman,

ma been Dios gualguxtis con laaman persi baguijxaman ni bagüjtaman xbejnman.

³ Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni caye'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxa'c guin ree naj par laaman!

⁵ Abi' niz lod za' yagxhil guin biguiejnan cha' bén rëb:

Gradi zi'c bengol zi'c xindoo

gol gules xvalor dux Dad ree Dios,

lëjt rüjndi laaman sirv abi' rajpidi laaman respejt.

Xgualbruxhliaa bén naj zi'c xi xiil Dios

⁶ Biguiejn tëen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëe Dios! Din ma canabee dux Dad ree Dios,

bén ca' gra gualrniabee.

⁷ Yan yadxé' du luxdoo ree zagdxé, yabaa ree yales tëë ree xvaloraman.

Din ma bidxin dxej guxhliaa bén naj zi'c xi xiilaman

abi' bén gac lacheelaman ma za'chaawaman.

⁸ Najcwaman lajd zagdxé, ni naquich, naya rulaa tëen bacha'.

Din lajd naquich guin rën guiëban ni zagdxé ni been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xgualbruxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bén wali ree rüjncwent xtiidx Jesucrist. Gojp da't respejt Dios.

Din por Jesús zëed ni rníee ree bén rudëed xtiidx Dios.

Bén dxiib tijb way naquich

¹¹ Dxel baguian zobjyal xanyabaa baguia tëen tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xgualguxtisaman në xwadijlaman,

¹² guiaalojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban,

¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxé ni naquich ni naya tëë.

¹⁵ Ro'man ririi tijb espad ni nadoxh ro', con espad guin gudëedaman casti bénguidxliuj, në con var guuib nabeeman laa reeman. Zi'c rë'p bejn guijc uv par guixiin, zian gudëedaman loj reeman casti narooob ni zëed por Dios bén rajp gra gualrniabee.

¹⁶ Loj xcajpaman con cüdaman ca ree diidx ni rëb: “Rey bén rniabee loj ree rey në Dad bén rniabee loj ree dad.”

¹⁷ Dxel baguian tijb anjl za'liman loj gubijdx, dád rejs rbidxa'man, rbejdxaman gra ree be ni rzuj xanyabaa, rebaman:

—Gol guda, gol bachajg lasa'di lod gunee Dios ni gawidi zro' da't,

¹⁸ zi'c xbëël ree rey, xbëël ree capitán, xbëël ree bén achut rüjn gan, zi'c xbëël ree way, xbëël ree bén rbib laa reeb, xbëël gra ree bejn, zi'c xbëël ree bén naj zi'c bén nado' në xbëël ree bén ad najt zi'c bén nado', zi'c xi bëël ree bengol në ree xindoo.

¹⁹ Dxel baguian monstuo con ree rey yu' loj guidxliuj në ree xsuldad reeman, nadxag lasa' reeman par til reeman con bén dxiib way naquich guin con ree xsuldadaman.

²⁰ Per laa reeman gunaaaz reeman monstroo guin con bén rusquiee rëb rudëë xtiidx Dios loj ree bejn, bén rün milagr niz loj monstroo guin. Abi' por ree milagr guin basquieeman bén guyu ree xsen monstroo guin gojp tēë reeman respejt xfigurib. Abi' monstroo guin con bén rusquiee ni rëb rudëë xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre.

²¹ Abi' los demazri ree xbejn monstroo guin güjt reeman con espad ni ririi ro' bén dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëël reeman.

20

Ti mil ijz

¹ Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tēëman tijb caden narooob.

² Abi' gunaaazaman dragon, bëël gulal ni la xindxab nē satanás, guxhiiman laab con caden guin por timil ijz.

³ Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëë gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

⁴ Dxel baguian yagxhil zagdxë ree lasa' xyagxhil ree rey, lojn zojb ree bén ni ma cwa' guialrniabee par güün reeman guialguxtis. Baguia tēën xsprijt ree bén ni biru' yëjn guial gutie'ch reeman xtiidx Dios nē gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz.

⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz.

⁶ ¡Xiquilbaa ree bén yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

⁷ Chi ma bayaaloj timil ijz guin, dxel yarii xindxab guin lod nayaawix

⁸ Par gusquieex bejn ree guidib guidxliuj. Gusquieex Gog nē Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo.

⁹ Gra lad gui't reeman, guido'p reeman gadëd lod za' ree xbejn Dios nē gadëd ro' guiedx lod rënman. Per laaman diizd xanyabaa guixhiaalaman bajl ni guze'c bén guin ree xt yadëj reeman.

¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con bén rusquiee rëb rudëë xtiidx Dios loj ree bejn, lod ad yu't dxej yarii reeman lod sagdiaj tēë reeman dxej guiaal.

Yadëëd ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj nē xanyabaa, gunidloj reen tiblaxaa.

¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman.

¹³ Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëëd reeman cwent loj Dios, bibig reeman yagaj din güün xguialguxtis Dios con laa reeman bal conin been reeman.

¹⁴ Dxel guialgüjt con lod guzu ree bengüt gulëz reeman guidxin dxej yadëëd reeman cwent loj Dios, grop reen bazaal reeman loj bajl, bajl guin naj guialgüjt barojp.

¹⁵ Abi' loj gajc bajl guin bayal ree bén ad cat laj loj xlibr guialnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo.

² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhliiam con xin gac lacheelim.

³ Abi' dád rejs biguiejnan cha' bén gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiaad laaman suman con laa reeman abi' gacaman xDios reeman.

⁴ Laaman gutiaa loj reeman nijs biin reeman, dxel achetri guialgüjt chu', guialroon, guialrunaya në guialzi, din gra ree ni guyu gocli ma gudëd reen.

⁵ Abi' bën zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidz guia'xchej në par tiblayaa. Bén re'c nijs, naj yazaladx nijs lojman nijs ni ririi lod rajch nijs ni runee guialnaban.

⁷ Bén ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nan.

⁸ Per ree bën rdxeb sudxi'ch loj ni rililadx reeman naj, bën ad rililadxt ree naj, bën ruladx ree güün ganax ni mal, bën rugüjt ree bejn, bën rüjn ree nidxuudx con ree bën ad najt lacheel reeman, bën rüjn ree guialbidxaa, bën rën ree ni naladx reeman naj ree Dios, në gra ree bën rusquiee, laa reeman rayal loj bajl lod caye'c azufre, bajl guin naj guialgüjt rarojp.

Jerusalén cüb

⁹ Dxel tijb guigajdx ree anjl bën ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bën naj zi'c xi xiil Dios.

¹⁰ Abi' por Sprijt binë anjl guin naj guic tijb guia' narooob, guic tijb guia' ya. Ni balüüman naj Jerusalén, xcüda narooob Dios zidguiajtan xi xanyabaa Dios.

¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdxe ni la Jaspe, nayni zi'c tijb vidr.

¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bën Israel, tijb gaj lad port guin ca zi'c la tibcwaa gaj reeman.

¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur.

¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bën naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan.

¹⁷ Dxel cwa'man midid ze' guin, abi' ze' guin najn gayojnbitap mejtr zi'c naj xmidid bënguidxliuj zi'c bare'xh anjl guinan.

¹⁸ Ze' guin gojcnë guiaj ni la Jaspe, abi' ciuda guin najnë ganax or, zi'cgajczi naj vidr nayni.

¹⁹ Xguiaj cimiant ze' guin najcchaawnë gadxagayaa ree guiaj zagdxe. Guiaj yaløj guin najcchaawnë con guiaj ni la Jaspe, guiaj barojp guin najcchaawnë guiaj ni la zafiro, guiaj bayon guin najcchaawnë guiaj ni la ágata, guiaj badajp guin najcchaawnë guiaj ni la esmeralda,

²⁰ Guiaj ni bagaay guin najcchaawnë guiaj ni la ónice, guiaj ni baxo'p guin najcchaawnë guiaj ni la cornalina, guiaj bagajdx guin najcchaawnë guiaj ni la crisólito, guiaj goc xhujn najcchaawnë con guiaj ni la berilo, guiaj goc gaa najcchaawnë guiaj ni la topacio, guiaj ni goc chüi najcchaawnë guiaj ni la crisoprasa, guiaj ni goc chiptib najcchaawnë guiaj ni la jacinto, guiaj ni goc chiptio'p najcchaawnë guiaj ni la amatista.

²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop sijch.

²² Ni'qui tijb yadoo ad baguatan loj ciuda guin din dux Dad ree Dios bën ca' gra guialrniabee con bën naj zi'c xi xiilaman, laa reeman naj xyadoo ciuda guin.

²³ Abi' loj ciuda guin ad rüjnt nagueijn gusni gubijdx ni'qui bëëw, din xbacha' Dios rusni ni abi' bën naj zi'c xi xiilaman laaman naj bajl ni.

²⁴ Bén zëëd ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin.

²⁵ Xport ciuda guin ad yu't dxej yaaw reen radxe, abi' ni ad zut guiaal.

²⁶ Gra xgualza'cdxoon con gra xgualzagdxee ree bén zëed lood rent lood ren, guidxjn reen loj ciuda guin.

²⁷ Per ad yu't dxej chu' ni dxuudx loj ciuda guin, ni'qui ree bén rüjn ni dxuudx ni'qui ree bén rusquiee, bén cazí ree laj loj xlibr guialnaban ni ca' bén naj zi'c xi xiil Dios, laaz reeman chu' loj ciuda guin.

22

¹ Balüü tée anjl guin lon tijb guiiv naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bén naj zi'c xi xiilaman,

² abi' zën galay loj nejz narooob ni naa galay ciuda guin. Galay nejz guin naa guiiv guin, abi' grop lad guiiv guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan.

³ Achetri ni mal chu' ni, abi' Dios con bén naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt.

⁴ Abi' ni guguaalaj reeman Dios, bén ni ca ree lajman lucwaj.

⁵ Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabebe reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bén razaladx diidx loj ree bén rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac.

⁷ Dad Jesucrist rëb guial nayob gui'taman.

¡Xiquilbaa ree bén ridxga' ni ca loj libr guie ni rugojn ni gac!

⁸ Naj Waj, baguian biguejñ tēen ni guin ree. Abi' chi gulox baguian biguejñ tēen ni guin ree, dxel bazuxiban par ga'p da'tan respejt anjl ni balüü ree ni guin lon.

⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bén rudëed ree xtiidx Dios, nē ree bén ridxga' ree ni ca loj libr guie. Zeel Dios gojp da't respejt.

¹⁰ Na tēeman lon:

—Ad guie'chil diidx ni zëed ree loj libr guie, diidx ni rugojn ree ni gac, din ma zidyob gac reen.

¹¹ Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rēn Dios gusnuu guiban reeman zi'c rēn Dios.

¹² Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman.

¹³ Naj naj zi'c lejtr A con lejtr Z, lejtr ni rzulojnē ni rlioxnē tēe alfabeto, din tijbzi naj rniabee diizd guia'xchej nē par tiblayaa.

¹⁴ Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tēe reeman derejch gaw reeman ni nejxh ni rtia loj yag runee guialnaban.

¹⁵ Abi' xijch ciuda guin yaya'n ree benguijdx, bén rüjn ree guialbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni naladx reeman naj dios, nē ree bén ruladx cwëëguijc ni rusquiee rniece tēe reeman diidx rusquiee ree.

¹⁶ —Naj Jesús ma guxhal da anjlan din gugojnman lējt gra ree ni guie din guiëbidi laan loj gra ree bén rililadx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

¹⁷ XSprijt Dios con biinxdüb ni gac lacheel bén naj zi'c xi xiil Dios rëb reeman:

—Guda.

Abi' bén riguejñ rniece reeman zian, rëb gajcaman:

—Guda.

Chutëez bén re'c nijs, gol guda, abi' bén rēn zajc guië'man nijs runee guialnaban lagajzi.

¹⁸ Gra ree bén riguejñ ree diidx ni zëed loj libr guie ni gac, naj rni lojdi bal chu bén gucaa guijc ni zëed loj libr guie, ziangajc zusro' Dios guialzi ni zëed loj libr guie par laaman.

¹⁹ Ziangajc bal chu chiquied xhie diidx guijc ree diidx ni zëed loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tētaman loj xciuda Dios ni ruza't libr guie.

²⁰ Bén ragbee guial diidxli naj gra ree ni guie, rëbaman:

—Walin, nayob guialan.

Zian gacan Dad Jesús, ¡Guda!

²¹ Dad Jesús güünle' gradi. Amén.